

全 唐 诗

(第十三部)

· 全唐诗 ·

第四百六十一卷

卷 461_1 【窗中列远岫】

白居易

天静秋山好，窗开晓翠通。遥怜峰窈窕，不隔竹朦胧。
万点当虚室，千重叠远空。列檐攒秀气，缘隙助清风。
碧爱新晴后，明宜反照中。宣城郡斋在，望与古时同。

卷 461_2 【玉水记方流】

白居易

良璞含章久，寒泉彻底幽。矩浮光滟滟，方折浪悠悠。
凌乱波纹异，萦回水性柔。似风摇浅濑，疑月落清流。
潜颖应傍达，藏真岂上浮。玉人如不见，沦弃即千秋。

卷 461_3 【大社观献捷诗】

白居易

· 全唐诗 ·

淮海妖氛灭，乾坤嘉气通。班师郊社内，操袂凯歌中。
庙算无遗策，天兵不战功。小臣同鸟兽，率舞向皇风。

卷 461_4 【自诲】

白居易

乐天乐天，来与汝言。汝宜拳拳，终身行焉。物有万类，
铤人如锁。事有万感，熬人如火。万类递来，锁汝形骸。
使汝未老，形枯如柴。万感递至，火汝心怀。使汝未死，
心化为灰。乐天乐天，可不大哀，汝胡不怨往而念来。
人生百岁七十稀，设使与汝七十期。汝今年已四十四，
却后二十六年能几时。汝不思二十五年来事，
疾速倏忽如一寐。往日来日皆瞥然，胡为自苦于其间。
乐天乐天，可不大哀。而今而后，汝宜饥而食，渴而饮；
昼而兴，夜而寝；无浪喜，无妄忧；病则卧，死则休。
此中是汝家，此中是汝乡，汝何舍此而去，自取其遑遑。
遑遑兮欲安往哉，乐天乐天归去来。

卷 461_5 【三谣·蟠木谣】

白居易

蟠木蟠木，有似我身；不中乎器，无用于人。
下拥肿而上鳞菌，桷不桷兮轮不轮。

· 全唐诗 ·

天子建明堂兮既非梁栋，诸侯斫大辂兮材又不中。
唯我病夫，或有所用。用尔为几，承吾臂支吾颐而已矣。
不伤尔性，不枉尔理。尔快快为几之外，无所用尔。
尔既不材，吾亦不材，胡为乎人间裴回？蟠木蟠木，
吾与汝归草堂去来。

卷 461_6 【三谣 · 素屏谣】

白居易

素屏素屏，胡为乎不文不饰，不丹不青？
当世岂无李阳冰之篆字，张旭之笔迹？边鸾之花鸟，
张璪之松石？吾不令加一点一画于其上，欲尔保真而全白。
吾于香炉峰下置草堂，二屏倚在东西墙。
夜如明月入我室，晓如白云围我床。我心久养浩然气，
亦欲与尔表里相辉光。尔不见当今甲第与王宫，
织成步障银屏风。缀珠陷钿贴云母，五金七宝相玲珑。
贵豪待此方悦目，晏然寝卧乎其中。素屏素屏，
物各有所宜，用各有所施。尔今木为骨兮纸为面，
舍吾草堂欲何之？

卷 461_7 【三谣 · 朱藤谣】

白居易

· 全唐诗 ·

朱藤朱藤，温如红玉，直如朱绳。自我得尔以为杖，
大有裨于股肱。前年左选，东南万里。交游别我于国门，
亲友送我于浣水。登高山兮车倒轮摧，渡汉水兮马踟蹰开。
中途不进，部曲多回。唯此朱藤，实随我来。瘴疠之乡，
无人之地。扶卫衰病，驱诃魑魅。吾独一身，赖尔为二。
或水或陆，自北徂南。泥黏雪滑，足力不堪。吾本两足，
得尔为三。紫霄峰头，黄石岩下。松门石磴，不通舆马。
吾与尔披云拨水，环山绕野。二年蹋遍匡庐间，
未尝一步而相舍。虽有佳子弟、良友朋，扶危助蹇，
不如朱藤。嗟乎，穷既若是，通复何如，吾不以常杖待尔，
尔勿以常人望吾。朱藤朱藤，吾虽青云之上、黄泥之下，
誓不弃尔于斯须。

卷 461_8【无可奈何歌】

白居易

无可奈何兮，白日走而朱颜颓。少日往而老日催，
生者不住兮死者不回。况乎宠辱丰悴之外物，
又何常不十去而一来？去不可挽兮来不可推，
无可奈何兮，已焉哉。惟天长而地久，前无始兮后无终。
嗟吾生之几何，寄瞬息乎其中。又如太仓之稊米，
委一粒于万钟。何不与道逍遥，委化从容，纵心放志，
泄泄融融。胡为乎分爱恶于生死，系忧喜于穷通。
倔强其骨髓，龃齟其心胸。合冰炭以交战，只自苦兮厥躬。
彼造物者，云何不为？此与化者，云何不随？或煦或吹，

· 全唐诗 ·

或盛或衰，虽千变与万化，委一顺以贯之。为彼何非，
为此何是？谁冥此心，梦蝶之子。何祸非福，何吉非凶？
谁达此观，丧马之翁。俾吾为秋毫之杪，吾亦自足，
不见其小；俾吾为泰山之阿，吾亦无余，不见其多。
是以达人静则吻然与阴合迹，动则浩然与阳同波。
委顺而已，孰知其他。时邪命邪，吾其无奈彼何；
委邪顺邪，彼亦无奈吾何。夫两无奈何，
然后能冥至顺而合太和。故吾所以饮太和，扣至顺，
而为无可奈何之歌。

卷 461_9【池上篇】

白居易

十亩之宅，五亩之园。有水一池，有竹千竿。勿谓土狭，
勿谓地偏。足以容膝，足以息肩。有堂有庭，有桥有船。
有书有酒，有歌有弦。有叟在中，白须飘然。识分知足，
外无求焉。如鸟择木，姑务巢安。如龟居坎，不知海宽。
灵鹤怪石，紫菱白莲。皆吾所好，尽在吾前。时饮一杯，
或吟一篇。妻孥熙熙，鸡犬闲闲。优哉游哉，
吾将终老乎其间。

卷 461_10【齿落辞】

白居易

· 全唐诗 ·

嗟嗟乎双齿，自吾有之尔，俾尔嚼肉咀蔬，衔杯漱水；
丰吾肤革，滋吾骨髓；从幼逮老，勤亦至矣。幸有辅车，
非无断齟。胡然舍我，一旦双落。齿虽无情，吾岂无情。
老与齿别，齿随涕零。我老日来，尔去不回。嗟嗟乎双齿，
孰谓而来哉，孰谓而去哉？齿不能言，请以意宣。
为口中之物，忽乎六十余年。昔君之壮也，血刚齿坚；
今君之老矣，血衰齿寒。辅车断齟，日削月朘。
上参差而下飮臄，曾何足以少安。嘻，君其听哉：
女长辞姥，臣老辞主。发衰辞头，叶枯辞树。物无细大，
功成者去。君何嗟嗟，独不闻诸道经：我身非我有也，
盖天地之委形；君何嗟嗟，又不闻诸佛说：是身如浮云，
须臾变灭。由是而言，君何有焉？所宜委百骸而顺万化，
胡为乎嗟嗟于一牙一齿之间。吾应曰：吾过矣，尔之言然。

卷 461_11【不能忘情吟】

白居易

鬻骆马兮放杨柳枝，掩翠黛兮顿金羁。
马不能言兮长鸣而却顾，杨柳枝再拜长跪而致辞。
辞曰：主乘此骆五年，凡千有八百日。衔橛之下，
不惊不逸。素事主十年，凡三千有六百日。巾栉之间，
无违无失。今素貌虽陋，未至衰摧。骆力犹壮，
又无尪隤。即骆之力，尚可以代主一步；素之歌，
亦可以送主一杯。一旦双去，有去无回。故素将去，
其辞也苦；骆将去，其鸣也哀。此人之情也，马之情也，

· 全唐诗 ·

岂主君独无情哉？予俯而叹，仰而哈，且曰：骆，骆，
尔勿嘶：素，素，尔勿啼。骆反厩，素反闺。吾疾虽作，
年虽颓，幸未及项籍之将死。何必一日之内，
弃骓兮而别虞兮。乃目素兮素兮，为我歌杨柳枝。
我姑酌彼金罍，我与尔归醉乡去来。

· 全唐诗 ·

第四百六十二卷

卷 462_1【劝酒】

白居易

昨与美人对尊酒，朱颜如花腰似柳。今与美人倾一杯，
秋风飒飒头上来。年光似水向东去，两鬓不禁白日催。
东邻起楼高百尺，璇题照日光相射。珠翠无非二八人，
盘筵何啻三千客。邻家儒者方下帷，夜诵古书朝忍饥。
身年三十未入仕，仰望东邻安可期。一朝逸翮乘风势，
金榜高张登上第。春闱未了冬登科，九万抟风谁与继。
不逾十稔居台衡，门前车马纷纵横。人人仰望在何处，
造化笔头云雨生。东邻高楼色未改，主人云亡息犹在。
金玉车马一不存，朱门更有何人待。墙垣反锁长安春，
楼台渐渐属西邻。松篁薄暮亦栖鸟，桃李无情还笑人。
忆昔东邻宅初构，云甍彩栋皆非旧。玳瑁筵前翡翠栖，
芙蓉池上鸳鸯斗。日往月来凡几秋，一衰一盛何悠悠。
但教帝里笙歌在，池上年年醉五侯。

卷 462_2【南阳小将张彦硖口镇税人场射虎歌】

· 全唐诗 ·

白居易

海内昔年狎太平，横目穰穰何峥嵘。天生天杀岂天怒，
忍使朝朝喂猛虎。关东驿路多丘荒，行人最忌税人场。
张彦雄特制残暴，见之叱起如叱羊。鸣弦霹雳越幽阻，
往往依林犹旅拒。草际旋看委锦茵，腰间不更抽白羽。
老饕已毙众雏恐，童稚揶揄皆自勇。忠良效顺势亦然，
一剑猜狂敢轻动。有文有武方为国，不是英雄伏不得。
试征张彦作将军，几个将军愿策勋。

卷 462_3【阴雨】

白居易

润叶濡枝浹四方，浓云来去势何长。
旷然寰宇清风满，救旱功高暑气凉。

卷 462_4【喜雨】

白居易

西北油然云势浓，须臾滂沛雨飘空。
顿疏万物焦枯意，定看秋郊稼穡丰。

· 全唐诗 ·

卷 462_5【过故洛城】

白居易

故城门前春日斜，故城门外无人家。
市朝欲认不知处，漠漠野田飞草花。

卷 462_6【江南喜逢萧九彻，因话长安旧游，戏赠五十韵】

白居易

忆昔嬉游伴，多陪欢宴场。寓居同永乐，幽会共平康。
师子寻前曲，声儿出内坊。花深态奴宅，竹错得怜堂。
庭晚开红药，门闲荫绿杨。经过悉同巷，居处尽连墙。
时世高梳髻，风流澹作妆。戴花红石竹，帔晕紫槟榔。
鬓动悬蝉翼，钗垂小凤行。拂胸轻粉絮，暖手小香囊。
选胜移银烛，邀欢举玉觞。炉烟凝麝气，酒色注鹅黄。
急管停还奏，繁弦慢更张。雪飞回舞袖，尘起绕歌梁。
旧曲翻调笑，新声打义扬。名情推阿轨，巧语许秋娘。
风暖春将暮，星回夜未央。宴余添粉黛，坐久换衣裳。
结伴归深院，分头入洞房。彩帷开翡翠，罗荐拂鸳鸯。
留宿争牵袖，贪眠各占床。绿窗笼水影，红壁背灯光。
索镜收花钿，邀人解袷裆。暗娇妆靥笑，私语口脂香。
怕听钟声坐，羞明映绶藏。眉残蛾翠浅，鬟解绿云长。
聚散知无定，忧欢事不常。离筵开夕宴，别骑促晨装。

· 全唐诗 ·

去住青门外，留连浣水傍。车行遥寄语，马驻共相望。
云雨分何处，山川共异方。野行初寂寞，店宿乍恓惶。
别后嫌宵永，愁来厌岁芳。几看花结子，频见露为霜。
岁月何超忽，音容坐渺茫。往还书断绝，来去梦游扬。
自我辞秦地，逢君客楚乡。常嗟异岐路，忽喜共舟航。
话旧堪垂泪，思乡数断肠。愁云接巫峡，泪竹近潇湘。
月落江湖阔，天高节候凉。浦深烟渺渺，沙冷月苍苍。
红叶江枫老，青芜驿路荒。野风吹蟋蟀，湖水浸菰蒋。
帝路何由见，心期不可忘。旧游千里外，往事十年强。
春昼提壶饮，秋林摘橘尝。强歌还自感，纵饮不成狂。
永夜长相忆，逢君各共伤。殷勤万里意，并写赠萧郎。

卷 462_7 【赠薛涛】

白居易

蛾眉山势接云霓，欲逐刘郎北路迷。
若似剡中容易到，春风犹隔武陵溪。

卷 462_8 【酬令狐留守尚书见赠十韵】

白居易

长庆清风在，夔龙夔理余。太和膏雨降，周邵保厘初。
嵩少当宫署，伊瀍入禁渠。晓关开玉兔，夕钥纳银鱼。

· 全唐诗 ·

旧眷怜移疾，新吟念索居。离声双白鹧，行色一篮舆。
罢免无余俸，休闲有敝庐。慵于嵇叔夜，渴似马相如。
酒每蒙酤我，诗尝许起予。洛中归计定，一半为尚书。

卷 462_9【听芦管】

白居易

幽咽新芦管，凄凉古竹枝。似临猿峡唱，疑在雁门吹。
调为高多切，声缘小乍迟。粗豪嫌鬣箠，细妙胜参差。
云水巴南客，风沙陇上儿。屈原收泪夜，苏武断肠时。
仰秣胡驹听，惊栖越鸟知。何言胡越异，闻此一同悲。

卷 462_10【送滕庶子致仕归婺州】

白居易

春风秋月携歌酒，八十年来玩物华。已见曾孙骑竹马，
犹听侍女唱梅花。入乡不杖归时健，出郭乘轺到处夸。
儿著绣衣身衣锦，东阳门户胜滕家。

卷 462_11【送刘郎中赴任苏州】

白居易

· 全唐诗 ·

仁风膏雨去随轮，胜境欢游到逐身。水驿路穿儿店月，
花船棹入女湖春。宣城独咏窗中岫，柳恽单题汀上蘋。
何似姑苏诗太守，吟诗相继有三人。

卷 462_12【福先寺雪中饯刘苏州】

白居易

送君何处展离筵，大梵王宫大雪天。庾岭梅花落歌管，
谢家柳絮扑金田。乱从纨袖交加舞，醉入篮舆取次眠。
却笑召邹兼访戴，只持空酒驾空船。

卷 462_13【除夜言怀，兼赠张常侍】

白居易

三百六旬今夜尽，六十四年明日催。不用叹身随日老，
亦须知寿逐年来。加添雪兴凭毡帐，消杀春愁付酒杯。
唯恨诗成君去后，红笺纸卷为谁开。

卷 462_14【送张常侍西归】

白居易

· 全唐诗 ·

二年花下为闲伴，一旦尊前弃老夫。西午桥街行怅望，
南龙兴寺立踟蹰。洛城久住留情否，省骑重归称意无。
出镇归朝但相访，此身应不离东都。

卷 462_15【和河南郑尹新岁对雪】

白居易

白雪吟诗铃阁开，故情新兴两裴回。昔经勤苦照书卷，
今助欢娱飘酒杯。楚客难酬郢中曲，吴公兼占洛阳才。
铜街金谷春知否，又有诗人作尹来。

卷 462_16【吹笙内人出家】

白居易

雨露难忘君念重，电泡易灭妾身轻。金刀已剃头然发，
玉管休吹肠断声。新戒珠从衣里得，初心莲向火中生。
道场夜半香花冷，犹在灯前礼佛名。

卷 462_17【醉中见微之旧卷有感】

白居易

· 全唐诗 ·

今朝何事一沾襟，检得君诗醉后吟。老泪交流风病眼，
春筇摇动酒杯心。银钩尘覆年年暗，玉树泥埋日日深。
闻道墓松高一丈，更无消息到如今。

卷 462_18【寿安歇马重吟】

白居易

春衫细薄马蹄轻，一日迟迟进一程。野枣花含新蜜气，
山禽语带破匏声。垂鞭晚就槐阴歇，低倡闲冲柳絮行。
忽忆家园须速去，樱桃欲熟笋应生。

卷 462_19【赠张处士山人】

白居易

萝襟蕙带竹皮巾，虽到尘中不染尘。每见俗人多惨澹，
惟逢美酒即殷勤。浮云心事谁能会，老鹤风标不可亲。
世说三生如不谬，共疑巢许是前身。

卷 462_20【池畔闲坐，兼呈侍中】

白居易

· 全唐诗 ·

池畔最平处，树阴新合时。移床解衣带，坐任清风吹。
举棹鸟先觉，垂纶鱼未知。前头何所有，一卷晋公诗。

卷 462_21【初冬即事忆皇甫十】

白居易

冷竹风成韵，荒街叶作堆。欲寻联句卷，先饮暖寒杯。
帽为迎霜戴，炉因试火开。时时还有客，终不当君来。

卷 462_22【小庭寒夜寄梦得】

白居易

庭小同蜗舍，门闲称雀罗。火将灯共尽，风与雪相和。
老睡随年减，衰情向夕多。不知同病者，争奈夜长何。

卷 462_23【西还寿安路西歇马】

白居易

槐阴歇鞍马，柳絮惹衣巾。日晚独归路，春深多思人。
去家才百里，为客只三旬。已念纱窗下，应生宝瑟尘。

· 全唐诗 ·

卷 462_24【雨中访崔十八】

白居易

肩舁仍挈榼，莫怪就君来。秋雨经三宿，无人劝一杯。

卷 462_25【梦得得新诗】

白居易

池上今宵风月凉，闲教少乐理霓裳。
集仙殿里新词到，便播笙歌作乐章。

卷 462_26【初见刘二十八郎中有感】

白居易

欲话毗陵君反袂，欲言夏口我沾衣。
谁知临老相逢日，悲叹声多语笑稀。

卷 462_27【夜题玉泉】

白居易

· 全唐诗 ·

遇客多言爱山水，逢僧尽道厌嚣尘。
玉泉潭畔松间宿，要且经年无一人。

卷 462_28【拜表早出，赠皇甫宾客】

白居易

一月一回同拜表，莫辞侵早过中桥。
老于君者应无数，犹趁西京十五朝。

卷 462_29【赠郑尹】

白居易

府池东北旧亭台，久别长思醉一回。
但请主人空扫地，自携杯酒管弦来。

卷 462_30【别杨同州后却寄】

白居易

潘驿桥南醉中别，下邳村北醒时归。
春风怪我君知否，榆叶杨花扑面飞。

· 全唐诗 ·

卷 462_31 【狐泉店前作】

白居易

野狐泉上柳花飞，逐水东流便不归。
花水悠悠两无意，因风吹落偶相依。

卷 462_32 【赠卢绩】

白居易

余杭县里卢明府，虚白亭中白舍人。
今日相逢头似雪，一杯相劝送残春。

卷 462_33 【与裴华州同过敷水戏赠】

白居易

使君五马且踟蹰，马上能听绝句无。
每过桑间试留意，何妨后代有罗敷。

卷 462_34 【闲游】

· 全唐诗 ·

白居易

欲笑随情酒逐身，此身虽老未辜春。
春来点检闲游数，犹自多于年少人。

卷 462_35【招韬光禅师】

白居易

白屋炊香饭，荤膻不入家。滤泉澄葛粉，洗手摘藤花。
青芥除黄叶，红姜带紫芽。命师相伴食，斋罢一瓿茶。

卷 462_36【和柳公权登齐云楼】

白居易

楼外春晴百鸟鸣，楼中春酒美人倾。路旁花日添衣色，
云里天风散珮声。向此高吟谁得意，偶来闲客独多情。
佳时莫起兴亡恨，游乐今逢四海清。

卷 462_37【毛公坛】

白居易

· 全唐诗 ·

毛公坛上片云闲，得道何年去不还。
千载鹤翎归碧落，五湖空镇万重山。

卷 462_38【灵岩寺】

白居易

馆娃宫畔千年寺，水阔云多客到稀。
闻说春来更惆怅，百花深处一僧归。

卷 462_39【白云泉】

白居易

天平山上白云泉，云自无心水自闲。
何必奔冲山下去，更添波浪向人间。

卷 462_40【寄韬光禅师】

白居易

一山门作两山门，两寺原从一寺分。东涧水流西涧水，
南山云起北山云。前台花发后台见，上界钟声下界闻。
遥想吾师行道处，天香桂子落纷纷。

· 全唐诗 ·

卷 462_41 【和梦得夏至忆苏州呈卢宾客】

白居易

忆在苏州日，常谙夏至筵。粽香筒竹嫩，炙脆子鹅鲜。
水国多台榭，吴风尚管弦。每家皆有酒，无处不过船。
交印君相次，褰帷我在前。此乡俱老矣，东望共依然。
洛下麦秋月，江南梅雨天。齐云楼上事，已上十三年。

卷 462_42 【曲江】

白居易

细草岸西东，酒旗摇水风。楼台在花杪，鸥鹭下烟中。
翠幄晴相接，芳洲夜暂空。何人赏秋景，兴与此时同。

卷 462_43 【岁夜咏怀，兼寄思黯】

白居易

遍数故交亲，何人得六旬。今年已入手，余事岂关身。
老自无多兴，春应不拣人。陶窗与弘阁，风景一时新。

· 全唐诗 ·

卷 462_44 【寒食日过枣团店】

白居易

寒食枣团店，春低杨柳枝。酒香留客住，莺语和人诗。
困立攀花久，慵行上马迟。若为将此意，前字与僧期。

卷 462_45 【宿张云举院】

白居易

不食胡麻饭，杯中自得仙。隔房招好客，可室致芳筵。
美酝香醪嫩，时新异果鲜。夜深唯畏晓，坐稳不思眠。
棋罢嫌无敌，诗成愧在前。明朝题壁上，谁得众人传。

卷 462_46 【惜花】

白居易

可怜天艳正当时，刚被狂风一夜吹。
今日流莺来旧处，百般言语泥空枝。

卷 462_47 【七夕】

· 全唐诗 ·

白居易

烟霄微月澹长空，银汉秋期万古同。
几许欢情与离恨，年年并在此宵中。

卷 462_48【宿诚禅师山房题赠】

白居易

不出孤峰上，人间四十秋。视身如传舍，阅世任东流。
法为因缘立，心从次第修。中宵问真偈，有住是吾忧。

卷 462_49【新池】

白居易

数日自穿凿，引泉来近陂。寻渠通咽处，绕岸待清时。
深好求鱼养，闲堪与鹤期。幽声听难尽，入夜睡常迟。

卷 462_50【南池】

白居易

萧条微雨绝，荒岸抱清源。入舫山侵塞，分泉道接村。

· 全唐诗 ·

秋声依树色，月影在蒲根。淹泊方难遂，他宵关梦魂。

卷 462_51【宿池上】

白居易

泉来从绝壑，亭敞在中流。竹密无空岸，松长可绊舟。
蟪蛄潭上夜，河汉岛前秋。异夕期新涨，携琴却此游。

卷 462_52【翻经台】

白居易

一会灵山犹未散，重翻贝叶有来由。
是名精进才开眼，岩石无端亦点头。

卷 462_53【寄题上强山精舍寺】

白居易

惯游山水住南州，行尽天台及虎丘。
惟有上强精舍寺，最堪游处未曾游。

· 全唐诗 ·

卷 462_54 【一字至七字诗】

白居易

诗。绮美，瑰奇。明月夜，落花时。能助欢笑，亦伤别离。
调清金石怨，吟苦鬼神悲。天下只应我爱，世间唯有君知。
自从都尉别苏句，便到司空送白辞。

卷 462_55 【九老图诗】

白居易

雪作须眉云作衣，辽东华表鹤双归。
当时一鹤犹希有，何况今逢两令威。

卷 462_56 【和裴相公傍水闲行绝句】

白居易

行寻春水坐看山，早出中书晚未还。
为报野僧岩客道，偷闲气味胜长闲。

· 全唐诗 ·

第四百六十三卷

卷 463_1【七老会诗】

胡杲

闲居同会在三春，大抵愚年最出群。霜鬓不嫌杯酒兴，
白头仍爱玉炉熏。裴回玩柳心犹健，老大看花意却勤。
凿落满斟判酩酊，香囊高挂任氤氲。搜神得句题红叶，
望景长吟对白云。今日交情何不替，齐年同事圣明君。

卷 463_2【七老会诗】

吉皎

休官罢任已闲居，林苑园亭兴有余。对酒最宜花藻发，
邀欢不厌柳条初。低腰醉舞垂绯袖，击筑讴歌任褐裾。
宁用管弦来合杂，自亲松竹且清虚。飞觥酒到须先酌，
赋咏成诗不住书。借问商山贤四皓，不知此后更何如。

卷 463_3【七老会诗】

· 全唐诗 ·

刘真

垂丝今日幸同筵，朱紫居身是大年。赏景尚知心未退，
吟诗犹觉力完全。闲庭饮酒当三月，在席挥毫象七贤。
山茗煮时秋雾碧，玉杯斟处彩霞鲜。临阶花笑如歌妓，
傍竹松声当管弦。虽未学穷生死诀，人间岂不是神仙。

卷 463_4【七老会诗】

郑据

东洛幽闲日暮春，邀欢多是白头宾。官班朱紫多相似，
年纪高低次第匀。联句每言松竹意，停杯多说古今人。
更无外事来心肺，空有清虚入思神。醉舞两回迎劝酒，
狂歌一曲会娱身。今朝何事偏情重，同作明时列任臣。

卷 463_5【七老会诗】

卢真

三春已尽洛阳宫，天气初晴景象中。千朵嫩桃迎晓日，
万株垂柳逐和风。非论官位皆相似，及至年高亦共同。
对酒歌声犹觉妙，玩花诗思岂能穷。先时共作三朝贵，
今日犹逢七老翁。但愿醪醑常满酌，烟霞万里会应同。

· 全唐诗 ·

卷 463_6【七老会诗】

张浑

幽亭春尽共为欢，印绶居身是大官。遁迹岂劳登远岫，
垂丝何必坐谿磻。诗联六韵犹应易，酒饮三杯未觉难。
每况襟怀同宴会，共将心事比波澜。风吹野柳垂罗带，
日照庭花落绮纨。此席不烦铺锦帐，斯筵堪作画图看。

卷 463_7【一字至七字诗·竹】

韦式

竹。临池，似玉。裊露静，和烟绿。抱节宁改，贞心自束。
渭曲偏种多，王家看不足。仙杖正惊龙化，美实当随凤熟。
唯愁吹作别离声，回首驾骖舞阵速。

卷 463_8【奉和白太守拣橘】

张彤

凌霜远涉太湖深，双卷朱旗望橘林。树树笼烟疑带火，
山山照日似悬金。行看采掇方盈手，暗觉馨香已满襟。
拣选封题皆尽力，无人不感近臣心。

· 全唐诗 ·

卷 463_9【和白太守拣贡橘】

周元范

离离朱实绿丛中，似火烧山处处红。影下寒林沈绿水，
光摇高树照晴空。银章自竭人臣力，玉液谁知造化功。
看取明朝船发后，余香犹尚逐仁风。

卷 463_10【句】

周元范

谁云蒿上烟，随云依碧落。

莫怪西陵风景别，镜湖花草为先春。

卷 463_11【书巫山神女祠】

繁知一

忠州刺史今才子，行到巫山必有诗。
为报高唐神女道，速排云雨候清词。

· 全唐诗 ·

卷 463_12【唐昌观玉蕊花折有仙人游，怅然成二绝】

严休复

终日斋心祷玉宸，魂销目断未逢真。
不如满树琼瑶蕊，笑对藏花洞里人。

羽车潜下玉龟山，尘世何由睹舜颜。
唯有多情枝上雪，好风吹缀绿云鬟。

卷 463_13【江亭寓目】

卢拱

江郭带林峦，津亭倚槛看。水风蒲叶战，沙雨鹭鸶寒。
晚木初凋柳，秋丛欲败兰。哀猿自相叫，乡泪好无端。

卷 463_14【中元日观法事】

卢拱

西孟逢秋序，三元得气中。云迎碧落步，章奏玉皇宫。
坛滴槐花露，香飘柏子风。羽衣凌缥缈，瑶轂转虚空。
久慕餐霞客，常悲习蓼虫。青囊如可授，从此访鸿蒙。

· 全唐诗 ·

卷 463_15【句】

卢拱

地瓷如拳石，溪横似叶舟。

卷 463_16【苏州元日郡斋感怀，寄越州元相公、杭州白舍人】

李谅

称庆还乡郡吏归，端忧明发俨朝衣。首开三百六旬日，
新知四十九年非。当官补拙犹勤虑，游宦量才已息机。
举族共资随月俸，一身惟忆故山薇。旧交邂逅封疆近，
老牧萧条宴赏稀。书札每来同笑语，篇章时到借光辉。
丝纶暂厌分符竹，舟楫初登拥羽旗。未知今日情何似，
应与幽人事有违。

卷 463_17【月生】

刘猛

月生十五前，日望光彩圆。月满十五后，日畏光彩瘦。
不见夜花色，一尊成暗酒。匣中苔背铜，光短不照空。
不惜补明月，惭无此良工。

· 全唐诗 ·

卷 463_18 【苦雨】

刘猛

自念数年间，两手中藏钩。于心且无恨，他日为我羞。
古老传童歌，连淫亦兵象。夜梦戈甲鸣，苦不愿年长。

卷 463_19 【晓】

刘猛

朝梳一把白，夜泪千滴雨。可耻垂拱时，老作在家女。

卷 463_20 【献卢尚书】

万彤云

荷衣拭泪几回穿，欲谒朱门抵上天。
不是尚书轻下客，山家无物与王权。

卷 463_21 【和白尚书赋永丰柳】

卢贞

· 全唐诗 ·

一树依依在永丰，两枝飞去杳无踪。
玉皇曾采人间曲，应逐歌声入九重。

卷 463_22【和刘梦得岁夜怀友】

卢贞

文翰走天下，琴尊卧洛阳。贞元朝士尽，新岁一悲凉。
名早缘才大，官迟为寿长。时来知病已，莫叹步趋妨。

· 全唐诗 ·

第四百六十四卷

卷 464_1 【和李校书雨中自秘省见访知早入朝便入集贤不遇诗】

王起

台庭才子来款扉，典校初从天禄归。已惭陋巷回玉趾，
仍闻细雨沾彩衣。诘朝始趋凤阙去，此日遂愁鸡黍违。
忆昨谬官在乌府，喜君对门讨鱼鲁。直庐相望夜每阑，
高阁遥临月时吐。昔闻三入承明庐，今来重入中秘书。
校文复忝丞相属，博物更与张侯居。新冠峨峨不变铁，
旧泉脉脉犹在渠。忽枉情人吐芳讯，临风不羨潘锦舒。
忆见青天霞未卷，吟玩瑶华不知晚。自怜岂是风引舟，
如何渐与蓬山远。

卷 464_2 【贡举人谒先师闻雅乐】

王起

蔼蔼观光士，来同鹄鹭群。鞠躬遗像在，稽首雅歌闻。
度曲飘清汉，馀音遏晓云。两楹凄已合，九仞杳难分。

· 全唐诗 ·

断续同清吹，洪纤入紫氛。长言听已罢，千载仰斯文。

卷 464_3【浊水求珠】

王起

行潦沈明月，光辉也不浮。识珍能洞鉴，珍宝此来求。
几被泥沙杂，常随混浊流。润川终自媚，照乘且何由。
的皪终难掩，晶荧愿见收。蛇行无胫至，饮德已闻酬。

卷 464_4【和周侍郎见寄】

王起

贡院离来二十霜，谁知更忝主文场。杨叶纵能穿旧的，
桂枝何必爱新香。九重每忆同仙禁，六义初吟得夜光。
莫道相知不相见，莲峰之下欲征黄。

卷 464_5【赠毛仙翁】

王起

冰霜肌骨称童年，羽驾何由到俗间。丹灶化金留秘诀，
仙宫嗽玉叩玄关。壶中世界青天近，洞里烟霞白日闲。

· 全唐诗 ·

若许随师去尘网，愿陪鸾鹤向三山。

卷 464_6 【赋花】

王起

花。点缀，分葩。露初裊，月未斜。一枝曲水，千树山家。
戏蝶未成梦，娇莺语更夸。既见东园成径，何殊西子同车。
渐觉风飘轻似雪，能令醉者乱如麻。

卷 464_7 【赋得浊水求珠】

王损之

积水非澄彻，明珠不易求。依稀沈极浦，想像在中流。
瞪目思清浅，褰裳恨暗投。徒看川色媚，空爱夜光浮。
月入疑龙吐，星归似蚌游。终希识珍者，采掇冀冥搜。

卷 464_8 【赋得行不由径】

王炎

邪径趋时捷，端心恶此名。长衢贵高步，大路自规行。
且虑萦纤僻，将求坦荡情。诤同流俗好，方保立身贞。

· 全唐诗 ·

远迹如违险，修仁在履平。始知夫子道，从此得坚诚。

卷 464_9【赋得行不由径】

封孟绅

欲速意何成，康庄欲砥平。天衢皆利往，吾道泰方行。
不复由莱径，无由见蒋生。三条遵广达，九轨尚安贞。
紫陌悠悠去，芳尘步步清。澹台千载后，公正有遗名。

卷 464_10【题马侍中燧木香亭】

邵楚苌

春日迟迟木香阁，窈窕佳人褰绣幕。淋漓玉露滴紫蕤，
绵蛮黄鸟窥朱萼。横汉碧云歌处断，满地花钿舞时落。
树影参差斜入檐，风动玲珑水晶箔。

卷 464_11【赋得玉水记方流】

郑俞

积水纂文动，因知玉产幽。如天涵素色，侔地引方流。
潜润滋云起，荧华射浪浮。鱼龙泉不夜，草木岸无秋。

· 全唐诗 ·

璧沼宁堪比，瑶池讵可侑。若非悬坐测，谁复寄冥搜。

卷 464_12【赋得玉水记方流】

吴丹

玉泉何处记，四折水纹浮。润下宁逾矩，居方在上流。
映空虚漾漾，涵白净悠悠。影碎疑冲斗，光清耐触舟。
珪璋分辨状，沙砾共怀柔。愿赴朝宗日，萦回入御沟。

卷 464_13【赋得玉水记方流】

王鉴

玉润在中洲，光临碕岸幽。氤氲冥瑞影，演漾度方流。
乍似轻涟合，还疑骇浪收。夤缘知有异，洞彻信无俦。
比德称殊赏，含辉处至柔。沉沦如见念，况乃属时休。

卷 464_14【赋得玉水记方流】

陈昌言

明媚如怀玉，奇姿自托幽。白虹深不见，绿水折空流。
方珏清沙遍，纵横气色浮。类圭才有角，写月让成钩。

· 全唐诗 ·

久处沉潜贵，希当特达收。滔滔在何许，揭厉愿从游。

卷 464_15【白日丽江皋】

陈昌言

迟景临遥水，晴空似不高。清明开晓镜，昭晰辨秋毫。
郁郁长堤土，离离浅渚毛。烟销占一候，风静拥千艘。
独媚青春柳，宜看白鹭涛。何年谢公赏，遗韵在江皋。

卷 464_16【赋得玉水记方流】

杜元颖

重泉生美玉，积水异常流。始玩清堪赏，因知宝可求。
斗回虹气见，磬折紫光浮。中矩皆明德，同方叶至柔。
月华偏共映，风暖伫将游。遇鉴终无暗，逢时愿见收。

卷 464_17【太常观阅骠国新乐】

胡直钧

异音来骠国，初被奉常人。才可宫商辨，殊惊节奏新。
转规回绣面，曲折度文身。舒散随鸾吹，喧呼杂鸟春。

· 全唐诗 ·

襟衽怀旧识，丝竹变恒陈。何事留中夏，长令表化淳。

卷 464_18【行不由径】

俞简

古人心有尚，乃是孔门生。为计安贫乐，当从大道行。
讷应流远迹，方欲料前程。捷径虽云易，长衢岂不平。
后来无枉路，先达擅前名。一示遵途意，微衷益自精。

卷 464_19【丁巳岁八月祭武侯祠堂，因题临淮公旧碑】

杨嗣复

斋庄修祀事，旌旆出效闾。薤草轩墀狭，涂墙赭垩新。
谋猷期作圣，风俗奉为神。酹酒成坳泽，持兵列偶人。
非才膺宠任，异代揖芳尘。况是平津客，碑前泪满巾。

卷 464_20【仪凤】

杨嗣复

八方该帝泽，威凤忽来宾。向日朱光动，迎风翠羽新。
低昂多异趣，饮啄迥无邻。郊薮今翔集，河图意等伦。

· 全唐诗 ·

闻韶知鼓舞，偶圣愿逡巡。比屋初同俗，垂恩击壤人。

卷 464_21 【赠毛仙翁】

杨嗣复

天上玉郎骑白鹤，肘后金壶盛妙药。暂游下界傲五侯，
重看当时旧城郭。羽衣茸茸轻似雪，云上双童持绛节。
王母亲缝紫锦囊，令向怀中藏秘诀。令威子晋皆俦侣，
东岳同寻太真女。搜奇缀韵和阳春，文章不是人间语。
药成自固黄金骨，天地齐兮身不没。日月宫中便是家，
下视昆仑何突兀。童姿玉貌谁方比，玄发绿髯光弥弥。
满朝将相门弟子，随师尽愿抛尘滓。九转琅玕必有余，
愿乞刀圭救生死。

卷 464_22 【题李处士山居】

杨嗣复

卧龙决起为时君，寂寞匡庐惟白云。
今日仲容修故业，草堂焉敢更移文。

卷 464_23 【谢寄新茶】

· 全唐诗 ·

杨嗣复

石上生芽二月中，蒙山顾渚莫争雄。
封题寄与杨司马，应为前衔是相公。

· 全唐诗 ·

第四百六十五卷

卷 465_1【卢十五竹亭送侄偁归山】

杨衡

落叶寒拥壁，清霜夜沾石。正是忆山时，复送归山客。
殷勤一尊酒，晓月当窗白。

卷 465_2【旅次江亭】

杨衡

扣舷不能寐，皓露清衣襟。弥伤孤舟夜，远结万里心。
幽兴惜瑶草，素怀寄鸣琴。三奏月初上，寂寥寒江深。

卷 465_3【赋得夜雨滴空阶送魏秀才】

杨衡

委檐方滴滴，沾红复洒绿。醉听乍朦胧，愁闻多断续。

· 全唐诗 ·

始兼泉向细，稍杂更声促。百虑自萦心，况有人如玉。

卷 465_4【征人】

杨衡

西风屡鸣雁，东郊未升日。繁烟幕幕昏，暗骑萧萧出。
望云愁玉塞，眠月想蕙质。借问露沾衣，何如香满室。

卷 465_5【游陆先生故岩居】

杨衡

独壑临万嶂，苍苔绝行迹。仰窥猿挂树，俯对鹤巢石。
上有一岩屋，相传灵人宅。深林无阳晖，幽水转鲜碧。
拾薪遇遗鼎，探穴得古籍。结念候云兴，烧香坐终夕。

卷 465_6【题玄和师仙药室】

杨衡

山边萧寂室，石掩浮云扃。绕室微有路，松烟深冥冥。
入松汲寒水，对鹤问仙经。石几香未尽，水花风欲零。
何年去华表，几度穷苍冥。却顾宦游子，眇如霜中萤。

· 全唐诗 ·

卷 465_7【宿陆氏斋赋得残灯诗】

杨衡

殷勤照永夜，属思未成眠。余辉含薄雾，落烬迸空筵。
谁比秦楼晓，缄愁别幌前。

卷 465_8【夷陵郡内叙别】

杨衡

礼娶嗣明德，同牢夙所钦。况蒙生死契，岂顾蓬蒿心。
雁帟任野薄，恩爱缘义深。同声若鼓瑟，合韵似鸣琴。
将迓空未立，就赘意难任。皎月托言誓，沧波信浮沉。
荆台理晨辙，巫渚疑宵襟。惘惘百虑起，回回万恨深。
候更促徒侣，先晓彻夜禽。灯彩凝寒风，蝉思噪密林。
留念同心带，赠远芙蓉簪。抚怀极投漆，感物重黄金。
分鸾岂遐阻，别剑念相寻。倘甘蓬户贱，愿俟故山岑。

卷 465_9【将之荆州南与张伯刚马惣钟陵夜别】

杨衡

荆台别路长，密绪分离状。莫诉杯来促，更筹屡已倡。

· 全唐诗 ·

烛花侵雾暗，瑟调寒风亮。谁念晓帆开，默睇参差浪。

卷 465_10【经端溪峡中】

杨衡

阴岸东流水，上有微风生。素羽漾翠涧，碧苔敷丹英。
重林宿雨晦，远岫孤霞明。飞猱相攀牵，白云乱纵横。
有客溯轻楫，阅胜匪羁程。逍遥一息间，粪土五侯荣。
攀茗庶蠲热，漱泉聊析醒。寄言丝竹者，讵识松风声。

卷 465_11【南海苦雨，寄赠王四侍御】

杨衡

炎风杂海气，暑雨每成霖。涂泥亲杖屨，苔藓渍衣襟。
念近剧怀远，涉浅定知深。暗沟夜滴滴，荒庭昼霏霏。
折简展离旷，理径俟招寻。处阴诚多惨，况乃触隅禽。

卷 465_12【秋夜闲居，即事寄庐山郑员外、蜀郡符处士】

杨衡

忧思繁未整，良辰会无由。引领迟佳音，星纪屡以周。

· 全唐诗 ·

蓬阁绝华耀，况乃处穷愁。坠叶寒拥砌，灯火夜悠悠。
开琴弄清弦，窥月俯澄流。冉冉鸿雁度，萧萧帷箔秋。
怅怀石门咏，缅慕碧鸡游。仿佛蒙颜色，崇兰隐芳洲。

卷 465_13【寄赠田仓曹湾】

杨衡

芳兰媚庭除，灼灼红英舒。身为陋巷客，门有绂轺车。
朝览夷胡传，暮习颖阳书。盼云高羽翼，待贾蕴璠琦。
纓弁虽云阻，音尘岂复疏。若因风雨晦，应念寂寥居。

卷 465_14【咏春色】

杨衡

霭霭复濛濛，非雾满晴空。密添宫柳翠，暗泄路桃红。
萦丝光乍失，缘隙影才通。夕迷鸳枕上，朝漫绮弦中。
促驷驰香陌，劳莺转艳丛。可怜肠断望，并在洛城东。

卷 465_15【送春】

杨衡

· 全唐诗 ·

三月三十日，春归日复暮。惆怅问春风，明朝应不住。
送春曲江上，眷眷东西顾。但见扑水花，纷纷不知数。
人生似行客，两足无停步。日日进前程，前程几多路。
兵刃与水火，尽可违之去。惟有老到来，人间无避处。
感时良未已，独倚池南树。今日送春心，心如别亲故。

卷 465_16【游峡山寺】

杨衡

结构天南畔，胜绝固难俦。幸蒙时所漏，遂得恣闲游。
路石荫松盖，槛藤维鹤舟。雨霁花木润，风和景气柔。
宝殿敞丹扉，灵幡垂绛旒。照曜芙蓉壶，金人居上头。
翔禽拂危刹，落日避层楼。端溪弥漫驶，曲涧潺湲流。
高居何重沓，登览自夷犹。烟霞无隐态，岩洞诘遗幽。
奔驹非久耀，驰波肯暂留。会从香火缘，灭迹此山丘。

卷 465_17【宿陟岵寺云律师院】

杨衡

像宇郁参差，宝林疏复密。中有弥天子，燃灯坐虚室。
心证红莲喻，迹羁青眼律。玉炉扬翠烟，金经开缥帙。
肆陈坚固学，破我梦幻质。碧水洒尘缨，凉扇当夏日。
宿禽诘相保，迸火烟欲失。愿回戚促劳，趋隅事休逸。

· 全唐诗 ·

卷 465_18 【秋夜桂州宴送郑十九侍御】

杨衡

秋至触物愁，况当离别筵。短歌销夜烛，繁绪遍高弦。
桂水舟始泛，兰堂榻讵悬。一杯勾离阻，三载奉周旋。
鸦噪更漏飒，露濡风景鲜。斯须不共此，且为更留连。

卷 465_19 【九日陪樊尚书龙山宴集】

杨衡

孟嘉从宴地，千乘复登临。缘危陟高步，凭旷写幽襟。
黄花玩初馥，翠物喜盈斟。云杂组绣色，乐和山水音。
旆摇秋吹急，筵卷夕光沉。都人瞻骑火，犹知隔寺深。

卷 465_20 【江陵送客归河北】

杨衡

远客归故里，临路结裴回。山长水复阔，无因重此来。
聊将歌一曲，送子手中杯。

· 全唐诗 ·

卷 465_21 【送郑丞之罗浮中习业】

杨衡

百年泛飘忽，万事系衰荣。高鸿脱矰缴，达士去簪缨。
始从天目游，复作罗浮行。云卧石林密，月窥花洞明。
全形在气和，习默凭境清。夙秘绛囊诀，屡投金简名。
钟管促离觞，烟霞随去程。何当真府内，重得款平生。

卷 465_22 【送王秀才往安南】

杨衡

君为蹈海客，客路谁谙悉。鲸度乍疑山，鸡鸣先见日。
所嗟回棹晚，倍结离情密。无贪合浦珠，念守江陵橘。

卷 465_23 【送公孙器自桂林归蜀】

杨衡

桂林浅复碧，潺湲半露石。将乘触物舟，暂驻飞空锡。
蜀乡异青眼，蓬户高朱戟。风度杳难寻，云飘讵留迹。
旧户闲花草，驯鸽傍檐隙。挥手共忘怀，日堕千山夕。

· 全唐诗 ·

卷 465_24 【赠罗浮易炼师】

杨衡

海上多仙峤，灵人信长生。荣卫冰雪姿，咽嚼日月精。
默书绛符遍，晦步斗文成。翠发披肩长，金盖凌风轻。
晓籁息尘响，天鸡叱幽声。碧树来户阴，丹霞照窗明。
焚香叩虚寂，稽首回太清。鸾鹭振羽仪，飞翻拂旒旌。
左挹玉泉液，右搴云芝英。念得参龙驾，攀天度赤城。

卷 465_25 【登紫霄峰赠黄仙师】

杨衡

紫霄不可涉，灵峰信穹崇。下有琼树枝，上有翠发翁。
鸡鸣秋汉侧，日出红霞中。璨璨真仙子，执旄为侍童。
焚香杳忘言，默念合太空。世华徒熠熠，虚室自朦胧。
云飞琼瑶圃，龟息芝兰丛。玉簪掩不开，天窗微微风。
兹焉悟佳旨，尘境亦幽通。浩渺临广津，永用挹无穷。

卷 465_26 【乌啼曲】

杨衡

· 全唐诗 ·

可怜杨叶复杨花，雪净烟深碧玉家。乌栖不定枝条弱，
城头夜半声哑哑。浮萍流荡门前水，任骂芙蓉莫浣纱。

卷 465_27【白紵歌二首】

杨衡

玉纓翠佩杂轻罗，香汗微渍朱颜酡。为君起唱白紵歌，
清声袅云繁思多，凝笳哀瑟时相和。金壶半倾芳夜促，
梁尘霏霏暗红烛。令君安坐听终曲，坠叶飘花难再复。

蹑珠履，步琼筵，轻身起舞红烛前。芳姿艳态妖且妍，
回眸转袖暗催弦。凉风萧萧漏水急，月华泛艳红莲湿，
牵裙揽带翻成泣。

卷 465_28【长门怨】

杨衡

丝声繁兮管声急，珠帘不卷风吹入。万遍凝愁枕上听，
千回候命花间立。望望昭阳信不来，回眸独掩红巾泣。

卷 465_29【寄彻公】

· 全唐诗 ·

杨衡

北风吹霜霜月明，荷叶枯尽越水清。
别来几度龙宫宿，雪山童子应相逐。

卷 465_30 【哭李象】

杨衡

白鸡黄犬不将去，寂寞空馀葬时路。草死花开年复年，
后人知是何人墓。忆君思君独不眠，夜寒月照青枫树。

卷 465_31 【宿云溪观，赋得秋灯引送客】

杨衡

云房寄宿秋夜客，一灯荧荧照虚壁。虫声呼客客未眠，
几人语话清景侧。不可离别愁纷多，秋灯秋灯奈别何。

卷 465_32 【采莲曲】

杨衡

凝鲜雾渚夕，阳艳绿波风。鱼游乍散藻，露重稍欹红。

· 全唐诗 ·

楚客伤暮节，吴娃泣败丛。促令芳本固，宁望雪霜中。

卷 465_33【他乡七夕】

杨衡

汉渚常多别，山桥忽重游。向云迎翠辇，当月拜珠旒。
寝幌凝宵态，妆奁闭晓愁。不堪鸣杼日，空对白榆秋。

卷 465_34【春日偶题】

杨衡

何处春先到，桥东水北亭。冻花开未得，冷酒酌难醒。
就日移轻榻，遮风展小屏。更无人劝饮，莺语渐叮咛。

卷 465_35【题山寺】

杨衡

千峰白露后，云壁挂残灯。曙色海边日，经声松下僧。
意闲门不闭，年去水空澄。稽首如何问，森罗尽一乘。

· 全唐诗 ·

卷 465_36 【广州石门寺重送李尚赴朝，时兼宗正卿】

杨衡

象阙趋云陛，龙宫憩石门。清铙犹启路，黄发重攀辕。
藻变朝天服，珠怀委地言。那令蓬蒿客，兹席未离尊。

卷 465_37 【送孔周之南海谒王尚书】

杨衡

泛棹若流萍，桂寒山更青。望云生碧落，看日下沧溟。
潮尽收珠母，沙闲拾翠翎。自趋龙戟下，再为诵芳馨。

卷 465_38 【冬夜举公房送崔秀才归南阳】

杨衡

闻君动征棹，犯夜故来寻。强置一尊酒，重款百年心。
灯白霜气冷，室虚松韵深。南阳三顾地，幸偶价千金。

卷 465_39 【送陈房谒抚州周使君】

· 全唐诗 ·

杨衡

匡山一亩宫，尚有桂兰丛。凿壁年虽异，穿杨志幸同。
貌羸缘塞苦，道蹇为囊空。去谒临川守，因怜鹤在笼。

卷 465_40【山斋独宿赠晏上人】

杨衡

幢幢云树秋，黄叶下山头。虫响夜难度，梦闲神不游。
窗灯寒几尽，帘雨晓阶愁。何以禅栖客，灰心在沃州。

卷 465_41【桂州与陈羽念别】

杨衡

惨戚损志抱，因君时解颜。重叹今夕会，复在几夕间。
碧桂水连海，苍梧云满山。茫茫从此去，何路入秦关。

卷 465_42【经赵处士居】

杨衡

云居避世客，发白习儒经。有地水空绿，无人山自青。

· 全唐诗 ·

废梁悲逝水，卧木思荒庭。向夕霏烟敛，徒看处土星。

卷 465_43【病中赴袁州次香馆】

杨衡

病舆憩上馆，缭绕向山隅。荒葛漫欹壁，幽禽啄朽株。
力微怯升降，意欲结踟蹰。谁能挹香水，一为濯烦纡。

卷 465_44【送人流雷州】

杨衡

逐客指天涯，人间此路赊。地图经大庾，水驿过长沙。
腊月雷州雨，秋风桂岭花。不知荒徼外，何处有人家。

卷 465_45【送彻公】

杨衡

白首年空度，幽居俗岂知。败蕉依晚日，孤鹤立秋墀。
久客何由造，禅门不可窥。会同尘外友，斋沐奉威仪。

· 全唐诗 ·

卷 465_46 【赠庐山道士】

杨衡

寂寥高室古松寒，松下仙人字委鸾。头垂白发朝鸣磬，
手把青芝夜绕坛。物像自随尘外灭，真源长向性中看。
悠悠万古皆如此，秋比松枝春比兰。

卷 465_47 【赋得直如朱丝弦】

杨衡

寂寞瑶琴上，深知直者情。幸传朱鹭曲，那止素丝名。
瑞草人空仰，王言世久行。大方闻正位，乐府动清声。
文武音初合，宫商调屡更。谁能向机杼，终日泣无成。

卷 465_48 【早春即事】

杨衡

眼重朝眠足，头轻宿醉醒。阳光满前户，雪水半中庭。
候变随天气，春生逐地形。北檐梅晚白，东岸柳先青。
葱垄抽羊角，松巢堕鹤翎。老来诗更拙，吟罢少人听。

· 全唐诗 ·

卷 465_49【题花树】

杨衡

都无看花意，偶到树边来。可怜枝上色，一一为愁开。

卷 465_50【宿吉祥寺寄庐山隐者】

杨衡

风鸣云外钟，鹤宿千年松。相思杳不见，月出山重重。

卷 465_51【边思】

杨衡

苏武节旄尽，李陵音信稀。梅当陇上发，人向陇头归。

卷 465_52【夜半步次古城】

杨衡

茫茫死复生，惟有古时城。夜半无鸟雀，花枝当月明。

· 全唐诗 ·

卷 465_53 【春梦】

杨衡

空庭日照花如锦，红妆美人当昼寝。
傍人不知梦中事，唯见玉钗时坠枕。

卷 465_54 【宿青牛谷】

杨衡

随云步入青牛谷，青牛道士留我宿。
可怜夜久月明中，唯有坛边一枝竹。

卷 465_55 【槿】

杨衡

自用金钱买槿栽，二年方始一花开。
怜红未许家人见，胡蝶争知早到来。

卷 465_56 【九日】

· 全唐诗 ·

杨衡

黄菊紫菊傍篱落，摘菊泛酒爱芳新。
不堪今日望乡意，强插茱萸随众人。

卷 465_57【仙女词】

杨衡

玉京初侍紫皇君，金缕鸳鸯满绛裙。
仙宫一闭无消息，遥结芳心向碧云。

卷 465_58【句】

杨衡

贤人处霄汉，荒泽自耕耘。

陇首降时雨，雷声出夏云。

一一鹤声飞上天。

· 全唐诗 ·

第四百六十六卷

卷 466_1【享太庙乐章】

牛僧孺

湜湜颀颀，融昭德辉。不纽不舒，贯成九围。
武烈文经，敷施当宜。纂尧付启，亿万熙熙。

卷 466_2【乐天梦得有岁夜诗聊以奉和】

牛僧孺

惜岁岁今尽，少年应不知。凄凉数流辈，欢喜见孙儿。
暗减一身力，潜添满鬓丝。莫愁花笑老，花自几多时。

卷 466_3【李苏州遗太湖石奇状绝伦，因题二十韵，奉呈梦得、乐天】

牛僧孺

· 全唐诗 ·

胚浑何时结，嵌空此日成。掀蹲龙虎斗，挟怪鬼神惊。
带雨新水静，轻敲碎玉鸣。揜叉锋刃簇，缕络钓丝萦。
近水摇奇冷，依松助澹清。通身鳞甲隐，透穴洞天明。
丑凸隆胡准，深凹刻兕觥。雷风疑欲变，阴黑讶将行。
噤痒微寒早，轮囷数片横。地祇愁垫压，鳌足困支撑。
珍重姑苏守，相怜懒慢情。为探湖里物，不怕浪中鲸。
利涉余千里，山河仅百程。池塘初展见，金玉自凡轻。
侧眩魂犹悚，周观意渐平。似逢三益友，如对十年兄。
旺兴添魔力，消烦破宿醒。媿人当绮皓，视秩即公卿。
念此园林宝，还须别识精。诗仙有刘白，为汝数逢迎。

卷 466_3【席上赠刘梦得】

牛僧孺

粉署为郎四十春，今来名辈更无人。休论世上升沉事，
且斗樽前见在身。珠玉会应成咳唾，山川犹觉露精神。
莫嫌恃酒轻言语，曾把文章谒后尘。

卷 466_4【句】

牛僧孺

但愁封寄去，魔物或惊禅。

· 全唐诗 ·

惟羨东都白居易，年年香积问禅师。

不是道公狂不得，恨公逢我不教狂。

地瘦草丛短。

求人气色沮，凭酒意乃伸。

卷 466_5【赋得月照冰池】

叶季良

霁夕云初敛，栖娥月未亏。圆光生碧海，素色满瑶池。
天迥轮空见，波凝影讵窥。浮霜玉比彩，照像镜同规。
皎洁寒偏净，裴回夜转宜。谁怜幽境在，长与赏心随。

卷 466_6【赋得琢玉成器】

叶季良

片玉寄幽石，纷纶当代名。荆人献始遇，良匠琢初成。
冰映寒光动，虹开晚色明。雅容看更澈，余响扣弥清。
自与琼瑶比，方随掌握荣。因知君有用，高价伫连城。

· 全唐诗 ·

卷 466_7【省试吴宫教美人战】

叶季良

强吴矜霸略，讲武在深宫。尽出娇娥妓，先观上将风。
挥戈罗袖卷，擐甲汗妆红。掩笑分旗下，含羞入队中。
鼓停行未正，刑举令才崇。自可威邻国，何劳逞战功。

卷 466_8【题历山司徒右长史祖宅】

湛贲

隳官长史籍，高步历山椒。丽句传黄绢，香名播宋朝。
分能知止足，迹贵出尘嚣。松竹心长固，池台兴自饶。
龙宫欣访旧，莺谷忝迁乔。从事叨承乏，铜章愧在腰。

卷 466_9【伏览吕侍郎丘员外旧题十三代祖历山草堂诗，因书记事】

湛贲

名遂贵知己，道胜方晦迹。高居葺莲宫，遗文焕石壁。
桑田代已变，池草春犹碧。识曲遇周郎，知音荷宗伯。
调逸南平兆，风清建安迹。祖德今发扬，还同书史册。

· 全唐诗 ·

卷 466_10【别慧山书堂】

湛贲

卷帘晓望云平槛，下榻宵吟月半窗。
病守未能依结社，更施何术去为邦。

卷 466_11【暮春自南台丞再除给事中】

薛存诚

再入青锁闱，忝官诚自非。拂尘惊物在，开户似僧归。
积草渐无径，残花犹洒衣。禁垣偏日近，行坐是恩辉。

卷 466_12【御制段太尉碑】

薛存诚

葬仪从俭礼，刊石荷尧君。露迹垂繁字，天哀洒丽文。
诏深荣嗣子，海变记孤坟。宝思皆涵象，皇心永念勋。
雅词黄绢妙，渥泽紫泥分。青史应同久，芳名万古闻。

卷 466_13【御题国子监门】

· 全唐诗 ·

薛存诚

宸翰符玄造，荣题国子门。笔锋回日月，字势动乾坤。
檐下云光绝，梁间鹊影翻。张英圣莫拟，索靖妙难言。
为著盘龙迹，能彰舞凤蹲。更随垂露像，常以沐皇恩。

卷 466_14【御箭连中双兔】

薛存诚

宸游经上苑，羽猎向闲田。狡兔初迷窟，纤骊讵著鞭。
三驱仍百步，一发遂双连。影射含霜草，魂消向月弦。
驩声动寒木，喜气满晴天。那似陈王意，空随乐府篇。

卷 466_15【太学创置石经】

薛存诚

圣唐复古制，德义功无替。奥旨悦诗书，遗文分篆隶。
银钩互交映，石壁靡尘翳。永与乾坤期，不逐日月逝。
儒林道益广，学者心弥锐。从此理化成，恩光遍遐裔。

卷 466_16【观南郊回仗】

· 全唐诗 ·

薛存诚

传警千门寂，南郊彩仗回。但惊龙再见，谁识日双开。
德泽施云雨，恩光变烬灰。阅兵貔武振，听乐凤凰来。
候刻移宸辇，遵时集观台。多惭远臣贱，不得礼容陪。

卷 466_17【闻击壤】

薛存诚

尧年听野老，击壤复何云。自谓欢由己，宁知德在君。
气平闲易畅，声贺作难分。耕凿方随日，恩威比望云。
箕桴均下调，和木等南薰。无落于吾事，谁将帝已闻。

卷 466_18【膏泽多丰年】

薛存诚

帝德方多泽，莓莓井径同。八方甘雨布，四远报年丰。
廩庾千厢在，幽流万壑通。候时勤稼穡，击壤乐农功。
畎亩人无惰，田庐岁不空。何须忧伏腊，千载贺尧风。

卷 466_19【东都父老望幸】

· 全唐诗 ·

薛存诚

銮舆秦地久，羽卫洛阳空。彼土虽凭固，兹川乃得中。
龙颜覲白日，鹤发仰清风。望幸诚逾邈，怀来意不穷。
昔因封泰岳，今伫蹑维嵩。天地心无异，神祇理亦同。
翠华翔渭北，玉检候关东。众愿其难阻，明君早勒功。

卷 466_20 【嵩山望幸】

薛存诚

峻极位何崇，方知造化功。降灵逢圣主，望幸表维嵩。
隐映连青壁，嵯峨向碧空。象车因叶瑞，龙驾愿升中。
万岁声长在，千岩气转雄。东都歌盛事，西笑伫皇风。

卷 466_21 【华清宫望幸】

薛存诚

骊岫接新丰，嵯峨驾碧空。凿山开秘殿，隐雾蔽仙宫。
绛阙犹栖凤，雕梁尚带虹。温泉曾浴日，华馆旧迎风。
肃穆瞻云辇，深沉闭绮栊。东郊望幸处，瑞气霭濛濛。

卷 466_22 【谒见日将至双阙】

· 全唐诗 ·

薛存诚

晓色临双阙，微臣礼位陪。远惊龙凤睹，谁识冕旒开。
蔼蔼千年盛，颙颙万国来。天文标日月，时令布云雷。
迥出黄金殿，全分白玉台。雕虫竟何取，瞻恋不知回。

卷 466_23【南至日隔仗望含元殿炉香】

裴次元

冕旒初负宸，卉服尽朝天。旸谷初移日，金炉渐起烟。
芬馨流远近，散漫入貂蝉。霜仗凝逾白，朱栏映转鲜。
始看浮阙在，稍见逐风迁。为沐皇家庆，来瞻羽卫前。

卷 466_24【律中应钟】

裴次元

律穷方数寸，室暗在三重。伶管灰先动，秦正节已逢。
商声辞玉笛，羽调入金钟。密叶翻霜彩，轻冰敛水容。
望鸿南去绝，迎气北来浓。愿托无凋性，寒林自比松。

卷 466_25【赋得亚父碎玉斗】

· 全唐诗 ·

裴次元

雄谋竟不决，宝玉将何爱。倏尔霜刃挥，飒然春冰碎。
飞光动旗帜，散响惊环珮。霜浓绣帐前，星流锦筵内。
图王业已失，为虏言空悔。独有青史中，英风冠千载。

卷 466_26【句】

裴次元

积高依郡城，迥拔凌霄汉。

卷 466_27【并州路】

李宣远

秋日并州路，黄榆落故关。孤城吹角罢，数骑射雕还。
帐幕遥临水，牛羊自下山。征人正垂泪，烽火起云间。

卷 466_28【近无西耗】

李宣远

远戎兵压境，迁客泪横襟。烽堠惊秦塞，囚居困越吟。

· 全唐诗 ·

自怜牛马走，未识犬羊心。一月无消息，西看日又沉。

卷 466_29【曲江亭望慈恩寺杏园花发】

李君何

春晴凭水轩，仙杏发南园。开蕊风初晓，浮香景欲暄。
光华临御陌，色相对空门。野雪遥添净，山烟近借繁。
地闲分鹿苑，景胜类桃源。况值新晴日，芳枝度彩鸳。

卷 466_30【除夜书情】

周弘亮

何处风尘岁，云阳古驿前。三冬不再稔，晓日又明年。
春入江南柳，寒归塞北天。还伤知候客，花景对韦编。

卷 466_31【曲江亭望慈恩寺杏园花发】

周弘亮

江亭闲望处，远近见秦源。古寺迟春景，新花发杏园。
萼中轻蕊密，枝上素姿繁。拂雨云初起，含风雪欲翻。
容辉明十地，香气遍千门。愿莫随桃李，芳菲不为言。

· 全唐诗 ·

卷 466_32 【故乡除夜】

周弘亮

三百六十日云终，故乡还与异乡同。非唯律变情堪恨，
抑亦才疏命未通。何处夜歌销腊酒，谁家高烛候春风。
诗成始欲吟将看，早是去年牵课中。

卷 466_33 【曲江亭望慈恩寺杏园花发】

陈翥

曲江晴望好，近接梵王家。十亩开金地，千林发杏花。
映雪犹误雪，煦日欲成霞。紫陌传香远，红泉落影斜。
园中春尚早，亭上路非赊。芳景堪游处，其如惜物华。

卷 466_34 【曲江亭望慈恩寺杏园花发】

曹著

渚亭临净域，凭望一开轩。晚日分初地，东风发杏园。
异香飘九陌，丽色映千门。照灼瑶华散，葳蕤玉露繁。
未教游妓折，乍听早莺喧。谁复争桃李，含芳自不言。

· 全唐诗 ·

卷 466_35 【鱼上冰】

王公亮

春生寒气减，稍动久潜鱼。乍喜东风至，来看曲岸初。
出冰朱鬣见，望日锦鳞舒。渐觉流澌近，还欣掉尾余。
噉喙情自乐，沿溯意宁疏。倘得随鲲化，终能上太虚。

卷 466_36 【赋得竹箭有筠】

张仲方

东南生绿竹，独美有筠箭。枝叶讵曾凋，风霜孰云变。
偏宜林表秀，多向岁寒见。碧色乍葱茏，清光常蒨练。
皮开凤彩出，节劲龙文现。爰此守坚贞，含歌属时彦。

卷 466_37 【赠毛仙翁】

张仲方

毛仙翁，毛仙翁，容貌常如二八童。几岁头梳云鬓绿，
无时面带桃花红。眼前人世阅沧海，肘后药成辞月宫。
方口秀眉编贝齿，了然灵灵双瞳子。芝椿禀气本坚强，
龟鹤计年应不死。四海五山长独游，矜贫傲富欺王侯。

· 全唐诗 ·

灵通指下砖甃化，瑞气炉中金玉流。定是烟霞列仙侣，
暂来尘俗救危苦。紫霞妖女琼华飞，秘法虔心传付与。
阴功足，阴功成，羽驾何年归上清。待我休官了婚嫁，
桃源洞里觅仙兄。

卷 466_38 【句】

张仲方

入门池色静，登阁雨声来。

卷 466_39 【和白乐天】

崔玄亮

病余归到洛阳头，拭目开眉见白侯。凤诏恐君今岁去，
龙门欠我旧时游。几人樽下同歌咏，数盏灯前共献酬。
相对忆刘刘在远，寒宵耿耿梦长洲。

卷 466_40 【临终诗】

崔玄亮

暂荣暂悴石敲火，即空即色眼生花。

· 全唐诗 ·

许时为客今归去，大历元年是我家。

卷 466_41 【句】

崔玄亮

共相呼唤醉归来。

卷 466_42 【省试临渊羡鱼】

徐牧

清泚濯缨处，今来喜一临。惭无下钓处，空有羡鱼心。
退省时频改，谋身岁屡沉。鬣成川上媚，网就水宁深。
赅尾临波里，朱须破浪寻。此时倘不漏，江上免行吟。

卷 466_43 【淮南游故居感旧，酬西川李尚书德裕】

王播

昔年献赋去江湄，今日行春到却悲。三径仅存新竹树，
四邻惟见旧孙儿。壁间潜认偷光处，川上宁忘结网时。
更见桥边记名姓，始知题柱免人嗤。

· 全唐诗 ·

卷 466_44 【题木兰院二首】

王播

三十年前此院游，木兰花发院新修。
如今再到经行处，树老无花僧白头。

上堂已了各西东，惭愧闍黎饭后钟。
三十年来尘扑面，如今始得碧纱笼。

卷 466_45 【上巳接清明游宴】

独孤良弼

上巳欢初罢，清明赏又追。闰年侵旧历，令节并芳时。
细雨莺飞重，春风酒酝迟。寻花迷白雪，看柳拆青丝。
淑气如相待，天和意为谁。吁嗟名未立，空咏宴游诗。

卷 466_46 【次潭州，酬唐侍御、姚员外游道林岳麓寺题示】

沈传师

承明年老辄自论，乞得湘守东南奔。为闻楚国富山水，
青嶂迢迢僧家园。含香珥笔皆眷旧，谦抑自忘台省尊。

· 全唐诗 ·

不令执简候亭馆，直许携手游山樊。忽惊列岫晓来逼，
朔雪洗尽烟岚昏。碧波回屿三山转，丹槛缭郭千艘屯。
华镳躞蹀绚砂步，大旆彩错辉松门。樛枝竞骛龙蛇势，
折干不灭风霆痕。相重古殿倚岩腹，别引新径萦云根。
目伤平楚虞帝魂，情多思远聊开樽。危弦细管逐歌飘，
画鼓绣靴随节翻。锵金七言凌老杜，入木八法蟠高轩。
嗟余潦倒久不利，忍复感激励元元。

卷 466_47【和李德裕观玉蕊花见怀之作】

沈传师

曾对金銮直，同依玉树阴。雪英飞舞近，烟叶动摇深。
素萼年年密，衰容日日侵。劳君想华发，近欲不胜簪。

卷 466_48【赠毛仙翁】

沈传师

安期何事出云烟，为把仙方与世传。只向人间称百岁，
谁知洞里过千年。青牛到日迎方朔，丹灶开时共稚川。
更说桃源更深处，异花长占四时天。

卷 466_49【寄大府兄侍史】

· 全唐诗 ·

沈传师

积雪山阴马过难，残更深夜铁衣寒。
将军破了单于阵，更把兵书仔细看。

卷 466_50【蒙泉】

沈传师

京路马駸駸，尘劳日向深。蒙泉聊息驾，可以洗君心。

卷 466_51【春从何处来】

白行简

欲识春生处，先从木德来。入门潜报柳，度岭暗惊梅。
透雪寒光散，消冰水镜开。晓迎郊骑发，夜逐斗杓回。
淑气空中变，新声雨后催。偏宜资律吕，应是候阳台。

卷 466_52【贡院楼北新栽小松】

白行简

华省春霜曙，楼阴植小松。移根依厚地，委质别危峰。

· 全唐诗 ·

北户知犹远，东堂幸见容。心坚终待鹤，枝嫩未成龙。
夜影看仍薄，朝岚色渐浓。山苗不可荫，孤直俟秦封。

卷 466_53【金在熔】

白行简

巨橐方熔物，洪炉欲范金。紫光看渐发，赤气望逾深。
焰热晴云变，烟浮昼景阴。坚刚由我性，鼓铸任君心。
踊跃徒标异，沈潜自可钦。何当得成器，待叩向知音。

卷 466_54【归马华山】

白行简

牧野功成后，周王战马闲。驱驰休伏皂，饮齕任依山。
逐日朝仍去，随风暮自还。冰生疑陇坂，叶落似榆关。
蹉跎仙峰下，腾骧渭水湾。幸逢时偃武，不复鼓鞞间。

卷 466_55【夫子鼓琴得其人】

白行简

宣父穷玄奥，师襄授素琴。稍殊流水引，全辨圣人心。

· 全唐诗 ·

慕德声逾感，怀人意自深。泠泠传妙手，撼撼振空林。
促调清风至，操弦白日沈。曲终情不尽，千古仰知音。

卷 466_56【李都尉重阳日得苏属国书】

白行简

降虏意何如，穷荒九月初。三秋异乡节，一纸故人书。
对酒情无极，开缄思有余。感时空寂寞，怀旧几踌躇。
雁尽平沙迥，烟销大漠虚。登台南望处，掩泪对双鱼。

卷 466_57【在巴南望郡南山呈乐天】

白行简

临江一嶂白云间，红绿层层锦绣班。
不作巴南天外意，何殊昭应望骊山。

卷 466_58【春云】

裴澄

漠漠复溶溶，乘春任所从。映林初展叶，触石未成峰。
旭日消寒翠，晴烟点净容。霏微将似灭，深浅又如重。

· 全唐诗 ·

薄彩临溪散，轻阴带雨浓。空余负樵者，岭上自相逢。

卷 466_59【赋得沽美玉】

罗立言

谁怜被褐士，怀玉正求沽。成器终期达，逢时岂见诬。
宝同珠照乘，价重剑论都。浮彩朝虹满，悬光夜月孤。
几年沦瓦砾，今日出泥涂。采斫资良匠，无令瑕掩瑜。

卷 466_60【寒食遣怀】

张灿

繁华泣清露，悄悄落衣巾。明日逢寒食，春风见故人。
病来羞滞楚，西去欲迷秦。憔悴此时久，青山归四邻。

· 全唐诗 ·

第四百六十七卷

卷 467_1 【春日山亭】

牟融

醉来重整华阳巾，搔首惊看白发新。莫道愁多因病酒，
只缘命薄不辞贫。龙鱼失水难为用，龟玉蒙尘未见珍。
正是圣朝全盛日，诮知林下有闲人。

卷 467_2 【寄周韶州】

牟融

十年学道困穷庐，空有长才重老儒。功业要当垂永久，
利名那得在须臾。山中荆璞谁知玉，海底骊龙不见珠。
寄语故人休怅快，古来贤达事多殊。

卷 467_3 【秋夜醉归，有感而赋】

牟融

· 全唐诗 ·

衔杯谁道易更阑，沉醉归来不自欢。惆怅后时孤剑冷，
寂寥无寐一灯残。竹窗凉雨鸣秋籁，江郭清砧捣夜寒。
多少客怀消不得，临风搔首浩漫漫。

卷 467_4【寄范使君】

牟融

未秋为别已终秋，咫尺娄江路阻修。心上惟君知委曲，
眼前独我逐漂流。从来姑息难为好，到底依栖总是讎。
西望家山成浩叹，临风搔首不胜愁。

卷 467_5【送罗约】

牟融

雨晴江馆柳依依，握手那堪此别离。独鹤孤琴随远旆，
红亭绿酒惜分岐。月明野店闻鸡早，花暗关城匹马迟。
后夜定知相忆处，东风回首不胜悲。

卷 467_6【题李昭训山水】

牟融

· 全唐诗 ·

卜筑藏修地自偏，尊前诗酒集群贤。半岩松暝时藏鹤，
一枕秋声夜听泉。风月谩劳酬逸兴，渔樵随处度流年。
南州人物依然在，山水幽居胜辋川。

卷 467_7【处厚游杭，作诗寄之】

牟融

江村摇落暂逢秋，况是闻君独远游。浙水风烟思吊古，
楚乡人物赋登楼。书沈寒雁云边影，梦绕清猿月下愁。
念我故人劳碌久，不如投老卧沧洲。

卷 467_8【山中有怀李十二】

牟融

林前风景晚苍苍，林下怀人路杳茫。白发流年淹旧业，
碧山茅屋卧斜阳。客边秋兴悲张翰，病里春情笑沈郎。
何事登楼望平野，几回搔首思归。

卷 467_9【客中作】

牟融

· 全唐诗 ·

异乡岁晚怅离怀，游子驱驰愧不才。夜夜砧声催客去，
年年雁影带寒来。半林残叶迎霜落，三径黄花近节开。
几度无聊倍惆怅，临风搔首独兴哀。

卷 467_10【山寺律僧画兰竹图】

牟融

偶来绝顶兴无穷，独有山僧笔最工。绿径日长袁户在，
紫荃秋晚谢庭空。离花影度湘江月，遗珮香生洛浦风。
欲结岁寒盟不去，忘机相对画图中。

卷 467_11【送客之杭】

牟融

西风吹冷透貂裘，行色匆匆不暂留。帆带夕阳投越浦，
心随明月到杭州。风清听漏惊乡梦，灯下闻歌乱别愁。
悬想到杭州兴地，尊前应与话离忧。

卷 467_12【有感二首】

牟融

· 全唐诗 ·

何事离怀入梦频，贫居寂寞四无邻。诗因韵险难成律，
酒为愁多不顾身。眼底故人惊岁别，尊前华发逐时新。
十年飘泊如萍迹，一度登临一怅神。

搔首临风独倚栏，客边惊觉岁华残。栖迟未遇常鉤荐，
邂逅宁弹贡禹冠。有兴不愁诗韵险，无聊只怕酒杯乾。
何如日日长如醉，付与诗人一笑看。

卷 467_13【送沈侯之京】

牟融

悠悠旌旆出东楼，特出仙郎上帝州。刘晏才高能富国，
萧何人杰足封侯。关河弱柳垂金缕，水驿青帘拂画楼。
欲尽故人尊酒意，春风江上暂停舟。

卷 467_14【寄羽士】

牟融

别来有路隔仙凡，几度临风欲去难。乐道无时忘鹤伴，
谈玄何日到星坛。山中胜景常留客，林下清风好炼丹。
使我浮生尘鞅脱，相从应得一盘桓。

· 全唐诗 ·

卷 467_15 【题赵支】

牟融

林间曲径掩衡茅，绕屋青青翡翠梢。一枕秋声鸾舞月，
半窗云影鹤归巢。曾闻贾谊陈奇策，肯学扬雄赋解嘲。
我有清风高节在，知君不负岁寒交。

卷 467_16 【司马迁墓】

牟融

落落长才负不羁，中原回首益堪悲。英雄此日谁能荐，
声价当时众所推。一代高风留异国，百年遗迹剩残碑。
经过词客空惆怅，落日寒烟赋黍离。

卷 467_17 【春游】

牟融

锦袍日暖耀冰蚕，上客陪游酒半酣。笑拂吟鞭邀好兴，
醉欹乌帽逞雄谈。楼前弱柳摇金缕，林外遥山隔翠岚。
正是太平行乐处，春风花下且停骖。

· 全唐诗 ·

卷 467_18 【水西草堂】

牟融

萝径萧然曲业存，闲云流水四无邻。身留白屋潜踪迹，
门 吟学隐沦。吟对琴尊江上月，笑看花木镜中春。
遗书自有亲 处，何必驱驰扰世尘。

卷 467_19 【送羽衣之京】

牟融

羽衣缥缈拂尘嚣，怅别河梁赠柳条。阆苑云深孤鹤迥，
蓬莱天近一身遥。香浮宝辇仙风润，花落瑶坛绛雨消。
自是长生林下客，也陪鸳鹭入清朝。

卷 467_20 【题道院壁】

牟融

山中旧宅四无邻，草净云和迥绝尘。神枣胡麻能饭客，
桃花流水荫通津。星坛火伏烟霞暝，林壑春香鸟雀驯。
若使凡缘终可脱，也应从此度闲身。

· 全唐诗 ·

卷 467_21 【赠欧阳詹】

牟融

为客囊无季子金，半生踪迹任浮沉。服勤因念劬劳重，
思养徒怀感慨深。岛外断云凝远日，天涯芳草动愁心。
家林千里遥相忆，几度停车一怅吟。

卷 467_22 【邵公母】

牟融

搔首惊闻楚些歌，拂衣归去泪悬河。劬劳常想三春恨，
思养其如寸草何。浙水梦怀千里远，苏台愁望白云多。
伤心独有黄堂客，几度临风咏蓼莪。

卷 467_23 【客中作】

牟融

千里云山恋旧游，寒窗凉雨夜悠悠。浮亭花竹频劳梦，
别路风烟半是愁。芳草傍人空对酒，流年多病倦登楼。
一杯重向樽前醉，莫遣相思累白头。

· 全唐诗 ·

卷 467_24 【赠杨处厚】

牟融

十年学道苦劳神，赢得尊前一病身。天上故人皆自贵，
山中明月独相亲。客心淡泊偏宜静，吾道从容不厌贫。
几度临风一回首，笑看华发及时新。

卷 467_25 【重赠张籍】

牟融

旧日仪容只宛然，笑谈不觉度流年。凡缘未了嗟无子，
薄命能孤不怨天。一醉便同尘外客，百杯疑是酒中仙。
人生随处堪为乐，管甚秋香满鬓边。

卷 467_26 【赠殷以道】

牟融

世路红尘懒步趋，长年结屋傍岩隅。独留乡井诚非隐，
老向山林不自愚。肯信白圭终在璞，谁怜沧海竟遗珠。
闲来抚景穷吟处，尊酒临风不自娱。

· 全唐诗 ·

卷 467_27【翁母些】

牟融

满头华发向人垂，长逝音容迥莫追。先垄每怀风木夜，
画堂无复彩衣时。停车遥望孤云影，翘首惊看吊鹤悲。
独有贤人崇孝义，伤心共咏蓼莪诗。

卷 467_28【题山庄】

牟融

萝屋萧萧事事幽，临风搔首远凝眸。东园松菊存遗业，
晚景桑榆乐旧游。吟对清尊江上月，笑谈华发镜中秋。
床头浊酒时时漉，上客相过一任留。

卷 467_29【沈存尚林亭夜宴】

牟融

草堂寂寂景偏幽，到此令人一纵眸。松菊寒香三径晚，
桑榆烟景两淮秋。近山红叶堆林屋，隔浦青帘拂画楼。
终日忘情能自乐，清尊应得遣闲愁。

· 全唐诗 ·

卷 467_30 【题孙君山亭】

牟融

长年乐道远尘氛，静筑藏修学隐沦。吟对琴樽庭下月，
笑看花木槛前春。闲来欲著登山屐，醉里还披漉酒巾。
林壑能忘轩冕贵，白云黄鹤好相亲。

卷 467_31 【题徐俞山居】

牟融

青山重叠巧裁攒，引水流泉夜激湍。岚锁岩扉清昼暝，
云归松壑翠阴寒。不因李相门前见，曾向袁生画里看。
老我不堪诗思杳，几回吟倚曲栏干。

卷 467_32 【送范启东还京】

牟融

萧萧行李上征鞍，满目离情欲去难。客里故人尊酒别，
天涯游子弊裘寒。官桥杨柳和愁折，驿路梅花带雪看。
重到京华旧游处，春风佳丽好盘桓。

· 全唐诗 ·

卷 467_33 【楼城叙别】

牟融

故人为客上神州，倾盖相逢感昔游。屈指年华嗟远别，
对床风雨话离愁。清樽不负花前约，白发惊看镜里秋。
此际那堪重分手，绿波芳草暂停舟。

卷 467_34 【写意二首】

牟融

寂寥荒馆闭闲门，苔径阴阴屐少痕。白发颠狂尘梦断，
青毡冷落客心存。高山流水琴三弄，明月清风酒一樽。
醉后曲肱林下卧，此生荣辱不须论。

萧萧华发满头生，深远蓬门倦送迎。独喜冥心无外慕，
自怜知命不求荣。闲情欲赋思陶令。卧病何人问马卿。
林下贫居甘困守，尽教城市不知名。

卷 467_35 【赠浙西李相公】

牟融

· 全唐诗 ·

长庚烈烈独遥天，盛世应知降谪仙。月里昔曾分兔药，
人间今喜得椿年。文章政事追先达，冠盖声华羨昔贤。
尊酒与君称寿毕，春风入醉绮罗筵。

卷 467_36【天台】

牟融

碧溪流水泛桃花，树绕天台迥不赊。洞里无尘通客境，
人间有路入仙家。鸡鸣犬吠三山近，草静云和一径斜。
此地不知何处去，暂留琼珮卧烟霞。

卷 467_37【送陈衡】

牟融

秋江烟景晚苍苍，江上离人促去航。千里一官嗟独往，
十年双鬓付三霜。云迷楼曲亲庭远，梦绕通山客路长。
不必临风悲冷落，古来白首尚为郎。

卷 467_38【送沈翔】

牟融

· 全唐诗 ·

江上西风一棹归，故人此别会应稀。清朝尽道无遗逸，
当路谁曾访少微。谩有才华嗟未达，闲寻鸥鸟暂忘机。
临歧不用空惆怅，未必新丰老布衣。

卷 467_39【过蠡湖】

牟融

东湖烟水浩漫漫，湘浦秋声入夜寒。风外暗香飘落粉，
月中清影舞离鸾。多情袁尹频移席，有道乔仙独倚阑。
几度篝帘相对处，无边诗思到吟坛。

卷 467_40【登环翠楼】

牟融

山中地僻好藏修，寂寂幽居架小楼。云树四围当户暝，
烟岚一带隔帘浮。举杯对月邀诗兴，抚景令人豁醉眸。
我亦人间肥遁客，也将踪迹寄林丘。

卷 467_41【游淮云寺】

牟融

· 全唐诗 ·

白云深锁沃州山，冠盖登临众仰攀。松径风清闻鹤唳，
昙花香暝见僧还。玄机隐隐应难觉，尘事悠悠了不关。
兴尽凡缘因未晚，裴回依旧到人间。

卷 467_42【游报本寺】

牟融

山房寂寂荜门开，此日相期社友来。雅兴共寻方外乐，
新诗争羨郢中才。茶烟袅袅笼禅榻，竹影萧萧扫径苔。
醉后不知明月上，狂歌直到夜深回。

了然尘事不相关，锡杖时时独看山。白发任教双鬓改，
黄金难买一生闲。不留活计存囊底，赢得诗名满世间。
自笑微躯长碌碌，几时来此学无还。

卷 467_43【题陈侯竹亭】

牟融

曾向幽亭一榻分，清风满座绝尘氛。丹山凤泣钩帘听，
沧海龙吟对酒闻。漠漠暝阴笼砌月，盈盈寒翠动湘云。
岁寒高节谁能识，独有王猷爱此君。

· 全唐诗 ·

卷 467_44 【送报本寺分韵得通字】

牟融

几度乘闲谒梵宫，此郎声价重江东。贵侯知重曾忘势，
闲客频来也悟空。满地新蔬和雨绿，半林残叶带霜红。

，

。

卷 467_45 【寄永平友人】

牟融

故人千里隔天涯，几度临风动远思。贾谊上书曾伏阙，
仲舒陈策欲匡时。高风落落谁同调，往事悠悠我独悲。
何日归来话畴昔，一樽重叙旧襟期。

朔风猎猎惨寒沙，关月寥寥咽暮笳。放逐一心终去国，
驱驰千里未还家。青蝇点玉原非病，沧海遗珠世所嗟。
直道未容淹屈久，暂劳踪迹寄天涯。

卷 467_46 【陈使君山庄】

牟融

· 全唐诗 ·

新卜幽居地自偏，士林争羨使君贤。数椽潇洒临溪屋，
十亩膏腴附郭田。流水断桥芳草路，淡烟疏雨落花天。
秋成准拟重来此，沉醉何妨一榻眠。

卷 467_47【题寺壁】

牟融

僧家胜景瞰平川，雾重岚深马不前。宛转数声花外鸟，
往来几叶渡头船。青山远隔红尘路，碧殿深笼绿树烟。
闻道此中堪遁迹，肯容一榻学逃禅。

卷 467_48【送徐浩】

牟融

渡口潮平促去舟，莫辞尊酒暂相留。弟兄聚散云边雁，
踪迹浮沉水上鸥。千里好山青入楚，几家深树碧藏楼。
知君此去情偏切，堂上椿萱雪满头。

卷 467_49【谢惠剑】

牟融

· 全唐诗 ·

感君三尺铁，挥擢鬼神惊。浩气中心发，雄风两腋生。
犬戎从此灭，巢穴不时平。万里横行去，封侯赖有成。

卷 467_50 【送僧】

牟融

梵王生别思，之子事遐征。烟水浮杯渡，云山只履行。
三生尘梦醒，一锡衲衣轻。此去家林近，飘飘物外情。

卷 467_51 【送友人】

牟融

有客棹扁舟，相逢不暂留。衣冠重文物，诗酒足风流。
官路生归兴，家林想旧游。临岐分手后，乘月过苏州。

卷 467_52 【题朱庆余闲居四首】

牟融

潇洒藏修处，琴书与画图。白丁门外远，俗子眼前无。
楚楚临轩竹，青青映水蒲。道人能爱静，诸事近清枯。

· 全唐诗 ·

尽日衡门闭，苍苔一径新。客心非厌静，悟道不忧贫。
白屋悬尘榻，清樽忆故人。近来疏懒甚，诗债后吟身。

闲客幽栖处，潇然一草庐。路通元亮宅，门对子云居。
按剑心犹壮，琴书乐有余。黄金都散尽，收得邺侯书。

寂寥荒馆下，投老欲何为。草色凝陈榻，书声出董帷。
闲云长作伴，归鹤独相随。才薄知无用，安贫不自危。

卷 467_53【寄张源】

牟融

咫尺西江路，悲欢暂莫闻。青年俱未达，白社独离群。
曲径荒秋草，衡茅掩夕曛。相思不相见，愁绝赋停云。

卷 467_54【题竹】

牟融

潇洒碧玉枝，清风追晋贤。数点渭川雨，一缕湘江烟。
不见凤凰尾，谁识珊瑚鞭。柯亭丁相遇，惊听奏钧天。

卷 467_55【有感】

· 全唐诗 ·

牟融

盛世嗟沉伏，中情快未舒。途穷悲阮籍，病久忆相如。
无客空尘榻，闲门闭草庐。不胜岑绝处，高卧半床书。

卷 467_56【题山房壁】

牟融

珠林春寂寂，宝地夜沉沉。玄奥凝神久，禅机入妙深。
参同大块理，窥测至人心。定处波罗蜜，须从物外寻。

卷 467_57【访请上人】

牟融

曲径绕丛林，钟声杂梵音。松风吹定衲，萝月照禅心。
抚景吟行远，谈玄入悟深。不能尘鞅脱，聊复一登临。

卷 467_58【送范启东】

牟融

杨柳春江上，东风一棹轻。行囊归客兴，尊酒故人情。

· 全唐诗 ·

画史名当代，声华重两京。临岐分手处，无奈别离生。

卷 467_59【客中作】

牟融

十年江汉客，几度帝京游。迹比风前叶，身如水上鸥。
醉吟愁里月，羞对镜中秋。怅望频回首，西风忆故丘。

卷 467_60【赠韩翃】

牟融

京国久知名，江河近识荆。不辞今日醉，便有故人情。
细雨孤鸿远，西风一棹轻。暂时分手去，应不负诗盟。

卷 467_61【禁烟作】

牟融

柳拖金缕拂朱栏，花扑香尘满绣鞍。
尊酒临风酬令节，越罗衣薄觉春寒。

· 全唐诗 ·

卷 467_62【闽中回】

牟融

帆影随风过富阳，橹声摇月下钱塘。
千山积雪凝寒碧，梦入枫宸绕御床。

· 全唐诗 ·

第四百六十八卷

卷 468_1 【苦妇词】

刘言史

地远易骄崇，用刑匪精研。哀哉苦妇身，夫死百殃缠。
草草催出门，衣堕发披肩。独随军吏行，当夕余欲迁。
来时已厌生，到此自不全。临江卧黄砂，二子死在边。
气啜不发声，背头血涓涓。有时强为言，只是尤青天。
稿蓐无一枝，冷气两悬悬。穷荒夷教卑，骨肉病弃捐。
况非本族音，肌露谁为怜。事痛感行宾，住得贪程船。
必当负严法，岂有胎孕篇。游畋复释麋，羔兔尚免鹯。
何处宾逐深，一罪三见颠。校尉勋望重，幕府才且贤。
兰裙间珠履，食玉处花筵。但勿轻所暗，莫虑无人焉。

卷 468_2 【与孟郊洛北野泉上煎茶】

刘言史

粉细越笋芽，野煎寒溪滨。恐乖灵草性，触事皆手亲。
敲石取鲜火，撇泉避腥鳞。荧荧爨风铛，拾得坠巢薪。

· 全唐诗 ·

洁色既爽别，浮氲亦殷勤。以兹委曲静，求得正味真。
宛如摘山时，自歎指下春。湘瓷泛轻花，涤尽昏渴神。
此游惬醒趣，可以话高人。

卷 468_3【七夕歌】

刘言史

星寥寥兮月细轮，佳期可想兮不可亲。云衣香薄妆态新，
彩輶悠悠度天津。玉幌相逢夜将极，妖红惨黛生愁色。
寂寞低容入旧机，歇著金梭思往夕。人间不见因谁知，
万家闺艳求此时。碧空露重彩盘湿，花上乞得蜘蛛丝。

卷 468_4【立秋日】

刘言史

商风动叶初，萧索一贫居。老性容茶少，羸肌与簟疏。
旧醅难重漉，新菜未胜鉏。才薄无潘兴，便便画偃庐。

卷 468_5【题茅山仙台药院】

刘言史

· 全唐诗 ·

扰扰浮生外，华阳一洞春。道书金字小，仙圃玉苗新。
芝草迎飞燕，桃花笑俗人。楼台争耸汉，鸡犬亦嫌秦。
愿得青芽散，长年驻此身。

卷 468_6【送婆罗门归本国】

刘言史

刹利王孙字迦摄，竹锥横写叱萝叶。遥知汉地未有经，
手牵白马绕天行。龟兹磧西胡雪黑，大师冻死来不得。
地尽年深始到船，海里更行三十国。行多耳断金环落，
冉冉悠悠不停脚。马死经留却去时，往来应尽一生期。
出漠独行人绝处，磧西天漏雨丝丝。

卷 468_7【潇湘游】

刘言史

夷女采山蕉，缙纱浸江水。野花满髻妆色新，
闲歌欵乃深峡里。欵乃知从何处生，当时泣舜肠断声。
翠华寂寞婵娟没，野筱空余红泪情。青烟冥冥覆杉桂，
崖壁凌天风雨细。昔人幽恨此地遗，绿芳红艳含怨姿。
清猿未尽鼯鼠切，泪水流到湘妃祠。北人莫作潇湘游，
九疑云入苍梧愁。

· 全唐诗 ·

卷 468_8 【放萤怨】

刘言史

放萤去，不须留，聚时年少今白头。架中科斗万馀卷，
一字千回重照见。青云杳渺不可亲，开囊欲放增余怨。
且逍遥，还酩酊，仲舒漫不窥园井。那将寂寞老病身，
更就微虫借光影。欲放时，泪沾裳。冲篱落，千点光。

卷 468_9 【观绳伎】

刘言史

泰陵遗乐何最珍，彩绳冉冉天仙人。广场寒食风日好，
百夫伐鼓锦臂新。银画青绡抹云发，高处绮罗香更切。
重肩接立三四层，著屐背行仍应节。两边丸剑渐相迎，
侧身交步何轻盈。闪然欲落却收得，万人肉上寒毛生。
危机险势无不有，倒挂纤腰学垂柳。下来一一芙蓉姿，
粉薄钿稀态转奇。坐中还有沾巾者，曾见先皇初教时。

卷 468_10 【买花谣】

刘言史

· 全唐诗 ·

杜陵村人不田穡，入谷经谿复缘壁。每至南山草木春，
即向侯家取金碧。幽艳凝华春景曙，林夫移得将何处。
蝶惜芳丛送下山，寻断孤香始回去。豪少居连鵷鹊东，
千金使买一株红。院多花少栽未得，零落绿娥纤指中。
咸阳亲戚长安里，无限将金买花子。浇红湿绿千万家，
青丝玉轭声哑哑。

卷 468_11【王中丞宅夜观舞胡腾】

刘言史

石国胡儿人见少，蹲舞尊前急如鸟。织成蕃帽虚顶尖，
细氎胡衫双袖小。手中抛下蒲萄盏，西顾忽思乡路远。
跳身转毂宝带鸣，弄脚缤纷锦靴软。四座无言皆瞪目，
横笛琵琶遍头促。乱腾新毯雪朱毛，傍拂轻花下红烛。
酒阑舞罢丝管绝，木槿花西见残月。

卷 468_12【竹里梅】

刘言史

竹里梅花相并枝，梅花正发竹枝垂。
风吹总向竹枝上，直似王家雪下时。

· 全唐诗 ·

卷 468_13【春过赵墟】

刘言史

下马邯郸陌头歇，寂寥崩隧临车辙。古柏重生枝亦乾，
馀燎见风幽焰灭。白蒿微发紫槿新，行人感此复悲春。

卷 468_14【初下东周赠孟郊】

刘言史

鹤老身更印，龟死壳亦灵。正信非外沿，终始全本情。
童子不戏尘，积书就岩扃。身著木叶衣，养鹿兼犴耕。
偶随下山云，荏苒失故程。渐入机险中，危思难太行。
十发九缕丝，悠然东周城。言词野麋态，出口多累形。
因依汉元寮，未似羁细轻。冷灶助新热，静砧与寒声。
断蓬在门栏，岂当桃李荣。寄食若蠹虫，侵损利微生。
固非拙为强，懦劣外疗并。素坚冰蘖心，洁持保坚贞。
修文返正风，刊字齐古经。惭将衰末分，高栖喧世名。

卷 468_15【过春秋峡】

刘言史

· 全唐诗 ·

峭壁苍苍苔色新，无风晴景自胜春。
不知何树幽崖里，腊月开花似北人。

卷 468_16 【长门怨】

刘言史

独坐炉边结夜愁，暂时思去亦难留。
手持金箸垂红泪，乱拨寒灰不举头。

卷 468_17 【春游曲】

刘言史

花钿红鬃一何偏，绿槐香陌欲朝天。
仍嫌众里娇行疾，傍镫深藏白玉鞭。

喷沫团香小桂条，玉鞭兼赐霍嫖姚。
弄影便从天禁出，碧蹄声碎五门桥。

卷 468_18 【广州王园寺伏日即事寄北中亲友】

刘言史

· 全唐诗 ·

南越逢初伏，东林度一朝。曲池煎畏景，高阁绝微飙。
竹簟移先洒，蒲葵破复摇。地偏毛瘴近，山毒火威饶。
裊汗絺如濯，亲床枕并烧。坠枝伤翠羽，萎叶惜红蕉。
且困流金炽，难成独酌谣。望霖窥润础，思吹候生条。
旅恨生乌浒，乡心系洛桥。谁怜在炎客，一夕壮容销。

卷 468_19【立秋】

刘言史

兹晨戒流火，商飊早已惊。云天收夏色，木叶动秋声。

卷 468_20【别落花】

刘言史

风艳霏霏去，羈人处处游。明年纵相见，不在此枝头。

卷 468_21【登甘露台】

刘言史

偶至无尘空翠间，雨花甘露境闲闲。
身心未寂终为累，非想天中独退还。

· 全唐诗 ·

卷 468_22 【夜泊润州江口】

刘言史

秋江欲起白头波，贾客瞻风无渡河。
千船火绝寒宵半，独听钟声觉寺多。

卷 468_23 【看山木瓜花二首】

刘言史

裊露凝氛紫艳新，千般婉娜不胜春。
年年此树花开日，出尽丹阳郭里人。

柔枝湿艳亚朱栏，暂作庭芳便欲残。
深藏数片将归去，红缕金针绣取看。

卷 468_24 【题十三弟竹园】

刘言史

绕屋扶疏耸翠茎，苔滋粉漾有幽情。
丹阳万户春光静，独自君家秋雨声。

· 全唐诗 ·

卷 468_25 【乐府杂词三首】

刘言史

紫禁梨花飞雪毛，春风丝管翠楼高。
城里万家闻不见，君王试舞郑樱桃。

蝉鬓红冠粉黛轻，云和新教羽衣成。
月光如雪金阶上，迸却颇梨义甲声。

不耐檐前红槿枝，薄妆春寝觉仍迟。
梦中无限风流事，夫婿多情亦未知。

卷 468_26 【岁暮题杨录事江亭】

刘言史

垂丝蜀客涕濡衣，岁尽长沙未得归。
肠断锦帆风日好，可怜桐鸟出花飞。

卷 468_27 【冬日峡中旅泊】

刘言史

· 全唐诗 ·

霜月明明雪复残，孤舟夜泊使君滩。
一声钟出远山里，暗想雪窗僧起寒。

卷 468_28【泊花石浦】

刘言史

旧业丛台废苑东，几年为梗复为蓬。
杜鹃啼断回家梦，半在邯郸驿树中。

卷 468_29【闻崔倚旅葬】

刘言史

远客那能返故庐，苍梧埋骨痛何如。
他时亲戚空相忆，席上同悲一纸书。

卷 468_30【赋蕃子牧马】

刘言史

磧净山高见极边，孤烽引上一条烟。
蕃落多晴尘扰扰，天军猎到鹔鹑泉。

· 全唐诗 ·

卷 468_31 【牧马泉】

刘言史

平沙漫漫马悠悠，弓箭闲抛郊水头。
鼠毛衣里取羌笛，吹向秋天眉眼愁。

卷 468_32 【越井台望】

刘言史

独立阳台望广州，更添羁客异乡愁。
晚潮未至早潮落，井邑暂依沙上头。

卷 468_33 【扶病春亭】

刘言史

强梳稀发著纶巾，舍杖空行试病身。
花间自欲裴回立，稚子牵衣不许人。

卷 468_34 【赠童尼】

· 全唐诗 ·

刘言史

旧时艳质如明玉，今日空心是冷灰。
料得襄王惆怅极，更无云雨到阳台。

卷 468_35 【读故友于君集】

刘言史

大底从头总是悲，就中偏怆筑城词。
依然想得初成日，寄出秋山与我时。

卷 468_36 【病僧二首】

刘言史

竺国乡程算不回，病中衣锡遍浮埃。
如今汉地诸经本，自过流沙远背来。

空林衰病卧多时，白发从成数寸丝。
西行却过流沙日，枕上寥寥心独知。

卷 468_37 【右军墨池】

· 全唐诗 ·

刘言史

永嘉人事尽归空，逸少遗居蔓草中。
至今池水涵余墨，犹共诸泉色不同。

卷 468_38 【送僧归山】

刘言史

楚俗翻花自送迎，密人来往岂知情。
夜行独自寒山寺，雪径泠泠金锡声。

卷 468_39 【题源分竹亭】

刘言史

绕屋扶疏千万竿，年年相诱独行看。
日光不透烟常在，先校诸家一月寒。

卷 468_40 【山寺看樱桃花题僧壁】

刘言史

楚寺春风腊尽时，含桃先坼一千枝。

· 全唐诗 ·

老僧不语旁边坐，花发人来总不知。

卷 468_41【伤清江上人】

刘言史

往年偏共仰师游，闻过流沙泪不休。
此身岂得多时住，更著尘心起外愁。

卷 468_42【山寺看海榴花】

刘言史

琉璃地上绀宫前，发翠凝红已十年。
夜久月明人去尽，火光霞焰递相燃。

卷 468_43【赠成炼师四首】

刘言史

花冠蕊帔色婵娟，一曲清箫凌紫烟。
不知今日重来意，更住人间几百年。

黄昏骑得下天龙，巡遍茅山数十峰。

· 全唐诗 ·

采芝却到蓬莱上，花里犹残碧玉钟。

等闲何处得灵方，丹脸云鬟日月长。
大罗过却三千岁，更向人间魅阮郎。

曾随阿母汉宫斋，凤驾龙輶列玉阶。
当时白燕无寻处，今日云鬟见玉钗。

卷 468_44 【上巳日陪襄阳李尚书宴光风亭】

刘言史

碧池萍嫩柳垂波，绮席丝镗舞翠娥。
为报会稽亭上客，永和应不胜元和。

卷 468_45 【奉酬】

刘言史

闰余春早景沉沉，楔饮风亭恣赏心。
红袖青娥留永夕，汉阴宁肯羨山阴。

卷 468_46 【病中客散复言怀】

· 全唐诗 ·

刘言史

华发离披卧满头，暗虫衰草入乡愁。
枕前人去空庭暮，又见芭蕉白露秋。

卷 468_47【处州月夜穆中丞席和主人】

刘言史

羌竹繁弦银烛红，月光初出柳城东。
忽见隐侯裁一咏，还须书向郡楼中。

卷 468_48【寻花】

刘言史

游春未足春将度，访紫寻红少在家。
借问流莺与飞蝶，更知何处有幽花。

卷 468_49【赠陈长史妓】

刘言史

宝钿云和玉禁仙，深含媚靥袅朱弦。

· 全唐诗 ·

春风不怕君王恨，引出幽花落外边。

卷 468_50 【题王况故居】

刘言史

入巷萧条起悲绪，儿女犹居旧贫处。
尘满空床屋见天，独作驴鸣一声去。

卷 468_51 【偶题】

刘言史

迟日新妆游冶娘，盈盈彩艇白莲塘。
掬水远湿岸边郎，红绡缕中玉钏光。

卷 468_52 【恸柳论】

刘言史

孀妻栖户仍无嗣，欲访孤坟谁引至。
裴回无处展哀情，惟有衣襟知下泪。

· 全唐诗 ·

卷 468_53【夜入简子古城】

刘言史

远火荧荧聚寒鬼，绿焰欲销还复起。
夜深风雪古城空，行客衣襟汗如水。

卷 468_54【桂江中题香顶台】

刘言史

岌岌香积凌空翠，天上名花落幽地。
老僧相对竟无言，山鸟却呼诸佛字。

卷 468_55【僧檐前独竹咏】

刘言史

乱石田中寄孤本，亭亭不住凌虚引。
欲以袈裟拂著来，一边碧玉无轻粉。

卷 468_56【送人随姊夫任云安令】

· 全唐诗 ·

刘言史

闲逐维私向武城，北风青雀片时行。
孤帆瞥过荆州岸，认得瞿塘急浪声。

卷 468_57【山中喜崔补阙见寻】

刘言史

鹿袖青藜鼠耳巾，潜夫岂解拜朝臣。
白屋藜床还共入，山妻老大不羞人。

卷 468_58【偶题二首】

刘言史

金榜荣名俱失尽，病身为庶更投魑。
春娥慢笑无愁色，别向人家舞柘枝。

得罪除名谪海头，惊心无暇与身愁。
中使不知何处住，家书莫寄向春州。

卷 468_59【嘉兴社日】

· 全唐诗 ·

刘言史

消渴天涯寄病身，临邛知我是何人。
今年社日分余肉，不值陈平又不均。

卷 468_60【席上赠李尹】

刘言史

伛偻山夫发似丝，松间石上坐多时。
瓢饮不曾看酒肆，世人空笑亦何为。

卷 468_61【弼公院问病】

刘言史

一头细发两分丝，卧见芭蕉白露滋。
欲令居士身无病，直待众生苦尽时。

卷 468_62【惜花】

刘言史

年少共怜含露色，老人偏惜委尘红。

· 全唐诗 ·

如何遂得心中事，每要花时不厌风。

卷 468_63【代胡僧留别】

刘言史

此地缘疏语未通，归时老病去无穷。
定知不彻南天竺，死在条支阴磧中。

卷 468_64【桂江逢王使君旅棹归】

刘言史

故人丹旆出南威，少妇随丧哭渐归。
遥想北原新垄上，日寒光浅水松稀。

卷 468_65【玉京词】

刘言史

绝景寥寥日更迟，人间甲子不同时。
未知樵客终何得，归后无家是看棋。

· 全唐诗 ·

卷 468_66 【葛巾歌】

刘言史

一片白葛巾，潜夫自能结。篱边折枯蒿，聊用簪华发。
有时醉倒长松侧，酒醒不见心还忆。谷鸟衔将却趁来，
野风吹去还寻得。十年紫竹溪南住，迹同玄豹依深雾。
草堂窗底漉春醅，山寺门前逢暮雨。临汝袁郎得相见，
闲云引到东阳县。鲁性将他类此身，还拈野物赠傍人。
空留税仗犍鼻褌，濛濛烟雨归山村。

卷 468_67 【北原情三首】

刘言史

错莫天色愁，挽歌出重闉。谁家白网车，送客入幽尘。
铭旌下官道，葬輿去辘辘。萧条黄蒿中，奠酒花翠新。
米雪晚霏微，墓成悄无人。乌鸢下空地，烟火残荒榛。
生人更多苦，入户事盈身。营营日易深，却到不得频。
寂寥孤隧头，草绿棠梨春。

洛阳城北山，古今葬冥客。聚骨朽成泥，此山土多白。
近来送葬人，亦去闻归声。岂能车轮疾，渐是墓侵城。
城中人不绝，哀挽相次行。莫非北邙后，重向洛城生。

· 全唐诗 ·

卜地起孤坟，全家送葬去。归来却到时，不复重知处。
叠叠葬相续，土乾草已绿。列纸泻壶浆，空向春云哭。

卷 468_68【林中独醒】

刘言史

晚来林沼静，独坐间瓢尊。向己非前迹，齐心欲不言。
微凉生乱筱，轻馥起孤萱。未得浑无事，瓜田草正繁。

卷 468_69【江陵客舍留别樊尚书】

刘言史

信陵门馆下，多病有归思。坠履忘情后，寒灰更湿时。
委栏芳蕙晚，凭几雪髭垂。明日秋关外，单车风雨随。

· 全唐诗 ·

第四百六十九卷

卷 469_1 【拟古咏河边枯树】

长孙佐辅

野火烧枝水洗根，数围孤树半心存。
应是无机承雨露，却将春色寄苔痕。

卷 469_2 【别友人】

长孙佐辅

愁多不忍醒时别，想极还寻静处行。
谁遣同衾又分手，不如行路本无情。

卷 469_3 【伤故人歌妓】

长孙佐辅

愁脸无红衣满尘，万家门户不容身。

· 全唐诗 ·

曾将一笑君前去，误杀几多回顾人。

卷 469_4【南中客舍对雨送故人归北】

长孙佐辅

猿声啾啾雁声苦，卷帘相对愁不语。几年客吴君在楚，
况送君归我犹阻。家书作得不忍封，北风吹断阶前雨。

卷 469_5【杭州秋日别故友】

长孙佐辅

相见又相别，大江秋水深。悲欢一世事，去住两乡心。
淅沥篱下叶，凄清阶上琴。独随孤棹去，何处更同衾。

卷 469_6【代别后梦别】

长孙佐辅

别中还梦别，悲后更生悲。觉梦俱千里，追随难再期。
翻思梦里苦，却恨觉来迟。纵是非真事，何妨梦会时。

· 全唐诗 ·

卷 469_7 【答边信】

长孙佐辅

征人去年戍辽水，夜得边书字盈纸。挥刀就烛裁红绮，
结作同心答千里。君寄边书书莫绝，妾答同心心自结。
同心再解心不离，书字频看字愁灭。结成一夜和泪封，
贮书只在怀袖中。莫如书字故难久，愿学同心长可同。

卷 469_8 【对镜吟】

长孙佐辅

忆昔逢君新纳娉，青铜铸出千年镜。意怜光彩固无瑕，
义比恩情永相映。每将鉴面兼鉴心，鉴来不辍情逾深。
君非结心空结带，结处尚新恩已背。开帘览镜悲难语，
对面相看孟门阻。掩匣徒惭双凤飞，悬台欲效孤鸾舞。
昔日照来人共许，今朝照罢自生疑。镜上有尘犹可淬，
君恩讵肯无回时。

卷 469_9 【山行书事】

长孙佐辅

· 全唐诗 ·

日落风高风高，驱车行远郊。中心有所悲，古墓穿黄茅。
茅中狐兔窠，四面乌鸢巢。鬼火时独出，人烟不相交。
行行近破村，一径欹还坳。迎霜听蟋蟀，向月看蟪蛄。
翁喜客来至，客业羞厨庖。浊醪夸泼蚁，时果仍新苞。
相劝对寒灯，呼儿爇枯梢。性朴颇近古，其言无斗筲。
忧欢世上并，岁月途中抛。谁知问津客，空作扬雄嘲。

卷 469_10【古宫怨】

长孙佐辅

窗前好树名玫瑰，去年花落今年开。无情春色尚识返，
君心忽断何时来。忆昔妆成候仙仗，宫琐玲珑日新上。
拊心却笑西子颦，掩鼻谁忧郑姬谤。草染文章衣下履，
花黏甲乙床前帐。三千玉貌休自夸，十二金钗独相向。
盛衰倾夺欲何如，娇爱翻悲逐佞谀。重远岂能惭沼鹄，
弃前方见泣船鱼。看笼不记熏龙脑，咏扇空曾秃鼠须。
始喜类萝新托柏，终伤如荠却甘荼。院深独开还独闭，
鸚鵡惊飞苔覆地。满箱旧赐前日衣，渍枕新垂夜来泪。
痕多开镜照还悲，绿髻青蛾尚未衰。莫道新缣长绝比，
犹逢故剑会相追。

卷 469_11【关山月】

长孙佐辅

· 全唐诗 ·

凄凄还切切，戍客多离别。何处最伤心，关山见秋月。
关月竟如何，由来远近过。始经玄菟塞，终绕白狼河。
忽忆秦楼妇，流光应共有。已得并蛾眉，还知揽纤手。
去岁照同行，比翼复连形。今宵照独立，顾影自茕茕。
余晖惭西落，夜夜看如昨。借问映旌旗，何如鉴帷幕。
拂晓朔风悲，蓬惊雁不飞。几时征戍罢，还向月中归。

卷 469_12【陇西行】

长孙佐辅

阴云凝朔气，陇上正飞雪。四月草不生，北风劲如切。
朝来羽书急，夜救长城窟。道隘行不前，相呼抱鞍歇。
人寒指欲堕，马冻蹄亦裂。射雁旋充饥，斧冰还止渴。
宁辞解围斗，但恐乘疲没。早晚边候空，归来养羸卒。

卷 469_13【寻山家】

长孙佐辅

独访山家歇还涉，茅屋斜连隔松叶。
主人闻语未开门，绕篱野菜飞黄蝶。

卷 469_14【山居】

· 全唐诗 ·

长孙佐辅

看书爱幽寂，结宇青冥间。飞泉引风听，古桂和云攀。
地深草木稠，境静鱼鸟闲。阴气晚出谷，朝光先照山。
有时独杖藜，入夜犹启关。星昏归鸟过，火出樵童还。
神体自和适，不是离人寰。

卷 469_15【楚州盐谿古墙望海】

长孙佐辅

混沌本冥冥，泄为洪川流。雄哉大造化，万古横中州。
我从西北来，登高望蓬丘。阴晴乍开合，天地相沉浮。
长风卷繁云，日出扶桑头。水净露蛟室，烟销凝蜃楼。
时来会云翔，道蹇即津游。明发促归轸，沧波非宿谋。

卷 469_16【闻韦驸马使君迁拜台州】

长孙佐辅

溟藩轸帝忧，见说初鸣驺。德胜祸先戢，情闲思自流。
蚕殷桑柘空，廩实雀鼠稠。谏虎昔赐骏，安人将问牛。
曾陪后乘光，共逐平津游。旌旆拥追赏，歌钟催献酬。
音徽一寂寥，贵贱双沉浮。北郭乏中崖，东方称上头。
跻山望百城，目尽增遐愁。海逼日月近，天高星汉秋。

· 全唐诗 ·

无阶异渐鸿，有志惭驯鸥。终期促孤棹，暂访天台幽。

卷 469_17【山行经村径】

长孙佐辅

一径有人迹，到来唯数家。依稀听机杼，寂历看桑麻。
雨湿渡头草，风吹坟上花。却驱羸马去，数点归林鸦。

卷 469_18【野田行】

张碧

风昏昼色飞斜雨，冤骨千堆髑髅语。八纮牢落人物悲，
是个田园荒废主。悲嗟自古争天下，几度乾坤复如此。
秦皇屹屹筑长城，汉祖区区白蛇死。野田之骨兮又成尘，
楼阁风烟兮还复新。愿得华山之下长归马，
野田无复堆冤者。

卷 469_19【贫女】

张碧

岂是昧容华，岂不知机织。自是生寒门，良媒不相识。

· 全唐诗 ·

卷 469_20 【幽思】

张碧

金炉烟霭微，银釭残影灭。出户独裴回，落花满明月。

卷 469_21 【惜花三首】

张碧

千枝万枝占春开，彤霞著地红成堆。
一窖闲愁驱不去，殷勤对尔酌金杯。

老鸦拍翼盘空疾，准拟浮生如瞬息。
阿母蟠桃香未齐，汉皇骨葬秋山碧。

朝开暮落煎人老，无人为报东君道。
留取秣红伴醉吟，莫教少女来吹扫。

卷 469_22 【游春引三首】

张碧

句芒爱弄春风权，开萌发翠无党偏。

· 全唐诗 ·

句芒小女精神巧，机罗杼绮满平川。

五陵年少轻薄客，蛮锦花多春袖窄。
酌桂鸣金玩物华，星蹄绣毂填香陌。

千条碧绿轻拖水，金毛泣怕春江死。
万汇俱含造化恩，见我春工无私理。

卷 469_23【农父】

张碧

运锄耕耨侵星起，陇亩丰盈满家喜。
到头禾黍属他人，不知何处抛妻子。

卷 469_24【古意】

张碧

銮舆不碾香尘灭，更残三十六宫月。
手持纨扇独含情，秋风吹落横波血。

卷 469_25【秋日登岳阳楼晴望】

· 全唐诗 ·

张碧

三秋倚练飞金盏，洞庭波定平如划。天高云卷绿罗低，
一点君山碍人眼。漫漫万顷铺琉璃，烟波阔远无鸟飞。
西南东北竞无际，直疑侵断青天涯。屈原回日牵愁吟，
龙宫感激致应沈。贾生憔悴说不得，茫茫烟霭堆湖心。

卷 469_26【鸿沟】

张碧

毒龙衔日天地昏，八纮殒穰生愁云。秦园走鹿无藏处，
纷纷争处蜂成群。四溟波立鲸相吞，荡摇五岳崩山根。
鱼虾舞浪狂鳅鯢，龙蛇胆战登鸿门。星旗羽镞强者尊，
黑风白雨东西屯。山河欲拆人烟分，壮士鼓勇君王存。
项庄愤气吐不得，亚父斗声天上闻。玉光堕地惊昆仑，
留侯气魄吞太华。舌头一寸生阳春，神农女媧愁不言。
蛇枯老媪啼泪痕，星曹定秤秤王孙。项籍骨轻迷精魂，
沛公仰面争乾坤。须臾垓下贼星起，歌声缭绕凄人耳。
吴娃捧酒横秋波，霜天月照空城垒。力拔山兮忽到此，
骓嘶懒渡乌江水。新丰瑞色生楼台，西楚寒蒿哭愁鬼。
三尺霜鸣金匣里，神光一掉八千里。汉皇骤马意气生，
西南扫地迎天子。

卷 469_27【美人梳头】

· 全唐诗 ·

张碧

玉堂花院小枝红，绿窗一片春光晓。玉容惊觉浓睡醒，
圆蟾挂出妆台表。金盘解下丛鬟碎，三尺巫云绾朝翠。
皓指高低寸黛愁，水精梳滑参差坠。须臾拢掠蝉鬓生，
玉钗冷透冬冰明。芙蓉拆向新开脸，秋泉慢转眸波横。
鹦鹉偷来话心曲，屏风半倚遥山绿。

卷 469_28【题祖山人池上怪石】

张碧

寒姿数片奇突兀，曾作秋江秋水骨。先生应是厌风云，
著向江边塞龙窟。我来池上倾酒尊，半酣书破青烟痕。
参差翠缕摆不落，笔头惊怪黏秋云。
我闻吴中项容水墨有高价，邀得将来倚松下。
铺却双缁直道难，掉首空归不成画。

卷 469_29【山居雨霁即事】

张碧

结茅苍岭下，自与喧卑隔。况值雷雨晴，郊原转岑寂。
出门看反照，绕屋残溜滴。古路绝人行，荒陂响蝼蝈。
篱崩瓜豆蔓，圃坏牛羊迹。断续古祠鸦，高低远村笛。

· 全唐诗 ·

喜闻东皋润，欲往未通屐。杖策试危桥，攀萝瞰苔壁。
邻翁夜相访，缓酌聊跂石。新月出污尊，浮云在巾舄。
常隳腐儒操，谬习经邦画。有待时未知，非关慕沮溺。

卷 469_30【赠琴棋僧歌】

张瀛

我尝听师法一说，波上莲花水中月。不垢不净是色空，
无法无空亦无灭。我尝听师禅一观，浪溢鳌头蟾魄满。
河沙世界尽空空，一寸寒灰冷灯畔。我又听师琴一抚，
长松唤住秋山雨。弦中雅弄若铿金，指下寒泉流太古。
我又听师棋一著，山顶坐沈红日脚。阿谁称是国手人，
罗浮道士赌却鹤，输却药。法怀斟下红霞丹，
束手不敢争头角。

· 全唐诗 ·

第四百七十卷

卷 470_1 【妾换马】

卢殷

伴凤楼中妾，如龙枥上宛。同年辞旧宠，异地受新恩。
香阁更衣处，尘蒙喷草痕。连嘶将忍泪，俱恋主人门。

卷 470_2 【七夕】

卢殷

河耿月凉时，牵牛织女期。欢娱方在此，漏刻竟由谁。
定不嫌秋驶，唯当乞夜迟。全胜客子妇，十载泣生离。

卷 470_3 【月夜】

卢殷

露下凉生簟，无人月满庭。难闻逆河浪，徒望白榆星。

· 全唐诗 ·

树绕孤栖鹊，窗飞就暗萤。移时宿兰影，思共习芳馨。

卷 470_4【仲夏寄江南】

卢殷

五月行将近，三年客未回。梦成千里去，酒醒百忧来。
晚暮时看槿，悲酸不食梅。空将白团扇，从寄复裴回。

卷 470_5【欲销云】

卢殷

欲隐从龙质，仍余触石文。霏微依碧落，仿佛误非云。
度月光无隔，倾河影不分。如逢作霖处，当为起氤氲。

卷 470_6【遇边使】

卢殷

累年无的信，每夜梦边城。袖掩千行泪，书封一尺情。

卷 470_7【移住别居】

· 全唐诗 ·

卢殷

自到西川住，唯君别有情。常逢对门远，又隔一重城。

卷 470_8【棚口逢友人】

卢殷

艰难别离久，中外往还深。已改当时法，空余旧日心。

卷 470_9【雨霁登北岸寄友人】

卢殷

稻黄扑扑黍油油，野树连山涧自流。
忆得年时冯翊部，谢郎相引上楼头。

卷 470_10【长安亲故】

卢殷

楚兰不佩佩吴钩，带酒城头别旧游。
年事已多筋力在，试将弓箭到并州。

· 全唐诗 ·

卷 470_11【悲秋】

卢殷

秋空雁度青天远，疏树蝉嘶白露寒。
阶下败兰犹有气，手中团扇渐无端。

卷 470_12【晚蝉】

卢殷

深藏高柳背斜晖，能轸孤愁减昔围。
犹畏旅人头不白，再三移树带声飞。

卷 470_13【维扬郡西亭赠友人】

卢殷

萍飒风池香满船，杨花漠漠暮春天。
玉人此日心中事，何似乘羊入市年。

卷 470_14【终南精舍月中闻磬】

· 全唐诗 ·

独孤申叔

精庐残夜景，天宇灭埃氛。幽磬此时击，余音几处闻。
随风树杪去，支策月中分。断绝如残漏，凄清不隔云。
羁人方罢梦，独雁忽迷群。响尽河汉落，千山空纠纷。

卷 470_15【题汉州西湖】

严公弼

西湖创置自房公，心匠纵横造化同。
见说凤池推独步，高名何事滞川中。

卷 470_16【题汉州西湖】

严公颉

凤沼才难尽，余思凿西湖。珍木罗修岸，冰光映坐隅。
琴台今寂寞，竹岛尚萦纡。犹蕴济川志，芳名终不渝。

卷 470_17【湘弦曲】

庄南杰

· 全唐诗 ·

楚云铮铮戛秋露，巫云峡雨飞朝暮。古磬高敲百尺楼，
孤猿夜哭千丈树。云轩碾火声珑珑，连山卷尽长江空。
莺啼寂寞花枝雨，鬼啸荒郊松柏风。满堂怨咽悲相续，
苦调中含古离曲。繁弦响绝楚魂遥，湘江水碧湘山绿。

卷 470_18【黄雀行】

庄南杰

穿屋穿墙不知止，争树争巢入营死。林间公子挟弹弓，
一丸致毙花丛里。小口黄雏未有知，青天不解高高飞。
虞人设网当要路，白日啾嘲祸万机。

卷 470_19【雁门太守行】

庄南杰

旌旗闪闪摇天末，长笛横吹虏尘阔。跨下嘶风白练狞，
腰间切玉青蛇活。击革攄金燧牛尾，犬羊兵败如山死。
九泉寂寞葬秋虫，湿云荒草啼秋思。

卷 470_20【阳春曲】

庄南杰

· 全唐诗 ·

紫锦红囊香满风，金鸾玉轭摇丁冬。沙鸥白羽翦晴碧，
野桃红艳烧春空。芳草绵延锁平地，蛱蝶双双舞幽翠。
凤叶龙吟白日长，落花声底仙娥醉。

卷 470_21【伤歌行】

庄南杰

兔走乌飞不相见，人事依稀速如电。王母天桃一度开，
玉楼红粉千回变。车驰马走咸阳道，石家旧宅空荒草。
秋雨无情不惜花，芙蓉一一惊香倒。劝君莫谩栽荆棘，
秦皇虚费驱山力。英风一去更无言，白骨沉埋暮山碧。

卷 470_22【无题】

李溥

乔木挂斗邑，水驿坏门开。向月片帆去，背云行雁来。
晚年名利迹，宁免路岐哀。前计不能息，若为玄鬓回。

卷 470_23【客舍喜友人相访】

贺兰朋吉

· 全唐诗 ·

荒居无四邻，谁肯访来频。古树秋中叶，他乡病里身。
雁声风送急，萤影月流新。独为成名晚，多惭见友人。

卷 470_24 【诣李侍郎】

王鲁复

文字元无底，功夫转到难。苦心三百首，暂请侍郎看。

卷 470_25 【吊灵均】

王鲁复

万古汨罗深，骚人道不沉。明明唐日月，应见楚臣心。

卷 470_26 【吊韩侍郎】

王鲁复

星落少微宫，高人入古风。几年才子泪，并写五言中。

卷 470_27 【故白岩禅师院】

· 全唐诗 ·

王鲁复

能师还世名还在，空闭禅堂满院苔。
花树不随人寂寞，数枝犹自出墙来。

卷 470_28【招玉川子咏新文】

徐希仁

清气宿我心，结为清冷音。一夜吟不足，君来相和吟。

· 全唐诗 ·

第四百七十一卷

卷 471_1【五杂组】

雍裕之

五杂组，刺绣窠。往复还，织锦梭。不得已，戍交河。

卷 471_2【剪彩花】

雍裕之

敢竞桃李色，自呈刀尺功。蝶犹迷剪翠，人岂辨裁红。

卷 471_3【春晦送客】

雍裕之

野酌乱无巡，送君兼送春。明年春色至，莫作未归人。

· 全唐诗 ·

卷 471_4【自君之出矣】

雍裕之

自君之出矣，宝镜为谁明。思君如陇水，长闻呜咽声。

卷 471_5【四气】

雍裕之

春禽犹竞啭，夏木忽交阴。稍觉秋山远，俄惊冬霰深。

卷 471_6【四色】

雍裕之

壶中冰始结，盘上露初圆。何意瑶池雪，欲夺鹤毛鲜。

道士牛已至，仙家鸟亦来。骨为神不朽，眼向故人开。

劳鲋莲渚内，汗马火旂间。平生血诚尽，不独左轮殷。

已见池尽墨，谁言突不黔。漆身恩未报，貂裘弊岂嫌。

· 全唐诗 ·

卷 471_7【大言】

雍裕之

四溟杯绿醕，五岳髻青螺。挥汗曾成雨，画地亦成河。

卷 471_8【细言】

雍裕之

蚊眉自可托，蜗角岂劳争。欲效丝毫力，谁知蝼蚁诚。

卷 471_9【山中桂】

雍裕之

八树拂云霄，四时青不凋。秋风何处起，先裊最长条。

卷 471_10【芦花】

雍裕之

夹岸复连沙，枝枝摇浪花。月明浑似雪，无处认渔家。

· 全唐诗 ·

卷 471_11【江边柳】

雍裕之

袅袅古堤边，青青一树烟。若为丝不断，留取系郎船。

卷 471_12【江上山】

雍裕之

绮霞明赤岸，锦缆绕丹枝。楚客正愁绝，西风且莫吹。

卷 471_13【游丝】

雍裕之

游丝何所似，应最似春心。一向风前乱，千条不可寻。

卷 471_14【柳絮】

雍裕之

无风才到地，有风还满空。缘渠偏似雪，莫近鬓毛生。

· 全唐诗 ·

卷 471_15【残莺】

雍裕之

花阑莺亦懒，不语似含情。何言百啭舌，唯余一两声。

卷 471_16【早蝉】

雍裕之

一声清潏暑，几处促流年。志士心偏苦，初闻独泫然。

卷 471_17【秋蛩】

雍裕之

雨绝苍苔地，月斜青草阶。蛩鸣谁不怨，况是正离怀。

卷 471_18【江上闻猿】

雍裕之

枫岸月斜明，猿啼旅梦惊。愁多肠易断，不待第三声。

· 全唐诗 ·

卷 471_19【折柳赠行人】

雍裕之

那言柳乱垂，尽日任风吹。欲识千条恨，和烟折一枝。

卷 471_20【题蒲葵扇】

雍裕之

倾心曾向日，在手幸摇风。羨尔逢提握，知名自谢公。

卷 471_21【赠苦行僧】

雍裕之

幽深红叶寺，清净白毫僧。古殿长鸣磬，低头礼昼灯。

卷 471_22【两头纤纤】

雍裕之

两头纤纤八字眉，半白半黑灯影帷。

· 全唐诗 ·

膆膆膊膊晓禽飞，磊磊落落秋果垂。

卷 471_23【了语】

雍裕之

扫却烟尘寇初剿，深水高林放鱼鸟。
鸡人唱绝残漏晓，仙乐拍终天悄悄。

卷 471_24【不了语】

雍裕之

浮名世利知多少，朝市喧喧尘扰扰。
车马交驰往复来，钟鼓相催天又晓。

卷 471_25【听弹沈湘】

雍裕之

贾谊投文吊屈平，瑶琴能写此时情。
秋风一奏沈湘曲，流水千年作恨声。

· 全唐诗 ·

卷 471_26【豪家夏冰咏】

雍裕之

金错银盘贮赐冰，清光如耸玉山棱。
无论尘客闲停扇，直到消时不见蝇。

卷 471_27【宿棣华馆闻雁】

雍裕之

不堪旅宿棣花馆，况有离群鸿雁声。
一点秋灯残影下，不知寒梦几回惊。

卷 471_28【农家望晴】

雍裕之

尝闻秦地西风雨，为问西风早晚回。
白发老农如鹤立，麦场高处望云开。

卷 471_29【宫人斜】

· 全唐诗 ·

雍裕之

几多红粉委黄泥，野鸟如歌又似啼。
应有春魂化为燕，年来飞入未央栖。

卷 471_30【曲江池上】

雍裕之

殷勤春在曲江头，全藉群仙占胜游。
何必三山待鸾鹤，年年此地是瀛洲。

· 全唐诗 ·

第四百七十二卷

卷 472_1 【奉陪吕使君楼上夜看花】

段弘古

城上芳园花满枝，城头太守夜看时。
为报林中高举烛，感人情思欲题诗。

卷 472_2 【所居寺院凉夜书情，呈上吕和叔温郎中】

何元上

庾公念病宜清暑，遣向僧家占上方。月光似水衣裳湿，
松气如秋枕簟凉。幸以薄才当客次，无因弱羽逐鸾翔。
何由一示云霄路，肠断星星两鬓霜。

卷 472_3 【塞上闻笛】

宋济

· 全唐诗 ·

胡儿吹笛戍楼间，楼上萧条海月闲。
借问梅花何处落，风吹一夜满关山。

卷 472_4 【东邻美人歌】

宋济

花暖江城斜日阴，莺啼绣户晓云深。
春风不道珠帘隔，传得歌声与客心。

卷 472_5 【题李八百洞】

符载

太极之年混沌坼，此山亦是神仙宅。
后世何人来飞升，紫阳真人李八百。

卷 472_6 【甘州歌】

符载

月里嫦娥不画眉，只将云雾作罗衣。
不知梦逐青鸾去，犹把花枝盖面归。

· 全唐诗 ·

卷 472_7 【句】

符载

绿迸穿篱笋，红飘隔户花。

卷 472_8 【贞元八年十二月谒先主庙绝句三首】

张俨

仗顺继皇业，并吞势由己。天命屈雄图，谁歌大风起。

得股肱贤明，能以奇用兵。何事伤客情，何人归帝京。

雄名垂竹帛，荒陵压阡陌。终古更何闻，悲风入松柏。

卷 472_9 【题安乐山】

先汪

碧峰横倚白云端，隋氏真人化迹残。

翠柏不凋龙骨瘦，石泉犹在镜光寒。

· 全唐诗 ·

卷 472_10【姑熟杂咏·姑熟溪】

李赤

爱此溪水闲，乘流兴无极。击楫怕鸥惊，垂竿待鱼食。
波翻晓霞影，岸叠春山色。何处浣纱人，红颜未相识。

卷 472_11【姑熟杂咏·丹阳湖】

李赤

湖与元气通，风波浩难止。天外贾客归，云间片帆起。
龟游莲叶上，鸟宿芦花里。少女棹舟归，歌声逐流水。

卷 472_12【姑熟杂咏·谢公宅】

李赤

青山日将暝，寂寞谢公宅。竹里无人声，池中虚月白。
荒庭衰草遍，废井苍苔积。唯有清风闻，时时起泉石。

卷 472_13【姑熟杂咏·凌歊台】

· 全唐诗 ·

李赤

旷望登古台，台极高人目。叠嶂列远空，闲花杂平陆。
白云入窗牖，野翠生松竹。欲览碑上文，苔侵岂堪读。

卷 472_14【姑熟杂咏·桓公井】

李赤

桓公名已古，废井曾未竭。石甃冷苍苔，寒泉湛孤月。
秋来桐暂落，春至桃还发。路远人罕窥，谁能见清澈。

卷 472_15【姑熟杂咏·慈姥竹】

李赤

野竹攒石生，含烟映江岛。翠色落波深，虚声带寒早。
龙吟曾未听，凤曲吹应好。不学蒲柳凋，贞心常自保。

卷 472_16【姑熟杂咏·望夫山】

李赤

颢望临碧空，怨情感离别。芳草不知愁，岩花但争发。

· 全唐诗 ·

云山万重隔，音信千里绝。春去秋复来，相思几时歇。

卷 472_17【姑熟杂咏·牛渚矶】

李赤

绝壁临巨川，连峰势相向。乱石流湍间，回波自成浪。
但惊群木秀，莫测精灵状。更听猿夜啼，忧心醉江上。

卷 472_18【姑熟杂咏·灵墟山】

李赤

丁令辞世人，拂衣向仙路。伏炼九丹成，方随五云去。
松萝蔽幽洞，桃杏深隐处。不知曾化鹤，辽海归几度。

卷 472_19【姑熟杂咏·天门山】

李赤

迥出江水上，双峰自相对。岸映松色寒，石分浪花碎。
参差远天际，缥缈晴霞外。落日舟去遥，回首沈青霭。

· 全唐诗 ·

卷 472_20 【敕赠康尚书美人】

薛 绁

天门喜气晓氛氲，圣主临轩召冠军。
欲令从此行霖雨，先赐巫山一片云。

卷 472_21 【将赴东都上李相国】

孙叔向

四海兵初偃，平津阁正开。谁知大炉火，还有不然灰。

卷 472_22 【题昭应温泉】

孙叔向

一道温泉绕御楼，先皇曾向此中游。
虽然水是无情物，也到宫前咽不流。

卷 472_23 【送咸安公主】

孙叔向

· 全唐诗 ·

卤簿迟迟出国门，汉家公主嫁乌孙。
玉颜便向穹庐去，卫霍空承明主恩。

卷 472_24 【边城柳】

刘皂

一株新柳色，十里断孤城。为近东西路，长悬离别情。

卷 472_25 【长门怨三首】

刘皂

雨滴长门秋夜长，愁心和雨到昭阳。
泪痕不学君恩断，拭却千行更万行。

宫殿沈沈月欲分，昭阳更漏不堪闻。
珊瑚枕上千行泪，不是思君是恨君。

蝉鬓慵梳倚帐门，蛾眉不扫惯承恩。
旁人未必知心事，一面残妆空泪痕。

卷 472_26 【旅次朔方】

· 全唐诗 ·

刘皂

客舍并州数十霜，归心日夜忆咸阳。
无端又渡桑干水，却望并州似故乡。

卷 472_27【早起】

杨厚

星汉转寒更，伊余索寞情。钟催归梦断，雁引远愁生。
危壁兰光暗，疏帘露气清。闲庭聊一望，海日未分明。

卷 472_28【长门怨】

裴交泰

自闭长门经几秋，罗衣湿尽泪还流。
一种蛾眉明月夜，南宫歌管北宫愁。

卷 472_29【禁中送任山人】

李秘

子去非长往，君恩取大还。补天留彩石，缩地入青山。

· 全唐诗 ·

献寿千春外，来朝数月间。莫抛残药物，窃取驻童颜。

卷 472_30 【府试中元观道流步虚】

殷尧恭

玄都开秘箓，白石礼先生。上界秋光静，中元夜景清。
星辰朝帝处，鸾鹤步虚声。玉洞花长发，珠宫月最明。
扫坛天地肃，投简鬼神惊。倘赐刀圭药，还成不死名。

卷 472_31 【王仙坛】

林杰

羽客已登仙路去，丹炉草木尽凋残。
不知千载归何日，空使时人扫旧坛。

卷 472_32 【乞巧】

林杰

七夕今宵看碧霄，牵牛织女渡河桥。
家家乞巧望秋月，穿尽红丝几万条。

· 全唐诗 ·

卷 472_33 【句】

林杰

金盘摘下挂朱颗，红壳开时饮玉浆。

卷 472_34 【哭林杰】

郑立之

才高未及贾生年，何事孤魂逐逝川。
萤聚帐中人已去，鹤离台上月空圆。

卷 472_35 【咏和亲】

苏郁

关月夜悬青冢镜，寒云秋薄汉宫罗。
君王莫信和亲策，生得胡雏虏更多。

卷 472_36 【鹦鹉词】

苏郁

· 全唐诗 ·

莫把金笼闭鹦鹉，个个分明解人语。
忽然更向君前言，三十六宫愁几许。

卷 472_37【步虚词】

苏郁

十二楼藏玉堦中，凤凰双宿碧芙蓉。
流霞浅酌谁同醉，今夜笙歌第几重。

卷 472_38【句】

苏郁

吟倚雨残树，月收山下村。

卷 472_39【赋得琢玉成器】

浩虚舟

已沐识坚贞，应怜器未成。辉山方可重，散璞乍堪惊。
玷灭随心正，瑕消夺眼明。琢磨虹气在，拂拭水容生。
赏玩冰光冷，提携月魄轻。伫当亲捧握，瑚璉幸齐名。

· 全唐诗 ·

卷 472_40 【责商山四皓】

蔡京

秦末家家思逐鹿，商山四皓独忘机。
如何鬓发霜相似，更出深山定是非。

卷 472_41 【假节邕交道由吴溪】

蔡京

停桡横水中，举目孤烟外。借问吴溪人，谁家有山卖。

卷 472_42 【咏子规】

蔡京

千年冤魄化为禽，永逐悲风叫远林。愁血滴花春艳死，
月明飘浪冷光沉。凝成紫塞风前泪，惊破红楼梦里心。
肠断楚词归不得，剑门迢递蜀江深。

卷 472_43 【献蔡京】

· 全唐诗 ·

张顶

抛却长竿卷却丝，手持蓑笠献新诗。
临川太守清如镜，不是渔人下钓时。

· 全唐诗 ·

第四百七十三卷

卷 473_1【享惠昭太子庙乐章】

李逢吉

既洁酒醴，聿陈熟腥。肃将震念，昭格储灵。
展矣礼典，薰然德馨。愔愔管磬，亦具是听。

卷 473_2【望京楼上寄令狐华州】

李逢吉

祗役滞南服，颓思属暮年。闲上望京台，万山蔽其前。
落日归飞翼，连翩东北天。涪江适在下，为我久潺湲。
中叶成文教，德威清远边。颁条信徒尔，华发生苍然。
寄怀三峰守，岐路隔云烟。

卷 473_3【再赴襄阳，辱宣武相公贻诗，今用奉酬】

李逢吉

· 全唐诗 ·

解鞍辞丹禁，扬旌去赤墀。自惊非素望，何力及清时。
又据三公席，多惭四老祠。岷山风已远，棠树事难追。
江汉饶春色，荆蛮足梦思。唯怜吐凤句，相示凿龙期。

卷 473_4【奉送李相公重镇襄阳】

李逢吉

海内埏埴遍，汉阴旌旆还。望留丹阙下，恩在紫霄间。
冰雪背秦岭，风烟经武关。树皆人尚爱，辕即吏曾攀。
自惜两心合，相看双鬓斑。终期谢戎务，同隐凿龙山。

卷 473_5【和严揆省中宿斋遇令狐员外当直之作】

李逢吉

致斋分直宿南宫，越石卢谿此夜同。位极班行犹念旧，
名题章奏亦从公。曾驱爪士三边静，新赠髯参六义穷。
竟夕文昌知有月，可怜如在庾楼中。

卷 473_6【奉酬忠武李相公见寄】

李逢吉

· 全唐诗 ·

直继先朝卫与英，能移孝友作忠贞。剑门失险曾缚虎，
淮水安流缘斩鲸。黄阁碧幢惟是俭，三公二伯未为荣。
惠连忽赠池塘句，又遣羸师破胆惊。

卷 473_7【酬致政杨祭酒见寄】

李逢吉

初还相印罢戎旌，获守皇居在紫烟。妄比鄴侯功蔑尔，
每怀疏傅意悠然。应将半俸沾间里，料入中条访洞天。
十载别离那可道，倍令惊喜见来篇。

卷 473_8【送令狐秀才赴举】

李逢吉

子有雄文藻思繁，韶年射策向金门。前随鸾鹤登霄汉，
却望风沙走塞垣。独忆忘机陪出处，自怜何力继飞翻。
那堪两地生离绪，蓬户长扃行旅喧。

卷 473_9【郡斋卧疾赠昼上人】

于頔

· 全唐诗 ·

夙陪翰墨徒，深论穷文格。丽则风骚后，公然我词客。
晚依方外友，极理探精赜。吻合南北宗，昼公我禅伯。
尤明性不染，故我行贞白。随顺令得解，故我言芳泽。
雪水漾清浔，吴山横碧岑。含珠复蕴玉，价重双南金。
的皪曜奇彩，凄清流雅音。商声发楚调，调切谱瑶琴。
吴山为我高，雪水为我深。万景徒有象，孤云本无心。
众木岂无声，椅桐有清响。众耳岂不聆，钟期有真赏。
高洁古人操，素怀夙所仰。觐君冰雪姿，祛我淫滞想。
常吟柳恽诗，苔浦久相思。逮此远为郡，蘋洲芳草衰。
逢师年腊长，值我病容羸。共话无生理，聊用契心期。

卷 473_10【和丘员外题湛长史旧居】

于頔

萧条历山下，水木无氛滓。王门结长裾，岩扃怡暮齿。
昔贤枕高躅，今彦仰知止。依依瞩烟霞，眷眷返墟里。
湛生久已没，丘也亦同耻。立言咸不朽，何必在青史。

卷 473_11【寒夜闻霜钟】

卢景亮

洪钟发长夜，清响出层岑。暗入繁霜切，遥传古寺深。
何城乱远漏，几处杂疏砧。已警离人梦，仍沾旅客襟。

· 全唐诗 ·

待时当命侣，抱器本无心。倘若无知者，谁能设此音。

卷 473_12【南溪诗】

李渤

玄岩丽南溪，新泉发幽色。岩泉孕灵秀，云烟纷崖壁。
斜峰信天插，奇洞固神辟。窈窕去未穷，环回势难极。
玉池似无水，玄井昏不测。仙户掩复开，乳膏凝更滴。
丹砂有遗址，石径无留迹。南眺苍梧云，北望洞庭客。
萧条风烟外，爽朗形神寂。若值浮丘翁，从此谢尘役。

卷 473_13【喜弟淑再至为长歌】

李渤

前年别时秋九月，白露吹霜金吹烈。离鸿一别影初分，
泪袖双挥心哽咽。别来几度得音书，南岳知
庐山峨峨倚天碧，捧排空崖千万尺。社榜长题高士名，
食堂每记云山迹。我本开云此山住，偶为名利相萦误。
自负心机四十年，羞闻社客山中篇。忧时魂梦忆归路，
觉来疑在林中眠。昨日亭前乌鹊喜，果得今朝尔来此。
吾吟行路五十篇，尽说江南数千里。自怜兄弟今五人，
共萦儒素家尚贫。虽然廩饩各不一，就中总免拘常伦。
长兄年少曾落托，拔剑沙场随卫霍。口里虽谭周孔文，

· 全唐诗 ·

怀中不舍孙吴略。次兄一生能苦节，夏聚流萤冬映雪。
非论疾恶志如霜，更觉临泉心似铁。第三之兄更奇异，
昂昂独负青云志。下看金玉不如泥，肯道王侯身可贵。
却愁清逸不干时，高踪大器无人知。倘逢感激许然诺，
必能万古留清规。念尔年来方二十，夙夜孜孜能独立。
卷中笔落星汉摇，洞里丹灵鬼神泣。嗟余流浪心最狂，
十年学剑逢时康。心中不解事拘束，世间谈笑多相妨。
广海青山殊未足，逢著高楼还醉宿。朝走安公枥上驹，
暮伦陶令篱边菊。近来诗思殊无况，苦被时流不相放。
云腾浪走势未衰，鹤膝蜂腰岂能障。送尔为文殊不识，
贵从一一传胸臆。若到湖南见紫霄，会须待我同攀陟。

卷 473_14 【留别南溪二首】

李渤

常叹春泉去不回，我今此去更难来。
欲知别后留情处，手种岩花次第开。

如云不厌苍梧远，似雁逢春又北归。
惟有隐山溪上月，年年相望两依依。

卷 473_15 【桂林叹雁】

李渤

· 全唐诗 ·

三朝四黜倦遐征，往复皆愁万里程。
尔解分飞却回去，我方从此向南行。

卷 473_16【享惠昭太子庙乐章】

孟简

喧喧金石容既缺，肃肃羽驾就行列。
缙山遗响昔所闻，庙庭进旅今攸设。

卷 473_17【拟古】

孟简

剑客不夸貌，主人知此心。但营纤毫义，肯计千万金。
勇发看鸇击，愤来听虎吟。平生贵酬德，刃敌无幽深。

卷 473_18【咏欧阳行周事】

孟简

有客西北逐，驱马次太原。太原有佳人，神艳照行云。
座上转横波，流光注夫君。夫君意荡漾，即日相交欢。
定情非一词，结念誓青山。生死不变易，中诚无间言。

· 全唐诗 ·

此为太学徒，彼属北府官。中夜欲相从，严城限军门。
白日欲同居，君畏仁人闻。忽如陇头水，坐作东西分。
惊离肠千结，滴泪眼双昏。本达京师回，贺期相追攀。
宿约始乖阻，彼忧已缠绵。高髻若黄鹂，危鬓如玉蝉。
纤手自整理，剪刀断其根。柔情托侍儿，为我遗所欢。
所欢使者来，侍儿因复前。拭泪取遗寄，深诚祈为传。
封来赠君子，愿言慰穷泉。使者回复命，迟迟蓄悲酸。
詹生喜言旋，倒履走迎门。长跪听未毕，惊伤涕涟涟。
不饮亦不食，哀心百千端。襟情一夕空，精爽旦日残。
哀哉浩然气，溃散归化元。短生虽别离，长夜无阻拦。
双魂终会合，两剑遂蜿蜒。丈夫早通脱，巧笑安能干。
防身本苦节，一去何由还。后生莫沈迷，沈迷丧其真。

卷 473_19【惜分阴】

孟简

业广因功苦，拳拳志士心。九流难酌挹，四海易消沈。
对景嗟移晷，窥园讵改阴。三冬劳聚学，驷景重兼金。
刺股情方励，偷光思益深。再中如可冀，终嗣绝编音。

卷 473_20【嘉禾合颖】

孟简

· 全唐诗 ·

玉烛将成岁，封人亦自歌。八方沾圣泽，异亩发嘉禾。
共秀芳何远，连茎瑞且多。颖低甘露滴，影乱惠风过。
表稔由神化，为祥识气和。因知兴嗣岁，王道旧无颇。

卷 473_21【赋得亚父碎玉斗】

孟简

献谋既我违，积愤从心痂。鸿门入已迫，赤帝时潜退。
宝位方苦竞，玉斗何情爱。犹看虹气凝，讵惜冰姿碎。
而嗟大事返，当起千里悔。谁为西楚王，坐见东城溃。

卷 473_22【酬施先辈】

孟简

襄阳才子得声多，四海皆传古镜歌。
乐府正声三百首，梨园新入教青娥。

卷 473_23【寄李十员外】

王仲舒

百丈悬泉旧卧龙，欲将肝胆佐时雍。

· 全唐诗 ·

惟愁又入烟霞去，知在庐峰第几重。

卷 473_24 【访羊尊师】

孙革

松下问童子，言师采药去。只在此山中，云深不知处。

卷 473_25 【晚眺】

汪万於

杖策倚柴门，泉声隔岸闻。夕阳诸岭出，晴雪万山分。
静对豺狼窟，幽观鹿豕群。今宵寒月近，东北扫浮云。

卷 473_26 【亚父碎玉斗】

何儒亮

嬴女昔解网，楚王有遗躅。破关既定秦，碎首闻献玉。
贞姿应刃散，清响因风续。匪徇切泥功，将明怀璧辱。
莫量汉祖德，空受项君勗。事去见前心，千秋渭水绿。

· 全唐诗 ·

卷 473_27【赠毛仙翁】

李宗闵

不知仙客占青春，肌骨才教称两旬。俗眼暂惊相见日，
疑心未测几时人。闲推甲子经何代，笑说浮生老此身。
残药倘能沾朽质，愿将霄汉永为邻。

卷 473_28【池州夫子庙麟台】

韦表微

二仪既闭，三象乃乖。圣道埋郁，人心不开。
上无文武，下有定哀。吁嗟麟兮，孰为来哉。
周虽不纲，孔实嗣圣。诗书既删，礼乐大定。
劝善惩恶，奸邪乃正。吁嗟麟兮，克昭符命。
圣与时合，代行位尊。苟或乖戾，身穷道存。
於昭鲁邑，栖迟孔门。吁嗟麟兮，孰知其仁。
运极数残，德至时否。楚国浸广，秦封益侈。
墙仞迫厄，崎岖阙里。吁嗟麟兮，靡有攸止。
世治则麟，世乱则麋。出非其时，麋鹿同群。
孔不自圣，麟不自祥。吁嗟麟兮，天何所亡。

· 全唐诗 ·

第四百七十四卷

卷 474_1【送马向入蜀】

徐凝

游子出咸京，巴山万里程。白云连鸟道，青壁遘猿声。
雨雪经泥坂，烟花望锦城。工文人共许，应纪蜀中行。

卷 474_2【送李补阙归朝】

徐凝

驷马归咸秦，双凫出海门。还从清切禁，再沐圣明恩。
礼乐中朝贵，文章大雅存。江湖多放逸，献替欲谁论。

卷 474_3【送日本使还】

徐凝

绝国将无外，扶桑更有东。来朝逢圣日，归去及秋风。

· 全唐诗 ·

夜泛潮回际，晨征苍莽中。鲸波腾水府，蜃气壮仙宫。
天眷何期远，王文久已同。相望杳不见，离恨托飞鸿。

卷 474_4 【题开元寺牡丹】

徐凝

此花南地知难种，惭愧僧闲用意栽。海燕解怜频睥睨，
胡蜂未识更徘徊。虚生芍药徒劳妒，羞杀玫瑰不敢开。
惟有数苞红萼在，含芳只待舍人来。

卷 474_5 【香炉峰】

徐凝

香炉一峰绝，顶在寺门前。尽是玲珑石，时生旦暮烟。

卷 474_6 【白铜鞮】

徐凝

骖褭锦障泥，楼头日又西。留欢住不住，素齿白铜鞮。

· 全唐诗 ·

卷 474_7【杨叛儿】

徐凝

哀怨杨叛儿，骀荡郎知否。香死博山炉，烟生白门柳。

卷 474_8【春寒】

徐凝

乱雪从教舞，回风任听吹。春寒能作底，已被柳条欺。

卷 474_9【庐山独夜】

徐凝

寒空五老雪，斜月九江云。钟声知何处，苍苍树里闻。

卷 474_10【天台独夜】

徐凝

银地秋月色，石梁夜溪声。谁知屐齿尽，为破烟苔行。

· 全唐诗 ·

卷 474_11【送寒岩归士】

徐凝

不挂丝纆衣，归向寒岩栖。寒岩风雪夜，又过岩前溪。

卷 474_12【送陈司马】

徐凝

家寄茅洞中，身游越城下。宁知许长史，不忆陈司马。

卷 474_13【武夷山仙城】

徐凝

武夷无上路，毛径不通风。欲共麻姑住，仙城半在空。

卷 474_14【避暑二首】

徐凝

一株金染密，数亩碧鲜疏。避暑临溪坐，何妨直钓鱼。

· 全唐诗 ·

斑多简簟冷，发少角冠清。避暑长林下，寒蝉又有声。

卷 474_15【浙西李尚书奏毁淫昏庙】

徐凝

传闻废淫祀，万里静山陂。欲慰灵均恨，先烧靳尚祠。

卷 474_16【酬相公再游云门寺】

徐凝

远羨五云路，逶迤千骑回。遗簪唯一去，贵赏不重来。

卷 474_17【杭州祝涛头二首】

徐凝

不道沙堤尽，犹欺石栈顽。寄言飞白雪，休去打青山。

倒打钱塘郭，长驱白浪花。吞吴休得也，输却五千家。

卷 474_18【问渔叟】

· 全唐诗 ·

徐凝

生事同漂梗，机心在野船。如何临逝水，白发未忘筌。

卷 474_19【云封庵】

徐凝

登岩背山河，立石秋风里。隐见浙江涛，一尺东沟水。

卷 474_20【汉宫曲】

徐凝

水色帘前流玉霜，赵家飞燕侍昭阳。
掌中舞罢箫声绝，三十六宫秋夜长。

卷 474_21【和嵩阳客月夜忆上清人】

徐凝

独夜嵩阳忆上仙，月明三十六峰前。
瑶池月胜嵩阳月，人在玉清眠不眠。

· 全唐诗 ·

卷 474_22【八月望夕雨】

徐凝

今年八月十五夜，寒雨萧萧不可闻。
如练如霜在何处，吴山越水万重云。

卷 474_23【观浙江涛】

徐凝

浙江悠悠海西绿，惊涛日夜两翻覆。
钱塘郭里看潮人，直至白头看不足。

卷 474_24【庐山瀑布】

徐凝

虚空落泉千仞直，雷奔入江不暂息。
今古长如白练飞，一条界破青山色。

卷 474_25【嘉兴寒食】

· 全唐诗 ·

徐凝

嘉兴郭里逢寒食，落日家家拜扫回。
唯有县前苏小小，无人送与纸钱来。

卷 474_26【忆扬州】

徐凝

萧娘脸下难胜泪，桃叶眉头易得愁。
天下三分明月夜，二分无赖是扬州。

卷 474_27【八月灯夕寄游越施秀才】

徐凝

四天净色寒如水，八月清辉冷似霜。
想得越人今夜见，孟家珠在镜中央。

卷 474_28【八月十五夜】

徐凝

皎皎秋空八月圆，常娥端正桂枝鲜。

· 全唐诗 ·

一年无似如今夜，十二峰前看不眠。

卷 474_29 【题伍员庙】

徐凝

千载空祠云海头，夫差亡国已千秋。
浙波只有灵涛在，拜奠青山人不休。

卷 474_30 【员峤先生】

徐凝

员峤先生无白发，海烟深处采青芝。
逢人借问陶唐主，欲进冰蚕五色丝。

卷 474_31 【莫愁曲】

徐凝

玳瑁床头刺战袍，碧纱窗外叶骚骚。
若为教作辽西梦，月冷如丁风似刀。

· 全唐诗 ·

卷 474_32【寄白司马】

徐凝

三条九陌花时节，万户千车看牡丹。
争遣江州白司马，五年风景忆长安。

卷 474_33【相思林】

徐凝

游客远游新过岭，每逢芳树问芳名。
长林遍是相思树，争遣愁人独自行。

卷 474_34【寄海峤丈人】

徐凝

万丈只愁沧海浅，一身谁测岁华遥。
自言来此云边住，曾看秦王树石桥。

卷 474_35【寄潘先生】

· 全唐诗 ·

徐凝

至人知姓不知名，闻道黄金骨节轻。
世上仙方无觅处，欲来西岳事先生。

卷 474_36 【宫中曲二首】

徐凝

披香侍宴插山花，厌著龙绡著越纱。
恃赖倾城人不及，檀妆唯约数条霞。

身轻入宠尽恩私，腰细偏能舞柘枝。
一日新妆抛旧样，六宫争画黑烟眉。

卷 474_37 【七夕】

徐凝

一道鹊桥横渺渺，千声玉佩过玲玲。
别离还有经年客，怅望不如河鼓星。

卷 474_38 【八月九月望夕雨】

· 全唐诗 ·

徐凝

八月繁云连九月，两回三五晦漫漫。
一年怅望秋将尽，不得常娥正面看。

卷 474_39【喜雪】

徐凝

长爱谢家能咏雪，今朝见雪亦狂歌。
杨花道即偷人句，不那杨花似雪何。

卷 474_40【春饮】

徐凝

乌家若下蚁还浮，白玉尊前倒即休。
不是春来偏爱酒，应须得酒遣春愁。

卷 474_41【二月望日】

徐凝

长短一年相似夜，中秋未必胜中春。

· 全唐诗 ·

不寒不暖看明月，况是从来少睡人。

卷 474_42【读远书】

徐凝

两转三回读远书，画檐愁见燕归初。
百花时节教人懒，云髻朝来不欲梳。

卷 474_43【古树】

徐凝

古树欹斜临古道，枝不生花腹生草。
行人不见树少时，树见行人几番老。

卷 474_44【独住僧】

徐凝

百补袈裟一比丘，数茎长睫覆青眸。
多应独住山林惯，唯照寒泉自剃头。

· 全唐诗 ·

卷 474_45 【伤画松道芬上人】

徐凝

百法驱驰百年寿，五劳消瘦五株松。
昨来闻道严陵死，画到青山第几重。

卷 474_46 【观钓台画图】

徐凝

一水寂寥青霭合，两崖崔嵬白云残。
画人心到啼猿破，欲作三声出树难。

卷 474_47 【荆巫梦思】

徐凝

楚水白波风袅袅，荆门暮色雨萧萧。
相思合眼梦何处，十二峰高巴字遥。

卷 474_48 【浙东故孟尚书种柳】

· 全唐诗 ·

徐凝

孟家种柳东城去，临水逶迤思故人。
不似当时大司马，重来得见汉南春。

卷 474_49【长洲览古】

徐凝

吴王上国长洲奢，翠黛寒江一道斜。
伤见摧残旧宫树，美人曾插九枝花。

卷 474_50【却归旧山望月有寄】

徐凝

年年明月总相似，大抵人情自不同。
今夜故山依旧见，班家扇样碧峰东。

卷 474_51【再归松溪旧居宿西林】

徐凝

五粒松深溪水清，众山摇落月偏明。

· 全唐诗 ·

西林静夜重来宿，暗记人家犬吠声。

卷 474_52【玩花五首】

徐凝

一树梨花春向暮，雪枝残处怨风来。
明朝渐觉无多去，看到黄昏不欲回。

麴尘溪上素红枝，影在溪流半落时。
时人自惜花肠断，春风却是等闲吹。

朱霞焰焰山枝动，绿野声声杜宇来。
谁为蜀王身作鸟，自啼还自有花开。

谁家踯躅青林里，半见殷花焰焰枝。
忆得倡楼人送客，深红衫子影门时。

花到蔷薇明艳绝，燕支颺破麦风秋。
一番弄色一番退，小妇轻妆大妇愁。

卷 474_53【长庆春】

徐凝

· 全唐诗 ·

山头水色薄笼烟，久客新愁长庆年。
身上五劳仍病酒，天桃窗下背花眠。

卷 474_54【山鹧鸪词】

徐凝

南越岭头山鹧鸪，传是当时守贞女。
化为飞鸟怨何人，犹有啼声带蛮语。

卷 474_55【郑女出参丈人词】

徐凝

凤钗翠翘双宛转，出见丈人梳洗晚。
掣曳罗绡跪拜时，柳条无力花枝软。

卷 474_56【春雨】

徐凝

花时闷见联绵雨，云入人家水毁堤。
昨日春风源上路，可怜红锦枉抛泥。

· 全唐诗 ·

卷 474_57【和白使君木兰花】

徐凝

枝枝转势雕弓动，片片摇光玉剑斜。
见说木兰征戍女，不知那作酒边花。

卷 474_58【正月十五夜呈幕中诸公】

徐凝

宵游二万七千人，独坐重城圈一身。
步月游山俱不得，可怜辜负白头春。

卷 474_59【乐府新诗】

徐凝

一声卢女十三弦，早嫁城西好少年。
不羨越溪歌者苦，采莲归去绿窗眠。

卷 474_60【春陪相公看花宴会二首】

· 全唐诗 ·

徐凝

丞相邀欢事事同，玉箫金管咽东风。
百分春酒莫辞醉，明日的无今日红。

木兰花谢可怜条，远道音书转寂寥。
春去一年春又尽，几回空上望江桥。

卷 474_61【牡丹】

徐凝

何人不爱牡丹花，占断城中好物华。
疑是洛川神女作，千娇万态破朝霞。

卷 474_62【过马当】

徐凝

风波隐隐石苍苍，送客灵鸦拂去樯。
三月尽头云叶秀，小姑新著好衣裳。

卷 474_63【金谷览古】

· 全唐诗 ·

徐凝

金谷园中数尺土，问人知是绿珠台。
绿珠歌舞天下绝，唯与石家生祸胎。

卷 474_64【上阳红叶】

徐凝

洛下三分红叶秋，二分翻作上阳愁。
千声万片御沟上，一片出宫何处流。

卷 474_65【洛城秋砧】

徐凝

三川水上秋砧发，五凤楼前明月新。
谁为秋砧明月夜，洛阳城里更愁人。

卷 474_66【和川守侍郎缙山题仙庙】

徐凝

王子缙山石殿明，白家诗句咏吹笙。

· 全唐诗 ·

安知散席人间曲，不是寥天鹤上声。

卷 474_67【和夜题玉泉寺】

徐凝

岁岁云山玉泉寺，年年车马洛阳尘。
风清月冷水边宿，诗好官高能几人。

卷 474_68【和秋游洛阳】

徐凝

洛阳自古多才子，唯爱春风烂漫游。
今到白家诗句出，无人不咏洛阳秋。

卷 474_69【和嘲春风】

徐凝

源上拂桃烧水发，江边吹杏暗园开。
可怜半死龙门树，懊恼春风作底来。

· 全唐诗 ·

卷 474_70【侍郎宅泛池】

徐凝

莲子花边回竹岸，鸡头叶上荡兰舟。
谁知洛北朱门里，便到江南绿水游。

卷 474_71【和侍郎邀宿不至】

徐凝

蟾蜍有色门应锁，街鼓无声夜自深。
料得白家诗思苦，一篇诗了一弹琴。

卷 474_72【自鄂渚至河南将归江外留辞侍郎】

徐凝

一生所遇唯元白，天下无人重布衣。
欲别朱门泪先尽，白头游子白身归。

卷 474_73【蛮入西川后】

· 全唐诗 ·

徐凝

守隘一夫何处在，长桥万里只堪伤。
纷纷塞外乌蛮贼，驱尽江头濯锦娘。

卷 474_74【忆紫溪】

徐凝

长忆紫溪春欲尽，千岩交映水回斜。
岩空水满溪自紫，水态更笼南烛花。

卷 474_75【夸红槿】

徐凝

谁道槿花生感促，可怜相计半年红。
何如桃李无多少，并打千枝一夜风。

卷 474_76【题缙云山鼎池二首】

徐凝

黄帝旌旗去不回，空余片石碧崔嵬。

· 全唐诗 ·

有时风卷鼎湖浪，散作晴天雨点来。

天地茫茫成古今，仙都凡有几人寻。
到来唯见山高下，只是不知湖浅深。

卷 474_77【宿冽上人房】

徐凝

浮生不定若蓬飘，林下真僧偶见招。
觉后始知身是梦，更闻寒雨滴芭蕉。

卷 474_78【汴河览古】

徐凝

炀帝龙舟向此行，三千宫女采桡轻。
渡河不似如今唱，为是杨家怨思声。

卷 474_79【柬白丈人】

徐凝

昔时丈人鬓发白，千年松下锄茯苓。

· 全唐诗 ·

今来见此松树死，丈人斩新鬓发青。

卷 474_80【览镜词】

徐凝

宝镜磨来寒水清，青衣把就绿窗明。
潘郎懊恼新秋发，拔却一茎生两茎。

卷 474_81【寄玄阳先生】

徐凝

不能相见见人传，巉岸山中岱岸边。
颜貌只如三二十，道年三百亦藏年。

卷 474_82【白人】

徐凝

暖风入烟花漠漠，白人梳洗寻常薄。
泥郎为插珑璁钗，争教一朵牙云落。

· 全唐诗 ·

卷 474_83【奉酬元相公上元】

徐凝

出拥楼船千万人，入为台辅九霄身。
如何更羨看灯夜，曾见宫花拂面春。

卷 474_84【奉和鹦鹉】

徐凝

毛羽曾经翦处残，学人言语道暄寒。
任饶长被金笼阖，也免栖飞雨雪难。

卷 474_85【将至妙喜寺】

徐凝

清风袅袅越水陂，远树苍苍妙喜寺。
自有车轮与马蹄，未曾到此波心地。

卷 474_86【红蕉】

· 全唐诗 ·

徐凝

红蕉曾到岭南看，校小芭蕉几一般。
差是斜刀剪红绢，卷来开去叶中安。

卷 474_87【见少室】

徐凝

适我一簞孤客性，问人三十六峰名。
青云无忘白云在，便可嵩阳老此生。

卷 474_88【语儿见新月】

徐凝

几处天边见新月，经过草市忆西施。
娟娟水宿初三夜，曾伴愁蛾到语儿。

卷 474_89【回施先辈见寄新诗二首】

徐凝

九幽仙子西山卷，读了绦绳系又开。

· 全唐诗 ·

此卷玉清宫里少，曾寻真诰读诗来。

紫河车里丹成也，皂荚枝头早晚飞。
料得仙宫列仙籍，如君进士出身稀。

卷 474_90【送沈亚之赴郢掾】

徐凝

千万乘骢沈司户，不须惆怅郢中游。
几年白雪无人唱，今日唯君上雪楼。

卷 474_91【答白公】

徐凝

高景争来草木头，一生心事酒前休。
山公自是仙人侣，携手醉登城上楼。

卷 474_92【句】

徐凝

青山旧路在，白首醉还乡。

· 全唐诗 ·

试到第三桥，便入千顷花。

乱后见淮水，归心忽迢遥。

乍疑鲸喷浪，忽似鹧凌风。呀呷汀洲动，喧阗里巷空。

· 全唐诗 ·

第四百七十五卷

卷 475_1 【奉和圣制南郊礼毕诗】

李德裕

磬筦歌大吕，冕裘旅天神。烧萧辟阍闾，祈谷为蒸人。
羽旗洒轻雪，麦陇含阳春。昌运岁今会，王猷从此新。
三臣皆就日，万国望如云。仁寿信非远，群生方在钧。

卷 475_2 【郊坛回輿，中书二相公蒙圣慈召至御马前，仰感恩遇，辄书是诗，兼呈二相公】

李德裕

七萃和銮动，三条葆吹回。相星环日道，苍马近龙媒。
咫尺天颜接，光华喜气来。自惭衰且病，无以效涓埃。

卷 475_3 【寒食日三殿侍宴，奉进诗一首】

李德裕

· 全唐诗 ·

宛转龙歌节，参差燕羽高。风光摇禁柳，霁色暖宫桃。
春露明仙掌，晨霞照御袍。雪凝陈组练，林植耸干旄。
广乐初跼凤，神山欲抃鳌。鸣笳朱鹭起，叠鼓紫骝豪。
象舞严金铠，丰歌耀宝刀。不劳孙子法，自得太公韬。
分席罗玄冕，行觞举绿醪。馥中时落羽，橐末乍升猱。
瑞景开阴翳，薰风散郁陶。天颜欢益醉，臣节劲尤高。
桔矢方来贡，雕弓已载囊。英威扬绝漠，神算尽临洮。
赤县阳和布，苍生雨露膏。野平惟有麦，田辟久无蒿。
禄秩荣三事，功勋乏一毫。寝谋惭汲黯，秉羽贵孙敖。
焕若游玄圃，欢如享太牢。轻生何以报，只自比鸿毛。

卷 475_4【雨中自秘书省访王三侍御，知早入朝，便入集贤，侍御任集贤校书，及升柏台，又与秘阁相对，同院张学士亦余特厚，故以诗赠之】

李德裕

共怜独鹤青霞姿，瀛洲故山归已迟。仁者焉能效鸂鶒，
飞舞自合追长离。梧桐迴齐鵷鹄观，烟雨屡拂蛟龙旗。
鸿雁冲飙去不尽，寒声晚下天泉池。顾我蓬莱静无事，
玉版宝书藏众瑞。青编尽以汲冢来，科斗皆从鲁室至。
金门待诏何逍遥，名儒早问张子侨。王褒轶材晚始入，
宫女已能传洞箫。应令柏台长对户，别来相望独寥寥。

卷 475_5【奉和太原张尚书山亭书怀】

· 全唐诗 ·

李德裕

岩石在朱户，风泉当翠楼。始知岷亭赏，难与清晖留。
馀景淡将夕，凝岚轻欲收。东山有归志，方接赤松游。

卷 475_6【奉和韦侍御陪相公游开义五言六韵】

李德裕

羊公追胜概，兹地暂逍遥。风景同南岷，丹青见北朝。
石渠清夏气，高树激鲜飙。念法珍禽集，闻经醉象调。
偶分甘露味，偏觉众香饶。为问毗城内，余薰几日销。

卷 475_7【赠圆明上人】

李德裕

远公说易长松下，龙树双经海藏中。
今日导师闻佛慧，始知前路化成空。

卷 475_8【赠奉律上人】

李德裕

· 全唐诗 ·

知君学地厌多闻，广渡群生出世氛。
饭色不应殊宝器，树香皆遣入禅薰。

卷 475_9【戏赠慎微寺主道安上座三僧正】

李德裕

甘露洒空惟一味，旃檀移植自成薰。
遥知畅献分南北，应用调柔致六群。

卷 475_10【长安秋夜】

李德裕

内宫传诏问戎机，载笔金銮夜始归。
万户千门皆寂寂，月中清露点朝衣。

卷 475_11【清冷池怀古】

李德裕

区囿三百里，常闻駟马来。旌旗朝甬道，箫鼓燕平台。
追昔赋文雅，从容游上才。竹园秋水净，风苑雪烟开。
牛祸衅将发，羊孙谋始回。袁丝徒伏剑，长孺欲成灰。

· 全唐诗 ·

兴废由所感，湮沦斯可哀。空留故池雁，刷羽尚徘徊。

卷 475_12【述梦诗四十韵】

李德裕

赋命诚非薄，良时幸已遭。君当尧舜日，官接凤凰曹。
目睹烟霄阔，心惊羽翼高。椅梧连鹤禁，璚垓接龙韬。
我后怜词客，吾僚并隼髦。著书同陆贾，待诏比王褒。
重价连悬璧，英词淬宝刀。泉流初落涧，露滴更濡毫。
赤豹欣来献，彤弓喜暂褰。非烟含瑞气，驯雉洁霜毛。
静室便幽独，虚楼散郁陶。花光晨艳艳，松韵晚骚骚。
画壁看飞鹤，仙图见巨鳌。倚檐阴药树，落格蔓蒲桃。
荷静蓬池鲙，冰寒郢水醪。荔枝来自远，卢橘赐仍叨。
麝气随兰泽，霜华入杏膏。恩光惟觉重，携挈未为劳。
夕阅梨园骑，宵闻禁仗铍。扇回交彩翟，雕起飏银绦。
轡待袁丝揽，书期蜀客操。尽规常謏謏，退食尚忉忉。
龟顾垂金钮，鸾飞曳锦袍。御沟杨柳弱，天厩骅骝豪。
屡换青春直，闲随上苑遨。烟低行殿竹，风拆绕墙桃。
聚散俄成昔，悲愁益自熬。每怀仙驾远，更望茂陵号。
地接三茅岭，川迎伍子涛。花迷瓜步暗，石固蒜山牢。
兰野凝香管，梅洲动翠篙。泉鱼惊彩妓，溪鸟避干旄。
感旧心犹绝，思归首更搔。无聊燃蜜炬，谁复劝金匏。
岚气朝生栋，城阴夜入濠。望烟归海峤，送雁渡江皋。
宛马嘶寒枥，吴钩在锦弰。未能追狡兔，空觉长黄蒿。
水国逾千里，风帆过万艘。阅川终古恨，惟见暮滔滔。

· 全唐诗 ·

卷 475_13【招隐山观玉蕊树戏书即事奉寄江西沈大夫阁老】

李德裕

玉蕊天中树，金闺昔共窥。落英闲舞雪，蜜叶乍低帷。
旧赏烟霄远，前欢岁月移。今来想颜色，还似忆琼枝。

卷 475_14【寄题惠林李侍郎旧馆】

李德裕

栋宇非吾室，云山是我邻。百龄惟待尽，一世乐长贫。
半壁悬秋日，空林满夕尘。只应双鹤吊，松路更无人。

卷 475_15【寄茅山孙炼师】

李德裕

何地最脩然，华阳第八天。松风清有露，萝月净无烟。
乍警瑶坛鹤，时嘶玉树蝉。欲驰千里恋，惟有凤门泉。

石上谿荪发紫茸，碧山幽蔼水溶溶。
菖花定是无人见，春日惟应羽客逢。

· 全唐诗 ·

独寻兰渚玩迟晖，闲倚松窗望翠微。
遥想春山明月曙，玉坛清磬步虚归。

卷 475_16 【题奇石】

李德裕

蕴玉抱清辉，闲庭日潇洒。块然天地间，自是孤生者。

卷 475_17 【送张中丞入台从事】

李德裕

驿骑朝天去，江城眷阙深。夜珠先去握，芳桂乍辞阴。
泽国三千里，羁孤万感心。自嗟文废久，此曲为卢谿。

卷 475_18 【怀京国】

李德裕

海上东风犯雪来，腊前先折镜湖梅。
遥思禁苑青春夜，坐待宫人画诏回。

· 全唐诗 ·

卷 475_19【追和太师颜公清远道士游虎丘寺】

李德裕

茂苑有灵峰，嗟余未游观。藏山半平陆，坏谷为高岸。
冈绕数仞墙，岩潜千丈干。乃知造化意，回斡资奇玩。
鏐腾昔虎踞，剑没尝龙焕。潭黛入海底，峯岑耸霄半。
层峦未升日，哀狖宁知旦。绿筱夏凝阴，碧林秋不换。
冥搜既窈窕，回望何萧散。川晴岚气收，江春杂英乱。
逸人缀清藻，前哲留篇翰。共扣哀玉音，皆舒文绣段。
难追彦回赏，徒起兴公叹。一夕如再升，含毫星斗烂。

卷 475_20【东郡怀古二首·王京兆】

李德裕

河水昔将决，冲波溢川浚。峥嵘金堤下，喷薄风雷音。
投马灾未弭，为鱼叹方深。惟公执珪璧，誓与身俱沉。
诚信不虚发，神明宜尔临。湍流自此回，咫尺焉能侵。
逮我守东郡，凄然怀所钦。虽非识君面，自谓知君心。
意气苟相合，神明无古今。登城见遗庙，日夕空悲吟。

卷 475_21【东郡怀古二首·阳给事】

· 全唐诗 ·

李德裕

宋氏远家左，豺狼满中州。阳君守滑台，终古垂英猷。
数仞城既毁，万夫心莫留。跳身入飞镞，免胄临霜矛。
毕命在旗下，僵尸横道周。义风激河汴，壮气沦山丘。
嗟尔抱忠烈，古来谁与俦。就烹感汉使，握节悲阳秋。
颜子缀清藻，铿然如素璆。徘徊望故垒，尚想精魂游。

卷 475_22【秋日登郡楼望赞皇山感而成咏】

李德裕

昔人怀井邑，为有挂冠期。顾我飘蓬者，长随泛梗移。
越吟因病感，潘鬓入秋悲。北指邯郸道，应无归去期。

卷 475_23【雨后净望河西连山怆然成咏】

李德裕

宿雨初收晚吹繁，秋光极目自销魂。烟山北下归辽海，
鸿雁南飞出蓟门。只恨无功书史籍，岂悲临老事戎轩。
唯怀药餌蠲衰病，为惜余年报主恩。

卷 475_24【秋日美晴，郡楼闲眺，寄荆南张书记】

· 全唐诗 ·

李德裕

高槛凉风起，清川旭景开。秋声向野去，爽气自山来。
霄外鸿初返，檐间燕已归。不因烟雨夕，何处梦阳台。

卷 475_25 【故人寄茶】

李德裕

剑外九华英，缄题下玉京。开时微月上，碾处乱泉声。
半夜邀僧至，孤吟对竹烹。碧流霞脚碎，香泛乳花轻。
六腑睡神去，数朝诗思清。其余不敢费，留伴读书行。

卷 475_26 【奉送相公十八丈镇扬州】

李德裕

千骑风生大旆舒，春江重到武侯庐。共悬龟印衔新绶，
同忆鱣庭访旧居。取履桥边啼鸟换，钓璜溪畔落花初。
今来却笑临邛客，入蜀空驰使者车。

卷 475_27 【题剑门】

李德裕

· 全唐诗 ·

奇峰百仞悬，清眺出岚烟。迥若戈回日，高疑剑倚天。
参差霞壁耸，合沓翠屏连。想是三刀梦，森然在目前。

卷 475_28【汉州月夕游房太尉西湖】

李德裕

丞相鸣琴地，何年闭玉徽。偶因明月夕，重敞故楼扉。
桃柳谿空在，芙蓉客暂依。谁怜济川楫，长与夜舟归。

卷 475_29【重题】

李德裕

晚日临寒渚，微风发棹讴。凤池波自阔，鱼水运难留。
亭古思宏栋，川长忆夜舟。想公高世志，只似冶城游。

卷 475_30【房公旧竹亭闻琴缅慕风流神期如在因重题此作】

李德裕

流水音长在，青霞意不传。独悲形解后，谁听广陵弦。

· 全唐诗 ·

卷 475_31 【忆金门旧游奉寄江西沈大夫】

李德裕

东望沧溟路几重，无因白首更相逢。已悲泉下双琪树，
又惜天边一卧龙。人事升沉才十载，宦游漂泊过千峰。
思君远寄西山药，岁暮相期向赤松。

卷 475_32 【早入中书行公主册礼事毕，登集贤阁成咏】

李德裕

明星入东陌，灿灿光层宙。皎月映高梧，轻风发凉候。
金门列葆吹，钟室传清漏。简册自中来，貂黄忝宣授。
更登天禄阁，极眺终南岫。遥羨商山翁，闲歌紫芝秀。
晨兴念始辱，夕惕思致寇。倾夺非我心，凄然感田窦。

卷 475_33 【题罗浮石】

李德裕

清景持芳菊，凉天倚茂松。名山何必去，此地有群峰。

· 全唐诗 ·

卷 475_34 【重过列子庙，追感顷年自淮服与居守王仆射同名于庙壁，仆射已为御史，余尚布衣。自后俱列紫垣，继游内署，两为下官之代，复联左揆之荣，荷宠多同，感涕何极，因书四韵奉寄】

李德裕

白首过遗庙，朱轮入故城。已惭联左揆，犹喜抗前旌。
曳履忘年旧，弹冠久要情。重看题壁处，岂羡弃繻生。

卷 475_35 【遥伤茅山县孙尊师三首】

李德裕

蝉蜕遗虚白，蜺飞入上清。同人悲剑解，旧友觉衣轻。
黄鹄遥将举，斑麟俨未行。惟应鲍靓室，中夜识琴声。

金格期初至，飙轮去不停。山摧武担石，天陨少微星。
弟子悲徐甲，门人泣蔡经。空闻留玉舄，犹在阜乡亭。

空宇留丹灶，层霞被羽衣。旧山闻鹿化，遗舄尚凫飞。
数日奇香在，何年白鹤归。想君旋下泪，方款里闾扉。

卷 475_36 【尊师是桃源黄先生传法弟子，常见尊师称先师

· 全唐诗 ·

灵迹，今重赋此诗，兼寄题黄先生旧馆】

李德裕

后学方成市，吾师又上宾。洞天应不夜，源树只如春。
棋客留童子，山精避直神。无因握石髓，及与养生人。

卷 475_37【仆射相公偶话于故集贤张学士厅写得德裕与仆射
旧唱和诗，其时和者五人，惟仆射与德裕皆列高位，凄然怀旧，
辄献此诗】

李德裕

赋感邻人笛，诗留夫子墙。延年如有作，应不用山王。

卷 475_38【惠泉】

李德裕

兹泉由太洁，终不畜纤鳞。到底清何益，含虚势自贫。
明玕难秘彩，美玉讵潜珍。未及黄陂量，滔滔岂有津。

卷 475_39【无题】

· 全唐诗 ·

李德裕

松倚苍崖老，兰临碧洞衰。不劳邻舍笛，吹起旧时悲。

卷 475_40【题冠盖里】

李德裕

偶来冠盖里，愧是旧三公。自喜无兵术，轻裘上闕宫。

卷 475_41【离平泉马上作】

李德裕

十年紫殿掌洪钧，出入三朝一品身。文帝宠深陪雉尾，
武皇恩厚宴龙津。黑山永破和亲虏，乌领全阬跋扈臣。
自是功高临尽处，祸来名灭不由人。

卷 475_42【谪岭南道中作】

李德裕

岭水争分路转迷，桄榔椰叶暗蛮溪。愁冲毒雾逢蛇草，
畏落沙虫避燕泥。五月畬田收火米，三更津吏报潮鸡。

· 全唐诗 ·

不堪肠断思乡处，红槿花中越鸟啼。

卷 475_43【到恶溪夜泊芦岛】

李德裕

甘露花香不再持，远公应怪负前期。青蝇岂独悲虞氏，
黄犬应闻笑李斯。风雨瘴昏蛮日月，烟波魂断恶溪时。
岭头无限相思泪，泣向寒梅近北枝。

卷 475_44【登崖州城作】

李德裕

独上高楼望帝京，鸟飞犹是半年程。
青山似欲留人住，百匝千遭绕郡城。

卷 475_45【鸳鸯篇】

李德裕

君不见昔时同心人，化作鸳鸯鸟。和鸣一夕不暂离，
交颈千年尚为少。二月草菲菲，山樱花未稀。金塘风日好，
何处不相依。既逢解佩游女，更值凌波宓妃。精光摇翠盖，

· 全唐诗 ·

丽色映珠玑。双影相伴，双心莫违。淹留碧沙上，
荡漾洗红衣。春光兮宛转，嬉游兮未反。宿莫近天泉池，
飞莫近长洲苑。尔愿欢爱不相忘，须去人间罗网远。
南有潇湘洲，且为千里游。洞庭无苦寒，沅江多碧流。
昔为薄命妾，无日不含愁。今为水中鸟，颉颃自相求。
洛阳女儿在青阁，二月罗衣轻更薄。金泥文彩未足珍，
画作鸳鸯始堪著。亦有少妇破瓜年，春闺无伴独婵娟。
夜夜学织连枝锦，织作鸳鸯人共怜。悠悠湘水滨，
清浅漾初蘋。菖花发艳无人识，江柳逶迤空自春。
唯怜独鹤依琴曲，更念孤鸾隐镜尘。愿作鸳鸯被，
长覆有情人。

卷 475_46【南梁行】

李德裕

江南郁郁春草长，悠悠汉水浮清光。杂英飞尽空和景，
绿杨阴重官舍静。此时醉客纵横书，公言可荐承明庐。
青天诏下宠光至，颁籍金闺征石渠。重归山路烟岚隔，
巫山未深晚花折。涧底红光夺目燃，摇风有毒愁行客。
杜鹃啼咽花亦殷，声悲绝艳连空山。斜阳瞥映浅深树，
云雨翻迷崖谷间。山鸡锦质矜毛羽，透竹穿萝命俦侣。
乔木幽谷上下同，雄雌不异飞栖处。望秦峰迥过商颜，
浪叠云堆万簇山。行尽杳冥青嶂外，九重钟漏紫云间。
元和列侍明光殿，谏草初焚市朝变。北阙趋臣半隙尘，
南梁笑客皆飞霰。追思感叹却昏迷，霜鬓愁吟到晓鸡。

· 全唐诗 ·

故园岁深开断简，秋堂月晓掩遗桂。呜呜晓角霞辉粲，
抚剑当楹一长叹。刍狗无由学圣贤，空持感激终昏旦。

卷 475_47【近于伊川卜山居，将命者画图而至，欣然有感，
聊赋此诗，兼寄上浙东元相公大夫，使求青田胎化鹤】

李德裕

弱岁弄词翰，遂叨明主恩。怀章过越邸，建旆守吴门。
西垞阴难驻，东皋意尚存。惭逾六百石，愧负五千言。
寄世知婴缴，辞荣类触藩。欲追绵上隐，况近子平村。
邑有桐乡爱，山余黍谷暄。既非逃相地，乃是故侯园。
野竹多微径，严泉岂一源。映池方树密，傍涧古藤繁。
邛杖堪扶老，黄牛已服辕。只应将唳鹤，幽谷共翩翻。

卷 475_48【忆平泉山居，赠沈吏部一首】

李德裕

昔闻羊叔子，茅屋在东渠。岂不念归路，徘徊畏简书。
乃知轩冕客，自与田园疏。歿世有遗恨，精诚何所如。
嗟予寡时用，夙志在林闾。虽抱山水癖，敢希仁智居。
清泉绕舍下，修竹荫庭除。幽径松盖密，小池莲叶初。
从来有好鸟，近复跃鲋鱼。少室映川陆，鸣皋对蓬庐。
张何旧寮案，相勉在悬舆。常恐似伯玉，瞻前惭魏舒。

· 全唐诗 ·

卷 475_49【夏晚有怀平泉林居】

李德裕

孟夏守畏途，舍舟在徂暑。愀然何所念，念我龙门坞。
密竹无蹊径，高松有四五。飞泉鸣树间，飒飒如度雨。
菌桂秀层岭，芳茝媚幽渚。稚子候我归，衡门独延伫。
谁言圣与哲，曾是不怀土。公旦既思周，宣尼亦念鲁。
矧余窜炎裔，日夕谁晤语。眷阙悲子牟，班荆感椒举。
凄凄视环玦，恻恻步庭庑。岂待庄舄吟，方知倦羁旅。

卷 475_50【早秋龙兴寺江亭闲眺忆龙门山居寄崔张旧从事】

李德裕

江亭感秋至，兰径悲露泫。粳稻秀晚川，杉松郁晴巘。
嗟予有林壑，兹夕念原衍。绿筱连岭多，青莎近溪浅。
渊明菊犹在，仲蔚蒿莫翦。乔木粲凌苕，阴崖积幽藓。
遥思伊川水，北渡龙门岨。苍翠双阙间，逶迤清滩转。
故人在乡国，岁晏路悠缅。惆怅此生涯，无由共登践。

卷 475_51 【比闻龙门敬善寺有红桂树独秀伊川，尝于江南诸山访之莫致，陈侍御知予所好，因访剡溪樵沮，乃知敬善所有是蜀道（）草，徒得嘉名，因赋是诗，兼赠陈侍御】

· 全唐诗 ·

李德裕

昔闻红桂枝，独秀龙门侧。越叟遗数株，周人未尝识。
平生爱此树，攀玩无由得。君子知我心，因之为羽翼。
岂烦嘉客誉，且就清阴息。来自天姥岑，长疑翠岚色。
芬芳世所绝，偃蹇枝渐直。琼叶润不凋，珠英粲如织。
犹疑翡翠宿，想待鹧鸪食。宁止暂淹留，终当更封植。

卷 475_52【怀山居邀松阳子同作】

李德裕

我有爱山心，如饥复如渴。出谷一年馀，常疑十年别。
春思岩花烂，夏忆寒泉冽。秋忆泛兰卮，冬思玩松雪。
晨思小山桂，暝忆深潭月。醉忆剖红梨，饭思食紫蕨。
坐思藤萝密，步忆莓苔滑。昼夜百刻中，愁肠几回绝。
每念羊叔子，言之岂常辍。人生不如意，十乃居七八。
我未及悬舆，今犹佩朝绂。焉能逐麋鹿，便得游林樾。
范恣沧波舟，张怀赤松列。惟应诤身恤，岂敢忘臣节。
器满自当欹，物盈终有缺。从兹返樵径，庶可希前哲。

卷 475_53【思归赤松村呈松阳子】

李德裕

· 全唐诗 ·

昔人思避世，惟恐不深幽。禽庆潜名岳，鸱夷漾钓舟。
顾余知止足，所乐在归休。不似寻山者，忘家恣远游。

卷 475_54【近腊对雪有怀林居】

李德裕

蓬门常昼掩，竹径寂无人。鸟起飘松霰，麋行动谷榛。
应知禽鱼侣，合与薜萝亲。遥忆平皋望，溪烟已发春。

卷 475_55【思山居一十首·清明后忆山中】

李德裕

遥思寒食后，野老林下醉。月照一山明，风吹百花气。
飞泉与万籁，仿佛疑箫吹。不待曙华分，已应喧鸟至。

卷 475_56【思山居一十首·题寄商山石】

李德裕

绮皓岩中石，尝经伴隐沦。紫芝呈几曲，红藓闕千春。
聊用支琴尾，宁惟倚病身。自知来处所，何暇问严遵。

· 全唐诗 ·

卷 475_57【思山居一十首·忆种菰时】

李德裕

尚平方毕娶，疏广念归期。涧底松成盖，檐前桂长枝。
径闲芳草合，山静落花迟。虽有菰园在，无因及种时。

卷 475_58【思山居一十首·春日独坐思归】

李德裕

壮龄心已尽，孤赏意犹存。岂望图麟阁，惟思卧鹿门。
无谋堪适野，何力可拘原。只有容身去，幽山自灌园。

卷 475_59【思山居一十首·思登家山林岭】

李德裕

自知无世用，只是爱山游。旧有嵇康懒，今惭赵武偷。
登峦未觉疾，泛水便忘忧。最惜残筋力，扪萝遍一丘。

卷 475_60【思山居一十首·思乡园老人】

· 全唐诗 ·

李德裕

常羨华门翁，所思惟岁稔。遥知松月曙，尚在山窗寝。
兰气入幽帘，禽言傍孤枕。晨兴步岩径，更酌寒泉饮。

卷 475_61【思山居一十首·寄龙门僧】

李德裕

龙门有开士，爱我春潭碧。清景出东山，闲来玩松石。
应怜林壑主，远作沧溟客。为我谢此僧，终当理归策。

卷 475_62【思山居一十首·忆药苗】

李德裕

溪上药苗齐，丰茸正堪掇。皆能扶我寿，岂止坚肌骨。
味掩商山芝，英逾首阳蕨。岂如甘谷士，只得香泉啜。

卷 475_63【思山居一十首·忆村中老人春酒】

李德裕

二叟茅茨下，清晨饮浊醪。雨残红芍药，风落紫樱桃。

· 全唐诗 ·

巢燕衔泥疾，檐虫挂网高。闲思春谷事，转觉宦途劳。

卷 475_64【思山居一十首·忆葛胜木禅床】

李德裕

忆我斋中榻，寒宵几独眠。管宁穿亦坐，徐孺去常悬。
虫网垂应遍，苔痕染更鲜。何人及身在，归对老僧禅。

卷 475_65【思山居一十首·初夏有怀山居】

李德裕

山中有所忆，夏景始清幽。野竹阴无日，岩泉冷似秋。
翠岑当累榭，皓月入轻舟。只有思归夕，空帘且梦游。

卷 475_66【张公超谷中石】

李德裕

鼓篋依绿槐，横经起秋雾。有时连岳客，尚办弦歌处。
自予去幽谷，谁人袭芳杜。空留古苔石，对我岩中树。

· 全唐诗 ·

卷 475_67【初归平泉，过龙门南岭，遥望山居即事】

李德裕

初归故乡陌，极望且徐轮。近野樵蒸至，平泉烟火新。
农夫馈鸡黍，渔子荐霜鳞。惆怅怀杨仆，惭为关外人。

卷 475_68【伊川晚眺】

李德裕

桑叶初黄梨叶红，伊川落日尽无风。
汉储何假终南客，甬里先生在谷中。

卷 475_69【潭上喜见新月】

李德裕

簪组十年梦，园庐今夕情。谁怜故乡月，复映碧潭生。
皓彩松上见，寒光波际轻。还将孤赏意，暂寄玉琴声。

卷 475_70【郊外即事寄侍郎大尹】

· 全唐诗 ·

李德裕

高秋慚非隐，闲林喜退居。老农争席坐，稚子带经锄。
竹径难回骑，仙舟但跂予。岂知陶靖节，只自爱吾庐。

卷 475_71 【山居遇雪喜道者相访】

李德裕

幽居近谷西，乔木与山齐。野竹连池合，岩松映雪低。
喜君来白社，值我在青谿。应笑於陵子，遗荣自灌畦。

卷 475_72 【雪霁晨起】

李德裕

雪覆寒溪竹，风卷野田蓬。四望无行迹，谁怜孤老翁。

卷 475_73 【洛中士君子多以平泉见呼，愧获方外方之名，
因以此诗为报奉寄刘宾客】

李德裕

非高柳下逸，自爱竹林闲。才异居东里，愚因在北山。

· 全唐诗 ·

径荒寒未扫，门设昼长关。不及鸱夷子，悠悠烟水间。

卷 475_74【早春至言禅公法堂忆平泉别业】

李德裕

昔我伊原上，孤游竹树间。人依红桂静，鸟傍碧潭闲。
松盖低春雪，藤轮倚暮山。永怀桑梓邑，衰老若为还。

卷 475_75【峡山亭月夜独宿对櫻桃花有怀伊川别墅】

李德裕

皎月照芳树，鲜葩含素辉。愁人惜春夜，达曙想岩扉。
风静阴满砌，露浓香入衣。恨无金谷妓，为我奏思归。

卷 475_76【春暮思平泉杂咏二十首·望伊川】

李德裕

远村寒食后，细雨度川来。芳草连谿合，梨花映墅开。
槿篱悬落照，松径长新苔。向夕亭皋望，游禽几处回。

· 全唐诗 ·

卷 475_77【春暮思平泉杂咏二十首·潭上紫藤】

李德裕

故乡春欲尽，一岁芳难再。岩树已青葱，吾庐日堪爱。
幽溪人未去，芳草行应碍。遥忆紫藤垂，繁英照潭黛。

卷 475_78【春暮思平泉杂咏二十首·书楼晴望】

李德裕

幽居人世外，久厌市朝喧。苍翠连双阙，微茫认九原。
残红映巩树，斜日照轳轳。薄暮柴扉掩，谁知仲蔚园。

卷 475_79【春暮思平泉杂咏二十首·西岭望鸣皋山】

李德裕

高秋对凉野，四望何萧瑟。远见鸣皋山，青峰原上出。
晨兴采薇蕨，向暮归蓬荜。诟假数挥金，餐和养余日。

卷 475_80【春暮思平泉杂咏二十首·瀑泉亭】

· 全唐诗 ·

李德裕

向老多悲恨，凄然念一丘。岩泉终古在，风月几年游。
菌阁饶佳树，菱潭有钓舟。不如羊叔子，名与岷山留。

卷 475_81【春暮思平泉杂咏二十首·红桂树】

李德裕

欲求尘外物，此树是瑶林。后素合余绚，如丹见本心。
妍姿无点辱，芳意托幽深。愿以鲜葩色，凌霜照碧浔。

卷 475_82【春暮思平泉杂咏二十首·金松】

李德裕

台岭生奇树，佳名世未知。纤纤疑大菊，落落是松枝。
照日含金晰，笼烟淡翠滋。勿言人去晚，犹有岁寒期。

卷 475_83【春暮思平泉杂咏二十首·月桂】

李德裕

何年霜夜月，桂子落寒山。翠干生岩下，金英在世间。

· 全唐诗 ·

幽崖空自老，清汉未知还。惟有凉秋夜，嫦娥来暂攀。

卷 475_84【春暮思平泉杂咏二十首·山桂】

李德裕

吾爱山中树，繁英满目鲜。临风飘碎锦，映日乱非烟。
影入春潭底，香凝月榭前。岂知幽独客，赖此当朱弦。

卷 475_85【春暮思平泉杂咏二十首·柏】

李德裕

闻有三株树，惟应秘阆风。珊瑚不生叶，朱草又无丛。
未若凌云柏，常能终岁红。晨霞与落日，相照在岩中。

卷 475_86【春暮思平泉杂咏二十首·芳荪】

李德裕

楚客重兰荪，遗芳今未歇。叶抽清浅水，花照暄妍节。
紫艳映渠鲜，轻香含露洁。离居若有赠，暂与幽人折。

· 全唐诗 ·

卷 475_87【春暮思平泉杂咏二十首·流杯亭】

李德裕

激水自山椒，析波分浅濑。回环疑古篆，诘曲如萦带。
宁憩羽觞迟，惟欢亲友会。欲知中圣处，皓月临松盖。

卷 475_88【春暮思平泉杂咏二十首·东谿】

李德裕

近蓄东谿水，悠悠起渌波。彩鸳留不去，芳草日应多。
夹岸生奇筱，缘岩覆女萝。兰桡思无限，为感濯缨歌。

卷 475_89【春暮思平泉杂咏二十首·鸂鶒】

李德裕

清泚双鸂鶒，前年海上雏。今来恋洲屿，思若在江湖。
欲起摇荷盖，闲飞溅水珠。不能常泛泛，惟作逐波凫。

卷 475_90【春暮思平泉杂咏二十首·西园】

· 全唐诗 ·

李德裕

西园最多趣，永日自忘归。石濑流清浅，风岑澹翠微。
晓翻红药艳，晴袅碧潭辉。独望娟娟月，宵分半掩扉。

卷 475_91【春暮思平泉杂咏二十首·海石楠】

李德裕

昔见历阳山，鸡笼已孤秀。今看海峤树，翠盖何幽茂。
霰雪讵能侵，烟岚自相揉。攀条独临憩，况值清阴昼。

卷 475_92【春暮思平泉杂咏二十首·双碧潭】

李德裕

清剌与严湍，潺湲皆可忆。适来玩山水，无此秋潭色。
莫辨幽兰丛，难分翠禽翼。迟迟洲渚步，临眺忘餐食。

卷 475_93【春暮思平泉杂咏二十首·竹径】

李德裕

野竹自成径，绕溪三里余。檀栾被层阜，萧瑟荫清渠。

· 全唐诗 ·

日落见林静，风行知谷虚。田家故人少，谁肯共焚鱼。

卷 475_94【春暮思平泉杂咏二十首·花药栏】

李德裕

蕙草春已碧，兰花秋更红。四时发英艳，三径满芳丛。
秀色濯清露，鲜辉摇惠风。王孙未知返，幽赏竟谁同。

卷 475_95【春暮思平泉杂咏二十首·自叙】

李德裕

五岳径虽深，遍游心已荡。苟能知止足，所遇皆清旷。
七十难可期，一丘乃微尚。遥怀少室山，常恐非吾望。

卷 475_96【首夏清景想望山居】

李德裕

嘉树阴初合，山中赏更新。禽言未知夏，兰径尚余春。
散满萝垂带，扶疏桂长轮。丹青写不尽，宵梦叹非真。
累榭空留月，虚舟若待人。何时倚兰棹，相与掇汀蘋。

· 全唐诗 ·

卷 475_97【思平泉树石杂咏一十首·钓台】

李德裕

我有严湍思，怀人访故台。客星依钓隐，仙石逐槎回。
倒影含清沚，凝阴长碧苔。飞泉信可挹，幽客未归来。

卷 475_98【思平泉树石杂咏一十首·似鹿石】

李德裕

林中有奇石，仿佛兽潜行。乍似依岩桂，还疑食野苹。
茸长绿藓映，斑细紫苔生。不是见羈者，何劳如顿缨。

卷 475_99【思平泉树石杂咏一十首·海上石笋】

李德裕

常爱仙都山，奇峰千仞悬。迢迢一何迥，不与众山连。
忽逢海峤石，稍慰平生忆。何以慰我心，亭亭孤且直。

卷 475_100【思平泉树石杂咏一十首·叠石】

· 全唐诗 ·

李德裕

潺湲桂水湍，漱石多奇状。鳞次冠烟霞，蝉联叠波浪。
今来碧梧下，迥出秋潭上。岁晚苔藓滋，怀贤益惆怅。

卷 475_101【思平泉树石杂咏一十首·重台芙蓉】

李德裕

芙蓉含露时，秀色波中溢。玉女袭朱裳，重重映皓质。
晨霞耀丹景，片片明秋日。兰泽多众芳，妍姿不相匹。

卷 475_102【思平泉树石杂咏一十首·白鹭鸂】

李德裕

余心怜白鹭，潭上日相依。拂石疑星落，凌风似雪飞。
碧沙常独立，清景自忘归。所乐惟烟水，徘徊恋钓矶。

卷 475_103【思平泉树石杂咏一十首·海鱼骨】

李德裕

昔日任公子，期年钓此鱼。无由见成岳，聊喜识专车。

· 全唐诗 ·

皎皎连霜月，高高映碧渠。陶潜虽好事，观海只披图。

卷 475_104【思平泉树石杂咏一十首·泛池舟】

李德裕

桂舟兰作枻，芬芳皆绝世。只可弄潺湲，焉能济大川。
树悬凉夜月，风散碧潭烟。未得同鱼子，菱歌共扣舷。

卷 475_105【思平泉树石杂咏一十首·舴艋舟】

李德裕

无轻舴艋舟，始自鸱夷子。双阙挂朝衣，五湖极烟水。
时游杏坛下，乍入湘川里。永日歌濯缨，超然谢尘滓。

卷 475_106【思平泉树石杂咏一十首·二猿】

李德裕

钓濑水涟漪，富春山合沓。松上夜猿鸣，谷中清响合。
冲网忽见羈，故山从此辞。无由碧潭饮，争接绿萝枝。

· 全唐诗 ·

卷 475_107【思在山居日偶成此咏邀松阳子同作】

李德裕

闲思昔岁事，忽忽念伊川。乘月步秋坂，满山闻石泉。
回塘碧潭映，高树绿萝悬。露下叫田鹤，风来嘶晚蝉。
怀兹长在梦，归去且无缘。幽谷人未至，兰苔应更鲜。

卷 475_108【重忆山居六首·平泉源】

李德裕

山谷才浮芥，中园已滥觞。逶迤过竹坞，浩淼走兰塘。
夜静闻鱼跃，风微见雁翔。从兹东向海，可泛济川航。

卷 475_109【重忆山居六首·泰山石】

李德裕

鸡鸣日观望，远与扶桑对。沧海似熔金，众山如点黛。
遥知碧峰首，独立烟岚内。此石依五松，苍苍几千载。

卷 475_110【重忆山居六首·巫山石】

· 全唐诗 ·

李德裕

十二峰前月，三声猿夜愁。此中多怪石，日夕漱寒流。
必是归星渚，先求历斗牛。还疑烟雨霁，仿佛是嵩丘。

卷 475_111【重忆山居六首·罗浮山】

李德裕

龙伯钓鳌时，蓬莱一峰坼。飞来碧海畔，遂与三山隔。
其下多长溪，潺湲淙乱石。知君分如此，赠逾荆山璧。

卷 475_112【重忆山居六首·漏潭石】

李德裕

常疑六合外，未信漆园书。及此闻溪漏，方欣验尾闾。
大哉天地气，呼吸有盈虚。美石劳相赠，琼瑰自不如。

卷 475_113【重忆山居六首·钓石】

李德裕

严光隐富春，山色谿又碧。所钓不在鱼，挥纶以自适。

· 全唐诗 ·

余怀慕君子，且欲坐潭石。持此返伊川，悠然慰衰疾。

卷 475_114【怀伊川郊居】

李德裕

衰疾常怀土，郊园欲掩扉。虽知明目地，不及有身归。
巩树秋阴遍，伊原霁色微。此生看白首，良愿已应违。

卷 475_115【晨起见雪忆山居】

李德裕

忽忆岩中雪，谁人拂薜萝。竹梢低未举，松盖偃应多。
山溜随冰落，林麋带霰过。不劳闻鹤语，方奏苦寒歌。

卷 475_116【忆平泉杂咏·忆初暖】

李德裕

今日初春暖，山中事若何。雪开喧鸟至，澌散跃鱼多。
幽翠生松栝，轻烟起薜萝。柴扉常昼掩，惟有野人过。

· 全唐诗 ·

卷 475_117【忆平泉杂咏·忆辛夷】

李德裕

昔年将出谷，几日对辛夷。倚树怜芳意，攀条惜岁滋。
清阴须暂憩，秀色正堪思。只待挥金日，殷勤泛羽卮。

卷 475_118【忆平泉杂咏·忆寒梅】

李德裕

寒塘数树梅，常近腊前开。雪映缘岩竹，香侵泛水苔。
遥思清景暮，还有野禽来。谁是攀枝客，兹辰醉始回。

卷 475_119【忆平泉杂咏·忆药栏】

李德裕

野人清旦起，扫雪见兰芽。始吠春泉入，惟愁暮景斜。
未抽萱草叶，才发款冬花。谁念江潭老，中宵旅梦赊。

卷 475_120【忆平泉杂咏·忆茗芽】

· 全唐诗 ·

李德裕

谷中春日暖，渐忆掇茶英。欲及清明火，能销醉客醒。
松花飘鼎泛，兰气入瓯轻。饮罢闲无事，扪萝溪上行。

卷 475_121【忆平泉杂咏·忆野花】

李德裕

虽游洛阳道，未识故园花。晓忆东谿雪，晴思冠岭霞。
谷深兰色秀，村迥柳阴斜。怅望龙门晚，谁知小隐家。

卷 475_122【忆平泉杂咏·忆春雨】

李德裕

春鸠鸣野树，细雨入池塘。潭上花微落，溪边草更长。
梳风白鹭起，拂水彩鸳翔。最羡归飞燕，年年在故乡。

卷 475_123【忆平泉杂咏·忆晚眺】

李德裕

伊川新雨霁，原上见春山。缙岭晴虹断，龙门宿鸟还。

· 全唐诗 ·

牛羊平野外，桑柘夕烟间。不及乡园叟，悠悠尽日闲。

卷 475_124【忆平泉杂咏·忆新藤】

李德裕

遥闻碧潭上，春晚紫藤开。水似晨霞照，林疑彩凤来。
清香凝岛屿，繁艳映莓苔。金谷如相并，应将锦帐回。

卷 475_125【忆平泉杂咏·忆春耕】

李德裕

郊外杏花坼，林间布谷鸣。原田春雨后，谿水夕流平。
野老荷蓑至，和风吹草轻。无因共沮溺，相与事岩耕。

卷 475_126【余所居平泉村舍，近蒙韦常侍大尹，特改嘉名，
因寄诗以谢】

李德裕

未谢留侯疾，常怀仲蔚园。闲谣紫芝曲，归梦赤松村。
忽改蓬蒿色，俄吹黍谷暄。多惭孔北海，传教及衡门。

· 全唐诗 ·

卷 475_127【山信至说平泉别墅草木滋长，地转幽深，怅然思归，复此作】

李德裕

忽闻樵客语，暂慰野人心。幽径芳兰密，闲庭秀木深。
麋麋来涧底，鳧鹄遍川浔。谁念沧溟上，归欤起叹音。

卷 475_128【临海太守惠予赤城石，报以是诗】

李德裕

闻君采奇石，剪断赤城霞。潭上倒虹影，波中摇日华。
仙岩接绛气，谿路杂桃花。若值客星去，便应随海槎。

卷 475_129【上巳忆江南禊事】

李德裕

黄河西绕郡城流，上巳应无祓禊游。
为忆渌江春水色，更无宵梦向吴州。

卷 475_130【北固怀古】

· 全唐诗 ·

李德裕

自有此山川，于今几太守。近世二千石，毕公宣化厚。
丞相量纳川，平阳气冲斗。三贤若时雨，所至跻仁寿。

卷 475_131【汨罗】

李德裕

远谪南荒一病身，停舟暂吊汨罗人。都缘靳尚图专国，
岂是怀王厌直臣。万里碧潭秋景静，四时愁色野花新。
不劳渔父重相问，自有招魂拭泪巾。

卷 475_132【岭外守岁】

李德裕

冬逐更筹尽，春随斗柄回。寒暄一夜隔，客鬓两年催。

卷 475_133【访韦楚老不遇】

李德裕

昔日征黄绮，余惭在凤池。今来招隐士，恨不见琼枝。

· 全唐诗 ·

卷 475_134 【题柳郎中故居】

李德裕

下马荒阶日欲曛，潺潺石溜静中闻。
鸟啼花发人声绝，寂寞山窗掩白云。

卷 475_135 【盘陀岭驿楼】

李德裕

嵩少心期杳莫攀，好山聊复一开颜。
明朝便是南荒路，更上层楼望故关。

卷 475_136 【句】

李德裕

检经求绿字，凭酒借红颜。

君不见秋山寂历风飙歇，半夜青崖吐明月。
寒光乍出松筱间，万籁萧萧从此发。忽闻歌管吟朔风，
精魂想在幽岩中。

· 全唐诗 ·

银花悬院榜，神撼引铃绦。

葳蕤轻风里，若衔若垂何可拟。

自从一梦高唐后，可是无人胜楚王。

牛羊具特俎。

心悟觉身劳，云中弃宝刀。久闲生髀肉，多寿长眉毫。

书空跣足睡，路险侧身行。

谁家幼女敲箏歌，何处丁妻点灯织。

鱼虾集橘市。

休咎占人甲，挨持见天丁。

洛下推年少，山东许地高。

世上文章士，谁为第一人。老生夸隐拙，时辈毁尖新。

湍湍寒泉深百尺。

奇觚率尔操，讽谏欣然纳。

· 全唐诗 ·

第四百七十六卷

卷 476_1 【至日荷李常侍过郊居】

熊孺登

贱子守柴荆，谁人记姓名。风云千骑降，草木一阳生。
礼异江河动，欢殊里巷惊。称觞容侍坐，看竹许同行。
遇觉沧溟浅，恩疑太岳轻。尽搜天地物，无谕此时情。

卷 476_2 【日暮天无云】

熊孺登

杳杳复苍然，无云日暮天。象分青气外，景尽赤霄前。
渐吐星河色，遥生水木烟。从容难附丽，顾步欲澄鲜。
但见收三素，何能测上玄。应非暂呈瑞，不许出山川。

卷 476_3 【新成小亭月夜】

熊孺登

· 全唐诗 ·

已被月知处，斩新风到来。无人伴幽境，多取木兰栽。

卷 476_4【和窦中丞岁酒喜见小男两岁】

熊孺登

更添十岁应为相，岁酒从今把未休。
闻得一毛添五色，眼看相逐凤池头。

卷 476_5【寒食】

熊孺登

东风泼火雨新休，舁尽春泥扫雪沟。
走马犊车当御路，汉阳公主谢鸡球。

卷 476_6【送僧游山】

熊孺登

云身自在山山去，何处灵山不是归。
日暮寒林投古寺，雪花飞满水田衣。

· 全唐诗 ·

卷 476_7【雪中答僧书】

熊孺登

八行银字非常草，六出天花尽是梅。
无所与陈童子别，雪中辛苦远山来。

卷 476_8【题逍遥楼伤故韦大夫】

熊孺登

利及生人无更为，落花流水旧城池。
逍遥楼上雕龙字，便是羊公堕泪碑。

卷 476_9【戏赠费冠卿】

熊孺登

但恐红尘虚白首，宁论蹇逸分先后。
莫占莺花笑寂寥，长安春色年年有。

卷 476_10【与左兴宗湓城别】

· 全唐诗 ·

熊孺登

江逢九派人将别，猿到三声月为秋。
不知相见更何日，此夜少年堪白头。

卷 476_11【八月十五夜卧疾】

熊孺登

一年只有今宵月，尽上江楼独病眠。
寂寞竹窗闲不闭，夜深斜影到床前。

卷 476_12【正月十五日】

熊孺登

汉家遗事今宵见，楚郭明灯几处张。
深夜行歌声绝后，紫姑神下月苍苍。

卷 476_13【曲池陪宴即事上窦中丞】

熊孺登

水自山阿绕坐来，珊瑚台上木绵开。

· 全唐诗 ·

欲知举目无情罚，一片花流酒一杯。

卷 476_14【董监庙】

熊孺登

仁杰淫祠废欲无，枯枫老桧两三株。
神乌惯得商人食，飞趁征帆过蠡湖。

卷 476_15【赠侯山人】

熊孺登

一见清容惬素闻，有人传是紫阳君。
来时玉女裁春服，剪破湘山几片云。

卷 476_16【送马判官赴安南】

熊孺登

故人交趾去从军，应笑狂生挥阵云。
省得蔡州今日事，旧曾都护帐前闻。

· 全唐诗 ·

卷 476_17【送淮上人归石经院】

熊孺登

旃檀刻像今犹少，白石镌经古未曾。
归去更寻翻译寺，前山应遇雁门僧。

卷 476_18【寒食野望】

熊孺登

拜扫无过骨肉亲，一年唯此两三辰。
冢头莫种有花树，春色不关泉下人。

卷 476_19【祇役遇风谢湘中春色】

熊孺登

水生风熟布帆新，只见公程不见春。
应被百花撩乱笑，比来天地一闲人。

卷 476_20【湘江夜泛】

· 全唐诗 ·

熊孺登

江流如箭月如弓，行尽三湘数夜中。
无那子规知向蜀，一声声似怨春风。

卷 476_21【蜀江水】

熊孺登

日夜朝宗来万里，共怜江水引蕃心。
若论巴峡愁人处，猿比滩声是好音。

卷 476_22【寄安南马中丞】

熊孺登

龙韬能致虎符分，万里霜台压瘴云。
蕃客不须愁海路，波神今伏马将军。

卷 476_23【甘子堂陪宴上韦大夫】

熊孺登

武陵楼上春长早，甘子堂前花落迟。

· 全唐诗 ·

楚乐怪来声竞起，新歌尽是大夫词。

卷 476_24 【青溪村居二首】

熊孺登

家占溪南千个竹，地临湖上一群山。
渔船多在马长放，出处自由闲不闲。

深树黄鹂晓一声，林西江上月犹明。
野人早起无他事，贪绕沙泉看笋生。

卷 476_25 【奉和兴元郑相公早春送杨侍郎】

熊孺登

征鞍欲上醉还留，南浦春生百草头。
丞相新裁别离曲，声声飞出旧梁州。

卷 476_26 【送舍弟孺复往庐山】

熊孺登

能骑竹马辨西东，未省烟花暂不同。

· 全唐诗 ·

第一早归春欲尽，庐山好看过湖风。

卷 476_27【野别留少微上人】

熊孺登

若为相见还分散，翻觉浮云亦不闲。
何处留师暂且住，家贫唯有坐中山。

卷 476_28【经古墓】

熊孺登

碑折松枯山火烧，夜台从闭不曾朝。
那将逝者比流水，流水东流逢上潮。

卷 476_29【赠灵彻上人】

熊孺登

诗句能生世界春，僧家更有姓汤人。
况闻暗忆前朝事，知是修行第几身。

· 全唐诗 ·

卷 476_30 【春郊醉中赠章八元】

熊孺登

三月踏青能几日，百回添酒莫辞频。
看君倒卧杨花里，始觉春光为醉人。

· 全唐诗 ·

第四百七十七卷

卷 477_1【怀古】

李涉

尼父未适鲁，屡屡倦迷津。徒怀教化心，纡郁不能伸。
一遇知己言，万方始喧喧。至今百王则，孰不挹其源。

卷 477_2【咏古】

李涉

大智思济物，道行心始休。垂纶自消息，岁月任春秋。
纣虐武既贤，风云固可求。顺天行杀机，所向协良谋。
况以丈人师，将济安川流。何劳问枯骨，再取阴阳筹。
霸国不务仁，兵戈恣相酬。空令渭水迹，千古独悠悠。

卷 477_3【题清溪鬼谷先生旧居】

李涉

· 全唐诗 ·

翠壁开天池，青崖列云树。水容不可状，杳若清河雾。
常闻先生教，指示秦仪路。二子才不同，逞词过尺度。
偶因从吏役，远到冥栖处。松月想旧山，烟霞了如故。
未遑炼金鼎，日觉容光暮。万虑随境生，何由返真素。
寂寞天籁息，清迥鸟声曙。回首望重重，无期挹风驭。

卷 477_4【感兴】

李涉

隋氏造宫阙，峨峨倚云烟。搜奇竭四海，立制谋千年。
秦兵半夜来，烈火焚高台。万人聚筋血，一旦为尘埃。
君看汴河路，尚说隋家柳。但问哭陵人，秋草没来久。

卷 477_5【鹧鸪词二首】

李涉

湘江烟水深，沙岸隔枫林。何处鹧鸪飞，日斜斑竹阴。
二女空垂泪，三闾枉自沉。惟有鹧鸪啼，独伤行客心。

越冈连越井，越鸟更南飞。何处鹧鸪啼，夕烟东岭归。
岭外行人少，天涯北客稀。鹧鸪啼别处，相对泪沾衣。

· 全唐诗 ·

卷 477_6【山中】

李涉

无奈牧童何，放牛吃我竹。隔林呼不应，叫笑如生鹿。
欲报田舍翁，更深不归屋。

卷 477_7【寄荆娘写真】

李涉

章华台南莎草齐，长河柳色连金堤。青楼曈曈曙光蚤，
梨花满巷莺新啼。章台玉颜年十六，小来能唱西梁曲。
教坊大使久知名，郢上词人歌不足。少年才子心相许，
夜夜高堂梦云雨。五铢香帔结同心，三寸红笺替传语。
缘池并戏双鸳鸯，田田翠叶红莲香。百年恩爱两相许，
一夕不见生愁肠。上清仙女征游伴，欲从湘灵住河汉。
只愁陵谷变人寰，空叹桑田归海岸。愿分精魄定形影，
永似银壶挂金井。召得丹青绝世工，写真与身真相同。
忽然相对两不语，疑是妆成来镜中。岂期人愿天不违，
云輶却驻从山归。画图封裹寄箱篋，洞房艳艳生光辉。
良人翻作东飞翼，却遣江头问消息。经年不得一封书，
翠幕云屏绕空壁。结客有少年，名总身姓江。
征帆三千里，前月发豫章。知我别时言，识我马上郎。
恨无羽翼飞，使我徒怨沧波长。开篋取画图，

· 全唐诗 ·

寄我形影与客将。如今憔悴不相似，恐君重见生悲伤。
苍梧九疑在何处，斑斑竹泪连潇湘。

卷 477_8 【与弟渤新罗剑歌】

李涉

我有神剑异人与，暗中往往精灵语。识者知从东海来，
来时一夜因风雨。长河临晓北斗残，秋水露背青螭寒。
昨夜大梁城下宿，不借蹉跎光颜看。刃边飒飒尘沙缺，
瘢痕半是蛟龙血。雷焕张华久已无，沉冤知向何人说。
我有爱弟都九江，一条直气今无双。青光好去莫惆怅，
必斩长鲸须少壮。

卷 477_9 【六叹】

李涉

绮罗香风翡翠车，清明独傍芙蓉渠。上有云鬟洞仙女，
垂罗掩縠烟中语。风月频惊桃李时，沧波久别鸳鸯侣。
欲传一札孤飞翼，山长水远无消息。却锁重门一院深，
半夜空庭明月色。

深院梧桐夹金井，上有辘轳青丝索。美人清昼汲寒泉，
寒泉欲上银瓶落。迢迢碧甃千余尺，竟日倚阑空叹息。

· 全唐诗 ·

惆怅不来照明镜，却掩洞房抱寂寂。

汉臣一没丁零塞，牧羊西过阴沙外。朝凭南雁信难回，
夜望北辰心独在。汉家茅土横九州，高门长戟封王侯。
但将钟鼓悦私爱，肯以犬羊为国羞。夜宿寒云卧冰雪，
严风触刃垂旌节。丁年奉使白头归，泣尽李陵衣上血。

卷 477_10【春山三謁来】

李涉

钓鱼謁来春日暖，沿溪不厌舟行缓。野竹初栽碧玉长，
澄潭欲下青丝短。昔人避世兼避讎。暮栖云外朝悠悠。
我今无事亦如此，赤鲤忽到长竿头。泛泛随波凡几里，
碧莎如烟沙似砥。瘦壁横空怪石危，山花斗日禽争水。
有时带月归扣舷，身闲自是渔家仙。

山上謁来采新茗，新花乱发前山顶。琼英动摇钟乳碧，
丛丛高下随崖岭。未必蓬莱有仙药，能向鼎中云漠漠。
越瓯遥见裂鼻香，欲觉身轻骑白鹤。

采药謁来药苗盛，药生只傍行人径。世人重耳不重目，
指似药苗心不足。野客住山三十载，妻儿共寄浮云外。
小男学语便分别，已辩君臣知匹配。都市广长开大铺，
疾来求者多相误。见说韩康旧姓名，识之不识先相怒。

· 全唐诗 ·

卷 477_11【牧童词】

李涉

朝牧牛，牧牛下江曲。夜牧牛，牧牛度村谷。
荷蓑出林春雨细，芦管卧吹莎草绿。乱插蓬蒿箭满腰，
不怕猛虎欺黄犊。

卷 477_12【醉中赠崔膺】

李涉

与君兄弟匡岭故，与君相逢扬子渡。白浪南分吴塞云，
绿杨深入隋宫路。隋家文物今虽改，舞馆歌台基尚在。
炀帝陵边草木深，汴河流水空归海。古今悠悠人自别，
此地繁华终未歇。大道青楼夹翠烟，琼幄绣帐开明月。
与君一言两相许，外舍形骸中尔女。扬州歌酒不可追，
洛神映箔湘妃语。白马黄金为身置，谁能独羡他人醉。
暂到香炉一夕间，能展愁眉百世事。君看白日光如箭，
一度别来颜色变。早谋侯印佩腰间，莫遣看花鬓如霰。

卷 477_13【岳阳别张祜】

李涉

· 全唐诗 ·

十年蹭蹬为逐臣，鬓毛白尽巴江春。鹿鸣猿啸虽寂寞，
水蛟山魅多精神。山疟困中闻有赦，死灰不望光阴借。
半夜州符唤牧童，虚教衰病生惊怕。巫峡洞庭千里余，
蛮陬水国何亲疏。由来真宰不宰我，徒劳叹者怀吹嘘。
霸桥昔与张生别，万变桑田何处说。龙蛇纵在没泥涂，
长衢却为驽骀设。爱君气坚风骨峭，文章真把江淹笑。
洛下诸生惧刺先，乌鸢不得齐鹰鹞。岳阳西南湖上寺，
水阁松房遍文字。新钉张生一首诗，自余吟著皆无味。
策马前途须努力，莫学龙钟虚叹息。

卷 477_14【寄河阳从事杨潜】

李涉

忆昨天台寻石梁，赤城枕下看扶桑。金乌欲上海如血，
翠色一点蓬莱光。安期先生不可见，蓬莱目极沧海长。
回舟偶得风水便，烟帆数夕归潇湘。潇湘水清岩嶂曲，
夜宿朝游常不足。一自无名身事闲，五湖云月偏相属。
进者恐不荣，退者恐不深。鱼游鸟逝两虽异，
彼此各有遂生心。身解耕耘妾能织，岁晏饥寒免相逼。
稚子才年七岁余，渔樵一半分渠力。吾友从军在河上，
腰佩吴钩佐飞将。偶与嵩山道士期，西寻汴水来相访。
见君颜色犹憔悴，知君未展心中事。落日驱车出孟津，
高歌共叹伤心地。洛邑秦城少年别，两都陈事空闻说。
汉家天子不东游，古木行宫闭烟月。洛滨老翁年八十，
西望残阳临水泣。自言生长开元中，武皇恩化亲沾及。

· 全唐诗 ·

当时天下无甲兵，虽闻赋敛毫毛轻。红车翠盖满衢路，
洛中欢笑争逢迎。一从戎马来幽蓟，山谷虎狼无捍制。
九重宫殿闭豺狼，万国生人自相噬。蹭蹬疮痍今不平，
干戈南北常纵横。中原膏血焦欲尽，四郊贪将犹凭陵。
秦中豪宠争出群，巧将言智宽明君。南山四皓不敢语，
渭上钓人何足云。君不见昔时槐柳八百里，
路傍五月清阴起。只今零落几株残，枯根半死黄河水。

卷 477_15【重登滕王阁】

李涉

滕王阁上唱伊州，二十年前向此游。
半是半非君莫问，好山长在水长流。

卷 477_16【重到襄阳哭亡友韦寿朋】

李涉

故人坟树立秋风，伯道无儿迹便空。
重到笙歌分散地，隔江吹笛月明中。

卷 477_17【再至长安】

· 全唐诗 ·

李涉

十年谪宦鬼方人，三遇鸿恩始到秦。
今日九衢骑马望，却疑浑是刹那身。

卷 477_18【赠道器法师】

李涉

冰作形容雪作眉，早知谈论两川知。
如今不用空求佛，但把令狐宰相诗。

卷 477_19【庐山得元侍御书】

李涉

惭君知我命龙钟，一纸书来意万重。
正著白衣寻古寺，忽然邮递到云峰。

卷 477_20【竹枝词】

李涉

荆门滩急水潺潺，两岸猿啼烟满山。

· 全唐诗 ·

渡头少年应官去，月落西陵望不还。

巫峡云开神女祠，绿潭红树影参差。
不劳戍口初相问，无义滩头剩别离。

石壁千重树万重，白云斜掩碧芙蓉。
昭君溪上年年月，偏照婵娟色最浓。

十二峰头月欲低，空聆滩上子规啼。
孤舟一夜东归客，泣向东风忆建溪。

卷 477_21【京口送朱昼之淮南】

李涉

两行客泪愁中落，万树山花雨后残。
君到扬州见桃叶，为传风水渡江难。

卷 477_22【题鹤林寺僧舍】

李涉

终日昏昏醉梦间，忽闻春尽强登山。
因过竹院逢僧话，又得浮生半日闲。

· 全唐诗 ·

卷 477_23 【重过文上人院】

李涉

南随越鸟北燕鸿，松月三年别远公。
无限心中不平事，一宵清话又成空。

卷 477_24 【双峰寺得舍弟书】

李涉

暂入松门拜祖师，殷勤再读塔前碑。
回头忽向寻阳使，太守如今是惠持。

卷 477_25 【木兰花】

李涉

碧落真人著紫衣，始堪相并木兰枝。
今朝绕郭花看遍，尽是深村田舍儿。

卷 477_26 【过招隐寺】

· 全唐诗 ·

李涉

每忆中林访惠持，今来正遇早春时。
自从休去无心事，唯向高僧说便知。

卷 477_27【酬举生许遇山居】

李涉

琉璃潭上新秋月，清净泉中智惠珠。
不似本宗疏二教，许过云壑访潜夫。

卷 477_28【春晚游鹤林寺寄使府诸公】

李涉

野寺寻花春已迟，背岩唯有两三枝。
明朝携酒犹堪赏，为报春风且莫吹。

卷 477_29【题开圣寺】

李涉

宿雨初收草木浓，群鸦飞散下堂钟。

· 全唐诗 ·

长廊无事僧归院，尽日门前独看松。

卷 477_30【奉使淮南】

李涉

汉使征兵诏未休，两行旌旆接扬州。
试上高楼望春色，一年风景尽堪愁。

卷 477_31【登北固山亭】

李涉

海绕重山江抱城，隋家宫苑此分明。
居人不觉三吴恨，却笑关河又战争。

卷 477_32【秋日过员太祝林园】

李涉

望水寻山二里余，竹林斜到地仙居。
秋光何处堪消日，玄晏先生满架书。

· 全唐诗 ·

卷 477_33 【题武关】

李涉

来往悲欢万里心，多从此路计浮沉。
皆缘不得空门要，舜葬苍梧直到今。

卷 477_34 【题温泉】

李涉

能使时平四十春，开元圣主得贤臣。
当时姚宋并燕许，尽是骊山从驾人。

卷 477_35 【经湓川馆寄使府群公】

李涉

湓川水竹十家余，渔艇蓬门对岸居。
大胜尘中走鞍马，与他军府判文书。

卷 477_36 【葺夷陵幽居】

· 全唐诗 ·

李涉

负郭依山一径深，万竿如束翠沉沉。
从来爱物多成癖，辛苦移家为竹林。

卷 477_37【再游头陀寺】

李涉

无因暂泊鲁阳戈，白发兼愁日日多。
只恐雪晴花便尽，数来山寺亦无他。

卷 477_38【看射柳枝】

李涉

玉弣朱弦敕赐弓，新加二斗得秋风。
万人齐看翻金勒，百步穿杨逐箭空。

卷 477_39【寄峡州韦郎中】

李涉

年过五十鬓如丝，不必前程更问师。

· 全唐诗 ·

幸得休耕乐尧化，楚山深处最相宜。

卷 477_40 【赠田玉卿】

李涉

长安里巷旧邻居，未解梳头五岁余。
今朝嫁得风流婿，歌舞闲时看读书。

卷 477_41 【题招隐寺即戴颙旧宅】

李涉

两崖古树千般色，一井寒泉数丈冰。
欲问前朝戴居士，野烟秋色是丘陵。

卷 477_42 【山居送僧】

李涉

失意因休便买山，白云深处寄柴关。
若逢城邑人相问，报道花时也不闲。

· 全唐诗 ·

卷 477_43【过襄阳上于司空頔】

李涉

方城汉水旧城池，陵谷依然世自移。
歇马独来寻故事，逢人唯说岷山碑。

卷 477_44【送魏简能东游二首】

李涉

献赋论兵命未通，却乘羸马出关东。
灞陵原上重回首，十载长安似梦中。

燕市悲歌又送君，目随征雁过寒云。
孤亭宿处时看剑，莫使尘埃蔽斗文。

卷 477_45【中秋夜君山台望月】

李涉

大堤花里锦江前，诗酒同游四十年。
不料中秋最明夜，洞庭湖上见当天。

· 全唐诗 ·

卷 477_46 【酬彭伉】

李涉

公孙阁里见君初，衣锦南归二十馀。
莫叹屈声犹未展，同年今日在中书。

卷 477_47 【硖石遇赦】

李涉

天网初开释楚囚，残骸已废自知休。
荷蓑不是人间事，归去沧江有钓舟。

卷 477_48 【赠龙泉洞尘上人】

李涉

八十山僧眼未昏，独寻流水到穷源。
自言共得龙神语，拟作茅庵住洞门。

卷 477_49 【题湖台】

· 全唐诗 ·

李涉

山有松门江有亭，不劳他处问青冥。
有时带月床舁到，一阵风来酒尽醒。

卷 477_50 【送妻入道】

李涉

人无回意似波澜，琴有离声为一弹。
纵使空门再相见，还如秋月水中看。

卷 477_51 【遇湖州妓宋态宜二首】

李涉

曾识云仙至小时，芙蓉头上绾青丝。
当时惊觉高唐梦，唯有如今宋玉知。

陵阳夜会使君筵，解语花枝出眼前。
一从明月西沉海，不见嫦娥二十年。

卷 477_52 【逢旧二首】

· 全唐诗 ·

李涉

碧落高高云万重，当时孤鹤去无踪。
不期陵谷迁朝市，今日辽东特地逢。

将作乘槎去不还，便寻云海住三山。
不知留得支机石，却逐黄河到世间。

卷 477_53【润州听暮角】

李涉

江城吹角水茫茫，曲引边声怨思长。
惊起暮天沙上雁，海门斜去两三行。

卷 477_54【头陀寺看竹】

李涉

寺前新笋已成竿，策马重来独自看。
可惜班皮空满地，无人解取作头冠。

卷 477_55【奉使京西】

· 全唐诗 ·

李涉

卢龙已复两河平，烽火楼边处处耕。
何事书生走羸马，原州城下又添兵。

卷 477_56【题连云堡】

李涉

由来天地有关扃，断壑连山接杳冥。
一出纵知边上事，满朝谁信语堪听。

卷 477_57【再宿武关】

李涉

远别秦城万里游，乱山高下出商州。
关门不锁寒溪水，一夜潺湲送客愁。

卷 477_58【长安闷作】

李涉

宵分独坐到天明，又策羸骖信脚行。

· 全唐诗 ·

每日除书空满纸，不曾闻有介推名。

卷 477_59【和尚书舅见寄】

李涉

欲随流水去幽栖，喜伴归云入虎溪。
深谢陈蕃怜寂寞，远飞芳字警沉迷。

卷 477_60【送王六觐巢县叔父二首】

李涉

巢岸南分战鸟山，水云程尽到东关。
弦歌自是君家事，莫怪今来一邑闲。

长忆山阴旧会时，王家兄弟尽相随。
老来放逐潇湘路，泪滴秋风引献之。

卷 477_61【偶怀】

李涉

转知名宦是悠悠，分付空源始到头。

· 全唐诗 ·

待送妻儿下山了，便随云水一生休。

卷 477_62【秋夜题夷陵水馆】

李涉

凝碧初高海气秋，桂轮斜落到江楼。
三更浦上巴歌歇，山影沉沉水不流。

卷 477_63【与梧州刘中丞】

李涉

三代卢龙将相家，五分符竹到天涯。
瘴山江上重相见，醉里同看豆蔻花。

卷 477_64【听多美唱歌】

李涉

黄莺慢转引秋蝉，冲断行云直入天。
一曲梁州听初了，为君别唱想夫怜。

· 全唐诗 ·

卷 477_65【题润饮寺】

李涉

百年如梦竟何成，白发重来此地行。
还似萧郎许玄度，再看庭石悟前生。

卷 477_66【题苏仙宅枯松】

李涉

几年苍翠在仙家，一旦枝枯类海槎。
不如酸涩棠梨树，却占高城独放花。

卷 477_67【山居】

李涉

一从身世两相遗，往往关门到午时。
想得俗流应大笑，不知年老识便宜。

卷 477_68【听邻女吟】

· 全唐诗 ·

李涉

含情遥夜几人知，闲咏风流小谢诗。
还似霓旌下烟露，月边吹落上清词。

卷 477_69【题宇文秀才樱桃】

李涉

风光莫占少年家，白发殷勤最恋花。
今日颠狂任君笑，趁愁得醉眼麻茶。

卷 477_70【汉上偶题】

李涉

谪仙唐世游兹郡，花下听歌醉眼迷。
今日汉江烟树尽，更无人唱白铜鞮。

卷 477_71【送杨敬之倅湖南】

李涉

久嗟尘匣掩青萍，见说除书试一听。

· 全唐诗 ·

闻君却作长沙傅，便逐秋风过洞庭。

卷 477_72【送孙尧夫赴举】

李涉

自说轩皇息战威，万方无复事戎衣。
却教孙子藏兵法，空把文章向礼闱。

卷 477_73【题水月台】

李涉

平流白日无人爱，桥上闲行若个知。
水似晴天天似水，两重星点碧琉璃。

卷 477_74【早春霁后发头陀寺寄院中】

李涉

红楼金刹倚晴冈，雨雪初收望汉阳。
草檄可中能有暇，迎春一醉也无妨。

· 全唐诗 ·

卷 477_75【哭田布】

李涉

魏师临阵却抽营，谁管豺狼作信兵。
纵使将军能伏剑，何人岛上哭田横。

卷 477_76【黄葵花】

李涉

此花莫遣俗人看，新染鹅黄色未乾。
好逐秋风上天去，紫阳宫女要头冠。

卷 477_77【别南溪二首】

李涉

如云不厌苍梧远，似雁逢春又北飞。
唯有隐山溪上月，年年相望两依依。

常叹春泉去不回，我今此去更难来。
欲知别后留情处，手种岩花次第开。

· 全唐诗 ·

卷 477_78【井栏砂宿遇夜客】

李涉

暮雨萧萧江上村，绿林豪客夜知闻。
他时不用逃名姓，世上如今半是君。

卷 477_79【谢王连州送海阳图】

李涉

谢家为郡实风流，画得青山寄楚囚。
惊起草堂寒气晚，海阳潮水到床头。

卷 477_80【再谪夷陵题长乐寺】

李涉

当时谪宦向夷陵，愿得身闲便作僧。
谁知渐渐因缘重，羞见长燃一盏灯。

卷 477_81【谴谪康州先寄弟渤】

· 全唐诗 ·

李涉

唯将直道信苍苍，可料无名抵宪章。
阴鹭却应先有谓，已交鸿雁早随阳。

卷 477_82【赠廖道士】

李涉

膏已明煎信矣哉，二年人世不归来。
庭前为报仙桃树，今岁花时好好开。

卷 477_83【山花】

李涉

六出花开赤玉盘，当中红湿耐春寒。
长安若在五侯宅，谁肯将钱买牡丹。

卷 477_84【听歌】

李涉

飒飒先飞梁上尘，朱唇不动翠眉颦。

· 全唐诗 ·

愿得春风吹更远，直教愁杀满城人。

卷 477_85【送颜觉赴举】

李涉

颜子将才应四科，料量时辈更谁过。
居然一片荆山玉，可怕无人是卞和。

卷 477_86【题五松驿】

李涉

云木苍苍数万株，此中言命的应无。
人生不得如松树，却遇秦封作大夫。

卷 477_87【湘妃庙】

李涉

斑竹林边有古祠，鸟啼花发尽堪悲。
当时惆怅同今日，南北行人可得知。

· 全唐诗 ·

卷 477_88【赠长安小主人】

李涉

上清真子玉童颜，花态娇羞月思闲。
仙路迷人应有术，桃源不必在深山。

卷 477_89【邠州词献高尚书三首】

李涉

单于都护再分疆，西引双旌出帝乡。
朝日诏书添战马，即闻千骑取河湟。

将家难立是威声，不见多传卫霍名。
一自元和平蜀后，马头行处即长城。

朔方忠义旧来闻，尽是邠城父子军。
今日兵符归上将，旄头不用更妖氛。

卷 477_90【游西林寺】

李涉

· 全唐诗 ·

十地初心在此身，水能生月即离尘。
如今再结林中社，可羨当年会里人。

卷 477_91【题白鹿兰若】

李涉

只去都门十里强，竹阴流水绕回廊。
满城车马皆知有，每唤同游尽道忙。

卷 477_92【寄赵准乞湘川山居】

李涉

闲说班超有旧居，山横水曲占商於。
知君不用磻溪石，乞取终年独钓鱼。

卷 477_93【晓过函谷关】

李涉

因韩为赵两游秦，十月冰霜渡孟津。
纵使鸡鸣遇关吏，不知余也是何人。

· 全唐诗 ·

卷 477_94【奉和九弟渤见寄绝句】

李涉

忽启新缄吟近诗，诗中韵出碧云词。
且喜陟冈愁已散，登舟只恨渡江迟。

卷 477_95【赠友人孩子】

李涉

骊龙颔下亦生珠，便与人间众宝殊。
他时若要追风日，须得君家万里驹。

卷 477_96【奉宣慰使鱼十四郎】

李涉

年才二十众知名，孤鹤仪容彻骨清。
口传天语来人世，却逐祥云上玉京。

卷 477_97【题善光寺】

· 全唐诗 ·

李涉

云门天竺旧姻缘，临老移家住玉泉。
早到可中溷南寺，免得翻经住几年。

卷 477_98【题宣化寺道光上人居】

李涉

二十年前不系身，草堂曾与雪为邻。
常思和尚当时语，衣钵留将与此人。

卷 477_99【柳枝词】

李涉

锦池江上柳垂桥，风引蝉声送寂寥。
不必如丝千万缕，只禁离恨两三条。

卷 477_100【竹枝词】

李涉

十二山晴花尽开，楚宫双阙对阳台。

· 全唐诗 ·

细腰争舞君沉醉，白日秦兵天下来。

卷 477_101【竹里】

李涉

竹里编茅倚石根，竹茎疏处见前村。
闲眠尽日无人到，自有春风为扫门。

卷 477_102【失题】

李涉

华表千年一鹤归，丹砂为顶雪为衣。
泠泠仙语人听尽，却向五云翻翅飞。

· 全唐诗 ·

第四百七十八卷

卷 478_1【云安公主下降奉诏作催妆诗】

陆畅

云安公主贵，出嫁五侯家。天母亲调粉，日兄怜赐花。
催铺百子帐，待障七香车。借问妆成未，东方欲晓霞。

卷 478_2【山出云】

陆畅

灵山蓄云彩，纷郁出清晨。望树繁花白，看峰小雪新。
映松张盖影，依涧布鱼鳞。高似从龙处，低如触石频。
浓光藏半岫，浅色类飘尘。玉叶开天际，遥怜占早春。

卷 478_3【惊雪】

陆畅

· 全唐诗 ·

怪得北风急，前庭如月辉。天人宁许巧，剪水作花飞。

卷 478_4 【闻早蝉】

陆畅

落日早蝉急，客心闻更愁。一声来枕上，梦里故园秋。

卷 478_5 【别刘端公】

陆畅

连骑出都门，秋蝉噪高柳。落日辞故人，自醉不关酒。

卷 478_6 【新晴爱月】

陆畅

野性平生惟爱月，新晴半夜睹蝉娟。
起来自擘纱窗破，恰漏清光落枕前。

卷 478_7 【云安公主出降杂咏催妆二首】

· 全唐诗 ·

陆畅

天上琼花不避秋，今宵织女嫁牵牛。
万人惟待乘鸾出，乞巧齐登明月楼。

少妆银粉饰金钿，端正天花贵自然。
闻道禁中时节异，九秋香满镜台前。

卷 478_8【坐障】

陆畅

白玉为竿丁字成，黄金绣带短长轻。
强遮天上花颜色，不隔云中语笑声。

卷 478_9【帘】

陆畅

劳将素手卷虾须，琼室流光更缀珠。
玉漏报来过半夜，可怜潘岳立踟蹰。

卷 478_10【阶】

· 全唐诗 ·

陆畅

瓷玉编金次第平，花纹隐起踏无声。
几重便上华堂里，得见天人吹凤笙。

卷 478_11【扇】

陆畅

宝扇持来入禁宫，本教花下动香风。
姮娥须逐彩云降，不可通宵在月中。

卷 478_12【解内人嘲】

陆畅

粉面仙郎选圣朝，偶逢秦女学吹箫。
须教翡翠闻王母，不奈乌鸢噪鹊桥。

卷 478_13【成都赠别席夔】

陆畅

不值分流二江水，定应犹得且同行。

· 全唐诗 ·

三千里外情人别，更被子规啼数声。

卷 478_14【游城东王驸马亭】

陆畅

城外无尘水间松，秋天木落见山容。
共寻萧史江亭去，一望终南紫阁峰。

卷 478_15【望毛女峰】

陆畅

我种东峰千叶莲，此峰毛女始求仙。
今朝暗算当时事，已是人间七万年。

卷 478_16【送李山人归山】

陆畅

来从千山万山里，归向千山万山去。
山中白云千万重，却望人间不知处。

· 全唐诗 ·

卷 478_17【长安新晴】

陆畅

九重深浅人不知，金殿玉楼倚朝日。
一夜城中新雨晴，御沟流得宫花出。

卷 478_18【出蓝田关寄董使君】

陆畅

万里烟萝锦帐间，云迎水送度蓝关。
七盘九折难行处，尽是龚黄界外山。

卷 478_19【题悟公禅堂】

陆畅

临坛付法十三春，家本长城若下人。
芸阁少年应不识，南山钞主是前身。

卷 478_20【宿陕府北楼奉酬崔大夫二首】

· 全唐诗 ·

陆畅

楼压黄河山满坐，风清水凉谁忍卧。
人定军州禁漏传，不妨秋月城头过。

一别朱门三四春，再来应笑尚风尘。
昨宵唯有楼前月，识是谢公诗酒人。

卷 478_21【陕州逢窦巩同宿，寄江陵韦协律】

陆畅

共出丘门岁九霜，相逢凄怆对离觞。
荆南为报韦从事，一宿同眠御史床。

卷 478_22【夜到泗州酬崔使君】

陆畅

徐城洪尽到淮头，月里山河见泗州。
闻道泗滨清庙磬，雅声今在谢家楼。

卷 478_23【送崔员外使回入京金钩驿逢因赠】

· 全唐诗 ·

陆畅

六星宫里一星归，行到金钩近紫微。
侍史别来经岁月，今宵应梦护香衣。

卷 478_24【成都送别费冠卿】

陆畅

红椒花落桂花开，万里同游俱未回。
莫厌客中频送客，思乡独上望乡台。

卷 478_25【题商山庙】

陆畅

商洛秦时四老翁，人传羽化此山空。
若无仙眼何由见，总在庙前花洞中。

卷 478_26【题独孤少府园林】

陆畅

四面青山是四邻，烟霞成伴草成茵。

· 全唐诗 ·

年年洞口桃花发，不记曾经迷几人。

卷 478_27【送独孤秀才下第归太白山】

陆畅

逸翮暂时成落羽，将归太白赏灵踪。
须寻最近碧霄处，拟倩和云买一峰。

卷 478_28【下第后病中】

陆畅

献玉频年命未通，穷秋成病悟真空。
笑看朝市趋名者，不病那知在病中。

卷 478_29【送深上人归江南】

陆畅

留得莲花偈付谁，独携金策欲归时。
江南无限萧家寺，曾与白云何处期。

· 全唐诗 ·

卷 478_30 【题自然观】

陆畅

剑阁门西第一峰，道陵成道有高踪。
行人若上升仙处，须拨白云三四重。

卷 478_31 【疾愈步庭花】

陆畅

桃红李白觉春归，强步闲庭力尚微。
从困不扶灵寿杖，恐惊花里早莺飞。

卷 478_32 【筹笔店江亭】

陆畅

九折岩边下马行，江亭暂歇听江声。
白云绿树不关我，枉与樵人乐一生。

卷 478_33 【赠贺若少府】

· 全唐诗 ·

陆畅

十日广陵城里住，听君花下抚金徽。
新声指上怀中纸，莫怪潜偷数曲归。

卷 478_34【太子刘舍人邀看花】

陆畅

年少风流七品官，朱衣白马冶游盘。
负心不报春光主，几处偷看红牡丹。

卷 478_35【蔷薇花】

陆畅

锦窠花朵灯丛醉，翠叶眉稠裛露垂。
莫引美人来架下，恐惊红片落燕支。

卷 478_36【句】

陆畅

蜀道易，易于履平地。

· 全唐诗 ·

蝉噪入云树，风开无主花。

· 全唐诗 ·

第四百七十九卷

卷 479_1 【应制贺边军支春衣】

柳公权

去岁虽无战，今年未得归。皇恩何以报，春日得春衣。

挟纊非真纊，分衣是假衣。从今貔武士，不惮戍金微。

卷 479_2 【应制为宫嫔咏】

柳公权

不分前时忤主恩，已甘寂寞守长门。

今朝却得君王顾，重入椒房拭泪痕。

卷 479_3 【题朱审寺壁山水画】

柳公权

· 全唐诗 ·

朱审偏能视夕岚，洞边深墨写秋潭。
与君一顾西墙画，从此看山不向南。

卷 479_4 【阊门即事】

柳公权

耕夫占募逐楼船，春草青青万顷田。
试上吴门看郡郭，清明几处有新烟。

卷 479_5 【贡院楼北新栽小松】

吴武陵

拂槛爱贞容，移根自远峰。已曾经草没，终不任苔封。
叶少初陵雪，鳞生欲化龙。乘春濯雨露，得地近垣墉。
逐吹香微动，含烟色渐浓。时回日月照，为谢小山松。

卷 479_6 【题路左佛堂】

吴武陵

雀儿来逐颺风高，下视鹰鹞意气豪。
自谓能生千里翼，黄昏依旧委蓬蒿。

· 全唐诗 ·

卷 479_7【盛山十二诗·隐月岫】

韦处厚

初映钩如线，终衔镜似钩。远澄秋水色，高倚晓河流。

卷 479_8【盛山十二诗·流杯渠】

韦处厚

激曲萦飞箭，浮沟泛满卮。将来山太守，早向习家池。

卷 479_9【盛山十二诗·竹岩】

韦处厚

不资冬日秀，为作暑天寒。先植诚非凤，来翔定是鸾。

卷 479_10【盛山十二诗·绣衣石榻】

韦处厚

嶢嶢雪中峤，磊磊标方峭。勿为枕苍山，还当础清庙。

· 全唐诗 ·

卷 479_11【盛山十二诗·宿云亭】

韦处厚

雨合飞危砌，天开卷晓窗。齐平联郭柳，带绕抱城江。

卷 479_12【盛山十二诗·梅谿】

韦处厚

夹岸凝清素，交枝漾浅沦。味调方荐实，腊近又先春。

卷 479_13【盛山十二诗·桃坞】

韦处厚

喷日舒红景，通蹊茂绿阴。终期王母摘，不羨武陵深。

卷 479_14【盛山十二诗·胡卢沼】

韦处厚

疏凿徒为巧，圆洼自可澄。倒花纷错秀，鉴月静涵冰。

· 全唐诗 ·

卷 479_15【盛山十二诗·茶岭】

韦处厚

顾渚吴商绝，蒙山蜀信稀。千丛因此始，含露紫英肥。

卷 479_16【盛山十二诗·盘石磴】

韦处厚

缭绕缘云上，璘玕翳玉联。高高曾几折，极目瞰秋鸢。

卷 479_17【盛山十二诗·琵琶台】

韦处厚

徧地难层土，因厓遂削成。浅深岚嶂色，尽向此中呈。

卷 479_18【盛山十二诗·上士瓶泉】

韦处厚

绠汲岂无井，颠崖贵非浚。愿洒尘垢馀，一雨根茎润。

· 全唐诗 ·

卷 479_19【客思吟】

杨敬之

禾黍正离离，南园剪白芝。细腰沈赵女，高髻唱蛮姬。
路愧前冈月，梳惭一颌丝。乡人不可语，独念畏人知。

卷 479_20【赠项斯】

杨敬之

几度见诗诗总好，及观标格过于诗。
平生不解藏人善，到处逢人说项斯。

卷 479_21【句】

杨敬之

霜树鸟栖夜，空街雀报明。

碧山相倚暮，归雁一行斜。

卷 479_22【初日照凤楼】

· 全唐诗 ·

李虞仲

旭日烟云殿，朝阳烛帝居。断霞生峻宇，通阁丽晴虚。
流彩连朱槛，腾辉照绮疏。曈曨晨景里，明灭晓光初。
户牖仙山近，轩楹凤翼舒。还如王母过，遥度五云车。

卷 479_23【郡斋三月下旬作】

张又新

春事日已歇，池塘旷幽寻。残红披独坠，初绿间浅深。
偃仰倦芳褥，顾步爱新阴。谋春未及竟，夏初遽见侵。

卷 479_24【五月水边柳】

张又新

结根挺涯涘，垂影覆清浅。睡脸寒未开，懒腰晴更软。
摇空条已重，拂水带方展。似醉烟景凝，如愁月露泫。
丝长鱼误恐，枝弱禽惊践。怅别几多情，含春任攀拏。

卷 479_25【三月五日陪大夫泛长沙东湖】

张又新

· 全唐诗 ·

上巳余风景，芳辰集远坰。彩舟浮泛荡，绣毂下娉婷。
栖树回葱蒨，笙歌转杳冥。湖光迷翡翠，草色醉蜻蜓。
鸟弄桐花日，鱼翻谷雨萍。从今留胜会，谁看画兰亭。

卷 479_26 【赠广陵妓】

张又新

云雨分飞二十年，当时求梦不曾眠。
今来头白重相见，还上襄王玳瑁筵。

卷 479_27 【牡丹】

张又新

牡丹一朵值千金，将谓从来色最深。
今日满栏开似雪，一生辜负看花心。

卷 479_28 【游白鹤山】

张又新

白鹤山边秋复春，张文宅畔少风尘。
欲驱五马寻真隐，谁是当初 竹人。

· 全唐诗 ·

卷 479_29 【行田诗】

张又新

白石岩前湖水春，湖边旧境有清尘。
欲追谢守行田意，今古同忧是长人。

卷 479_30 【罗浮山】

张又新

江北重峦积翠浓，绮霞遥映碧芙蓉。
不知末后沧溟上，减却瀛洲第几峰。

卷 479_31 【青障山】

张又新

一派远光澄碧月，万株耸翠猎金飙。
陶仙谩学长生术，暑往寒来更寂寥。

卷 479_32 【中界山】

· 全唐诗 ·

张又新

瑟瑟峰头玉水流，晋时遗迹更堪愁。
愁人到此劳长望，何处烟波是祖州。

卷 479_33【帆游山】

张又新

涨海尝从此地流，千帆飞过碧山头。
君看深谷为陵后，翻覆人间未肯休。

卷 479_34【谢池】

张又新

郡郭东南积谷山，谢公曾是此跻攀。
今来惟有灵池月，犹是婵娟一水间。

卷 479_35【华盖山】

张又新

一岫坡陀凝绿草，千重虚翠透红霞。

· 全唐诗 ·

愁来始上消归思，见尽江城数百家。

卷 479_36 【吹台山】

张又新

吹台山上彩烟凝，日落云收叠翠屏。
应谓焦桐堪采斫，不知谁是柳吴兴。

卷 479_37 【青岵山】

张又新

灵海泓澄匝翠峰，昔贤心赏已成空。
今朝亭馆无遗制，积水沧浪一望中。

卷 479_38 【孤屿】

张又新

碧水逶迤浮翠嶂，绿萝蒙密媚晴江。
不知谁与名孤屿，其实中川是一双。

· 全唐诗 ·

卷 479_39 【春草池】

张又新

谢公梦草一差微，谪宦当时道不机。
且谓飞霞游赏地，池塘烟柳亦依依。

卷 479_40 【春色满皇州】

封敖

帝里春光正，葱茏喜气浮。锦铺仙禁侧，镜写曲江头。
红萼开萧阁，黄丝拂御楼。千门歌吹动，九陌绮罗游。
日近风先满，仁深泽共流。应非憔悴质，辛苦在神州。

卷 479_41 【题西隐寺】

封敖

三年未到九华山，终日披图一室间。秋寺喜因晴后赏，
灵峰看待足时还。猿从有性留僧坐，云霭无心伴客闲。
胜事倘能销岁月，已弢名利不相关。

· 全唐诗 ·

卷 479_42 【奉和白敏中圣道和平致兹休运岁终功就合咏盛明呈上】

马植

舜德尧仁化犬戎，许提河陇款皇风。指挥貔武皆神算，
恢拓乾坤是圣功。四帅有征无汗马，七关虽戍已弣弓。
天留此事还英主，不在他年在大中。

卷 479_43 【夏日途中】

李廓

树夹炎风路，行人正午稀。初蝉数声起，戏蝶一团飞。
日色欺清镜，槐膏点白衣。无成归故里，自觉少光辉。

卷 479_44 【长安少年行】

李廓

金紫少年郎，绕街鞍马光。身从左中尉，官属右春坊。
划戴扬州帽，重薰异国香。垂鞭踏青草，来去杏园芳。

追逐轻薄伴，闲游不著绯。长拢出猎马，数换打球衣。

· 全唐诗 ·

晓日寻花去，春风带酒归。青楼无昼夜，歌舞歇时稀。

日高春睡足，帖马赏年华。倒插银鱼袋，行随金犊车。
还携新市酒，远醉曲江花。几度归侵黑，金吾送到家。

好胜耽长夜，天明烛满楼。留人看独脚，赌马换偏头。
乐奏曾无歇，杯巡不暂休。时时遥冷笑，怪客有春愁。

遨游携艳妓，装束似男儿。杯酒逢花住，笙歌簇马吹。
莺声催曲急，春色送归迟。不以闻街鼓，华筵待月移。

赏春惟逐胜，大宅可曾归。不乐还逃席，多狂惯衩衣。
歌人踏日起，语燕卷帘飞。妇好唯相妒，倡楼不醉稀。

戟门连日闭，苦饮惜残春。开锁通新客，教姬屈醉人。
倩歌牵白马，自舞蹈红茵。时辈皆相许，平生不负身。

新年高殿上，始见有光辉。玉雁排方带，金鹅立仗衣。
酒深和碗赐，马疾打珂飞。朝下人争看，香街意气归。

游市慵骑马，随姬入坐车。楼边听歌吹，帘外见莺花。
乐眼从人闹，归心畏日斜。苍头来去报，饮伴到倡家。

小妇教鹦鹉，头边唤醉醒。犬娇眠玉簟，鹰掣撼金铃。
碧地攒花障，红泥待客亭。虽然长按曲，不饮不曾听。

· 全唐诗 ·

卷 479_45【鸡鸣曲】

李廓

星稀月没入五更，胶胶角角鸡初鸣。征人牵马出门立，
辞妾欲向安西行。再鸣引颈檐头下，楼中角声催上马。
才分曙色第二鸣，旌旆红尘已出城。妇人上城乱招手，
夫婿不闻遥哭声。长恨鸡鸣别时苦，不遣鸡栖近窗户。

卷 479_46【镜听词】

李廓

匣中取镜辞灶王，罗衣掩尽明月光。昔时长著照容色，
今夜潜将听消息。门前地黑人来稀，无人错道朝夕归。
更深弱体冷如铁，绣带菱花怀里热。铜片铜片如有灵，
愿照得见行人千里形。

卷 479_47【猛士行】

李廓

战鼓惊沙恶天色，猛士虬髯眼前黑。单于衣锦日行兵，
阵头走马生擒得。幽并少年不敢轻，虎狼窟里空手行。

· 全唐诗 ·

卷 479_48【送振武将军】

李廓

叶叶归边骑，风头万里干。金装腰带重，铁缝耳衣寒。
芦酒烧蓬暖，霜鸿捻箭看。黄河古戍道，秋雪白漫漫。

卷 479_49【落第】

李廓

榜前潜制泪，众里自嫌身。气味如中酒，情怀似别人。
暖风张乐席，晴日看花尘。尽是添愁处，深居乞过春。

卷 479_50【赠商山东于岭僧】

李廓

商岭东西路欲分，两间茅屋一溪云。
师言耳重知师意，人是人非不欲闻。

卷 479_51【上令狐舍人】

· 全唐诗 ·

李廓

名利生愁地，贫居岁月移。买书添架上，断酒过花时。
宿客嫌吟苦，乖童恨睡迟。近来唯俭静，持此答深知。

· 全唐诗 ·

第四百八十卷

卷 480_1【南梁行】

李绅

江城郁郁春草长，悠悠汉水浮青光。杂英飞尽空昼景，
绿杨重阴官舍静。此时醉客纵横书，公言可荐承明庐。
青天诏下宠光至，颁籍金闺征石渠。秣归山路烟岚隔，
山木幽深晚花拆。涧底红光夺火燃，摇风扇毒愁行客。
杜鹃啼咽花亦殷，声悲绝艳连空山。斜阳瞥映浅深树，
云雨翻迷崖谷间。山鸡锦质矜毛羽，透竹穿萝命俦侣。
乔木幽谿上下同，雄雌不惑飞栖处。望秦峰回过商颜，
浪叠云堆万簇山。行尽杳冥青嶂外，九重钟漏紫霄间。
元和列侍明光殿，谏草初焚市朝变。北阙趋承半隙尘，
南梁笑客皆飞霰。追思感叹却昏迷，霜鬓愁吟到晓鸡。
故筐岁深开断简，秋堂月曙掩遗题。呜呜晓角霞辉粲，
抚剑当应一长叹。刍狗无由学圣贤，空持感激终昏旦。

卷 480_2【趋翰苑遭诬构四十六韵】

李绅

· 全唐诗 ·

九五当乾德，三千应瑞符。纂尧昌圣历，宗禹盛丕图。
画象垂新令，消兵易旧谟。选贤方去智，招谏忽升愚。
大乐调元气，神功运化炉。脱鳞超沆漭，翻翼集蓬壶。
捧日恩光别，抽毫顾问殊。凤形怜采笔，龙颔借骊珠。
掷地声名寡，摩天羽翮孤。洁身酬雨露，利口扇谗谀。
碧海同宸眷，鸿毛比贱躯。辨疑分黑白，举直牴朋徒。
庭兽方呈角，阶蓂始效蓂。日倾乌掩魄，星落斗摧枢。
坠剑悲乔岳，号弓泣鼎湖。乱群逢害马，择肉纵狂獬。
胆为隳肝竭，心因沥血枯。满帆摧骇浪，征棹折危途。
燕客书方诈，尧门信未孚。谤兴金就铄，毁极玉生瑜。
砺吻矜先搏，张罗骋疾驱。地嫌稀魍魎，海恨止番禺。
瘴岭冲蛇入，蒸池蹶虺趋。望天收雪涕，看镜揽霜须。
草毒人惊剪，茅荒室未诛。火风晴处扇，山鬼雨中呼。
穷老乡关远，羁愁骨肉无。鹊灵窥牖户，龟瑞出泥途。
烟岛深千瘴，沧波淼四隅。海标传信使，江棹认妻孥。
到接三冬暮，来经六月徂。暗滩朝不怒，惊濑夜无虞。
俯首安羸业，齐眉慰病夫。涸鱼思雨润，僵燕望雷苏。
诏下因颁朔，恩移讵省辜。诳天犹指鹿，依社尚凭狐。
度岭瞻牛斗，浮江淬辘轳。未平人睚眦，谁惧鬼揶揄。
盆浦潮通楚，匡山地接吴。庾楼清桂满，远寺素莲敷。
仿佛皆停马，悲欢尽隙驹。旧交封宿草，衰鬓重生刍。
万戟分梁苑，双旌寄鲁儒。駸駸移岁月，冉冉近桑榆。
疲马愁千里，孤鸿念五湖。终当赋归去，那更学杨朱。

· 全唐诗 ·

李绅

宫莺报晓瑞烟开，三岛灵禽拂水回。桥转彩虹当绮殿，
舰浮花鹢近蓬莱。草承香辇王孙长，桃艳仙颜阿母栽。
簪笔此时方侍从，却思金马笑邹枚。

卷 480_4 【忆夜直金銮殿承旨】

李绅

月当银汉玉绳低，深听箫韶碧落齐。门压紫垣高绮树，
阁连青琐近丹梯。墨宣外渥催飞诏，草布深恩促换题。
明日独归花路远，可怜人世隔云霓。

卷 480_5 【忆春日曲江宴后许至芙蓉园】

李绅

春风上苑开桃李，诏许看花入御园。香径草中回玉勒，
凤凰池畔泛金樽。绿丝垂柳遮风暗，红药低丛拂砌繁。
归绕曲江烟景晚，未央明月锁千门。

卷 480_6 【新昌宅书堂前有药树一株，今已盈拱，前长庆中于
翰林院中内西轩药树下移得，才长一寸，仆夫封一泥丸以归植，

· 全唐诗 ·

今则长成，名之天上树】

李绅

白榆星底开红甲，珠树宫中长紫霄。丹彩结心才辨质，
碧枝抽叶乍成条。羽衣道士偷玄圃，金简真人护玉苗。
长带九天馀雨露，近来葱翠欲成乔。

卷 480_7 【过荆门】

李绅

荆江水阔烟波转，荆门路绕山葱蒨。帆势侵云灭又明，
山程背日昏还见。青青麦陇啼飞鸦，寂寞野径棠梨花。
行行驱马万里远，渐入烟岚危栈赊。林中有鸟飞出谷，
月上千岩一声哭。肠断思归不可闻，人言恨魄来巴蜀。
我听此鸟祝我魂，魂死莫学声衔冤。纵为羽族莫栖息，
直上青云呼帝阍。此时山月如衔镜，岩树参差互辉映。
皎洁深看入涧泉，分明细见樵人径。阴森鬼庙当邮亭，
鸡豚日宰闻膻腥。愚夫祸福自迷惑，魍魉凭何通百灵。
月低山晓问行客，已酹椒浆拜荒陌。惆怅忠贞徒自持，
谁祭山头望夫石。

卷 480_8 【涉沅潇】

· 全唐诗 ·

李绅

屈原死处潇湘阴，沧浪淼淼云沉沉。蛟龙长怒虎长啸，
山木翛翛波浪深。烟横日落惊鸿起，山映余霞杳千里。
鸿叫离离入暮天，霞消漠漠深云水。水灵江暗扬波涛，
鼉鼉动荡风骚骚。行人愁望待明月，星汉沉浮魑鬼号。
屈原尔为怀王没，水府通天化灵物。何不驱雷击电除奸邪，
可怜空作沈泉骨。举杯沥酒招尔魂，月影滉漾开乾坤。
波白水黑山隐见，汨罗之上遥昏昏。风帆候晓看五两，
戍鼓咚咚远山响。潮满江津猿鸟啼，荆夫楚语飞蛮桨。
潇湘岛浦无人居，风惊水暗惟蛟鱼。行来击棹独长叹，
问尔精魄何所如。

卷 480_9【逾岭峤止荒陬抵高要】

李绅

天将南北分寒燠，北被羔裘南卉服。寒气凝为戎虏骄，
炎蒸结作虫虺毒。周王止化惟荆蛮，汉武凿远通孱颜。
南标铜柱限荒徼，五岭从兹穷险艰。衡山截断炎方北，
回雁峰南瘴烟黑。万壑奔伤溢作沱，湍飞浪激如绳直。
千崖傍耸猿啸悲，丹蛇玄虺潜蟠蛇。泅夫拟楫劈高浪，
瞥忽浮沉如电随。岭头刺竹蒙笼密，火拆红蕉焰烧日。
岭上泉分南北流，行人照水愁肠骨。阴森石路盘萦纡，
雨寒日暖常斯须。瘴云暂卷火山外，苍茫海气穷番禺。
鹧鸪猿鸟声相续，椎髻晓呼同戚促。百处谿滩异雨晴，

· 全唐诗 ·

四时雷电迷昏旭。鱼肠雁足望缄封，地远三江岭万重。
鱼跃岂通清远峡，雁飞难渡漳江东。云蒸地热无霜霰，
桃李冬华匪时变。天际长垂饮涧虹，檐前不去衔泥燕。
幸逢雷雨荡妖昏，提挈悲欢出海门。西日眼明看少长，
北风身醒辨寒温。贾生谪去因前席，痛哭书成竟何益。
物忌忠良表是非，朝驱绛灌为讎敌。明皇圣德异文皇，
不使无辜困鬼方。汉日傅臣终委弃，如今衰叟重辉光。
高明白日恩深海，齿发虽残壮心在。空愧駉骀异一毛，
无令朽骨惭千载。

卷 480_10【移九江】

李绅

秋波入白水，帆去侵空小。五两剧奔星，樯乌疾飞鸟。
盆城依落日，盆浦看云眇。云眇更苍苍，匡山低夕阳。
楚客喜风水，秦人悲异乡。异乡秋思苦，江皋月华吐。
漾漾隐波亭，悠悠通月浦。津桥归候吏，竹巷开门户。
容膝有匡床，及肩才数堵。隙光非白驹，悬磬我无虞。
体瘦寡行立，家肥安啜哺。天书怜谴谪，重作朱轡客。
四座眼全青，一麾头半白。今来思往事，往事益凄然。
风月同今昔，悲欢异目前。四时嗟阅水，一纪换流年。
独有西庭鹤，孤鸣白露天。

卷 480_11【泛五湖】

· 全唐诗 ·

李绅

范子蜕冠履，扁舟逸霄汉。嗟予抱险艰，怵惕惊弥漫。
穷通泛滥劳，趣适殊昏旦。浴日荡层空，浮天淼无畔。
依滩落叶聚，立浦惊鸿散。浪叠雪峰连，山孤翠崖断。
风帆同巨壑，云矗成高岸。宇宙可东西，星辰沈灿烂。
霞生溟洞远，月吐青荧乱。岂复问津迷，休为吕梁叹。
漂沈自讷保，覆溺心长判。吴越郡异乡，婴童及为玩。
依稀占井邑，嘹唳同鹅鹳。举棹未宵分，维舟方日旰。
徵斯济川力，若鼓凌风翰。易狎当悔游，临深罔知难。

卷 480_12【过钟陵】

李绅

龙沙江尾抱钟陵，水郭村桥晚景澄。江对楚山千里月，
郭连渔浦万家灯。省抛双旆辞荣宠，遽落丹霄起爱憎。
惆怅旧游同草露，却思恩顾一沾膺。

卷 480_13【溯西江】

李绅

江风不定半晴阴，愁对花时尽日吟。孤棹自迟从蹭蹬，
乱帆争疾竞浮沉。一身累困怀千载，百口无虞贵万金。

· 全唐诗 ·

空阔远看波浪息，楚山安稳过云岑。

卷 480_14 【早发】

李绅

沙洲月落宿禽惊，潮起风微晓雾生。黄鹤浪明知上信，
黑龙山暗避前程。火旗似辨吴门戍，水驿遥迷楚塞城。
萧索更看江叶下，两乡俱是宦游情。

卷 480_15 【守滁阳深秋忆登郡城望琅琊】

李绅

山城小阁临青嶂，红树莲宫接薜萝。斜日半岩开古殿，
野烟浮水掩轻波。菊迎秋节西风急，雁引砧声北思多。
深夜独吟还不寐，坐看凝露满庭莎。

卷 480_16 【滁阳春日怀果园闲宴】

李绅

西园到日栽桃李，红白低枝拂酒杯。繁艳只愁风处落，
醉筵多就月中开。劝人莫折怜芳早，把烛频看畏晓催。

· 全唐诗 ·

闻道数年深草露，几株犹得近池台。

卷 480_17【悲善才】

李绅

穆王夜幸蓬池曲，金銮殿开高秉烛。东头弟子曹善才，
琵琶请进新翻曲。翠蛾列坐层城女，笙笛参差齐笑语。
天颜静听朱丝弹，众乐寂然无敢举。衔花金凤当承拨，
转腕拢弦促挥抹，花翻凤啸天上来，裴回满殿飞春雪。
抽弦度曲新声发，金铃玉珮相磋切。流莺子母飞上林，
仙鹤雌雄唳明月。此时奉诏侍金銮，别殿承恩许召弹。
三月曲江春草绿，九霄天乐下云端。紫髯供奉前屈膝，
尽弹妙曲当春日。寒泉注射陇水开，胡雁翻飞向天没。
日曛尘暗车马散，为惜新声有馀叹。明年冠剑闭桥山，
万里孤臣投海畔。笼禽铩翮尚还飞，白首生从五岭归。
闻道善才成朽骨，空余弟子奉音徽。南谿寂寞三春晚，
有客弹弦独凄怨。静听深奏楚月光，忆昔初闻曲江宴。
心悲不觉泪阑干，更为调弦反覆弹。秋吹动摇神女佩，
月珠敲击水晶盘。自怜淮海同泥滓，恨魄凝心未能死。
惆怅追怀万事空，雍门感慨徒为尔。

卷 480_18【闻里谣效古歌】

李绅

· 全唐诗 ·

乡里儿，桑麻郁郁禾黍肥，冬有襁褓夏有絺。
兄锄弟耨妻在机，夜犬不吠开蓬扉。乡里儿，醉还饱，
浊醪初熟劝翁媪。鸣鸠拂羽知年好，齐和杨花踏春草。
劝年少，乐耕桑。使君为我剪荆棘，使君为我驱豺狼。
林中无虎山有鹿，水底无蛟鱼有鲂。父渔子猎日归暮，
月明处处舂黄粱。乡里儿，东家父老为尔言，
鼓腹那知生育恩？莫令太守驰朱幡，悬鼓一鸣卢鹊喧。
恶声主吏噪尔门，唧唧力力烹鸡豚。乡里儿，莫悲咤。
上有明王颁诏下，重选贤良恤孤寡。春日迟迟驱五马，
留犊投钱以为谢。乡里儿，终尔词。我无工巧唯无私，
举手一挥临路岐。

卷 480_19【转寿春守，太和庚戌岁二月，祇命寿阳时替裴五塘终歿。因视壁题，自塘而上，或除名在边坐殿歿，凡七子，无一存焉。寿人多寇盗，好诉讐，时谓之凶郡，犷俗特著，蒙此处之顾，余衰年甘蹈前患，俾三月而寇静，期岁而人和，虎不暴物，奸吏屏窜，三载复遭邪佞所恶，授宾客分司东都，或举其目，或寄于风，亦粗继诗人之末云】

李绅

未登崖谷寻丹灶，且历轩窗看壁题。那遇八公生羽翼，
空悲七子委尘泥。旧坛无复翔云鹤，废垒曾经振鼓鼙。
点检遗编尽朝菌，应难求望一刀圭。

· 全唐诗 ·

卷 480_20 【忆寿春废虎坑，余以春二月至郡，主吏举所职，称霍山多虎，每岁采茶为患，择肉于人，至春常修陷阱数十所，勒猎者采其皮睛，余悉除罢之。是岁，虎不复为害，至余去郡三载】

李绅

匪将履尾求兢惕，那效探雏所患争。当路绝群尝诫暴，
为猫驱獮亦先迎。每推至化宣余力，岂用潜机害尔生。
休逐豺狼止贪戾，好为仁兽答皇明。

卷 480_21 【寿阳罢郡日，有诗十首，与追怀不殊，今编后兼纪瑞物·肥河维舟阻冻祇待敕命】

李绅

罢分符竹作闲官，舟冻肥河拟棹难。食蘂苦心甘处困，
饮冰持操敢辞寒。夜灯空应渔家火，朝食还依雁宿滩。
西奏血诚遥稽首，乞容归病老江干。

淮阳效理空多病，疏受辞荣岂恋班。陈力不任趋北阙，
有家无处寄东山。疲骖岂念前程税，倦鸟安能待暮还。
珍重八公山下叟，不劳重泪更追攀。

· 全唐诗 ·

卷 480_22【寿阳罢郡日，有诗十首，与追怀不殊，今编于
后兼纪瑞物·别连理树】

李绅

垂阴敢慕甘棠叶，附干将呈瑞木符。十步兰茶同秀彩，
万年枝叶表皇图。芟夷不及知无患，雨露曾沾自不枯。
好住孤根托桃李，莫令从此混樵苏。

卷 480_23【寿阳罢郡日，有诗十首，与追怀不殊，今编于
后兼纪瑞物·虎不食人】

李绅

南山白额同驯扰，亦变仁心去杀机。不竞牛甘令买患，
免遭狐假妄凭威。渡河岂适他邦害，据谷终无暴物非。
尔效驯虞护生草，岂徒柔伏在淮淝。

卷 480_24【寿阳罢郡日，有诗十首，与追怀不殊，今编于
后兼纪瑞物·发寿阳分司敕到又遇新正感怀书事】

李绅

休为建隼临淝守，转作垂丝入洛人。罢阅旧林三载籍，

· 全唐诗 ·

又开新历四年春。云遮北雁愁行客，柳起东风慰病身。
渐喜雪霜消解尽，得随风水到天津。

卷 480_25【寿阳罢郡日，有诗十首，与追怀不殊，今编于
后兼纪瑞物·初出淝口入淮】

李绅

东风百里雪初晴，淝口冰开好濯缨。野老拥途知意重，
病夫抛郡喜身轻。人心莫厌如弦直，淮水长怜似镜清。
回首夕岚山翠远，楚郊烟树隐襄城。

卷 480_26【寿阳罢郡日，有诗十首，与追怀不殊，今编于
后兼纪瑞物·入淮至盱眙】

李绅

山凝翠黛孤峰迥，淮起银花五两高。天外绮霞迷海鹤，
日边红树艳仙桃。岸惊目眩同奔马，浦溢心疑睹抃鳌。
寄谢云帆疾飞鸟，莫夸回雁卷轻毛。

卷 480_27【寿阳罢郡日，有诗十首，与追怀不殊，今编于
后兼纪瑞物·忆东湖】

· 全唐诗 ·

李绅

菱歌罢唱鹧舟回，雪鹭银鸥左右来。霞散浦边云锦截，
月升湖面镜波开。鱼惊翠羽金鳞跃，莲脱红衣紫萼摧。
淮口值春偏怅望，数株临水是寒梅。

· 全唐诗 ·

第四百八十一卷

卷 481_1【七年初到洛阳，寓居宣教里，时已春暮，而四老俱在洛中分司】

李绅

青莎满地无三径，白发缘头忝四人。官职谬齐商岭客，
姓名那重汉廷臣。圣朝寡罪容衰齿，愚叟多惭未退身。
惟有门人怜钝拙，劝教沈醉洛阳春。

卷 481_2【初秋忽奉诏除浙东观察使检校右貂】

李绅

龙楼寄引簪裾客，凤阙陪趋朔望朝。疏受杜门期脱屣，
买臣归邸忽乘轺。印封龟纽知颁爵，冠饰蝉緌更珥貂。
飞诏宠荣欢里舍，岂徒斑白与垂髫。

卷 481_3【忆至巩县河宿待家累追怀】

· 全唐诗 ·

李绅

玼树翻红秋日斜，水分伊洛照馀霞。弓开后骑低初月，
鶚驻前旌拂暮鸦。闺信坐迟青玉案，弄儿闲望白羊车。
今来忆事凉风晚，烟浦空悲黄菊花。

卷 481_4【宿扬州】

李绅

江横渡阔烟波晚，潮过金陵落叶秋。嘹唳塞鸿经楚泽，
浅深红树见扬州。夜桥灯火连星汉，水郭帆樯近斗牛。
今日市朝风俗变，不须开口问迷楼。

卷 481_5【忆被牛相留醉州中，时无他宾，牛公夜出真珠辈数人】

李绅

严城画角三声闭，清宴金樽一夕同。银烛坐隅听子夜，
宝箏筵上起春风。酒徵旧对惭衰质，曲换新词感上宫。
淮海一从云雨散，杳然俱是梦魂中。

卷 481_6【早渡扬子江】

· 全唐诗 ·

李绅

日冲海浪翻银屋，江转秋波走雪山。青嶂迴开蹲虎戍，
碧流潜伏跃龙关。地分吴楚星辰内，水迫沧溟宇宙间。
焚却戍船无战伐，使知风教被乌蛮。

卷 481_7 【忆过润州】

李绅

昔年从宦干戈地，黄绶青春一鲁儒。弓犯控弦招武旅，
剑当抽匣问狂夫。帛书投笔封鱼腹，玄发冲冠捋虎须。
谈笑谢金何所愧，不为偷买用兵符。

卷 481_8 【忆登栖霞寺峰】

李绅

香印烟火息，法堂钟磬馀。纱灯耿晨焰，释子安禅居。
林叶脱红影，竹烟含绮疏。星珠错落耀，月宇参差虚。
顾眺匪恣适，旷襟怀卷舒。江海淼清荡，丘陵何所如。
滔滔可问津，耕者非长沮。茅岭感仙客，萧园成古墟。
移步下碧峰，涉涧更踟躇。乌噪啄秋果，翠惊衔素鱼。
回塘彩鹢来，落景标林箴。漾漾棹翻月，萧萧风袭裾。
劳歌起旧思，戚叹竟难摅。却数共游者，凋落非里闾。

· 全唐诗 ·

卷 481_9【忆万岁楼望金山】

李绅

楼高雉堞千师垒，峰拔惊波万壑攒。山绝地维消虎踞，
水浮天险尚龙盘。蜃嘘云拱飞江岛，鳌喷仙岩隔海澜。
长对碧波临古渡，几经风月与悲欢。

卷 481_10【过梅里七首家于无锡四十载，今敝庐数堵犹存，
今列题于后·上家山】

李绅

上家山，家山依旧好。昔去松桂长，今来容须老。
上家山，临古道。高低入云树，芜没连天草。草色绿萋萋，
寒蛩遍草啼。噪鸦啼树远，行雁帖云齐。岩光翻落日，
僧火开经室。竹洞磬声长，松楼钟韵疾。苔阶泉溜缺，
石甃青莎密。旧径行处迷，前交坐中失。叹息整华冠，
持怀强自欢。笑歌怜稚孺，弦竹纵吹弹。山明溪月上，
酒满心聊放。邕发此淹留，垂丝匪闲旷。青山不可上，
昔事还惆怅。况复白头人，追怀空望望。

卷 481_11【过梅里七首家于无锡四十载，今敝庐数堵犹存，
今列题于后·忆东郭居】

· 全唐诗 ·

李绅

昔余过稚齿，从师昧知奥。徒怀利物心，不获藏身宝。
曳娄一缝掖，出处劳昏早。醒醉迷啜哺，衣裳辨颠倒。
忠诚贯白日，直已凭苍昊。卷舌堕谗谀，惊波息行潦。
衰禽识旧木，疲马知归道。杨柳长庭柯，兰荃覆阶草。
旌旆光里舍，骑服欢妻嫂。绿鬓绝新知，苍须稀旧老。
冠綬身忝贵，斋沐心常祷。笙磬谅谐和，庭除还洒扫。
栖迟还竹巷，物役浸江岛。倏忽变星霜，悲伤满衷抱。

卷 481_12【过梅里七首家于无锡四十载，今敝庐数堵犹存，
今列题于后·忆题惠山寺书堂】

李绅

故山一别光阴改，秋露清风岁月多。松下壮心年少去，
池边衰影老人过。白云生灭依岩岫，青桂荣枯托薜萝。
惟有此身长是客，又驱旌旆寄烟波。

卷 481_13【过梅里七首家于无锡四十载，今敝庐数堵犹存，
今列题于后·忆西湖双鸂鶒】

李绅

双鸂鶒，锦毛斓斑长比翼。戏绕莲丛回锦臆，

· 全唐诗 ·

照灼花丛两相得。渔歌惊起飞南北，缭绕追随不迷惑。
云间上下同栖息，不作惊禽远相忆。东家少妇机中语，
剪断回文泣机杼。徒嗟孔雀衔毛羽，一去东南别离苦。
五里裴回竟何补。

卷 481_14【过梅里七首家于无锡四十载，今敝庐数堵犹存，
今列题于后·早梅桥】

李绅

早梅花，满枝发。东风报春春未彻，紫萼迎风玉珠裂。
杨柳未黄莺结舌，委素飘香照新月。桥边一树伤离别，
游荡行人莫攀折。不竞江南艳阳节，任落东风伴春雪。

卷 481_15【过梅里七首家于无锡四十载，今敝庐数堵犹存，
今列题于后·翡翠坞】

李绅

翡翠飞飞绕莲坞，一啄嘉鱼一鸣舞。莲茎触散莲叶欹，
露滴珠光似还浦。虞人掠水轻浮弋，翡翠惊飞飞不息。
直上层空翠影高，还向云间双比翼。弹射莫及弋不得，
日暮虞人空叹息。

· 全唐诗 ·

卷 481_16【过梅里七首家于无锡四十载，今敝庐数堵犹存，
今列题于后·忆放鹤】

李绅

羽毛似雪无瑕点，顾影秋池舞白云。闲整素仪三岛近，
回飘清唳九霄闻。好风顺举应摩日，逸翮将成莫恋群。
凌励坐看空碧外，更怜鳬鹭老江滨。

卷 481_17【过吴门二十四韵】

李绅

烟水吴都郭，阊门架碧流。绿杨深浅巷，青翰往来舟。
朱户千家室，丹楹百处楼。水光摇极浦，草色辨长洲。
忆作麻衣翠，曾为旅棹游。放歌随楚老，清宴奉诸侯。
花寺听莺入，春湖看雁留。里吟传绮唱，乡语认讴讴。
桥转攒虹饮，波通斗鹢浮。竹扉梅圃静，水巷橘园幽。
缝堵荒麋苑，穿岩破虎丘。旧风犹越鼓，余俗尚吴钩。
故馆曾闲访，遗基亦遍搜。吹台山木尽，香径佛宫秋。
帐殿菰蒲掩，云房露雾收。苕萝妖覆灭，荆棘鬼包羞。
风月俄黄绶，经过半白头。重来冠盖客，非复别离愁。
候火分通陌，前旌驻外邮。水风摇彩旆，堤柳引鸣驺。
问吏儿孙隔，呼名礼敬修。顾瞻殊宿昔，语默过悲忧。
义感心空在，容衰日易偷。还持沧海诏，从此布皇猷。

· 全唐诗 ·

卷 481_18【杭州天竺、灵隐二寺顷岁亦布衣一游，及赴会稽，不敢以登临自适，竟不复到寺。寺多猿猱，谓之孙团弥长其类，因追思为诗二首】

李绅

翠岩幽谷高低寺，十里松风碧嶂连。开尽春花芳草润，
遍通秋水月明泉。石文照日分霞壁，竹影侵云拂暮烟。
时有猿猱扰钟磬，老僧无复得安禅。

人烟不隔江城近，水石虽清海气深。波动只观罗刹相，
静居难识梵王心。鱼扃昼锁龙宫宝，雁塔高摩欲界金。
近日尤闻重雕饰，世人遥礼二檀林。

卷 481_19【渡西陵十六韵】

李绅

雨送奔涛远，风收骇浪平。截流张旆影，分岸走鼙声。
兽逐衔波涌，龟艤喷棹轻。海门凝雾暗，江渚湿云横。
雁翼看舟子，鱼鳞辨水营。骑交遮戍合，戈簇拥沙明。
谬履千夫长，将询百吏情。下车占黍稷，冬雨害粢盛。
望祷依前圣，垂休冀厚生。半江犹惨澹，全野已澄清。
爱景三辰朗，祥农万庾盈。浦程通曲屿，海色媚重城。
弓日鞬囊动，旗风虎豹争。及郊挥白羽，入里卷红旗。

· 全唐诗 ·

恺悌思陈力，端庄冀表诚。临人与安俗，非止奉师贞。

卷 481_20【新楼诗二十首·新楼】

李绅

戎容罢引旌旗卷，朱户褰开雉堞高。山耸翠微连郡阁，
地临沧海接灵鳌。坐疑许宅驱鸡犬，笑类樊妻化羽毛。
惆怅桂枝零落促，莫思方朔种仙桃。

卷 481_21【新楼诗二十首·海榴亭】

李绅

海榴亭早开繁蕊，光照晴霞破碧烟。高近紫霄疑菡萏，
迥依江月半婵娟。怀芳不作翻风艳，别萼犹含泣露妍。
摇落旧丛云水隔，不堪行坐数流年。

卷 481_22【新楼诗二十首·望海亭】

李绅

乌盈兔缺天涯迥，鹤背松梢拂槛低。湖镜坐隅看匣满，
海涛生处辨云齐。夕岚明灭江帆小，烟树苍茫客思迷。

· 全唐诗 ·

萧索感心俱是梦，九天应共草萋萋。

卷 481_23【新楼诗二十首·杜鹃楼】

李绅

杜鹃如火千房拆，丹槛低看晚景中。繁艳向人啼宿露，
落英飘砌怨春风。早梅昔待佳人折，好月谁将老子同。
惟有此花随越鸟，一声啼处满山红。

卷 481_24【新楼诗二十首·满桂楼】

李绅

为怜湖水通宵望，不学樊杨却月楼。惟待素规澄满镜，
莫看纤魄挂如钩。卷帘方影侵红烛，绕竹斜晖透碧流。
萧瑟晓风闻木落，此时何异洞庭秋。

卷 481_25【新楼诗二十首·东武亭】

李绅

绿波春水湖光满，丹槛连楹碧嶂遥。兰鹢对飞渔棹急，
彩虹翻影海旗摇。斗疑斑虎归三岛，散作游龙上九霄。

· 全唐诗 ·

鼙鼓若雷争胜负，柳堤花岸万人招。

卷 481_26【新楼诗二十首·龙宫寺】

李绅

银地溪边遇衲师，笑将花宇指潜知。定观玄度生前事，
不道灵山别后期。真相有无因色界，化城兴灭在莲基。
好令沧海龙宫子，长护金人旧浴池。

卷 481_27【新楼诗二十首·禹庙】

李绅

削平水土穷沧海，畚锸东南尽会稽。山拥翠屏朝玉帛，
穴通金阙架云霓。秘文镂石藏青壁，宝检封云化紫泥。
清庙万年长血食，始知明德与天齐。

卷 481_28【新楼诗二十首·晏安寺】

李绅

寺深松桂无尘事，地接荒郊带夕阳。啼鸟歇时山寂寂，
野花残处月苍苍。绛纱凝焰开金像，清楚销声闭竹房。

· 全唐诗 ·

丘垄渐平边茂草，九原何处不心伤。

卷 481_29【新楼诗二十首·龟山】

李绅

一峰凝黛当明镜，十仞乔松倚翠屏。秋月满时侵兔魄，
素波摇处动龟形。旧深崖谷藏仙岛，新结楼台起佛扃。
不学大蛟凭水怪，等闲雪雨害生灵。

卷 481_30【新楼诗二十首·重台莲】

李绅

绿荷舒卷凉风晓，红萼开萦紫萼重。游女汉皋争笑脸，
二妃湘浦并愁容。自含秋露贞姿结，不竞春妖冶态秾。
终恐玉京仙子识，却将归种碧池峰。

卷 481_31【新楼诗二十首·橘园】

李绅

江城雾敛轻霜早，园橘千株欲变金。朱实摘时天路近，
素英飘处海云深。惧同枳棘愁迁徙，每抱馨香委照临。

· 全唐诗 ·

怜尔结根能自保，不随寒暑换贞心。

卷 481_32【新楼诗二十首·寒林寺】

李绅

最深城郭在人烟，疑借壶中到梵天。岩树桂花开月殿，
石楼风铎绕金仙。地无尘染多灵草，室鉴真空有定泉。
应是法宫传觉路，使无烦恼见青莲。

卷 481_33【新楼诗二十首·北楼櫻桃花】

李绅

开花占得春光早，雪缀云装万萼轻。凝艳拆时初照日，
落英频处乍闻莺。舞空柔弱看无力，带月葱茏似有情。
多事东风入闺闼，尽飘芳思委江城。

卷 481_34【新楼诗二十首·城上薔薇】

李绅

薔薇繁艳满城阴，烂熳开红次第深。新蕊度香翻宿蝶，
密房飘影戏晨禽。窦闺织妇惭诗句，南国佳人怨锦衾。

· 全唐诗 ·

风月寂寥思往事，暮春空赋白头吟。

卷 481_35【新楼诗二十首·南庭竹】

李绅

东南旧美凌霜操，五月凝阴入坐寒。烟惹翠梢含玉露，
粉开春箨耸琅玕。莫令戏马童儿见，试引为龙道士看。
知尔结根香实在，凤凰终拟下云端。

卷 481_36【新楼诗二十首·琪树】

李绅

石桥峰上栖玄鹤，碧阙岩边荫羽人。冰叶万条垂碧实，
玉珠千日保青春。月中泣露应同浥，涧底侵云尚有尘。
徒使茯苓成琥珀，不为松老化龙鳞。

卷 481_37【新楼诗二十首·海棠】

李绅

海边佳树生奇彩，知是仙山取得栽。琼蕊籍中闻阆苑，
紫芝图上见蓬莱。浅深芳萼通宵换，委积红英报晓开。

· 全唐诗 ·

寄语春园百花道，莫争颜色泛金杯。

卷 481_38【新楼诗二十首·水寺】

李绅

烟波野寺经过处，水国苍茫梦想中。云散浦间江月迥，
日曛洲渚海潮通。坐看鱼鸟沈浮远，静见楼台上下同。
闻道化城方便喻，只应从此到龙宫。

卷 481_39【新楼诗二十首·灵汜桥】

李绅

灵汜桥边多感伤，分明湖派绕回塘。岸花前后闻幽鸟，
湖月高低怨绿杨。能促岁阴惟白发，巧乘风马是春光。
何须化鹤归华表，却数凋零念越乡。

卷 481_40【若耶溪】

李绅

岚光花影绕山阴，山转花稀到碧浔。倾国美人妖艳远，
凿山良冶铸炉深。凌波莫惜临妆面，莹铄当期出匣心。

· 全唐诗 ·

应是蛟龙长不去，若耶秋水尚沈沈。

卷 481_41 【登禹庙回降雪五言二十韵】

李绅

金奏云坛毕，同云拂雪来。玉田千亩合，琼室万家开。
湖暗冰封镜，山明树变梅。裂缯分井陌，连璧混楼台。
麻引诗人兴，盐牵谢女才。细疑歌响尽，旅作舞腰回。
著水鹅毛失，铺松鹤羽摧。半崖云掩映，当砌月裴回。
遇物纤能状，随方巧若裁。玉花全缀萼，珠蚌尽呈胎。
志士书频照，鲛人杼正催。妒妆凌粉匣，欺酒上琼杯。
海使迷奔辙，江涛认暗雷。疾飘风作驭，轻集霰为媒。
剑客休矜利，农师正念摧。瑞彰知有感，灵贶表无灾。
尧历占新庆，虞阶想旧陪。粉凝莺阁下，银结凤池隈。
鸡树花惊笑，龙池絮欲猜。劳歌会稽守，遥祝永康哉。

卷 481_42 【题法华寺五言二十韵】

李绅

花界无生地，慈宫有相天。化娥腾宝像，留影閟金仙。
殿涌全身塔，池开半月泉。十峰排碧落，双涧合清涟。
药草经行遍，香灯次第燃。戒珠高腊护，心印祖僧传。
瓶识先罗汉，衣存旧福田。幻身观火宅，昏眼照青莲。

· 全唐诗 ·

住觉超真境，依游渡法船。化城珠百亿，灵迹冠三千。
萧壁将沈影，梁薪尚缀烟。色尘知有数，劫烬岂无年。
龙喷疑通海，鲸吞想漏川。磬疏闻启梵，钟息见安禅。
指喻三车觉，开迷五阴缠。教通方便入，心达是非诠。
贝叶千花藏，檀林万宝篇。坐严狮子迅，幢饰网珠悬。
极乐知无碍，分明应有缘。还将意功德，留偈法王前。

· 全唐诗 ·

第四百八十二卷

卷 482_1【宿越州天王寺】

李绅

海隅布政惭期月，江上沾巾愧万人。休按簿书惩黠吏，
未齐风俗昧良臣。壶冰自洁中无玷，镜水非求下见鳞。
清夜佛宫观色相，却归前老更前身。

卷 482_2【却渡西陵别越中父老】

李绅

海潮晚上江风急，津吏篙师语默齐。倾手奉觞看故老，
拥流争拜见孩提。惭非杜母临襄岘，自鄙朱翁别会稽。
渐举云帆烟水阔，杳然凫雁各东西。

卷 482_3【却到浙西】

李绅

· 全唐诗 ·

临平水竭蒹葭死，里社萧条旅馆秋。尝叹晋郊无乞食，
岂忘吴俗共分忧。野悲扬目称嗟食，林极翳桑顾所求。
苛政尚存犹惕息，老人偷拜拥前舟。

卷 482_4【苏州不住遥望武丘报恩两寺】

李绅

秋山古寺东西远，竹院松门怅望同。幽鸟静时侵径月，
野烟消处满林风。塔分朱雁馀霞外，刹对金螭落照中。
官备散寮身却累，往来惭谢二莲宫。

卷 482_5【回望馆娃故宫】

李绅

江云断续草绵连，云隔秋波树覆烟。飘雪荻花铺涨渚，
变霜枫叶卷平田。雀愁化水喧斜日，鸿怨惊风叫暮天。
因问馆娃何所恨，破吴红脸尚开莲。

卷 482_6【姑苏台杂句】

李绅

· 全唐诗 ·

越王巧破夫差国，来献黄金重雕刻。西施醉舞花艳倾，
妒月娇娥恣妖惑。姑苏百尺晓铺开，楼楣尽化黄金台。
歌清管咽欢未极，越师戈甲浮江来。伍胥抉目看吴灭，
范蠡全身霸西越。寂寞千年尽古墟，萧条两地皆明月。
灵岩香径掩禅扉，秋草荒凉遍落晖。江浦回看鸥鸟没，
碧峰斜见鹭鸶飞。如今白发星星满，却作闲官不闲散。
野寺经过惧悔尤，公程迫蹙悲秋馆。吴乡越国旧淹留，
草树烟霞昔遍游。云木梦回多感叹，不惟惆怅至长洲。

卷 482_7【开元寺】

李绅

十层花宇真毫相，数仞峰峦閟月扉。攒立宝山中色界，
散周香海小轮围。坐隅咫尺窥岩壑，窗外高低辨翠微。
难保尔形终不转，莫令偷拂六铢衣。

卷 482_8【皋桥】

李绅

伯鸾憔悴甘飘寓，非向嚣尘隐姓名。鸿鹄羽毛终有志，
素丝琴瑟自谐声。故桥秋月无家照，古井寒泉见底清。
犹有余风未磨灭，至今乡里重和鸣。

· 全唐诗 ·

卷 482_9【真娘墓】

李绅

一株繁艳春城尽，双树慈门忍草生。愁态自随风烛灭，
爱心难逐雨花轻。黛消波月空蟾影，歌息梁尘有梵声。
还似钱塘苏小小，只应回首是卿卿。

卷 482_10【却望无锡芙蓉湖】

李绅

水宽山远烟岚迥，柳岸萦回在碧流。
清昼不风凫雁少，却疑初梦镜湖秋。

丹橘村边独火微，碧流明处雁初飞。
萧条落叶垂杨岸，隔水寥寥闻捣衣。

逐波云影参差远，背日岚光隐约深。
犹似望中连海树，月生湖上是山阴。

旧山认得烟岚近，湖水平铺碧岫间。
喜见云泉还怅望，自惭山叟不归山。

翠崖幽谷分明处，倦鸟归云在眼前。

· 全唐诗 ·

惆怅白头为四老，远随尘土去伊川。

卷 482_11【重到惠山】

李绅

碧峰依旧松筠老，重得经过已白头。俱是海天黄叶信，
两逢霜节菊花秋。望中白鹤怜归翼，行处青苔恨昔游。
还向窗间名姓下，数行添记别离愁。

卷 482_12【鉴玄影堂】

李绅

香灯寂寞网尘中，烦恼身须色界空。龙钵已倾无法雨，
虎床犹在有悲风。定心池上浮泡没，招手岩边梦幻通。
深夜月明松子落，俨然听法侍生公。

卷 482_13【别石泉】

李绅

素沙见底空无色，青石潜流暗有声。微渡竹风涵淅沥，
细浮松月透轻明。桂凝秋露添灵液，茗折香芽泛玉英。

· 全唐诗 ·

应是梵宫连洞府，浴池今化醒泉清。

卷 482_14【别双温树】

李绅

翠条盈尺怜孤秀，植向西窗待月轩。轻剪绿丝秋叶暗，
密扶纤干夏阴繁。故山手种空怀想，温室心知不敢言。
看尔拂云今得地，莫随陵谷改深根。

卷 482_15【重别西湖】

李绅

浦边梅叶看凋落，波上双禽去寂寥。吹管曲传花易失，
织文机学羽难飘。雪欺春早摧芳萼，隼励秋深拂翠翘。
繁艳彩毛无处所，尽成愁叹别谿桥。

卷 482_16【毗陵东山】

李绅

昔人别馆淹留处，卜筑东山学谢家。丛桂半空摧枳棘，
曲池平尽隔烟霞。重开渔浦连天月，更种春园满地花。

· 全唐诗 ·

依旧秋风还寂寞，数行衰柳宿啼鸦。

卷 482_17【建元寺】

李绅

江城物候伤心地，远寺经过禁火辰。芳草垄边回首客，
野花丛里断肠人。紫荆繁艳空门昼，红药深开古殿春。
叹息光阴催白发，莫悲风月独沾巾。

卷 482_18【却到金陵登北固亭】

李绅

龙形江影隔云深，虎势山光入浪沈。潮蹙海风驱万里，
日浮天堑洞千寻。众峰作限横空碧，一柱中维彻底金。
还叱楫师看五两，莫令辜负济川心。

卷 482_19【望鹤林寺】

李绅

鹤栖峰下青莲宇，花发江城世界春。红照日高殷夺火，
紫凝霞曙莹销尘。每思载酒悲前事，欲问题诗想旧身。

· 全唐诗 ·

自叹秋风劳物役，白头拘束一闲人。

卷 482_20 【宿瓜州】

李绅

烟昏水郭津亭晚，回望金陵若动摇。冲浦回风翻宿浪，
照沙低月敛残潮。柳经寒露看萧索，人改衰容自寂寥。
官冷旧谙唯旅馆，岁阴轻薄是凉飙。

卷 482_21 【入扬州郭】

李绅

菊芳沙渚残花少，柳过秋风坠叶疏。堤绕门津喧井市，
路交村陌混樵渔。畏冲生客呼童仆，欲指潮痕问里闾。
非为掩身羞白发，自缘多病喜肩舆。

卷 482_22 【宿扬州水馆】

李绅

舟依浅岸参差合，桥映晴虹上下连。轻楫过时摇水月，
远灯繁处隔秋烟。却思海峤还凄叹，近涉江涛更凜然。

· 全唐诗 ·

闲凭栏干指星汉，尚疑轩盖在楼船。

卷 482_23【州中小饮便别牛相】

李绅

笙歌罢曲辞宾侣，庭竹移阴就小斋。愁不解颜徒满酌，
病非伤肺为忧怀。耻矜学步贻身患，岂慕醒狂蹶祸阶。
从此别离长酩酊，洛阳狂狷任椎埋。

卷 482_24【却过淮阴吊韩信庙】

李绅

功高自弃汉元臣，遗庙阴森楚水滨。英主任贤增虎翼，
假王徼福犯龙鳞。贱能忍耻卑狂少，贵乏怀忠近佞人。
徒用千金酬一饭，不知明哲重防身。

卷 482_25【却入泗口】

李绅

洪河一派清淮接，堤草芦花万里秋。烟树寂寥分楚泽，
海云明灭满扬州。望深江汉连天远，思起乡闾满眼愁。

· 全唐诗 ·

惆怅路岐真此处，夕阳西没水东流。

卷 482_26 【重入洛阳东门】

李绅

商颜重命伊川叟，时事知非入洛人。连野碧流通御苑，
满阶秋草过天津。每惭清秩容衰齿，犹有华簪寄病身。
驱马独归寻里巷，日斜行处旧红尘。

卷 482_27 【拜三川守】

李绅

恭承宠诏临伊洛，静守朝章化比閭。风变市儿惊偃草，
雨晴郊薮谬随车。改张琴瑟移胶柱，止息笙簧辨鲁鱼。
唯有从容期一德，使齐文教奉皇居。

卷 482_28 【庆云见】

李绅

礼成中岳陈金册，祥报卿云冠玉峰。轻未透林疑待凤，
细非行雨讵从龙。卷风变彩霏微薄，照日笼光映隐重。

· 全唐诗 ·

还入九霄成沆瀣，夕岚生处鹤归松。

卷 482_29 【灵蛇见少林寺】

李绅

琐文结绶灵蛇降，螭屈螭盘顾视闲。鳞蹙翠光抽璀璨，
腹连金彩动弯环。已应蜕骨风雷后，岂效衔珠草莽间。
知尔全身护昆阆，不矜挥尾在常山。

卷 482_30 【拜宣武军节度使】

李绅

油幢并入虎旗开，锦橐从天凤诏来。星应魏师新鼓角，
地嫌梁苑旧池台。日晖红旆分如电，人拥青门动若雷。
伊洛镜清回首处，是非纷杂任尘埃。

卷 482_31 【到宣武三十韵】

李绅

七月趋梁苑，三年谢尹京。旧风除物蠹，新律奉师贞。
龙节双油重，蛇矛百练明。跃鱼连后旆，腾虎耀前旌。

· 全唐诗 ·

路转金神并，川开铁马横。拥旄差白羽，分辔引红缨。
在浚风烟接，维嵩巩洛清。贯鱼奔骑疾，连雁卷行轻。
烟垒风调角，秋原雨洗兵。宿云看布甲，疏柳见分营。
鼓彻通宵警，和门候晓晴。虎符三校列，鱼胄万夫迎。
弄马猿猱健，奔车角牴呈。驾肩傍隘道，张幕内连楹。
森戟承三令，攒戈退一声。及郊知雨过，观俗辨风行。
望宋怜思女，游梁念客卿。义夫留感激，公子播英名。
泽广豚鱼洽，恩宣岂弟生。善师忘任智，中略在推诚。
式宴歌钟合，陈筵绮绣并。戏顰千卒跃，均酒百壶倾。
乐与师徒共，欢从井邑盈。教通因渐染，人悦尚和平。
授钺惭分阃，登坛荷列城。虚裘朝独坐，雄剑夜孤鸣。
白发侵霜变，丹心捧日惊。卫青终保志，潘岳未忘情。
期月终迷化，三年讵有成。惟看波海动，天外斩长鲸。

· 全唐诗 ·

第四百八十三卷

卷 483_1【江南暮春寄家】

李绅

雒阳城见梅迎雪，鱼口桥逢雪送梅。剑水寺前芳草合，
镜湖亭上野花开。江鸿断续翻云去，海燕差池拂水回。
想得心知近寒食，潜听喜鹊望归来。

卷 483_2【奉酬乐天立秋夕有怀见寄】

李绅

深夜星汉静，秋风初报凉。阶篁淅沥响，露叶参差光。
冰兔半升魄，铜壶微滴长。薄帷乍飘卷，襟带轻摇飏。
此际昏梦清，斜月满轩房。屣履步前楹，剑戟森在行。
重城宵正分，号鼓互相望。独坐有所思，夫君鸾凤章。
天津落星河，一苇安可航。龙泉白玉首，鱼服黄金装。
报国未知效，惟鹑徒在梁。裴回顾戎旆，颢气生东方。
衰叶满栏草，斑毛盈镜霜。羸牛未脱轭，老马强腾骧。
吟君白雪唱，惭愧巴人肠。

· 全唐诗 ·

卷 483_3【山出云】

李绅

杳霭祥云起，飘飏翠岭新。
萦峰开石秀，吐叶间松春。
林静翻空少，山明度岭频。
回崖时掩鹤，幽涧或随人。
姑射朝凝雪，阳台晚伴神。
悠悠九霄上，应坐玉京宾。

卷 483_4【上党奏庆云见】

李绅

飞龙久驭宇，真气尚兴云。
五色传嘉瑞，千龄表圣君。
从风忽萧索，依汉更氛氲。
影彻天初霁，光鲜日未曛。
表祥近自远，垂化聚还分。
宁作无依者，空传陶令文。

卷 483_5【华山庆云见】

李绅

圣主祠名岳，高峰发庆云。
金柯初缭绕，玉叶渐氛氲。
气色含珠日，晴夫吐翠雰。
依稀来鹤态，仿佛列山群。
万树流光影，千潭写锦文。
苍生欣有望，祥瑞在吾君。

· 全唐诗 ·

卷 483_6【欲到西陵寄王行周】

李绅

西陵沙岸回流急，船底粘沙去岸遥。驿吏递呼催下缆，
棹郎闲立道齐桡。犹瞻伍相青山庙，未见双童白鹤桥。
欲责舟人无次第，自知贪酒过春潮。

卷 483_7【华顶】

李绅

欲向仙峰炼九丹，独瞻华顶礼仙坛。石标琪树凌空碧，
水挂银河映月寒。天外鹤声随绛节，洞中云气隐琅玕。
浮生未有从师地，空诵仙经想羽翰。

卷 483_8【莺莺歌】

李绅

伯劳飞迟燕飞疾，垂杨绽金花笑日。绿窗娇女字莺莺，
金雀娅鬟年十七。黄姑上天阿母在，寂寞霜姿素莲质。
门掩重关萧寺中，芳草花时不曾出。

· 全唐诗 ·

卷 483_9【赠毛仙翁】

李绅

忆昔我祖神仙主，玄元皇帝周柱史。曾师轩黄友尧汤，
混迹和光佐周武。周之天子无仙气，成武康昭都警尔。
穆王粗识神仙事，八极轮蹄方逞志。鹤发韬真世不知，
日月星辰几回死。金鼎作丹丹化碧，三万六千神入宅。
仙兄受术几千年，已是当时驾鸿客。海光悠容天路长，
春风玉女开宫院。紫笔亲教书姓名，玉皇诏刻青金简。
桂窗一别三千春，秦妃镜里蛾眉新。忽控香虬天上去，
海隅劫石霄花尘。一从仙驾辞中土，顽日昏风老无主。
九州争夺无时休，八骏垂头避豺虎。我亦玄元千世孙，
眼穿望断苍烟根。花麟白凤竟冥寞，飞春走月劳神昏。
百年命促奔马疾，愁肠盘结心摧卒。今朝稽首拜仙兄，
愿赠丹砂化秋骨。

卷 483_10【和晋公三首】

李绅

凤仪常欲附，蚊力自知微。愿假樽壺末，膺门自此依。

貂蝉公独步，鸳鹭我同群。插羽先飞酒，交锋便著文。

· 全唐诗 ·

穷阴初莽苍，离思渐氛氲。残雪午桥岸，斜阳伊水滨。

卷 483_11【古风二首】

李绅

春种一粒粟，秋成万颗子。四海无闲田，农夫犹饿死。

锄禾日当午，汗滴禾下土。谁知盘中餐，粒粒皆辛苦。

卷 483_12【柳二首】

李绅

陶令门前冒接篱，亚夫营里拂朱旗。

人事推移无旧物，年年春至绿垂丝。

千条垂柳拂金丝，日暖牵风叶学眉。

愁见花飞狂不定，还同轻薄五陵儿。

卷 483_13【题白乐天文集】

李绅

· 全唐诗 ·

寄玉莲花藏，絨珠贝叶扃。院闲容客读，讲倦许僧听。
部列雕金榜，题存刻石铭。永添鸿宝集，莫杂小乘经。

卷 483_14【答章孝标】

李绅

假金方用真金镀，若是真金不镀金。
十载长安得一第，何须空腹用高心。

卷 483_15【朱槿花】

李绅

瘴烟长暖无霜雪，槿艳繁花满树红。
每叹芳菲四时厌，不知开落有春风。

卷 483_16【至潭州闻猿】

李绅

昔陪天上三清客，今作端州万里人。
湘浦更闻猿夜啸，断肠无泪可沾巾。

· 全唐诗 ·

卷 483_17【江亭】

李绅

瘴江昏雾连天合，欲作家书更断肠。
今日病身悲状候，岂能埋骨向炎荒。

卷 483_18【红蕉花】

李绅

红蕉花样炎方识，瘴水溪边色最深。
叶满丛深殷似火，不唯烧眼更烧心。

卷 483_19【忆汉月】

李绅

花开花落无时节，春去春来有底凭。
燕子不藏雷不蛰，烛烟昏雾暗腾腾。

卷 483_20【端州江亭得家书二首】

· 全唐诗 ·

李绅

雨中鹊语喧江树，风处蛛丝飏水浔。
开拆远书何事喜，数行家信抵千金。

长安别日春风早，岭外今来白露秋。
莫道淮南悲木叶，不闻摇落更堪愁。

卷 483_21【闻猿】

李绅

见说三声巴峡深，此时行者尽沾襟。
端州江口连云处，始信哀猿伤客心。

卷 483_22【赠韦金吾】

李绅

自报金吾主禁兵，腰间宝剑重横行。
接舆也是狂歌客，更就将军乞一声。

卷 483_23【长门怨】

· 全唐诗 ·

李绅

宫殿沈沈晓欲分，昭阳更漏不堪闻。
珊瑚枕上千行泪，不是思君是恨君。

卷 483_24【龟山寺鱼池】

李绅

汲水添池活白莲，十千髻鬣尽生天。
凡庸不识慈悲意，自葬江鱼入九泉。

剃发多缘是代耕，好闻人死恶人生。
祇园说法无高下，尔辈何劳尚世情。

卷 483_25【赋月】

李绅

月。光辉，皎洁。耀乾坤，静空阔。圆满中秋，玩争诗哲。
玉兔捣难穿，桂枝人共折。万象照乃无私，琼台岂遮君谒。
抱琴对弹别鹤声，不得知音声不切。

卷 483_26【句】

· 全唐诗 ·

李绅

君咏风月夕，余当童稚年。闲窗读书罢，偷咏左司篇。

· 全唐诗 ·

第四百八十四卷

卷 484_1 【和太原张相公山亭怀古】

崔公信

叠石状崖巘，翠含城上楼。前移庐霍峰，远带沅湘流。
潇洒主人静，夤缘芳径幽。清辉在昏旦，岂异东山游。

卷 484_2 【过小妓英英墓】

杨虞卿

萧晨骑马出皇都，闻说埋冤在路隅。别我已为泉下土，
思君犹似掌中珠。四弦品柱声初绝，三尺孤坟草已枯。
兰质蕙心何所在，焉知过者是狂夫。

卷 484_3 【句】

杨虞卿

· 全唐诗 ·

河势昆仑远，山形菡萏秋。

卷 484_4【和段相公登武担寺西台】

杨汝士

清净此道宫，层台复倚空。偶时三伏外，列席九霄中。
平视云端路，高临树杪风。自怜荣末座，前日别池笼。

卷 484_5【和段相公夏登张仪楼】

杨汝士

从公城上来，秋近绝纤埃。楼古秦规在，江分蜀望开。
远山标宿雪，末席本寒灰。陪赏今为忝，临欢敢诉杯。

卷 484_6【和宗人尚书嗣复祠祭武侯毕，题临淮公旧碑】

杨汝士

古柏森然地，修严蜀相祠。一过荣异代，三顾盛当时。
功德流何远，馨香荐未衰。敬名探国志，饰像慰毗思。
昔谒从征盖，今闻拥信旗。固宜光宠下，有泪刻前碑。

· 全唐诗 ·

卷 484_7【宴杨仆射新昌里第】

杨汝士

隔坐应须赐御屏，尽将仙翰入高冥。文章旧价留鸾掖，
桃李新阴在鲤庭。再岁生徒陈贺宴，一时良史尽传馨。
当时疏广虽云盛，讵有兹筵醉绿醺。

卷 484_8【建节后偶作】

杨汝士

抛却弓刀上砌台，上方台榭与云开。
山僧见我衣裳窄，知道新从战地来。

卷 484_9【题画山水】

杨汝士

太华峰前是故乡，路人遥指读书堂。
如今老大骑官马，羞向关西道姓杨。

卷 484_10【贺筵占赠营妓】

· 全唐诗 ·

杨汝士

郎君得意及青春，蜀国将军又不贫。
一曲高歌红一匹，两头娘子谢夫人。

卷 484_11【句】

杨汝士

昔日兰亭无艳质，此时金谷有高人。

卷 484_12【赋得芙蓉出水】

陈至

菡萏迎秋吐，天摇映水滨。剑芒开宝匣，峰影写蒲津。
下覆参差荇，高辞苒弱蘋。自当巢翠甲，非止戏赭鳞。
莫以时先后，而言色故新。芳香正堪玩，谁报涉江人。

卷 484_13【荐冰】

陈至

凌寒开涸沍，寝庙致精诚。色静澄三酒，光寒肃两楹。

· 全唐诗 ·

形盐非近进，玉豆为潜英。礼自春分展，坚从北陆成。
藉茅心共结，出鉴水渐明。幸得来观荐，灵台一小生。

卷 484_14 【句】

陈至

藻井尚寒龙迹在，红楼初施日光通。

卷 484_15 【荐冰】

赵蕃

仲月开凌室，斋心感圣情。寒姿分玉坐，皓彩发丹楹。
积素因风壮，虚空向日明。遥涵窗户冷，近映冕旒清。
在掌光逾澈，当轩质自轻。良辰方可致，由此表精诚。

卷 484_16 【老人星】

赵蕃

大史占南极，秋分见寿星。增辉延宝历，发曜起祥经。
灼烁依狼地，昭彰近帝庭。高悬方杳杳，孤白乍荧荧。
应见光新吐，休征德自形。既能符圣祚，从此表遐龄。

· 全唐诗 ·

第四百八十五卷

卷 485_1【古意】

鲍溶

女萝寄青松，绿蔓花绵绵。三五定君婚，结发早移天。
肃肃羔雁礼，泠泠琴瑟篇。恭承采蘋祀，敢效同车贤。
皎日不留景，良辰如逝川。愁心忽移爱，花貌无归妍。
翠袖皓珠粉，碧阶封绿钱。新人易如玉，废瑟难为弦。
寄谢蕣华木，荣君香阁前。岂无摇落苦，贵与根蒂连。
希君旧光景，照妾薄暮年。

卷 485_2【萧史图歌】

鲍溶

霜绡数幅八月天，彩龙引凤堂堂然。小载萧仙穆公女，
随仙上归玉京去。仙路迢迢烟几重，女衣清净云三素。
胡髯毵珊云髻光，翠蕤皎洁琼华凉。露痕烟迹渍红貌，
疑别秦宫初断肠。此天每在西北上，紫霄洞客晓烟望。

· 全唐诗 ·

卷 485_3 【会仙歌】

鲍溶

轻轻濛濛，龙言凤语何从容，耳有响兮目无踪。杳杳默默，
花张锦织，王母初自昆仑来，茅盈王方平在侧。
青毛仙鸟衔锦符，谨上阿环起居王母书。始知仙事亦多故，
一隔绛河千岁馀。详玉字，多喜气，瑶台明月来堕地。
冠剑低昂蹈舞频，礼容尽若君臣事。愿言小仙艺，
姓名许飞琼，洞阴玉磬敲天声。乐王母，一送玉杯长命酒。
碧花醉，灵扬扬，笑赐二子长生方。二子未及伸拜谢，
苍苍上兮皇皇下。

卷 485_4 【李夫人歌】

鲍溶

璿闺羽帐华烛陈，方士夜降夫人神。葳蕤半露芙蓉色，
窈窕将期环珮身。丽如三五月，可望难亲近。
嚬黛含犀竟不言，春思秋怨谁能问。欲求巧笑如生时，
歌坐在空瑟衔丝。神来未及梦相见，帝比初亡心更悲。
爱之欲其生又死，东流万代无回水。宫漏丁丁夜向晨，
烟消雾散愁方士。

· 全唐诗 ·

卷 485_5【水殿采菱歌】

鲍溶

宫鸦叫赤光，潮声入宫宫影凉。火华啼露卷横塘，
金堤四合宛柔扬。美人荷裙芙蓉妆，柔荑萦雾棹龙航。
采莲一声歌态长，青丝结眼捕鸳鸯。

卷 485_6【周先生画洞庭歌】

鲍溶

江南客，水为乡，舟为宅，能以笔锋知地脉。
闲分楚水入丹青，不下此堂临洞庭。水文不浪烟不动，
木末棱棱山碧重。帝子应哀窈窕云，客人似得婵娟梦。
六月火光衣上生，斋心寂听潺湲声。林冰摇镜水拂簟，
尽日独卧秋风清。因游洞庭不出户，疑君如有长生路。
玉壶先生在何处？

卷 485_7【霓裳羽衣歌】

鲍溶

玉烟生窗午轻凝，晨华左耀鲜相凌。人言天孙机上亲手迹，

· 全唐诗 ·

有时怨别无所惜。遂令武帝厌云韶，金针天丝缀飘飘。
五声写出心中见，拊石喧金柏梁殿。此衣春日赐何人，
秦女腰肢轻若燕。香风间旋众彩随，联联珍珠贯长丝。
眼前意是三清客，星宿离离绕身白。鸾凤有声不见身，
出宫入徵随伶人。神仙如月只可望，瑶华池头几惆怅。
乔山一闭曲未终，鼎湖秋惊白头浪。

卷 485_8 【寓兴】

鲍溶

念来若望神，追往如话梦。梦神不无迹，谁使烦心用。
鲁圣虚泣麟，楚狂浪歌凤。那言阮家子，更作穷途恸。

卷 485_9 【游山】

鲍溶

白道行深云，云高路弥细。时时天上客，遗路人间世。
烟花最深处，井臼得空刺。天寒鹤巢林，石长泉脉闭。
神化万灵集，心期一朝契。不见金板书，谁知阮家裔。
终期太古人，问取松柏岁。

卷 485_10 【隋宫】

· 全唐诗 ·

鲍溶

御街多行客，行客悲春风。楚老几代人，种田炀帝宫。
零落池台势，高低禾黍中。

卷 485_11【怀仙二首】

鲍溶

昆仑九层台，台上宫城峻。西母持地图，东来献虞舜。
虞宫礼成后，回驾仙风顺。十二楼上人，笙歌沸天引。
裴回扶桑路，白日生离恨。青鸟更不来，麻姑断书信。
乃知东海水，清浅谁能问。

阊峰绮阁几千丈，瑶水西流十二城。
曾见周灵王太子，碧桃花下自吹笙。

卷 485_12【怀远人】

鲍溶

远道在天际，客行如浮云。浮云不知归，似我长望君。
秋至汉水高，南音何时闻。瑶草难远寄，西风气氤氲。
常恐山岳游，不反鸾凤群。无厌坐迟人，风雨惊斯文。

· 全唐诗 ·

卷 485_13【怀尹真人】

鲍溶

万里叠嶂翠，一心浮云闲。羽人杏花发，倚树红琼颜。
流水杳冥外，女萝阴荫间。却思人间世，多恐不可还。
青鸟飞难远，春云晴不闲。但恐五灵车，山上复有山。

卷 485_14【秋晚铜山道中宿隐者】

鲍溶

我乡山川遥，秋晚空景促。天明共云散，日落依鸟宿。
主人逃名子，鹤发卧空谷。野言得真风，山貌宜古服。
喜于无声地，暂傲羲皇俗。秋窗照疏萤，寒犬吠落木。
朝隐留此处，一点天边宿。今忆见此时，添悲览止足。
迟迟清夜昼，幽路出深竹。笑谢万户侯，余将耻干禄。

卷 485_15【感怀】

鲍溶

宿心不觉远，事去劳追忆。旷古川上怀，东流几时息。
门前青山路，眼见归不得。晓梦云月光，过秋兰蕙色。

· 全唐诗 ·

卷 485_16 【经秦皇墓】

鲍溶

左岗青虬盘，右坂白虎踞。谁识此中陵，祖龙藏身处。
别为一天地，下入三泉路。珠华翔青鸟，玉影耀白兔。
山河一易姓，万事随人去。白昼盗开陵，玄冬火焚树。
哀哉送死厚，乃为弃身具。死者不复知，回看汉文墓。

卷 485_17 【将归旧山留别孟郊】

鲍溶

择木无利刃，羡鱼无巧纶。如何不量力，自取中路贫。
前者不厌耕，一日不离亲。今来千里外，我心不在身。
悠悠慈母心，惟愿才如人。蚕桑能几许，衣服常著新。
一饭吐尺丝，谁见此殷勤。别君归耕去，持火烧车轮。

卷 485_18 【留辞杜员外式方】

鲍溶

东风吹旅怀，乡梦无夜无。惭见君子堂，贫思上归途。
海岳泛念深，涓尘复何须。婆娑不在本，屈曲无弦弧。

· 全唐诗 ·

惻惻奉离尊，承欢独向隅。时当凤来日，孰用鸡鸣夫。
回首九仙门，皇家在玉壶。惭非海人别，泪下不成珠。

卷 485_19【长城】

鲍溶

蒙公虏生人，北筑秦氏冤。祸兴萧墙内，万里防祸根。
城成六国亡，宫阙启千门。生人半为土，何用空中原。
奈何家天下，骨肉尚无恩。投沙拥海水，安得久不翻。
乘高惨人魂，寒日易黄昏。枯骨贯朽铁，砂中如有言。
万古骊山下，徒悲野火燔。

卷 485_20【蔡平喜遇河阳马判官宽话别】

鲍溶

从事东军正四年，相逢且喜偃兵前。看寻狡兔翻三窟，
见射妖星落九天。江上柳营回鼓角，河阳花府望神仙。
秋风萧飒醉中别，白马嘶霜雁叫烟。

卷 485_21【寄福州从事殷尧藩】

鲍溶

· 全唐诗 ·

越岭寒轻物象殊，海城台阁似蓬壶。几回入市鲛绡女，
终岁啼花山鹧鸪。雷令剑龙知去未，虎夷云鹤亦来无。
就中静事冥宵话，何惜双轮访病夫。

卷 485_22【壮士行】

鲍溶

西方太白高，壮士羞病死。心知报恩处，对酒歌易水。
沙鸿噪天末，横剑别妻子。苏武执节归，班超束书起。
山河不足重，重在遇知己。

卷 485_23【章华宫行】

鲍溶

烟渚南鸿呼晓群，章华宫娥怨行云。十二巫峰仰天绿，
金车何处邀云宿。小腰矮堕三千人，宫衣水碧颜青春。
岂无一人似神女，忍使黛蛾常不伸。黛蛾不伸犹自可，
春朝诸处门常锁。

卷 485_24【倚瑟行】

鲍溶

· 全唐诗 ·

金輿传惊灞浐水，龙旗参天行殿巍。左文皇帝右慎姬，
北面侍臣张释之。因高知处邯郸道，寿陵已见生秋草。
万世何人不此归，一言出口堪生老。高歌倚瑟流清悲，
徐乐哀生知为谁。臣惊欢叹不可放，愿赐一言释名妄。
明珠为日红亭亭，水银为河玉为星。泉宫一闭秦国丧，
牧童弄火骊山上。与世无情在速贫，弃尸于野由斯葬。
生死茫茫不可知，视不一姓君莫悲。始皇有训二世哲，
君独何人至于斯。灞陵一代无发毁，俭风本是张廷尉。

卷 485_25【辞辇行】

鲍溶

汉家代久淳风薄，帝重微行极荒乐。青娥三千奉一人，
班女不以色事君。朝停玉辇诏同载，三十六宫皆眄睐。
不惊六马缓天仪，从容鸣环前致辞。君恩如海深难竭，
妾命如丝轻易绝。愿陪阿母同小星，敢使太阳齐万物。
周末幽王不可宗，妾闻上圣遗休风。五更三老侍白日，
八十一女居深宫。愿将辇内有馀席，回赐忠臣妾恩泽。
一时节义动贤君，千年名姓香氛氲，渐台水死何伤闻。

卷 485_26【巢乌行】

鲍溶

· 全唐诗 ·

乌生儿子林萧条，雄乌求食雌守巢。夜愁风雨巢倾覆，
常见一乌巢下宿。日长雏饥雄未回，雌乌下巢去哀哀。
野田春尽少遗谷，寻食不得饥飞来。黄雀亦引数青雀，
雀飞未远乌惊落。既分青雀啖尔雏，尔雏虽长心何如。
将飞不飞犹未忍，古瑟写哀哀不尽。杀生养生复养生，
呜呜啧啧何时平。

卷 485_27【姑苏宫行】

鲍溶

姑苏宫，九层金台半虚空。雕楹璇题斗皎洁，
中有妖姬似明月。西见洞庭秋镜开，水华百里盘宫来。
越王采女能水戏，仙舟如龙旌曳翠。羽盖晴翻橘柚香，
玉笙夜送芙蓉醉。归帆平静君无劳，还从下下上高高。

卷 485_28【悲哉行】

鲍溶

促促晨复昏，死生同一源。贵年不惧老，贱老伤久存。
朗朗哭前歌，绛旌引幽魂。来为千金子，去卧百草根。
黄土塞生路，悲风送回辕。金鞍旧良马，四顾不入门。
生结千岁念，荣华及百孙。黄金买性命，白刃酬一言。
宁知北山下，松柏侵田园。

· 全唐诗 ·

卷 485_29【元日早朝行】

鲍溶

乾元发生春为宗，盛德在天斗建东。东方岁星大明宫，
南山喜气摇晴空。望云五等舞万玉，献寿一声出千峰。
文章垂彩礼乐正，太白下直旌旗红。旌旗不断春风前，
直如朱绳非尔妍。

卷 485_30【秋怀五首】

鲍溶

促促生有涯，营营意无限。无限意未申，有涯生已晚。
恩荣不可恃，天道归寸管。老如影随人，时若车下坂。
行者归期尽，居人心更远。凉风日萧条，亲戚长在眼。
多忧知无奈，圣贤莫能免。客鸟投本枝，生生复深浅。

秋晓客迢迢，月清风楚楚。草虫夜侵我，唧唧床下语。
流年白日驰，微愿不我与。心如缫丝纶，展转多头绪。
凭觞散烦襟，援瑟清夜拊。回感帝子心，空堂有烟雨。
丝减悲不减，器新声更古。一弦有馀哀，何况二十五。

九月夜如年，幽房劳别梦。不知别日远，夜夜犹相送。
玉床暗虫响，锦席寒泪冻。明镜失旧人，空林误归凤。

· 全唐诗 ·

新年堪爱惜，锦字亦珍重。一念皎皎时，幽襟非所用。

金气白日来，疏黄满河关。平居乏愉悦，况复身险艰。
一忆故乡居，一望客人还。两心四海中，谁不伤朱颜。
双燕不巢树，浮萍不出山。性命君由天，安得易其间。
休悲砌虫苦，此日无人闲。

龙荒变露色，燕雁南为客。游子声影中，涕零念离析。
四时如车马，转此今与昔。往叹在空中，存事委幽迹。
翩翩日敛照，朗朗月系夕。物生春不留，年壮老还迫。
天机杳何为，长寿与松柏。

卷 485_31 【秋夜对月怀李正封】

鲍溶

援琴怅独立，高月对秋堂。美人远于月，徒望空景光。
坐忆执手时，七弦起凄凉。平生知音少，君子安可忘。
客意如梦寐，路岐遍四方。日远迷所之，满天心暗伤。
主奉二鲤鱼，中含五文章。惜无千金答，愁思盈中肠。
此夕临风叹，零露沾衣裳。

卷 485_32 【庐山石镜】

鲍溶

· 全唐诗 ·

东岩采薇人，岩际朝见月。怪堕幽萝间，非时更澄彻。
绿萝就玉兔，再与高鸟歇。清光照掌中，始悟石上发。
谁传阴阳火，铸此天地物。深影藏半山，虚轮带凝雪。
早回谢公赏，今遇樵夫说。白日乘彩霞，翩翩对容发。
我图辨鬼魅，信美留烟阙。形神乍相逢，竟夕难取别。
如其终身照，可化黄金骨。

卷 485_33【与峨眉山道士期尽日不至】

鲍溶

倾景安再中，人生有何常。胡为少君别，风驭峨眉阳。
结我千日期，青山故人堂。期尽师不至，望云空烧香。
顾惭有限身，易老白日光。怀君屡惊叹，支体安能强。
往闻清修箴，未究服食方。瑶田有灵芝，眼见不得尝。
玉壶贮天地，岁月亦已长。若用壶中景，东溟又堪伤。
寄言赤玉箫，夜夜吹清商。

卷 485_34【述德上太原严尚书绶】

鲍溶

帝命河岳神，降灵翼轩辕。天王委管籥，开闭秦北门。
顶戴日月光，口宣雨露言。甲马不及汗，天骄自亡魂。
清冢入内地，黄河穷本源。风云寝气象，鸟兽翔旗幡。

· 全唐诗 ·

军人歌无胡，长剑倚昆仑。终古鞭血地，到今耕稼繁。
樵客天一畔，何由拜旌轩。愿请执御臣，为公动朱轓。
岂令群荒外，尚有辜帝恩。愿陈田舍歌，暂息四座喧。
条桑去附枝，薤草绝本根。可惜汉公主，哀哀嫁乌孙。

卷 485_35 【山中怀刘修】

鲍溶

松老秋意孤，夜凉吟风水。山人在远道，相忆中夜起。
春光如不至，幽兰含香死。响象离鹤情，念来一相似。
月斜掩扉卧，又在梦魂里。

卷 485_36 【塞下】

鲍溶

北风号蓟门，杀气日夜兴。咸阳三千里，驿马如饥鹰。
行子久去乡，逢山不敢登。寒日惨大野，虏云若飞鹏。
西北防秋军，麾幢宿层层。匈奴天未丧，战鼓长登登。
汉卒马上老，繁缨空丝绳。诚知天所骄，欲罢又不能。

卷 485_37 【送僧南游】

· 全唐诗 ·

鲍溶

且攀隋宫柳，莫忆江南春。师有怀乡志，未为无事人。

卷 485_38【行路难】

鲍溶

玉堂向夕如无人，丝竹俨然宫商死。细人何言入君耳，
尘生金樽酒如水。君今不念岁蹉跎，雁天明明凉露多。
华灯清凝久照夜，彩僮窈窕虚垂萝。入宫见妒君不察，
暮入此地生风波。此时不乐早休息，女颜易老君如何。

卷 485_39【子规】

鲍溶

中林子规啼，云是古蜀帝。蜀帝胡为鸟，惊急如罪戾。
一啼艳阳节，春色亦可替。再啼孟夏林，密叶堪委翳。
三啼凉秋晓，百卉无生意。四啼玄冥冬，云物惨不霁。
芸黄壮士发，沾洒妖姬袂。悲深寒乌雏，哀掩病鹤翅。
胡为托幽命，庇质无完毳。戚戚含至冤，卑卑忌群势。
吾闻凤凰长，羽族皆受制。盍分翡翠毛，使学鹦鹉慧。
敌怨不在弦，一哀尚能继。那令不知休，泣血经世世。
古风失中和，衰代因郑卫。三叹尚淫哀，向渴嗜流涕。

· 全唐诗 ·

如因异声感，乐与中肠契。至教一昏芜，生人遂危脆。
古意叹通近，如上青天际。荼蓼久已甘，空劳堇葵惠。
谁闻子规苦，思与正声计。

卷 485_40【秋夜闻郑山人弹楚妃怨】

鲍溶

明月摇落夜，深堂清净弦。中间楚妃奏，十指哀婵娟。
寥寥夜含风，荡荡意如泉。寂寞物无象，依稀语空烟。
旅人多西望，客雁难南前。由来感神事，岂为无情传。
容华能几时，不再来者年。此夕河汉上，双星含凄然。

卷 485_41【忆旧游】

鲍溶

忆求无何乡，了在赤谷村。仙人居其中，将往问所存。
日入濛汜宿，石烟抱山门。明月久不下，半峰照啼猿。
堂上白鹤翁，神清心无烦。斋心侍席前，跪请长生恩。
云昔崆峒老，何词受轩辕。从星使变化，任日张乾坤。
若到旧乡里，宛如曾讨论。风移岩花气，珠贯金经言。
凉夜惜易尽，青烟谢晨暄。自唯腥膻体，难久留其藩。
几世身在梦，百年云无根。悠悠竟何事，愚智相忧冤。
叹息几晚寤，蒙师招其魂。至今瑶华心，每想清水源。

· 全唐诗 ·

卷 485_42 【白露】

鲍溶

清蝉暂休响，丰露还移色。金飙爽晨华，玉壶增夜刻。
已低疏萤焰，稍减哀蝉力。迎社促燕心，助风劳雁翼。
一悲纨扇情，再想清浅忆。高高拜月归，轧轧挑灯织。
盈盈玉盘泪，何处无消息。

卷 485_43 【经隐叟】

鲍溶

行蹋门外泉，坐披床上云。谁将许由事，万古留与君。
虚洞闭金锁，蠹简藏鸟文。萝景深的的，蕙风闲薰薰。
余有世上心，此来未及群。殷勤讳名姓，莫遣樵客闻。

卷 485_44 【秋暮山中怀李端公益】

鲍溶

旧事与日远，秋花仍旧香。前年绣衣客，此节过此堂。
侍臣不自高，笑脱绣衣裳。眠云有馀态，入鸟不乱行。
我恐云岚色，损君鞍马光。君言此何言，且共覆前觞。

· 全唐诗 ·

古人重一笑，买日轻金装。日尽秉烛游，千年不能忘。
君言此何言，明日皆异乡。明日非今日，山下道路长。
一从山下来，天地再炎凉。此中会难得，梦君马玄黄。

卷 485_45【苦哉远征人】

鲍溶

征人歌古曲，携手上河梁。李陵死别处，杳杳玄冥乡。
忆昔从此路，连年征鬼方。久行迷汉历，三死毡衣裳。
百战身且在，微功信难忘。远承云台议，非势孰敢当。
落日吊李广，白首过河阳。闲弓失月影，劳剑无龙光。
去日始束发，今来发成霜。虚名乃闲事，生见父母乡。
掩抑大风歌，裴回少年场。诚哉古人言，鸟尽良弓藏。

卷 485_46【悼豆卢策先辈】

鲍溶

丧车出东门，生时马无力。何处入黄泉，嵩高山西北。
室人万里外，久望君官职。今与牵衣儿，翻号死消息。
平生江海上，我不空相识。远客迷畏途，孤鸿伤一翼。
行将鸡黍祭，已是乌鸢食。劝酒执御郎，行人有哀色。
先悲三尺土，经岁哭不得。眼前双双流，故袂安可拭。
一拜隔千里，生人意何极。唯有阳春曲，永播清玉德。

· 全唐诗 ·

卷 485_47【首夏】

鲍溶

昨日青春去，晚峰尚含妍。虽留有馀态，脉脉防忧煎。
幽人惜时节，对此感流年。

卷 485_48【寄天台准公】

鲍溶

赤城桥东见月夜，佛垄寺边行月僧。
闲蹋莓苔绕琪树，海光清净对心灯。

卷 485_49【送僧东游】

鲍溶

风流东晋后，外学入僧家。独唱郢中雪，还游天际霞。
云村共香饭，水月喻秋花。景物添新致，前程讵可涯。

卷 485_50【送僧之宣城】

· 全唐诗 ·

鲍溶

昔从谢太守，宾客宛陵城。有日持斋戒，高僧识姓名。
秋风送客去，安得尽忘情。

卷 485_51【宣城北楼，昔从顺阳公会于此】

鲍溶

诗楼郡城北，窗牖敬亭山。几步尘埃隔，终朝世界闲。
凭师看粉壁，名姓在其间。

卷 485_52【东高峰】

鲍溶

东亭最高峙，春树绕山腰。画里青鸾客，云中碧玉箫。
秋风若西望，为我一长谣。

卷 485_53【禅定寺经院】

鲍溶

莲华不朽寺，雕刻满山根。石汗知天雨，金泥落圣言。

· 全唐诗 ·

思量施金客，千古独消魂。

卷 485_54【范真传侍御累有寄，因奉酬十首】

鲍溶

昨日新花红满眼，今朝美酒绿留人。
更宜明月含芳露，凭杖萧郎夜赏春。

白雪翦花朱蜡蒂，折花传笑惜春人。
请君白日留明日，一醉春光莫厌频。

云髻凤文细，对君歌少年。万金酬一顾，可惜十千钱。

玉管倾杯乐，春园斗草情。野花无限意，处处逐人行。

闻道中山酒，一杯千日醒。黄莺似传语，劝酒太叮咛。

红袂歌声起，因君始得闻。黄昏小垂手，与我驻浮云。

相劝醉年华，莫醒春日斜。春风宛陵道，万里晋阳花。

碧绿草萦堤，红蓝花满溪。愿君常践蹋，莫使暗萋萋。

萋萋巫峡云，楚客莫留恩。岁久晋阳道，谁能向太原。

· 全唐诗 ·

岁酒劝屠苏，楚声山鹧鸪。春风入君意，千日不须臾。

· 全唐诗 ·

第四百八十六卷

卷 486_1【越女词】

鲍溶

越女芙蓉妆，浣纱清浅水。忽惊春心晓，不敢思君子。
君子纵我思，宁来浣溪里。

卷 486_2【弄玉词二首】

鲍溶

素女结念飞天行，白玉参差凤凰声，天仙借女双翅猛。
五灯绕身生，入烟去无影。

三清弄玉秦公女，嫁得天上人。琼箫碧月唤朱雀，
携手上谒玉晨君。夫妻同寿，万万青春。

卷 486_3【山行经樵翁】

· 全唐诗 ·

鲍溶

我心劳我身，远道谁与论。心如木中火，忧至常自燔。
披访结恩地，世人轻报恩。女无良媒识，知入何人门。
寒日行深山，路由谷中村。田翁樵采熟，男女讴吟喧。
借问身命谋，上言愧乾坤。时清公赋薄，力勤地利繁。
下念草木年，坐家见重孙。举案馈宾客，糟浆盈陶尊。
醉闲鹿裘暖，白发舞轩轩。仰羡太古人，余将破行辕。
遑遑问身事，师友难为言。离歌又行去，落日低寒泉。

卷 486_4【途中旅思二首】

鲍溶

喔喔鸡鸣晓，萧萧马辞枥。草草名利区，居人少于客。
生期三万日，童耄半虚掷。修短命半中，忧欢复相敌。
朝提黄金爵，暮造青松宅。来往日相悲，北邙田土窄。
峨峨西天岳，锦绣明翠壁。中有不死乡，千年无人迹。
心期周太子，下马拜虚碧。鹤驾如可从，他年执烟策。

星出方问宿，睡眼始朦胧。天光见地色，上路车幢幢。
时物既老大，众山何枯空。青冥见古柏，寥朗闻疏鸿。
独步天地间，无因为君忠。白毛寻人忧，生此头发中。
跃马非壮岁，报恩无高功。斯言化为火，日夜焚深衷。

· 全唐诗 ·

卷 486_5【旧镜】

鲍溶

婵娟本家镜，与妾归君子。每忆并照时，相逢明月里。
春风忽分影，白日难依倚。珠粉不结花，玉珰宁辉耳。
心期不可见，不保长如此。华发一欺人，青铜化为鬼。
良人有归日，肯学妖桃李。瑶匣若浮云，冥冥藏玉水。
侍儿不遣照，恐学孤鸾死。

卷 486_6【宿悟空寺赠僧】

鲍溶

劳者谣烛蛾，致身何营营。雪山本师在，心地如镜清。
往与本师别，人间买浮名。朝光畏不久，内火烧人情。
迷路喜未远，宿留化人城。前心宛如此，了了随静生。
维持薝卜花，却与前心行。

卷 486_7【感兴】

鲍溶

幽人无近迹，别易会则稀。黄鹤亦姓丁，寥寥何处飞。

· 全唐诗 ·

时见海上山，绕云心依依。谅无驭风术，中路愁虚归。
童发慕道心，壮年堕尘机。白日不饶我，如今事皆非。
群羊化石尽，双凫与我违。岳黄金富，轩辕晓霞衣。
谁令日在眼，容色烟云微。

卷 486_8【秋思】

鲍溶

楚客秋更悲，皇皇无声地。时无无事人，我命与身异。
良时如飞鸟，回掌成故事。蹉跎秋定还，凝冽坚冰至。
人生不期老，华发谁能避。感此惜壮年，壮年少为贵。
我生虽努力，荣途难自致。徒为击角歌，且惭雕剑字。
吾师罕言命，感激潜伤思。

卷 486_9【客途逢乡人旋别】

鲍溶

惊鸿一断行，天远会无因。无因忽相会，感叹若有神。
我乡路三千，百里一主人。一宿独何恋，何况旧乡邻。
牢落岁华晏，相怜客中贫。迎霜君衣暖，与我同一身。
谁在天日下，此生能不勤。青萍寄流水，安得长相亲。
明发更远道，山河重苦辛。

· 全唐诗 ·

卷 486_10【隋帝陵下】

鲍溶

白露沾衣隋主宫，云亭月馆楚淮东。盘龙楼舰浮冤水，
雕锦帆幢使乱风。长夜应怜桀何罪，告成合笑禹无功。
伤心近似骊山路，陵树无根秋草中。

卷 486_11【洛阳春望】

鲍溶

五凤楼南望洛阳，龙门回合抱苍苍。受朝前殿云霞暖，
封岳行宫草木香。四海为家知德盛，二京有宅卜年长。
东人犹忆时巡礼，愿觐元和日月光。

卷 486_12【始见二毛】

鲍溶

玄发迎忧光色阑，衰华因镜强相看。百川赴海返潮易，
一叶报秋归树难。初弄藕丝牵欲断，又惊机素翦仍残。
颜生岂是光阴晚，余亦何人不自宽。

· 全唐诗 ·

卷 486_13 【巫山怀古】

鲍溶

十二峰峦斗翠微，石烟花雾犯容辉。青春楚女妒云老，
白日神人入梦稀。银箭暗凋歌夜烛，珠泉频点舞时衣。
谁伤宋玉千年后，留得青山辨是非。

卷 486_14 【郊天回】

鲍溶

日动萧烟上泰坛，帝从黄道整和銮。风前貔武回雕仗，
云里神龙起画竿。金鸟赦书鸣九夜，玉山寿酒舞千官。
始知报本终朝礼，旧典时巡只自难。

卷 486_15 【温泉宫】

鲍溶

忆昔开元天地平，武皇十月幸华清。山蒸阴火云三素，
日落温泉鸡一鸣。彩羽鸟仙歌不死，翠霓童妾舞长生。
仍闻老叟垂黄发，犹说龙髯缥缈情。

· 全唐诗 ·

卷 486_16【寄归】

鲍溶

塞草黄来见雁稀，陇云白后少人归。新丝强入未衰鬓，
别泪应沾独宿衣。几夕精诚拜初月，每秋河汉对空机。
更看出猎相思苦，不射秋田朝雉飞。

卷 486_17【赠远】

鲍溶

辛苦关西车骑官，几年旌节客河兰。金泥舞虎精神暗，
银缕交龙气色寒。欲和古诗成窦锦，倍悲秋扇损齐纨。
莫劳雁足传书信，愿向凌烟阁上看。

卷 486_18【九日与友人登高】

鲍溶

云木疏黄秋满川，茱萸风里一尊前。几回为客逢佳节，
曾见何人再少年。霜报征衣冷针指，雁惊幽梦泪婵娟。
古来醉乐皆难得，留取穷通付上天。

· 全唐诗 ·

卷 486_19 【赠杨炼师】

鲍溶

柴烟衣上绣春云，清隐山书小篆文。
明月在天将凤管，夜深吹向玉晨君。

卷 486_20 【玉清坛】

鲍溶

上阳宫里女，玉色楚人多。西信无因得，东游奈乐何。

卷 486_21 【答客】

鲍溶

竹间深路马惊嘶，独入蓬门半似迷。
劳问圃人终岁事，桔槔声里雨春畦。

卷 486_22 【隋宫】

鲍溶

· 全唐诗 ·

柳塘烟起日西斜，竹浦风回雁弄沙。
炀帝春游古城在，坏宫芳草满人家。

卷 486_23【送僧文江】

鲍溶

吴王剑池上，禅子石房深。久慕白云性，忽劳青玉音。
孤高知胜鹤，清雅似闻琴。此韵书珍重，烦师出定吟。

卷 486_24【古意】

鲍溶

重锦化为泥，剪刀误人事。夜裁远道书，翦破相思字。
妾心不自信，远道终难寄。客心固多疑，肯信非人意。
万里不言远，归书长相次。可即由此书，空房 忌讳。

卷 486_25【山中冬思二首】

鲍溶

山深先冬寒，败叶与林齐。门巷非世路，何人念穷栖。
哀风破山起，夕雪误鸣鸡。巢鸟侵旦出，饥猿无声啼。

· 全唐诗 ·

晨兴动烟火，开云伐冰溪。老木寒更瘦，阴云晴亦低。
我贫自求力，颜色常低迷。时思灵台下，游子正凄凄。

雪壮冰亦坚，冻润如平地。幽人毛褐暖，笑就糟床醉。
唤人空谷应，开火寒猿至。拾薪煮秋栗，看鼎书古字。
忽忆南涧游，衣巾多云气。露脚寻逸僧，谿量意中事。

卷 486_26【读史】

鲍溶

鬼书报秦亡，天地亦云闭。赤龙吟大野，老母哭白帝。
苍苍无白日，项氏徒先济。六合已姓刘，鸿门事难制。
坑降嬴政在，衣锦人望替。宿昔见汉兵，龙蛇满旌棨。
始矜山可拔，终叹骓不逝。区区亚父心，未究天人际。
萧张马无汗，盛业垂千世。

卷 486_27【冬夜答客】

鲍溶

冬日诚可爱，不如夜漏多。幸君霜露里，车马犯寒过。
学耕不逢年，稂莠败黍禾。岂唯亲宾散，鸟鼠移巢窠。
独见青松心，凌霜庇柔萝。壮日贱若此，留恩意如何。
因忆古丈夫，一言重山河。临风弹楚剑，为子奏燕歌。

· 全唐诗 ·

卷 486_28【宿吴兴道中菰村】

鲍溶

浮客倦长道，秋深夜如年。久行惜日月，常起鸡鸣前。
夕计今日程，息车在菰川。霜中水南寺，金磬泠泠然。
畴昔此林下，归心巢顶禅。身依寤昏寐，智月生虚圆。
羁旅违我程，去留难双全。观身话往事，如梦游青天。
明发止宾从，寄声琴上弦。聊书越人意，此曲名思仙。

卷 486_29【代楚老酬主人】

鲍溶

流水为我乡，扁舟为我宅。二毛去天远，几日人间客。
瞳瞳衔山景，渺渺翔云迹。从时无定心，病处不暖席。
烦君问岐路，为我生凄戚。百年衣食身，未死皆有役。
曾伤无遗嗣，纵有复何益。终古北邙山，樵人卖松柏。

卷 486_30【沛中怀古】

鲍溶

烟芜歌风台，此是赤帝乡。赤帝今已矣，大风邈凄凉。

· 全唐诗 ·

惟昔仗孤剑，十年朝八荒。人言生处乐，万乘巡东方。
高台何巍巍，行殿起中央。兴言万代事，四坐沾衣裳。
我为异代臣，酌水祀先王。抚事复怀昔，临风独彷徨。

卷 486_31【夏日华山别韩博士愈】

鲍溶

别地泰华阴，孤亭潼关口。夏日可畏时，望山易迟久。
暂因车马倦，一逐云先后。碧霞气争寒，黄鸟语相诱。
三峰多异态，迥举仙人手。天晴捧日轮，月夕弄星斗。
幽疑白帝近，明见黄河走。远心不期来，真境非吾有。
鸟鸣草木下，日息天地右。踟躅因风松，青冥谢仙叟。
不知无声泪，中感一颜厚。青霄上何阶，别剑空朗扣。
故乡此关外，身与名相守。迹比断根蓬，忧如长饮酒。
生离抱多恨，方寸安可受。咫尺岐路分，苍烟蔽回首。

卷 486_32【春日言怀】

鲍溶

湛湛琴前酒，期自赏青春。胡为絳笑语，深念不思身。
寂寂花舞多，嚶嚶鸟言频。心悲兄弟远，愿见相似人。
江界田土卑，竞来东作勤。岁寒虚尽力，家外无强亲。
杳窅青云望，无途同苦辛。

· 全唐诗 ·

卷 486_33【题吴征君岩居】

鲍溶

尧泽润天下，许由心不知。真风存绵绵，常与达者期。
有道吾不仕，有生吾不欺。澹然灵府中，独见太古时。
地脉发醴泉，岩根生灵芝。天文若通会，星影应离离。
亭亭傅氏岩，何独万古思。

卷 486_34【云溪竹园翁】

鲍溶

礧礧云溪里，翠竹和云生。古泉积涧深，竦竦如刻成。
楚客卧云老，世间无姓名。因兹千亩业，以代双牛耕。
乱林不可留，寸茎不可轻。风暖斗出地，仰齐故年茎。
幽室结白茅，密叶罗众清。照水寒澹荡，对山绿峥嵘。
苍松含古貌，秋桂俨白英。相看受天风，深夜戛击声。

卷 486_35【窃览都官李郎中和李舍人益酬张舍人弘静，夏夜寓直，思闻雅琴见寄】

鲍溶

· 全唐诗 ·

朝草天子奏，夜语思忧琴。因声含香气，其韵流水音。
仙乐朱凤意，灵芝紫鸾心。翻然远求友，岂独双归林。
松吹暑中冷，星花池上深。倘俾有声乐，请以丝和金。

卷 486_36【长安言怀】

鲍溶

殷殷生念厚，戚戚劳者多。二时昼夜等，百岁讵几何。
日下文翰苑，侧身识经过。千虑恐一失，翔阳已蹉跎。
临觞翦众忧，静寄丝桐歌。思归绕十指，五声不相和。
暮天还巢翼，明日陨叶柯。高谢岩谷人，鹿衣带女萝。
生不去亲爱，浮名若风波。谁令不及此，亲爱隔山河。

卷 486_37【秋思三首】

鲍溶

胡风吹雁翼，远别无人乡。君近雁来处，几回断君肠。
昔奉千日书，抚心怨星霜。无书又千日，世路重茫茫。
燕国有佳丽，蛾眉富春光。自然君归晚，花落君空堂。
君其若不然，岁晚双鸳鸯。

顾兔蚀残月，幽光不如星。女儿晚事夫，颜色同秋萤。
秋日边马思，武夫不遑宁。燕歌易水怨，剑舞蛟龙腥。

· 全唐诗 ·

风折连枝树，水翻无蒂萍。立身多门户，何必燕山铭。
生世不如鸟，双双比翼翎。

季秋天地闲，万物生意足。我忧长于生，安得及草木。
试从古人愿，致酒歌秉烛。燕赵皆世人，讵能长似玉。
俯怜老期近，仰视日车速。萧飒御风君，魂梦愿相逐。
百年夜销半，端为重纓束。

卷 486_38【归雁】

鲍溶

南国春早暖，渚蒲正月生。东风吹雁心，上下和乐声。
绕水半空去，拂云偕相迎。如防失群怨，预有侵夜惊。
渺邈天外影，支离塞中莺。自顾摧颓羽，偏感南北情。
乍甘烟雾劳，不顾龙沙荣。虽乐未归意，终不能自鸣。
喜去春月满，归来秋风清。啼余碧窗梦，望断阴山行。
不及瑶台燕，寄身金宫楹。

卷 486_39【悲湘灵】

鲍溶

山上凉云收，日斜川风止。娥皇五十弦，秋深汉江水。
初因无象外，牵感百忧里。霜露结瑶华，烟波劳玉指。

· 全唐诗 ·

将随落叶去，又绕疏蘋起。哀响云合来，清馀桐半死。
女颜万岁后，岂复婵娟子。不道神无悲，那能久如此。
魂魄无不之，九山徒相似。没没竟不从，唯伤远人耳。
斑斑泪篁下，恐有学瑟鬼。

卷 486_40【闻蝉】

鲍溶

高蝉旦夕噪，景物浮凉气。木叶渐惊年，锦字因络纬。
稍断当窗梦，更凄临水意。清香笋蒂风，晓露莲花泪。
馀引未全歇，凝悲寻迥至。星井欲望河，月扇看藏笥。
谁念因声感，放歌写人事。

卷 486_41【怀幽期】

鲍溶

清砧击霜天外发，楚僧期到石上月。寒峰深虚独绕尽，
夜水浅急不可越。窅机冥智难思量，无尽性月如空王。
眼界行处不著我，天花下来惟有香，我今胡为寄他乡。

卷 486_42【思琴高】

· 全唐诗 ·

鲍溶

琴仙人，得仙去。万古钓龙空有处，我持曲钩思白鱼。
仙溪绿尽含空虚，天钧踪迹无遗馀。烧香寄影在岩树，
东礼海日鸡鸣初。

卷 486_43【得储道士书】

鲍溶

婵娟春尽暮心秋，邻里同年半白头。
为问蓬莱近消息，海波平静好东游。

卷 486_44【寒夜吟】

鲍溶

九衢金吾夜行行，上宫玉漏遥分明。霜飙乘阴扫地起，
旅鸿迷雪绕枕声。远人归梦既不成，留家惜夜欢心发。
罗幕画堂深皎洁，兰烟对酒客几人。兽火扬光二三月，
细腰楚姬丝竹间。白纻长袖歌闲闲，岂识苦寒损朱颜。

卷 486_45【采莲曲二首】

· 全唐诗 ·

鲍溶

弄舟謁来南塘水，荷叶映身摘莲子。暑衣清净鸳鸯喜，
作浪舞花惊不起。殷勤护惜纤纤指，水菱初熟多新刺。

采莲謁来水无风，莲潭如鉴松如龙。夏衫短袖交斜红，
艳歌笑斗新芙蓉，戏鱼往听莲叶东。

卷 486_46 【玉山谣奉送王隐者】

鲍溶

凤凰城南玉山高，石脚耸立争雄豪。攒峰胎玉气色润，
百泉透云流不尽。万古分明对眼开，五烟窈窕呈祥近。
有客师事金身仙，用金买得山中田。闲开玉水灌芝草，
静醉天酒松间眠。心期南溟万里外，出山几遇光阴改。
水玉丁东不可闻，冰华皎洁应如待。秋风引吾歌去来，
玉山彩翠遥相催。殷勤千树玉山顶，碧洞寥寥寒锦苔。

卷 486_47 【岐路】

鲍溶

北风送微寒，徒侣勤远征。忧人席不暖，残月马上明。
飘飘岐路间，长见日初生。重嶂晓色浅，疏猿寒啼清。

· 全唐诗 ·

人间多岐路，常恐终身行。回见四方人，车轮无留声。
空谷亦堪隐，下田非懒耕。古人有遗训，饱食非亲荣。
我生礼义乡，少小见太平。圣贤犹羁旅，况复非其名。

卷 486_48【陇头水】

鲍溶

陇头水，千古不堪闻。生归苏属国，死别李将军。
细响风凋草，清哀雁落云。

卷 486_49【沙上月】

鲍溶

黄昏潮落南沙明，月光涵沙秋雪清。
水文不上烟不荡，平平玉田冷空旷。

卷 486_50【赠李黯将军】

鲍溶

细柳连营石堑牢，平安狼火赤星高。岩云入角雕龙爽，
寒日摇旗画兽豪。搜伏雄儿欺魍魉，射声游骑怯分毫。

· 全唐诗 ·

圣人唯有河湟恨，寰海无虞在一劳。

卷 486_51 【人日陪宣州范中丞传正与范侍御宴】

鲍溶

人日春风绽早梅，谢家兄弟看花来。吴姬对客歌千曲，
秦女留人酒百杯。丝柳向空轻婉转，玉山看日渐裴回。
流光易去欢难得，莫厌频频上此台。

卷 486_52 【古鉴】

鲍溶

古鉴含灵气象和，蛟龙盘鼻护金波。隐山道士未曾识，
负局先生不敢磨。曾向春窗分绰约，误回秋水照蹉跎。
世间纵有应难比，十斛明珠酬未多。

卷 486_53 【送王炼师】

鲍溶

圣母祠堂药树香，邑君承命荐椒浆。风云大感精神地，
雷雨频过父母乡。尽日一川侵草绿，回车二麦绕山黄。

· 全唐诗 ·

野人久会神仙事，敢奏歌钟庆万箱。

卷 486_54【寄张十七校书李仁行秀才】

鲍溶

去年八月此佳辰，池上闲闲四五人。久行月影愁迷梦，
误入华光笑认春。一与清风上芸阁，再期秋雨过龙津。
今年此日何由见，蓬户萧条对病身。

卷 486_55【送王损之秀才赴举】

鲍溶

青门珮兰客，淮水誓风流。名在乡书贡，心期月殿游。
平沙大河急，细雨二陵秋。感此添离恨，年光不少留。

卷 486_56【旧镜】

鲍溶

团团铜镜似潭水，心爱玉颜私自亲。
一经离别少年改，难与清光相见新。

· 全唐诗 ·

卷 486_57【忆郊天】

鲍溶

忆向郊坛望武皇，九军旗帐下南方。六龙日驭天行健，
圣母呈图地道光。浓暖气中生历草，是非烟里爱瑶浆。
至今满耳箫韶曲，徒羡瑶池舞凤凰。

卷 486_58【期尽】

鲍溶

鱼锁生衣门不开，玉筐金月共尘埃。
青山石妇千年望，雷雨曾知来不来。

卷 486_59【晚山蝉】

鲍溶

山蝉秋晚妨人语，客子惊心马亦嘶。能阅几时新碧树，
不知何日寂金闺。若逢海月明千里，莫忘何郎寄一题。

卷 486_60【秋暮送裴垍员外刺婺州】

· 全唐诗 ·

鲍溶

婺女星边气不秋，金华山水似瀛州。
含香太守心清净，去与神仙日日游。

卷 486_61【寄薛膺昆季】

鲍溶

楚山清洛两无期，梦里春风玉树枝。
何况芙蓉楼上客，海门江月亦相思。

卷 486_62【杨真人箬中像】

鲍溶

画中留得清虚质，人世难逢白鹤身。
应见茅盈衰老弟，为持金箬救生人。

卷 486_63【寄卢给事汀吴员外丹】

鲍溶

姓丁黄鹤辽东去，客倩仙翁海上人。

· 全唐诗 ·

闻道姓名多改变，只今偕是圣朝臣。

卷 486_64 【怀王直秀才】

鲍溶

乡无竹圃为三径，贫寄邻家已二年。
惟有素风身未坠，世间开口不言钱。

卷 486_65 【赠真公影堂】

鲍溶

旧房西壁画支公，昨暮今晨色不同。
远客闲心无处所，独添香火望虚空。

卷 486_66 【赠僧戒休】

鲍溶

风行露宿不知贫，明月为心又是身。
欲问月中无我法，无人无我问何人。

· 全唐诗 ·

卷 486_67【秋夜怀紫阁峰僧】

鲍溶

满山雨色应难见，隔涧经声又不闻。
紫阁夜深多入定，石台谁为扫秋云。

卷 486_68【酬江公见寄】

鲍溶

曾答雁门偈，为怜同社人。多惭惠休句，偕得此阳春。

卷 486_69【送罗侍御归西台】

鲍溶

归台新柱史，辞府旧英髦。劝酒莲幕贵，望尘骢马高。
诗情分绣段，剑彩拂霜毫。此举关风化，谁云别恨劳。

卷 486_70【宿水亭】

鲍溶

· 全唐诗 ·

雕楹彩槛压通波，鱼鳞碧幕衔曲玉。
夜深星月伴芙蓉，如在广寒宫里宿。

卷 486_71【寄峨嵋山杨炼师】

鲍溶

道士夜诵蕊珠经，白鹤下绕香烟听。
夜移经尽人上鹤，仙风吹入秋冥冥。

卷 486_72【寄海陵韩长官】

鲍溶

吏散重门印不开，玉琴招鹤舞裴回。
野人为此多东望，云雨仍从海上来。

卷 486_73【淮南卧病感路群侍御访别】

鲍溶

西台御史重难言，落木疏篱绕病魂。
一望青云感骢马，款行黄草出柴门。

· 全唐诗 ·

卷 486_74 【题禅定寺集公竹院】

鲍溶

公门得休静，禅寺少逢迎。任客看花醉，随僧入竹行。
归时常犯夜，云里有经声。

卷 486_75 【风筝】

鲍溶

何响与天通，瑶筝挂望中。彩弦非触指，锦瑟忽闻风。
雁柱虚连势，鸾歌且坠空。夜和霜击磬，晴引凤归桐。
幽咽谁生怨，清冷自匪躬。秦姬收宝匣，搔首不成功。

· 全唐诗 ·

第四百八十七卷

卷 487_1【经旧游】

鲍溶

游鱼怀故池，倦鸟怀故窠。故山系归念，行坐青巍峨。
羸马经旧途，此乡喜重过。居人无故老，倍感别日多。
但见野中坟，累累如青螺。凉风日摇落，桑下松婆娑。
叹息追古人，临风伤逝波。古人无不死，叹息欲如何。
裼来遂远心，默默存天和。

卷 487_2【过薛舍人旧隐】

鲍溶

寝门来哭夜，此月小祥初。风意犹忆瑟，萤光乍近书。
墙蒿藏宿鸟，池月上钩鱼。徒引相思泪，涓涓东逝余。

卷 487_3【山居】

· 全唐诗 ·

鲍溶

窈窕垂涧萝，蒙茸黄葛花。鸳鸯怜碧水，照影舞金沙。

卷 487_4【暮秋与裴居晦宴因见采菊花之作】

鲍溶

菊花低色过重阳，似忆王孙白玉觞。
今日王孙好收采，高天已下两回霜。

卷 487_5【望麻姑山】

鲍溶

幽人往往怀麻姑，浮世悠悠仙景殊。
自从青鸟不堪使，更得蓬莱消息无。

卷 487_6【湖上望月】

鲍溶

湖上清凉月更好，天边旅人犹未归。
几见金波满还破，草虫声畔露沾衣。

· 全唐诗 ·

卷 487_7【襄阳怀古】

鲍溶

襄阳太守沈碑意，身后身前几年事。
湘江千岁未为陵，水底鱼龙应识字。

卷 487_8【秋夜对月寄僧特】

鲍溶

忆见特公赏秋处，凉溪看月清光寒。
今夕深溪又相映，特公何处共团圆。

卷 487_9【望江中金山寺】

鲍溶

一朵蓬莱在世间，梵王宫阙翠云间。
近南溪水更清浅，闻道游人未忍还。

卷 487_10【宿青牛谷梁炼师仙居】

· 全唐诗 ·

鲍溶

随云步入青牛谷，青牛道士留我宿。
可怜夜久月中行，惟有坛边一枝竹。

卷 487_11【得僧书】

鲍溶

身归紫霄岭，书下白云来。翦笋发寒字，烧花芳夜雷。
想随香驭至，不假定钟催。

卷 487_12【见袁德师侍御说江南有仙檀花，因以戏赠】

鲍溶

闻说天坛花耐凉，笑风含露对秋光。
欲求御史更分别，何似衣花岁岁香。

卷 487_13【和王璠侍御酬友人赠白角冠】

鲍溶

芙蓉寒艳镂冰姿，天朗灯深拔豸时。

· 全唐诗 ·

好见吹笙伊洛上，紫烟丹凤亦相随。

卷 487_14【送僧择栖游天台二首】

鲍溶

身非居士常多病，心爱空王稍觉闲。
师问寄禅何处所，浙东青翠沃洲山。

金岭雪晴僧独归，水文霞彩衲禅衣。
可怜石室烧香夜，江月对心无是非。

卷 487_15【上巳日寄樊瓘、樊宗宪，兼呈上浙东孟中丞简】

鲍溶

世间禊事风流处，镜里云山若画屏。
今日会稽王内史，好将宾客醉兰亭。

卷 487_16【暮春戏赠樊宗宪】

鲍溶

羌笛胡琴春调长，美人何处乐年芳。野船弄酒鸳鸯醉，

· 全唐诗 ·

官路攀花驤褭狂。应和朝云垂手语，肯嫌夜色断刀光。

卷 487_17【酬王侍御】

鲍溶

惭非青玉制，故以赠仙郎。希冀留书阁，提携在笔床。
讵能辉绣服，安得似芸香。所报何珍重，清明胜夜光。

卷 487_18【寄宋申锡评事时从李少师移军回归】

鲍溶

君逐元侯静虏归，虎旗龙节驻春晖。欲求岱岳燔柴礼，
已锡鲁人缝掖衣。长剑一时天外倚，五云多绕日边飞。
心期共贺太平世，去去故乡亲食薇。

卷 487_19【夏日怀杜棕驸马】

鲍溶

五月清凉萧史家，瑶池分水种菱花。回文地簟龙鳞浪，
交锁天窗蝉翼纱。闲遣青琴飞小雪，自看碧玉破甘瓜。
仍闻圣主知书癖，凤阁烧香对五车。

· 全唐诗 ·

卷 487_20【莺雏】

鲍溶

双莺衔野蝶，枝上教雏飞。避日花阴语，愁风竹里啼。
须防美人赏，为尔好毛衣。

卷 487_21【上阳宫月】

鲍溶

水北宫城夜柝严，宫西新月影纤纤。受环花幌小开镜，
移烛瑶房皆卷帘。学织机边娥影静，拜新衣上露华沾。
合裁班扇思行幸，愿托凉风篴箥嫌。

卷 487_22【淮南卧病闻李相夷简移军山阳，以靖东寇，感激之下，因抒长句】

鲍溶

太白星前龙虎符，元臣出将顺天诛。教闻清净萧丞相，
计立安危范大夫。玉帐黄昏大刁斗，月营寒晓小单于。
鲁连未必蹈沧海，应见麒麟新画图。

· 全唐诗 ·

卷 487_23 【读淮南李相行营至楚州诗】

鲍溶

阃外建牙威不宾，古来戡难忆忠臣。已分舟楫归元老，
更使熊罴属丈人。玄象合教沧海晏，青龙喜应太山春。
来年二月登封礼，去望台星扈日轮。

卷 487_24 【读李相心中乐】

鲍溶

负海狂鲸纵巨鳞，四朝天子阻时巡。谁将侯玉乖南面，
几使戎车殷左轮。久作妖星虚费日，终天洞亦何人。
果闻丞相心中乐，上赞陶唐一万春。

卷 487_25 【闻国家将行封禅聊抒臣情】

鲍溶

云雨由来随六龙，玉泥瑶检不乾封。山知樛杓新烟火，
臣望箫韶旧鼓钟。清跸间过素王庙，翠华高映大夫松。
旅中病客谙尧曲，身贱何由奏九重。

· 全唐诗 ·

卷 487_26 【和淮南李相公夷简喜平淄青回军之作】

鲍溶

横笛临吹发晓军，元戎幢节拂寒云。搜山羽骑乘风引，
下濑楼船背水分。天际兽旗摇火焰，日前鱼甲动金文。
马毛不汗东方靖，行见萧何第一勋。

卷 487_27 【秋暮八月十五夜与王璠侍御赏月，因怆远离，聊以奉寄】

鲍溶

前月月明夜，美人同远光。清尘一以间，今夕坐相忘。
风落芙蓉露，凝余绣服香。

卷 487_28 【送萧世秀才】

鲍溶

心交别我西京去，愁满春魂不易醒。
从此无人访穷病，马蹄车辙草青青。

· 全唐诗 ·

卷 487_29【怀惠明禅师】

鲍溶

秋天欲霜夜无风，我意不在天地中。雪山世界此凉夜，
宝月独照琉璃宫。解空长老莲花手，曾以佛书亲指授。
雪岭无人又问来，十年夏腊平安否。

卷 487_30【吴中夜别】

鲍溶

楚客秋思著黄叶，吴姬夜歌停碧云。
声尽灯前各流泪，水天凉冷雁离群。

卷 487_31【隋家井】

鲍溶

玉钩栏下寒泉水，金辘轳边影照人。
此水今为九泉路，数枝花照数堆尘。

卷 487_32【寄王璠侍御求蜀笺】

· 全唐诗 ·

鲍溶

蜀川笺纸彩云初，闻说王家最有馀。
野客思将池上学，石楠红叶不堪书。

卷 487_33【湘妃列女操】

鲍溶

有虞夫人哭虞后，淑女何事又伤离。竹上泪迹生不尽，
寄哀云和五十丝。云和终奏钧天曲，乍听宝琴遥嗣续。
三湘测测流急绿，秋夜露寒蜀帝飞。枫林月斜楚臣宿，
更疑川宫日黄昏。暗携女手殷勤言，环珮玲珑有无间。
终疑既远双悄悄，苍梧旧云岂难召，老猿心寒不可啸。
目眊眊兮意蹉跎，魂腾腾兮惊秋波。曲一尽兮忆再奏，
众弦不声且如何。

卷 487_34【羽林行】

鲍溶

朝出羽林宫，入参云台议。独请万里行，不奏和亲事。
君王重年少，深纳开边利。宝马雕玉鞍，一朝从万骑。
煌煌都门外，祖帐光七贵。歌钟乐行军，云物惨别地。
箫笳整部曲，幢盖动郊次。临风亲戚怀，满袖儿女泪。

· 全唐诗 ·

行行复何赠，长剑报恩字。

卷 487_35 【鸣雁行】

鲍溶

七月朔方雁心苦，联影翻空落南土。八月江南阴复晴，
浮云绕天难夜行。羽翼劳痛心虚惊，一声相呼百处鸣。
楚童夜宿烟波侧，沙上布罗连草色。月暗风悲欲下天，
不知何处容栖息。楚童胡为伤我神，尔不曾作远行人。
江南羽族本不少，宁得网罗此客鸟。

卷 487_36 【织妇词】

鲍溶

百日织彩丝，一朝停杼机。机中有双凤，化作天边衣。
使人马如风，诚不阻音徽。影响随羽翼，双双绕君飞。
行人岂愿行，不怨不知归。所怨天尽处，何人见光辉。

卷 487_37 【塞上行】

鲍溶

· 全唐诗 ·

西风应时筋角坚，承露牧马水草冷。
可怜黄河九曲尽，毡馆牢落胡无影。

卷 487_38【采珠行】

鲍溶

东方暮空海面平，骊龙弄珠烧月明。海人惊窥水底火，
百宝错落随龙行。浮心一夜生奸见，月质龙躯看几遍。
擘波下去忘此身，迢迢谓海无灵神。海宫正当龙睡重，
昨夜孤光今得弄。河伯空忧水府贫，天吴不敢相惊动。
一团冰容掌上清，四面人入光中行。腾华乍摇白日影，
铜镜万古羞为灵。海边老翁怨狂子，抱珠哭向无底水。
一富何须龙颌前，千金几葬鱼腹里。鳞虫变化为阴阳，
填海破山无景光。拊心仿佛失珠意，此土为尔离农桑。
饮风衣日亦饱暖，老翁掷却荆鸡卵。

卷 487_39【采葛行】

鲍溶

春溪几回葛花黄，黄麝引子山山香。蛮女不惜手足损，
钩刀一一牵柔长。葛丝茸茸春雪体，深涧择泉清处洗。
殷勤十指蚕吐丝，当窗袅袅声高机。织成一尺无一两，
供进天子五月衣。水精夏殿开凉户，冰山绕座犹难御。

· 全唐诗 ·

衣亲玉体又何如，杳然独对秋风曙。镜湖女儿嫁蛟人，
蛟绡逼肖也不分。吴中角簟泛清水，摇曳胜被三素云。
自兹贡荐无人惜，那敢更争龙手迹。蛮女将来海市头，
卖与岭南贫估客。

卷 487_40 【南塘二首】

鲍溶

南塘旅舍秋浅清，夜深绿蘋风不生。
莲花受露重如睡，斜月起动鸳鸯声。

塘东白日驻红雾，早鱼翻光落碧浚。
画舟兰棹欲破浪，恐畏惊动莲花心。

卷 487_41 【东邻女】

鲍溶

双飞鸂鶒春影斜，美人盘金衣上花。
身为父母几时客，一生知向何人家。

卷 487_42 【寄李都护】

· 全唐诗 ·

鲍溶

去年河上送行人，万里弓旌一武臣。
闻道玉关烽火灭，犬戎知有外家亲。

卷 487_43【长安旅舍怀旧山】

鲍溶

昨夜清凉梦本山，眠云唤鹤有惭颜。
青莲道士长堪羨，身外无名至老闲。

卷 487_44【汉宫词二首】

鲍溶

柏梁宸居清窈窕，东方先生夜待诏。
夜久月当承露盘，内人吹笙舞凤鸾。

月映东窗似玉轮，未央前殿绝声尘。
宫槐花落西风起，鹦鹉惊寒夜唤人。

卷 487_45【荐冰】

· 全唐诗 ·

鲍溶

西陆宜先启，春寒寝庙清。历官分气候，天子荐精诚。
已辨瑶池色，如和玉珮鸣。礼馀神转肃，曙后月残明。
雅合霜容洁，非同雪体轻。空怜一掬水，珍重此时情。

卷 487_46 【送薛补阙入朝】

鲍溶

平原门下十余人，独受恩多未杀身。每叹陆家兄弟少，
更怜杨氏子孙贫。柴门已断施行马，鲁酒那能醉近臣。
赖有军中遗令在，犹将谈笑对风尘。

卷 487_47 【句】

鲍溶

万里岐路多，一身天地窄。

· 全唐诗 ·

第四百八十八卷

卷 488_1 【荐冰】

卢钧

荐冰朝日后，辟庙晓光清。不改晶荧质，能彰雨露情。
且无霜共洁，岂与水均明。在捧摇寒色，当呈表素诚。
凝姿陈俎豆，浮彩映窗楹。皎皎盘盂侧，棱棱严气生。

卷 488_2 【荐冰】

范传质

乘春方启闭，羞献有常程。洁朗寒光彻，辉华素彩明。
色凝霜雪净，影照冕旒清。肃肃将崇礼，兢兢示捧盈。
方圆陈玉座，小大表精诚。朝觐当西陆，桃弧每共行。

卷 488_3 【赋得芙蓉出水】

贾谟

· 全唐诗 ·

的皪舒芳艳，红姿映绿蘋。摇风开细浪，出沼媚清晨。
翻影初迎日，流香暗袭人。独披千叶浅，不竞百花春。
鱼戏参差动，龟游次第新。涉江如可采，从此免迷津。

卷 488_4【恩赐魏文贞公诸孙旧第以导直臣】

陈彦博

阿衡随逝水，池馆主他人。天意能酬德，云孙喜庇身。
生前由直道，殁后振芳尘。雨露新恩日，芝兰旧里春。
勋庸留十代，光彩映诸邻。共贺升平日，从兹得谏臣。

卷 488_5【使南海道长沙，题道林岳麓寺】

唐扶

道林岳麓仲与昆，卓荦请从先后论。松根踏云二千步，
始见大屋开三门。泉清或戏蛟龙窟，殿豁数尽高帆掀。
即今异鸟声不断，闻道看花春更繁。从容一衲分若有，
萧瑟两鬓吾能髡。逢迎侯伯转觉贵，膜拜佛像心加尊。
稍揖皇英颡浓泪，试与屈贾招清魂。荒唐大树悉楠桂，
细碎枯草多兰荪。沙弥去学五印字，静女来悬千尺幡。
主人念我尘眼昏，半夜号令期至暾。迟回虽得上白舫，
羁泄不敢言绿尊。两祠物色采拾尽，壁间杜甫真少恩。
晚来光彩更腾射，笔锋正健如可吞。

· 全唐诗 ·

卷 488_6【和兵部郑侍郎省中四松诗】

唐扶

幽抱应无语，贞松遂自栽。寄怀丞相业，因擢大夫材。
日射苍鳞动，尘迎翠帚回。嫩茸含细粉，初叶泛新杯。
偶圣为舟去，逢时与鹤来。寒声连晓竹，静气结阴苔。
赫奕鸣驺至，荧煌洞户开。良辰一临眺，憩树几裴回。
恨发风期阻，诗从绮思裁。还闻旧凋契，凡在此中培。

卷 488_7【和兵部郑侍郎省中四松诗】

陶雍

右相历兵署，四松皆手栽。鬪时惊鹤去，移处带云来。
根倍双桐植，花分八桂开。生成造化力，长作栋梁材。
岂羡兰依省，犹嫌柏占台。出楼终百尺，入梦已三台。
幽韵和宫漏，余香度酒杯。拂冠枝上雪，染履影中苔。
高位相承地，新诗寡和才。何由比萝蔓，樊附在条枚。

卷 488_8【谭子池】

郭周藩

· 全唐诗 ·

澄水一百步，世名谭子池。余诘陵阳叟，此池当因谁。
父老谓余说，本郡谭叔皮。开元末年中，生子字阿宜。
坠地便能语，九岁多须眉。不饮亦不食，未尝言渴饥。
十五锐行走，快马不能追。二十入山林，一去无还期。
父母忆念深，乡闾为立祠。大历元年春，此儿忽来归。
头冠簪凤凰，身著霞裳衣。普遍拯疲俗，丁宁告亲知。
余为神仙官，下界不可祈。恐为妖魅假，不如早平夷。
此有黄金藏，镇在兹庙基。发掘散生聚，可以救贫羸。
金出继灵泉，湛若清琉璃。泓澄表符瑞，水旱无竭时。
言讫辞冲虚，杳霭上玄微。凡情留不得，攀望众号悲。
寻禀神仙诫，彻庙鬻开窥。果获无穷宝，均融沾因危。
巨源出岭顶，喷涌世间稀。异境流千古，终年福四维。

卷 488_9【金谷园花发怀古】

侯洌

金谷千年后，春花发满园。红芳徒笑日，秾艳尚迎轩。
雨湿轻光软，风摇碎影翻。犹疑施锦帐，堪叹罢朱纨。
愁态莺吟涩，啼容露缀繁。殷勤问前事，桃李竟无言。

卷 488_10【花发上林】

侯洌

· 全唐诗 ·

花发三阳盛，香飘五柞深。素晖云积苑，红彩绣张林。
落水随鱼戏，摇风映鸟吟。琼楼出高艳，玉辇驻浓阴。
乱蝶枝开影，繁蜂蕊上音。鲜芳盈禁籞，布泽荷天心。

卷 488_11【金谷园花发怀古】

王质

寂寥金谷涧，花发旧时园。人事空怀古，烟霞此独存。
管弦非上客，歌舞少王孙。繁蕊风惊散，轻红鸟乍翻。
山川终不改，桃李自无言。今日经尘路，凄凉讵可论。

卷 488_12【和太原张相公山亭怀古】

高铢

斗石类岩巘，飞流泻潺湲。远壑檐宇际，孤峦雉堞间。
何必到海岳，境幽机自闲。兹焉得高趣，高步谢东山。

· 全唐诗 ·

第四百八十九卷

卷 489_1 【八月五日中部官舍读唐历天宝已来追怆故事】

舒元興

将寻国朝事，静读柳芳历。八月日之五，开卷忽感激。
正当天宝末，抚事坐追惜。仰思圣明帝，贻祸在肘腋。
杨李盗吏权，贪残日狼藉。燕戎伺其便，百万奋长戟。
两河连烟尘，二京成瓦砾。生人死欲尽，戕业犹不息。
肃宗传宝图，寇难连年击。天地方开泰，铸鼎成继述。
万国哭龙袞，悲思动蛮貊。自此千秋节，不复动金石。
悲风扬霜天，总帷冷尘席。零落太平老，东西乱离客。
往往为余言，呜咽泪双滴。况当近塞地，哀吹起边笛。
抚几观陈文，使我心不悵。花萼笑繁华，温泉树容碧。
霓裳烟云尽，梨园风雨隔。露囊与金镜，东逝惊波溺。
昔闻欢娱事，今日成惨戚。神仙不可求，剑玺苔文积。
万古长恨端，萧萧泰陵陌。

卷 489_2 【坊州按狱】

舒元興

· 全唐诗 ·

中部接戎塞，顽山四周遭。风冷木长瘦，石磽人亦劳。
牧守苟怀仁，痒之时为搔。其爱如赤子，始得无啼号。
奈何贪狼心，润屋沉脂膏。攫搏如猛虎，吞噬若狂獒。
山秃逾高采，水穷益深捞。龟鱼既绝迹，鹿兔无遗毛。
氓苦税外缙，吏忧笑中刀。大君明四目，烛之洞秋毫。
眷兹一州命，虑齐坠波涛。临轩诏小臣，汝往穷贪饕。
分明举公法，为我缓穷骚。小臣诚小心，奉命如煎熬。
饮冰不待夕，驱马凌晨皋。及此督簿书，游词出狴牢。
门墙见狼狈，案牍闻腥臊。探情与之言，变态如奸獠。
真非既巧饰，伪意乃深韬。去恶犹农夫，稂莠须耘耨。
恢恢布疏网，罪者何由逃。自顾孱钝姿，利器非能操。
六旬始归奏，霜落秋原蒿。寄谢守土臣，努力清郡曹。
须知所甚卑，勿谓天之高。

卷 489_3【桥山怀古】

舒元興

轩辕厌代千万秋，渌波浩荡东南流。今来古往无不死，
独有天地长悠悠。我乘驿骑到中部，古闻此地为渠搜。
桥山突兀在其左，荒榛交锁寒风愁。神仙天下亦如此，
况我戚促同蜉游。谁言衣冠葬其下，不见弓剑何人收。
哀喧叫笑牧童戏，阴天月落狐狸游。却思皇坟立人极，
车轮马迹无不周。洞庭张乐降玄鹤，涿鹿大战摧蚩尤。
知勇神天不自大，风后力牧输长筹。襄城迷路问童子，
帝乡归去无人留。崆峒求道失遗迹，荆山铸鼎馀荒丘。

· 全唐诗 ·

君不见黄龙飞去山下路，断髯成草风飕飕。

卷 489_4 【坊州按狱，苏氏庄记室二贤自鄜州走马相访，留连数日，发后独坐寂寞，因成诗寄之】

舒元舆

十年一相见，世俗信多岐。云雨易分散，山川长间之。
我衔凤阙恩，按狱桥山陲。君在龙骧府，掌奏羽檄词。
相去百馀里，魂梦自相驰。形容在胸臆，书札通相思。
烦君爱我深，轻车忽载脂。塞门秋色老，霜气方凝姿。
此地少平川，冈阜相参差。谁知路非远，行者多云疲。
君能犯劲风，信宿凌欹危。情亲不自倦，下马开双眉。
相对坐沉吟，屈指惊岁时。万事且莫问，一杯欣共持。
阳乌忽西倾，明蟾挂高枝。卷帘引瑶玉，灭烛临霜墀。
中庭有疏芦，淅淅闻风吹。长河卷云色，凝碧无瑕疵。
一言开我怀，旷然澹希夷。悠悠夜方永，冷思偏相宜。
眉睫无他人，与君闲解题。陶然叩寂寞，再请吟清诗。
得意且忘言，何况竹与丝。顷刻过三夕，起坐轻四肢。
明朝告行去，惨然还别离。出门送君去，君马扬金羁。
回来坐空堂，寂寞无人知。重重碧云合，何处寻佳期。

卷 489_5 【履春冰】

舒元舆

· 全唐诗 ·

投迹清冰上，凝光动早春。兢兢愁陷履，步步怯移身。
鸟照微生水，狐听或过人。细迁形外影，轻蹑镜中轮。
咫尺忧偏远，危疑惧已频。愿坚容足分，莫使独惊神。

卷 489_6【赠李翱】

舒元舆

湘江舞罢忽成悲，便脱蛮靴出绛帷。
谁是蔡邕琴酒客，魏公怀旧嫁文姬。

· 全唐诗 ·

第四百九十卷

卷 490_1 【登长安慈恩寺塔】

卢宗回

东方晓日上翔鸾，西转苍龙拂露盘。渭水寒光摇藻井，
玉峰晴色上朱阑。九重宫阙参差见，百二山河表里观。
暂辍去蓬悲不定，一凭金界望长安。

卷 490_2 【古镜歌】

周匡物

轩辕铸镜谁将去，曾被良工泻金取。明月中心桂不生，
轻冰面上菱初吐。蛟龙久无雷雨声，鸾凤空踏莓苔舞。
欲向高台对晓开，不知谁是孤光主。

卷 490_3 【及第谣】

周匡物

· 全唐诗 ·

水国寒消春日长，燕莺催促花枝忙。风吹金榜落凡世，
三十三人名字香。遥望龙墀新得意，九天敕下多狂醉。
骅骝一百三十蹄，踏破蓬莱五云地。物经千载出尘埃，
从此便为天下瑞。

卷 490_4【及第后谢座主】

周匡物

一从东越入西秦，十度闻莺不见春。试向昆山投瓦砾，
便容灵沼濯埃尘。悲欢暗负风云力，感激潜生草木身。
中夜自将形影语，古来吞炭是何人。

卷 490_5【自题读书堂】

周匡物

窗外卷帘侵碧落，槛前敲竹响青冥。
黄昏不欲留人宿，云起风生龙虎醒。

卷 490_6【应举题钱塘公馆】

周匡物

· 全唐诗 ·

万里茫茫天堑遥，秦皇底事不安桥。
钱塘江口无钱过，又阻西陵两信潮。

卷 490_7【题旅棹】

廖有方

嗟君没世委空囊，几度劳心翰墨场。
半面为君申一恸，不知何处是家乡。

卷 490_8【立春日呈宫傅侍郎】

皇甫曙

朝旦微风吹晓霞，散为和气满家家。不知容貌潜消落，
且喜春光动物华。出问池冰犹塞岸，归寻园柳未生芽。
摩娑酒瓮重封闭，待入新年共赏花。

卷 490_9【赋得玉声如乐】

潘存实

表质自坚贞，因人一扣鸣。静将金并响，妙与乐同声。
杳杳疑风送，泠泠似曲成。韵含湘瑟切，音带舜弦清。

· 全唐诗 ·

不独藏虹气，犹能畅物情。后夔如为听，从此振琮琤。

卷 490_10【送林刺史简言之漳州】

陈去疾

江树欲含曛，清歌一送君。征骖辞荔浦，别袂暗松云。
路狭横柯度，山深坠叶闻。明朝宿何处，未忍醉中分。

卷 490_11【忆山中】

陈去疾

长吟重悵然，为忆山中年。清瑟泛遥夜，乱花随暮烟。
珠林馀露气，乳窦滴香泉。迹远尘埃外，花开绮藻前。
岩罗云貌逸，竹抱水容妍。蕙磴飞英绕，萍潭片影悬。
林藏诸曲胜，台擅一峰偏。会可标真寄，焚香对石筵。

卷 490_12【元夕京城和欧阳衮】

陈去疾

兰焰芳芬彻晓开，珠光新霭映人来。歌迎甲夜催银管，
影动繁星缀玉台。别有朱门春澹荡，不妨芝火翠崔嵬。

· 全唐诗 ·

此时月色同沾醉，何处游轮陌上回。

卷 490_13【送韩将军之雁门】

陈去疾

荒塞峰烟百道驰，雁门风色暗旌旗。破围铁骑长驱疾，
饮血将军转战危。画角吹开边月静，纓纓不信虏尘窥。
归来长揖功成后，黄石当年故有期。

卷 490_14【赋得骐驎长鸣】

陈去疾

骐驎忻知己，嘶鸣忽异常。积悲摠怨抑，一举彻穹苍。
迹类三年鸟，心驰五达庄。何言从蹇蹶，今日逐腾骧。
牛皂休维繫，天衢恣陆梁。向非逢伯乐，谁足见其长。

卷 490_15【偶题】

陈去疾

魂梦天南垂，宿昔万里道。池台花气深，到处生春草。

· 全唐诗 ·

卷 490_16 【春宫曲】

陈去疾

流莺春晓唤樱桃，花外传呼殿影高。
抱里琵琶最承宠，君王敕赐玉檀槽。

卷 490_17 【采莲曲】

陈去疾

粉光花色叶中开，荷气衣香水上来。
棹响清潭见斜领，双鸳何事亦相猜。

卷 490_18 【踏歌行】

陈去疾

鸳鸯楼下万花新，翡翠宫前百戏陈。
夭矫翔龙衔火树，飞来瑞凤散芳春。

仙跸初传紫禁香，瑞云开处夜花芳。
繁弦促管升平调，绮缀丹莲借月光。

· 全唐诗 ·

卷 490_19 【塞下曲】

陈去疾

春至金河雪似花，萧条玉塞但胡沙。
晓来重上关城望，惟见惊尘不见家。

卷 490_20 【送人谪幽州】

陈去疾

临路深怀放废惭，梦中犹自忆江南。
莫言塞北春风少，还胜炎荒入瘴岚。

卷 490_21 【西上辞母坟】

陈去疾

高盖山头日影微，黄昏独立宿禽稀。
林间滴酒空垂泪，不见丁宁嘱早归。

· 全唐诗 ·

第四百九十一卷

卷 491_1 【履春冰】

张萧远

一步一步愁新，轻轻恐陷人。薄光全透日，残影半销春。
蝉想行时翼，鱼惊蹋处鳞。底虚难驻足，岸阔怯回身。
岂暇踟蹰久，宁辞顾盼频。愿将兢慎意，从此赴通津。

卷 491_2 【观灯】

张萧远

十万人家火烛光，门门开处见红妆。歌钟喧夜更漏暗，
罗绮满街尘土香。星宿别从天畔出，莲花不向水中芳。
宝钗骤马多遗落，依旧明朝在路傍。

卷 491_3 【送宫人入道】

张萧远

· 全唐诗 ·

舍宠求仙畏色衰，辞天素面立阶墀。金丹拟驻千年貌，
玉指休匀八字眉。师主与收珠翠后，君王看戴角冠时。
从来宫女皆相妒，闻向瑶台尽泪垂。

卷 491_4 【句】

张萧远

秦云寂寂僧还定，尽日无人鹿绕床。

日暮风吹官渡柳，白鸦飞出石头墙。

双双白燕入祠堂。

卷 491_5 【见志】

李播

去岁买琴不与价，今年沽酒未还钱。
门前债主雁行立，屋里醉人鱼贯眠。

卷 491_6 【鱼上冰】

王季则

· 全唐诗 ·

北陆收寒尽，东风解冻初。冰消通浅溜，气变跃潜鱼。
应节似知化，扬髻任所如。浮沉非乐藻，沿溯异传书。
结网时空久，临川意有馀。为龙将可望，今日愧才虚。

卷 491_7【鱼上冰】

纪元皋

春生寒气灭，稍动伏泉鱼。乍喜东风至，来观曲浦初。
近冰朱鬣见，望日锦鳞舒。渐觉流澌退，还忻掉尾馀。
噉喙情自乐，沿溯意宁疏。倘得随鲲化，终能戾太虚。

卷 491_8【鱼上冰】

吴晃

春水潜鳞发，寒潭旧藻疏。扬髻顺气后，振鬣上冰初。
戏广怜空洁，浮清媚景虚。戒贪还避饵，思达每怀书。
湿映流澌薄，狂游触浪馀。终希泮涣泽，为化北溟鱼。

卷 491_9【赠柳氏妓】

郑还古

· 全唐诗 ·

冶艳出神仙，歌声胜管弦。词轻白纻曲，歌遏碧云天。
未拟生裴秀，如何乞郑玄。不堪金谷水，横过坠楼前。

卷 491_10【吉州道中】

郑还古

吉州新置掾，驰驿到条山。薏苡殊非谤，羊肠未是艰。
自惭多白发，争敢竞朱颜。若有前生债，今朝不懊还。

卷 491_11【望思台】

郑还古

谗语能令骨肉离，奸情难测事堪悲。
何因掘得江充骨，捣作微尘祭望思。

卷 491_12【日南长至】

独孤铉

玉历颁新律，凝阴发一阳。轮辉犹惜短，圭影此偏长。
晷度经南斗，流晶尽北堂。乍疑周户耀，可爱逗林光。
积雪销微照，初萌动早芒。更升台上望，云物已昭彰。

· 全唐诗 ·

卷 491_13【延平天庆观】

王初

剑化江边绿构新，层台不染玉梯尘。千章隐篆标龙简，
一曲空歌降凤钧。岚气湿衣云叶晚，天香飘户月枝春。
盟经早晚闻仙语，学种三芝伴羽人。

卷 491_14【送叶秀才】

王初

快骑璁珑刻玉羁，河梁返照上征衣。层冰春近蟠龙起，
九泽云闲独鹤飞。行想北山清梦断，重游西洛故人稀。
汉庭狗监深知己，有日前驱负弩归。

卷 491_15【送王秀才谒池州吴都督】

王初

池阳去去跃雕鞍，十里长亭百草干。衣袂障风金缕细，
剑光横雪玉龙寒。晴郊别岸乡魂断，晓树啼乌客梦残。
南馆星郎东道主，摇鞭休问路行难。

· 全唐诗 ·

卷 491_16 【青帝】

王初

青帝邀春隔岁还，月娥孀独夜漫漫。韩凭舞羽身犹在，
素女商弦调未残。终古兰岩栖偶鹤，从来玉谷有离鸾。
几时幽恨飘然断，共待天池一水干。

卷 491_17 【银河】

王初

阊阖疏云漏绛津，桥头秋夜鹊飞频。犹残仙媛湔裙水，
几见星妃度袜尘。历历素榆飘玉叶，涓涓清月湿冰轮。
年来若有乘槎客，为吊波灵是楚臣。

卷 491_18 【书秋】

王初

千里南云度塞鸿，秋容无迹淡平空。人间玉岭清宵月，
天上银河白昼风。潘赋登山魂易断，楚歌遗佩怨何穷。
往来未若奇张翰，欲鲙霜鲸碧海东。

· 全唐诗 ·

卷 491_19【自和书秋】

王初

陇首斜飞避弋鸿，颓云萧索见层空。汉宫夜结双茎露，
阊阖凉生六幕风。湘女怨弦愁不禁，鄂君香被梦难穷。
江边两桨连歌渡，惊散游鱼莲叶东。

卷 491_20【立春后作】

王初

东君珂佩响珊珊，青驭多时下九关。
方信玉霄千万里，春风犹未到人间。

卷 491_21【梅花二首】

王初

应为阳春信未传，固将青艳属残年。
东君欲待寻佳约，剩寄衣香与粉绵。

迎春雪艳飘零极，度夕蟾华掩映多。
欲托清香传远信，一枝无计奈愁何。

· 全唐诗 ·

卷 491_22【春日咏梅花二首】

王初

靓妆才罢粉痕新，递晓风回散玉尘。
若遣有情应怅望，已兼残雪又兼春。

青帝来时值远芳，残花残雪尚交光。
隔年拟待春消息，得见春风已断肠。

卷 491_23【即夕】

王初

榆叶飘零碧汉流，玉蟾珠露两清秋。
仙家若有单栖恨，莫向银台半夜游。

卷 491_24【送陈校勘入宿】

王初

日落风回卷碧霓，芳蓬一夜拆龙泥。
银台级级连清汉，桂子香浓月杵低。

· 全唐诗 ·

卷 491_25 【即夕】

王初

风幌凉生白袷衣，星榆才乱绛河低。
月明休近相思树，恐有韩凭一处栖。

卷 491_26 【早春咏雪】

王初

句芒宫树已先开，珠蕊琼花斗剪裁。
散作上林今夜雪，送教春色一时来。

卷 491_27 【望雪】

王初

银花珠树晓来看，宿醉初醒一倍寒。
已似王恭披鹤氅，凭栏仍是玉栏干。

卷 491_28 【雪霁】

· 全唐诗 ·

王初

星榆叶叶昼离披，云粉千重凝不飞。
昆玉楼台珠树密，夜来谁向月中归。

卷 491_29【舟次汴堤】

王初

曲岸兰丛雁飞起，野客维舟碧烟里。
竿头五两转天风，白日杨花满流水。

卷 491_30【玉声如乐】

刘轲

玉叩能旋止，人言与乐并。繁音忽已阕，雅韵诎然清。
佩想停仙步，泉疑咽夜声。曲终无异听，响极有馀情。
特达知难拟，玲珑岂易名。昆山如可得，一片伫为荣。

卷 491_31【喜陈懿老示新制】

朱昼

· 全唐诗 ·

一别一千日，一日十二忆。苦心无闲时，今夕见玉色。
玉色复何异，弘明含群德。有文如星宿，飞入我胸臆。
忧愁方破坏，欢喜重补塞。使我心貌全，且非黄金力。
将攀下风手，愿假仙鸾翼。

卷 491_32【赠友人古镜】

朱昼

我有古时镜，初自坏陵得。蛟龙犹泥蟠，魑魅幸月蚀。
摩久见菱蕊，青于蓝水色。赠君将照色，无使心受惑。

卷 491_33【赋得花藤药合寄颖阴故人】

朱昼

藤生南海滨，引蔓青且长。剪削为花枝，何人无文章。
非才亦有心，割骨闻馀芳。繁叶落何处，孤贞在中央。
愿盛黄金膏，寄与青眼郎。路远莫知意，水深天苍苍。

卷 491_34【春色满皇州】

滕迈

· 全唐诗 ·

蔼蔼复悠悠，春归十二楼。最明云里阙，先满日边州。
色媚青门外，光摇紫陌头。上林荣旧树，太液镜新流。
暖带祥烟起，清添瑞景浮。阳和如启蛰，从此事芳游。

卷 491_35【杨柳枝词】

滕迈

三条陌上拂金羁，万里桥边映酒旗。
此日令人肠欲断，不堪将入笛中吹。

卷 491_36【句】

滕迈

陶令门前^{三四}接^离，亚夫营里拂朱旗。

卷 491_37【留别吉州太守宗人迈】

滕倪

秋初江上别旌旗，故国无家泪欲垂。千里未知投足处，
前程便是听猿时。误攻文字身空老，却返渔樵计已迟。
羽翼凋零飞不得，丹青无路接差池。

· 全唐诗 ·

卷 491_38【句】

滕倪

映水有深意，见人无惧心。

白发不能容相国，也同闲客满头生。

· 全唐诗 ·

第四百九十二卷

卷 492_1 【吴宫】

殷尧藩

吴王爱歌舞，夜夜醉婵娟。见日吹红烛，和尘扫翠钿。
徒令勾践霸，不信子胥贤。莫问长洲草，荒凉无限年。

卷 492_2 【久雨】

殷尧藩

云影蔽遥空，无端淡复浓。两旬绵密雨，二月似深冬。
诗酒从教数，帘帟一任重。孰知春有地，微露小桃红。

卷 492_3 【郊行逢社日】

殷尧藩

酒熟送迎便，村村庆有年。妻孥亲稼穡，老稚效渔畋。

· 全唐诗 ·

红树青林外，黄芦白鸟边。稔看风景美，宁不羨归田。

卷 492_4【过友人幽居】

殷尧藩

身坐众香国，蒲团诗思新。一贫曾累我，此兴未输人。
陋巷谁为俗，寒窗不染尘。石斋盟四友，年下顿生春。

卷 492_5【过雍陶博士邸中饮】

殷尧藩

落叶下萧萧，幽居远市朝。偶成投辖饮，不待致书招。
塞雁冲寒过，山云傍槛飘。此身何所似，天地一渔樵。

卷 492_6【游王羽士山房】

殷尧藩

落日半楼明，琳宫事事清。山横万古色，鹤带九皋声。
易作神仙侣，难忘父子情。道人应识我，未肯说长生。

· 全唐诗 ·

卷 492_7【署中答武功姚合】

殷尧藩

原中多阴雨，惟留一室明。自宜居静者，谁得问先生。
深井泉香出，危沙药更荣。全家笑无辱，曾不见戈兵。

卷 492_8【赠龙阳尉马戴】

殷尧藩

早学全身术，惟令耕近田。自输官税后，常卧晚云边。
细草沿阶长，高萝出石悬。向来名姓茂，空被外情牵。

卷 492_9【上巳日赠都上人】

殷尧藩

三月初三日，千家与万家。蝶飞秦地草，莺入汉宫花。
鞍马皆争丽，笙歌尽斗奢。吾师无所愿，惟愿老烟霞。

曲水公卿宴，香尘尽满街。无心修禊事，独步到禅斋。
细草萦愁目，繁花逆旅怀。绮罗人走马，遗落凤凰钗。

· 全唐诗 ·

卷 492_10 【送沈亚之尉南康】

殷尧藩

行迈南康路，客心离怨多。暮烟葵叶屋，秋月竹枝歌。
孤鹤唳残梦，惊猿啸薜萝。对江翘首望，愁泪叠如波。

卷 492_11 【奉送刘使君王屋山隐居】

殷尧藩

散发风檐下，沈沈日渐曛。鹰拳擒野雀，蛛网猎飞蚊。
群动能归计，吾生亦谩勤。尘缘难著眼，晚兴寄青云。

卷 492_12 【寄许浑秀才】

殷尧藩

文字饥难煮，为农策最良。兴来鉏晓月，倦后卧斜阳。
秋稼连千顷，春花醉几场。任他名利客，车马闹康庄。

卷 492_13 【送客游吴】

· 全唐诗 ·

殷尧藩

吴国水中央，波涛白渺茫。衣逢梅雨渍，船入稻花香。
海戍通盐灶，山村带蜜房。欲知苏小小，君试到钱塘。

卷 492_14【陆丞相故宅】

殷尧藩

衣冠零落久，今日事堪伤。厨起青烟薄，门开白日长。
残梅欹古道，名石卧颓墙。山色依然好，兴衰未可量。

卷 492_15【中元日观诸道士步虚】

殷尧藩

玄都开秘箓，白石礼先生。上界秋光净，中元夜气清。
星辰朝帝处，鸾鹤步虚声。玉洞花长发，珠宫月最明。
扫坛天地肃，投简鬼神惊。倘赐刀圭药，还留不死名。

卷 492_16【醉赠刘十二】

殷尧藩

· 全唐诗 ·

春草正凄凄，知君过恶溪。莺将吉了语，猿共猓然啼。
别路魂先断，还家梦几迷。定寻雷令剑，应识越王笄。
树色多于北，潮声少向西。椰花好为酒，谁伴醉如泥。

卷 492_17【早朝】

殷尧藩

曙钟催入紫宸朝，列炬流虹映绛绡。天近鳌头花簇仗，
风低豹尾乐鸣韶。衣冠一变无夷俗，律令重颁有正条。
昨日钟山甘露降，玻璃满赐出宫瓢。

卷 492_18【帝京二首】

殷尧藩

列郡征才起俊髦，万机独使圣躬劳。开藩上相颁龙节，
破虏将军展豹韬。地入黄图三辅壮，天垂华盖七星高。
迎春别赐瑶池宴，捧进金盘五色桃。

龙虎山河御气通，遥瞻帝阙五云红。英雄尽入江东籍，
将相多收蓟北功。礼乐日稽三代盛，梯航岁贡万方同。
都将俭德熙文治，淳俗应还太古风。

· 全唐诗 ·

卷 492_19 【宫词】

殷尧藩

悄悄深宫不见人，倚阑惟见石麒麟。芙蓉帐冷愁长夜，
翡翠帘垂隔小春。天远难通青鸟信，风寒欲动锦花茵。
夜深怕有羊车过，自起笼灯看雪纹。

卷 492_20 【郊居作】

殷尧藩

碧树浓阴护短垣，苍江春暖渚凫喧。买鱼试唤鸣榔艇，
寻鹤因行隔垄村。生理何凭文是业，世情纵遣酒盈樽。
相逢谓我迂疏甚，欲辨还憎恐失言。

卷 492_21 【闲居】

殷尧藩

茂苑闲居木石同，旋开小径翦蒿蓬。虚游心在鸿濛外，
穴处身疑培塿中。花影一阑吟夜月，松声半榻卧秋风。
百年寄傲聊容膝，何必高车驷马通。

· 全唐诗 ·

卷 492_22 【暮春述怀】

殷尧藩

为客山南二十年，愁来怆近落花天。阴云带雨连山脊，
湿气成岚滴树巅。邻屋有声敲石火，野禽无语避茶烟。
此时若遇孙阳顾，肯服盐车不受鞭。

卷 492_23 【端午日】

殷尧藩

少年佳节倍多情，老去谁知感慨生。不效艾符趋习俗，
但祈蒲酒话升平。鬓丝日日添头白，榴锦年年照眼明。
千载贤愚同瞬息，几人湮没几垂名。

卷 492_24 【九日】

殷尧藩

万里飘零十二秋，不堪今倚夕阳楼。壮怀空掷班超笔，
久客谁怜季子裘。瘴雨蛮烟朝暮景，平芜野草古今愁。
酣歌欲尽登高兴，强把黄花插满头。

· 全唐诗 ·

卷 492_25 【九日病起】

殷尧藩

重阳开满菊花金，病起支床惜赏心。紫蟹霜肥秋纵好，
绿醅蚁滑晚慵斟。眼窥薄雾行殊倦，身怯寒风坐未禁。
沈醉又成来岁约，遣怀聊作记时吟。

卷 492_26 【寒夜】

殷尧藩

云冷江空岁暮时，竹阴梅影月参差。鸡催梦枕司晨早，
更咽寒城报点迟。人事纷华潜动息，天心静默运推移。
凭谁荡涤穷残候，入眼东风喜在期。

卷 492_27 【喜雨】

殷尧藩

临岐终日自裴回，干我茅斋半亩苔。山上乱云随手变，
浙东飞雨过江来。一元和气归中正，百怪苍渊起蛰雷。
千里稻花应秀色，酒樽风月醉亭台。

· 全唐诗 ·

卷 492_28【春游】

殷尧藩

明日城东看杏花，叮咛童子蚤将车。路从丹凤楼前过，
酒向金鱼馆里赊。绿水满沟生杜若，暖云将雨湿泥沙。
绝胜羊傅襄阳道，车骑西风拥鼓笳。

卷 492_29【夜酌溪楼】

殷尧藩

楼居溪上凉生早，坐对城头起暮笳。打鼓泊船何处客，
搗衣隔竹是谁家。玉绳低转宵初迥，银烛高烧月近斜。
得意引杯须痛饮，好怀那许负年华。

卷 492_30【旅行】

殷尧藩

烟树寒林半有无，野人行李更萧疏。堠长堠短逢官马，
山北山南闻鹧鸪。万里关河成传舍，五更风雨忆呼卢。
寂寥一点寒灯在，酒熟邻家许夜沽。

· 全唐诗 ·

卷 492_31 【下第东归作】

殷尧藩

十载驱驰倦荷锄，三年生计鬓萧疏。辛勤几逐英雄后，
乙榜犹然姓氏虚。欲射狼星把弓箭，休将萤火读诗书。
身贱自惭贫骨相，朗啸东归学钓鱼。

卷 492_32 【还京口】

殷尧藩

黄鹤山头雪未消，行人归计在今朝。城高铁瓮江山壮，
地接金陵草木凋。北府市楼闻旧酒，南桥官柳识归桡。
吏民莫见参军面，水宿风餐鬓发焦。

卷 492_33 【襄口阻风】

殷尧藩

雪浪排空接海门，孤舟三日阻龙津。曹瞒曾堕周郎计，
王导难遮庾亮尘。鸥散白云沈远浦，花飞红雨送残春。
篙师整缆候明发，仍谒荒祠问鬼神。

· 全唐诗 ·

卷 492_34 【潭州独步】

殷尧藩

鹤发垂肩懒著巾，晚凉独步楚江滨。一帆暝色鸥边雨，
数尺筇枝物外身。习巧未逢医拙手，闻歌先识采莲人。
笑看斥鷃飞翔去，乐处蓬莱便有春。

卷 492_35 【金陵怀古】

殷尧藩

黄道天清拥珮珂，东南王气秣陵多。江吞彭蠡来三蜀，
地接昆仑带九河。凤阙晓霞红散绮，龙池春水绿生波。
华夷混一归真主，端拱无为乐太和。

卷 492_36 【登凤凰台二首】

殷尧藩

凤凰台上望长安，五色宫袍照水寒。彩笔十年留翰墨，
银河一夜卧阑干。三山飞鸟江天暮，六代离宫草树残。
始信人生如一梦，壮怀莫使酒杯干。

· 全唐诗 ·

梧桐叶落秋风老，人去台空凤不来。梁武台城芳草合，
吴王宫殿野花开。石头城下春生水，燕子堂前雨长苔。
莫问人间兴废事，百年相遇且衔杯。

卷 492_37【韩信庙】

殷尧藩

长空鸟尽将军死，无复中原入马蹄。身向九泉还属汉，
功超诸将合封齐。荒凉古庙惟松柏，咫尺长陵又鹿麋。
此日深怜萧相国，竟无一语到金闺。

卷 492_38【访许浑】

殷尧藩

去郭来寻隐者居，柳阴假步小篮舆。每期会面初偿约，
却计论心旧得书。浅绿垣墙绵薜荔，淡红池沼映芙渠。
为言肯共留连饮，涧有青芹罟有鱼。

卷 492_39【李舍人席上感遇】

殷尧藩

· 全唐诗 ·

微云敛雨天气清，松声出树秋泠泠。窗户长含碧萝色，
溪流时带蛟龙腥。一官到手不可避，万事役我徒劳形。
飘然曳杖出门去，无数好山江上横。

卷 492_40【和赵相公登鹳雀楼】

殷尧藩

危楼高架沕寥天，上相闲登立彩旃。树色到京三百里，
河流归汉几千年。晴峰耸日当周道，秋谷垂花满舜田。
云路何人见高志，最看西面赤阑前。

卷 492_41【冬至酬刘使君】

殷尧藩

异乡冬至又今朝，回首家山入梦遥。渐喜一阳从地复，
却怜群沴逐冰消。梅含露蕊知迎腊，柳拂宫袍忆候朝。
多少故人承宴赏，五云堆里听箫韶。

卷 492_42【李节度平虏诗】

殷尧藩

· 全唐诗 ·

百万王师下日边，将军雄略可图全。元勋未论封茅异，
捷势应知破竹然。燕警无烽清朔漠，秦文有宝进蓝田。
太平从此销兵甲，记取红羊换劫年。

卷 492_43【金陵上李公垂侍郎】

殷尧藩

海国微茫散晓暝，郁葱佳气满乾坤。六朝空据长江险，
一统今归圣代尊。西北诸峰连朔漠，东南众水合昆仑。
愿从吾道禧文运，再使河清俗化淳。

卷 492_44【赠惟俨师】

殷尧藩

焕然文采照青春，一策江湖自在身。云锁木龕聊息影，
雪香纸袄不生尘。谈禅早续灯无尽，护法重编论有神。
拟扫绿阴浮佛寺，桺椳高树结为邻。

卷 492_45【寄许浑秀才】

殷尧藩

· 全唐诗 ·

万木惊秋叶渐稀，静探造化见玄机。眼前谁悟先天理，
去后还知今日非。树拥秣陵千嶂合，云开萧寺一僧归。
汉廷累下征贤诏，未许严陵老钓矶。

卷 492_46【送白舍人渡江】

殷尧藩

晓发龙江第一程，诸公同济似登瀛。海门日上千峰出，
桃叶波平一棹轻。横锁已沈王濬筏，投鞭难阻谢玄兵。
片时喜得东风便，回首钟声隔凤城。

卷 492_47【送刘禹锡侍御出刺连州】

殷尧藩

遐荒迢递五羊城，归兴浓消客里情。家近似忘山路险，
土甘殊觉瘴烟轻。梅花清入罗浮梦，荔子红分广海程。
此去定知偿隐趣，石田春雨读书耕。

卷 492_48【送韦侍御报使西蕃】

殷尧藩

· 全唐诗 ·

归奏圣朝行万里，却衔天诏报蕃臣。本是诸生守文墨，
今将匹马静烟尘。旅宿关河逢暮雨，春耕亭障识遗民。
此去多应收故地，宁辞沙塞往来频。

卷 492_49【寒食城南即事因访蓝田韦明府】

殷尧藩

闲出城南禁火天，路傍骑马独摇鞭。青松古墓伤碑碣，
红杏春园羡管弦。徒说鹓鸪膏玉剑，漫夸蚨血点铜钱。
世间尽是悠悠事，且饮韦家冷酒眠。

卷 492_50【送源中丞使新罗】

殷尧藩

赤墀奉命使殊方，官重霜台紫绶光。玉节在船清海怪，
金函开诏抚夷王。云晴渐觉山川异，风便宁知道路长。
谁得似君将雨露，海东万里洒扶桑。

卷 492_51【送景玄上人还山】

殷尧藩

· 全唐诗 ·

嵩阳听罢讲经钟，远访庭闱锡度空。蒲履谩从归后织，
衲衣犹记别时缝。地横龙朔连沙暝，山入乌桓碧树重。
梵宇传来金贝叶，花前拜捧慰亲容。

卷 492_52 【宫人入道】

殷尧藩

卸却宫妆锦绣衣，黄冠素服制相宜。锡名近奉君王旨，
佩箓新参老氏师。白昼无情趋玉陛，清宵有梦步瑶池。
绿鬟女伴含愁别，释尽当年妒宠私。

卷 492_53 【友人山中梅花】

殷尧藩

南国看花动远情，沈郎诗苦瘦容生。铁心自儗山中赋，
玉笛谁将月下横。临水一枝春占早，照人千树雪同清。
好风吹醒罗浮梦，莫听空林翠羽声。

卷 492_54 【客中有感】

殷尧藩

· 全唐诗 ·

天地一身在，头颅五十过。流年消壮志，空使泪成河。

卷 492_55【忆家二首】

殷尧藩

新霁颼林初，蘋花贴岸舒。故乡今夜月，犹得照孤庐。

树拥溪边阁，山浮雨后岚。白头归未得，梦里望江南。

卷 492_56【江行二首】

殷尧藩

暝色沧州迥，秋声玉峡长。只因江上月，不觉过浔阳。

晚泊长江口，寒沙白似霜。年光流不尽，东去水声长。

卷 492_57【偶题】

殷尧藩

越女收龙眼，蛮儿拾象牙。长安千万里，走马送谁家。

· 全唐诗 ·

卷 492_58 【关中伤乱后】

殷尧藩

去岁干戈险，今年蝗旱忧。关西归战马，海内卖耕牛。

卷 492_59 【楚江怀古】

殷尧藩

骚灵不可见，楚些竟谁闻。欲采蘋花去，沧州隔暮云。

卷 492_60 【张飞庙】

殷尧藩

威名垂万古，勇力冠当时。回首三分国，何人赋黍离。

卷 492_61 【生公讲台】

殷尧藩

暝色护楼台，阴云昼未开。一尘无处著，花雨遍苍苔。

· 全唐诗 ·

卷 492_62【席上听琴】

殷尧藩

高堂流月明，万籁不到耳。一听清心魂，飞絮春纷起。

卷 492_63【酬雍秀才二首】

殷尧藩

晚市人烟合，归帆带夕阳。栖迟未归客，犹著锦衣裳。

卧病茅窗下，惊闻两月过。兴来聊赋咏，清婉逼阴何。

卷 492_64【竹】

殷尧藩

窗户尽萧森，空阶凝碧阴。不缘冰雪里，为识岁寒心。

卷 492_65【春怨】

殷尧藩

· 全唐诗 ·

柳花扑帘春欲尽，绿阴障林莺乱啼。
只愁明日送春去，落日满园啼竹鸡。

卷 492_66 【馆娃宫】

殷尧藩

宫女三千去不回，真珠翠羽是尘埃。
夫差旧国久破碎，红燕自归花自开。

卷 492_67 【汉宫词三首】

殷尧藩

成帝夫人泪满怀，璧宫相趁落空阶。
可怜玉貌花前死，惟有君恩白燕钗。

霍家有女字成君，年少教人著绣裙。
枉杀宫中许皇后，椒房恩泽是浮云。

骏马金鞍白玉鞭，宫中来取李延年。
承恩直日鸳鸯殿，一曲清歌在九天。

卷 492_68 【同州端午】

· 全唐诗 ·

殷尧藩

鹤发垂肩尺许长，离家三十五端阳。
儿童见说深惊讶，却问何方是故乡。

卷 492_69【夜过洞庭】

殷尧藩

笙歌只解闹花天，谁是敲冰掉小船。
为觅潇湘幽隐处，夜深载月听鸣泉。

卷 492_70【游山南寺二首】

殷尧藩

山中尽日无人到，竹外交加百鸟鸣。
昨日小楼微雨过，樱桃花落晚风晴。

踏碎羊山黄叶堆，天飞细雨隐轻雷。
朗陵莫讶来何晚，不忍听君话别杯。

卷 492_71【寄太仆田卿二首】

· 全唐诗 ·

殷尧藩

客窗强饮太匆匆，急雨寒风意万重。
暮上心来消未得，梦回又听五更钟。

一阳才动伏群阴，万物于今寓太音。
若喜长生添线日，微微消息识天心。

卷 492_72【新昌井】

殷尧藩

辘轳千转劳筋力，待得甘泉渴杀人。
且共山麋同饮涧，玉沙铺底浅磷磷。

卷 492_73【经靖安里】

殷尧藩

巷底萧萧绝市尘，供愁疏雨打黄昏。
悠然一曲泉明调，浅立闲愁轻闭门。

卷 492_74【闻箏歌】

· 全唐诗 ·

殷尧藩

凄凄切切断肠声，指滑音柔万种情。
花影深沈遮不住，度帏穿幕又残更。

卷 492_75【吹笙歌】

殷尧藩

伶儿竹声愁绕空，秦女泪湿燕支红。
玉桃花片落不住，三十六簧能唤风。

卷 492_76【赠歌人郭婉二首】

殷尧藩

石家金谷旧歌人，起唱花筵泪满巾。
红粉少年诸弟子，一时惆怅望梁尘。

云满衣裳月满身，轻盈归步过流尘。
五更无限留连意，常恐风花又一春。

卷 492_77【潭州席上赠舞柘枝妓】

· 全唐诗 ·

殷尧藩

姑苏太守青娥女，流落长沙舞柘枝。
坐满绣衣皆不识，可怜红脸泪双垂。

卷 492_78【句】

殷尧藩

瘴雨出虹蜺，蛮烟渡江急。尝闻岛夷俗，犀象满城邑。

· 全唐诗 ·

第四百九十三卷

卷 493_1【虎丘山真娘墓】

沈亚之

金钗沦剑壑，兹地似花台。油壁何人值，钱塘度曲哀。
翠馀长染柳，香重欲薰梅。但道行云去，应随魂梦来。

卷 493_2【答殷尧藩赠罢泾源记室】

沈亚之

劳君辍雅话，听说事疆场。提笔从征虏，飞书始伏羌。
河流辞马岭，节卧听龙骧。孤负平生剑，空怜射斗光。

卷 493_3【五月六日，发石头城，步望前船，示舍弟兼寄侯郎】

沈亚之

· 全唐诗 ·

客子去淮阳，逶迤别梦长。水关开夜锁，雾棹起晨凉。
烟月期同赏，风波勿异行。隐山曾撼橹，转濑指遥檣。
蒲叶吴刀绿，筠筒楚粽香。因书报惠远，为我忆檀郎。

卷 493_4【别庞子肃】

沈亚之

自为应仙才，丹砂炼几回。山秋梦桂树，月晓忆瑶台。
雨雪依岩避，烟云逐步开。今朝龙仗去，早晚鹤书来。

卷 493_5【春色满皇州】

沈亚之

何处春辉好，偏宜在雍州。花明夹城道，柳暗曲江头。
风软游丝重，光融瑞气浮。斗鸡怜短草，乳燕傍高楼。
绣毂盈香陌，新泉溢御沟。回看日欲暮，还骑似川流。

卷 493_6【宿白马津寄寇立】

沈亚之

客思听蛩嗟，秋怀似乱砂。剑头悬日影，蝇鼻落灯花。

· 全唐诗 ·

天外归鸿断，漳南别路赊。闻君同旅舍，几得梦还家。

卷 493_7【汴州船行赋岸傍所见】

沈亚之

古木晓苍苍，秋林拂岸香。露珠虫网细，金缕兔丝长。
秋浪时回沫，惊鳞乍触航。蓬烟沾绿线，棘实缀红囊。
乱穗摇鼉尾，出根挂凤肠。聊持一濯足，谁道比沧浪。

卷 493_8【送文颖上人游天台】

沈亚之

露花浮翠瓦，鲜思起芳丛。此际断客梦，况复别志公。
既历天台去，言过赤城东。莫说人间事，崎岖尘土中。

卷 493_9【宿后自华阳行次昭应寄王直方】

沈亚之

重归能几日，物意早如春。暖色先骊岫，寒声别雁群。
川光如戏剑，帆态似翔云。为报东园蝶，南枝日已曛。

· 全唐诗 ·

卷 493_10【题海榴树呈八叔大人】

沈亚之

曾在蓬壶伴众仙，文章枝叶五云边。几时奉宴瑶台下，
何日移荣玉砌前。染日裁霞深雨露，凌寒送暖占风烟。
应笑强如河畔柳，逢波逐浪送张骞。

卷 493_11【西蕃请谒庙】

沈亚之

肃肃层城里，巍巍祖庙清。圣恩覃布濩，异域献精诚。
冠盖分行列，戎夷辨姓名。礼终齐百拜，心洁表忠贞。
瑞气千重色，箫韶九奏声。仗移迎日转，旌动逐风轻。
休运威仪正，年推俎豆盈。不才惭圣泽，空此望华缨。

卷 493_12【劝政楼下观百官献寿】

沈亚之

御气黄花节，临轩紫陌头。早阳生彩仗，霁色入仙楼。
献寿皆鸳鹭，瞻天在冕旒。菊尊开九日，凤历启千秋。
乐阁祥烟起，杯酣瑞影收。年年歌舞夕，此地庆皇休。

· 全唐诗 ·

卷 493_13【山出云】

沈亚之

片云朝出岫，孤色迥难亲。盖小辞山早，根轻触石新。
飘扬经绿野，明丽照青春。拂树疑舒叶，临江似结鳞。
从龙方有感，捧日岂无因。看助为霖去，恩沾雨露均。

卷 493_14【曲江亭望慈恩杏花发】

沈亚之

曲台晴好望，近接梵王家。十亩开金地，千株发杏花。
带云犹误雪，映日欲欺霞。紫陌传香远，红泉落影斜。
园中春尚早，亭上路非赊。芳景偏堪赏，其如积岁华。

卷 493_15【村居】

沈亚之

有树巢宿鸟，无酒共客醉。月上蝉韵残，梧桐阴绕地。
独出村舍门，吟剧微风起。萧萧芦荻丛，叫啸如山鬼。
应缘我憔悴，为我哭秋思。

· 全唐诗 ·

卷 493_16 【春词酬元微之】

沈亚之

黄莺啼时春日高，红芳发尽井边桃。
美人手暖裁衣易，片片轻花落剪刀。

卷 493_17 【题侯仙亭】

沈亚之

新创仙亭覆石坛，雕梁峻宇入云端。
岭北啸猿高枕听，湖南山色卷帘看。

卷 493_18 【送庞子肃】

沈亚之

三年游宦也迷津，马困长安九陌尘。
都作无成不归去，古来妻嫂笑苏秦。

卷 493_19 【梦挽秦弄玉】

· 全唐诗 ·

沈亚之

泣葬一枝红，生同死不同。金钿坠芳草，香绣满春风。
旧日闻箫处，高楼当月中。梨花寒食夜，深闭翠微宫。

卷 493_20 【梦别秦穆公】

沈亚之

击鼙舞，恨满烟光无处所。泪如雨，欲拟著辞不成语。
金凤衔红旧绣衣，几度宫中同看舞。人间春日正欢乐，
日暮东风何处去。

卷 493_21 【梦游秦宫】

沈亚之

君王多感放东归，从此秦宫不复期。
春景似伤秦丧主，落花如雨泪胭脂。

卷 493_22 【湘中怨】

沈亚之

· 全唐诗 ·

隆佳秀兮昭盛时，播薰绿兮淑华归。顾室美与处萼兮，
潜重房以饰姿。见稚态之韶羞兮，蒙长霭以为帟。
醉融光兮渺渺瀰瀰，迷千里兮涵烟眉，晨陶陶兮暮熙熙。
舞倭那之秣条兮，骋盈盈以披迟。酩游颜兮倡蔓卉穀，
流茜霓兮石发髓旒。

溯青山兮江之隅，拖湘波兮袅绿裾。荷拳拳兮未舒，
匪同归兮将焉如。

卷 493_23【文祝延二阕】

沈亚之

闽山之杭杭兮水泱泱，吞荒抱大兮香叠层。
腾气清浑兮朝昏，神生其中兮宅幽凝。居如山兮惠如水，
处端卓兮赴下而忘鄙。集人之祈兮从人之所市，
攀清明兮叩仿佛。我民清兮期吉日，愿听诚兮陈所当。
侯临我兮恩如光，照导兮天覆。惠流吾兮乐且康，
恭闻侯兮饮食失常。民萦忧兮心苦疮，饱我之饥兮侯由有
谷。
神有泽兮宜荫沃，脱侯之恙兮归侯之多福。
群卑勤之恭洁兮，鉴贞盟乎山竹。

兕载吹兮音咿咿，铜铎呶兮哦呼眈眈。樟之盖兮麓下，
云垂幄兮为帷。合吾民兮将安，维吾侯之康兮乐欣。
肴盘列兮答神，神摆渔篁兮降拂窅窅。

· 全唐诗 ·

右持妓兮左夫人，态修邃兮佻眇。调丹含琼兮嗟佳笑，
馨炮膾燔兮溢按豆。爵盎无虚兮果摭杂佑，
秋云清醉兮流融光。巫裾旋兮颺袖翔，
瞪虚凝兮览回杨。语神欢兮酒云央，望吾侯兮遵赏事。
朝马驾兮搦宝辔，千弭函弦兮森道骑。吾何乐兮神轩，
维侯之康兮居游自遂。

· 全唐诗 ·

第四百九十四卷

卷 494_1【及第后过扬子江】

施肩吾

忆昔将贡年，抱愁此江边。鱼龙互闪烁，黑浪高于天。
今日步春草，复来经此道。江神也世情，为我风色好。

卷 494_2【夜宴曲】

施肩吾

兰缸如昼晓不眠，玉堂夜起沈香烟。青娥一行十二仙，
欲笑不笑桃花然。碧窗弄娇梳洗晚，户外不知银汉转。
被郎嗔罚琉璃盏，酒入四肢红玉软。

卷 494_3【效古兴】

施肩吾

· 全唐诗 ·

金雀无旧钗，缃绮无旧裾。唯有一寸心，长贮万里夫。
南轩夜虫织已促，北牖飞蛾绕残烛。只言众口铄千金，
谁信独愁销片玉。不知岁晚归不归，又将啼眼缝征衣。

卷 494_4【古别离二首】

施肩吾

古人谩歌西飞燕，十年不见狂夫面。三更风作切梦刀，
万转愁成系肠线。所嗟不及牛女星，一年一度得相见。

老母别爱子，少妻送征郎。血流既四面，乃一断二肠。
不愁寒无衣，不怕饥无粮。惟恐征战不还乡，
母化为鬼妻为嫖。

卷 494_5【壮士行】

施肩吾

一斗之胆撑脏腑，如礞之筋碍臂骨。有时误入千人丛，
自觉一身横突兀。当今四海无烟尘，胸襟被压不得伸。
冻泉残蛰我不取，污我匣里青蛇鳞。

卷 494_6【代征妇怨】

· 全唐诗 ·

施肩吾

寒窗羞见影相随，嫁得五陵轻薄儿。长短艳歌君自解，
浅深更漏妾偏知。画裙多泪鸳鸯湿，云鬓慵梳玳瑁垂。
何事不看霜雪里，坚贞惟有古松枝。

卷 494_7【送人南游】

施肩吾

见说南行偏不易，中途莫忘寄书频。凌空瘴气堕飞鸟，
解语山魈恼病人。闽县绿娥能引客，泉州乌药好防身。
异花奇竹分明看，待汝归来画取真。

卷 494_8【赠边将】

施肩吾

轻生奉国不为难，战苦身多旧箭瘢。玉匣锁龙鳞甲冷，
金铃衬鹖羽毛寒。皂貂拥出花当背，白马骑来月在鞍。
犹恐犬戎临虏塞，柳营时把阵图看。

卷 494_9【上礼部侍郎陈情】

· 全唐诗 ·

施肩吾

九重城里无亲识，八百人中独姓施。弱羽飞时攒箭险，
蹇驴行处薄冰危。晴天欲照盆难反，贫女如花镜不知。
却向从来受恩地，再求青律变寒枝。

卷 494_10【早春残雪】

施肩吾

春景照林峦，玲珑雪影残。井泉添碧甃，药圃洗朱栏。
云路迷初醒，书堂映渐难。花分梅岭色，尘减玉阶寒。
远称栖松鹤，高宜点露盘。伫逢春律后，阴谷始堪看。

卷 494_11【送端上人游天台】

施肩吾

师今欲向天台去，来说天台意最真。溪过石桥为险处，
路逢毛褐是真人。云边望字钟声远，雪里寻僧脚迹新。
只可且论经夏别，莫教琪树两回春。

卷 494_12【惜花】

· 全唐诗 ·

施肩吾

落尽万株红，无人解系风。今朝芳径里，惆怅锦机空。

卷 494_13【冲夜行】

施肩吾

夜行无月时，古路多荒榛。山鬼遥把火，自照不照人。

卷 494_14【夜愁曲】

施肩吾

歌者歌未绝，愁人愁转增。空把琅玕枝，强挑无心灯。

卷 494_15【杂古词五首】

施肩吾

可怜江北女，惯唱江南曲。摇荡木兰舟，双凫不成浴。

郎为七上香，妾作笼下灰。归时即暖热，去罢生尘埃。

· 全唐诗 ·

夜裁鸳鸯绮，朝织蒲桃绫。欲试一寸心，待缝三尺冰。

怜时鱼得水，怨罢商与参。不如山梔子，却能结同心。

红颜感暮花，白日同流水。思君若孤灯，一夜一心死。

卷 494_16【幼女词】

施肩吾

幼女才六岁，未知巧与拙。向夜在堂前，学人拜新月。

卷 494_17【买地词】

施肩吾

买地不惜钱，为多芳桂丛。所期在清凉，坐起闻香风。

卷 494_18【弋阳访古】

施肩吾

行逢葛溪水，不见葛仙人。空抛青竹杖，咒作葛陂神。

· 全唐诗 ·

卷 494_19 【幽居乐】

施肩吾

万籁不在耳，寂寥心境清。无妨数茎竹，时有萧萧声。

卷 494_20 【湘川怀古】

施肩吾

湘水终日流，湘妃昔时哭。美色已成尘，泪痕犹在竹。

卷 494_21 【秋山吟】

施肩吾

夜吟秋山上，袅袅秋风归。月色清且冷，桂香落人衣。

卷 494_22 【寒夜】

施肩吾

三复招隐吟，不知寒夜深。看看西来月，移到青天心。

· 全唐诗 ·

卷 494_23【湘竹词】

施肩吾

万古湘江竹，无穷奈怨何。年年长春笋，只是泪痕多。

卷 494_24【观花后游慈恩寺】

施肩吾

世事知难了，应须问苦空。羞将看花眼，来入梵王宫。

卷 494_25【乞巧词】

施肩吾

乞巧望星河，双双并绮罗。不嫌针眼小，只道月明多。

卷 494_26【不见来词】

施肩吾

乌鹊语千回，黄昏不见来。漫教脂粉匣，闭了又重开。

· 全唐诗 ·

卷 494_27【夜起来】

施肩吾

香销连理带，尘覆合欢杯。懒卧相思枕，愁吟夜起来。

卷 494_28【笑卿卿词】

施肩吾

笑向卿卿道，耽书夜夜多。出来看玉兔，又欲过银河。

卷 494_29【感遇词】

施肩吾

一种貌如仙，人情要自偏。罗敷有底好，最得使君怜。

卷 494_30【及第后夜访月仙子】

施肩吾

自喜寻幽夜，新当及第年。还将天上桂，来访月中仙。

· 全唐诗 ·

卷 494_31【定情乐】

施肩吾

敢嗟君不怜，自是命不谐。著破三条裙，却还双股钗。

感郎双条脱，新破八幅绡。不惜榆荚钱，买人金步摇。

卷 494_32【宿南一上人山房】

施肩吾

窗牖月色多，坐卧禅心静。青鬼来试人，夜深弄灯影。

卷 494_33【兰渚泊】

施肩吾

家在洞水西，身作兰渚客。天昼无纤云，独坐空江碧。

卷 494_34【经吴真君旧宅】

施肩吾

· 全唐诗 ·

古仙炼丹处，不测何岁年。至今空宅基，时有五色烟。

卷 494_35【古相思】

施肩吾

十访九不见，甚于菖蒲花。可怜云中月，今夜堕我家。

卷 494_36【瀑布】

施肩吾

豁开青冥颠，写出万丈泉。如裁一条素，白日悬秋天。

卷 494_37【金尺石】

施肩吾

丹砂画顽石，黄金横一尺。人世较短长，仙家爱平直。

卷 494_38【秋洞宿】

施肩吾

· 全唐诗 ·

夜深秋洞里，风雨报龙归。何事触人睡，不教胡蝶飞。

卷 494_39 【效古词】

施肩吾

姊妹无多兄弟少，举家钟爱年最小。
有时绕树山鹊飞，贪看不待画眉了。

卷 494_40 【山中得刘秀才京书】

施肩吾

自笑家贫客到疏，满庭烟草不能锄。
今朝谁料三千里，忽得刘京一纸书。

卷 494_41 【望夫词】

施肩吾

手爇寒灯向影频，回文机上暗生尘。
自家夫婿无消息，却恨桥头卖卜人。

· 全唐诗 ·

卷 494_42【忆四明山泉】

施肩吾

爱彼山中石泉水，幽深夜夜落空里。
至今忆得卧云时，犹自涓涓在人耳。

卷 494_43【西山静中吟】

施肩吾

重重道气结成神，玉阙金堂逐日新。
若数西山得道者，连予便是十三人。

卷 494_44【天柱山赠峨嵋田道士】

施肩吾

古称天柱连九天，峨嵋道士栖其巅。
近闻教得玄鹤舞，试凭驱出青芝田。

卷 494_45【夜岩谣】

· 全唐诗 ·

施肩吾

夜上幽岩踏灵草，松枝已疏桂枝老。
新诗几度惜不吟，此处一声风月好。

卷 494_46【岛夷行】

施肩吾

腥臊海边多鬼市，岛夷居处无乡里。
黑皮年少学采珠，手把生犀照咸水。

卷 494_47【帝宫词】

施肩吾

自得君王宠爱时，敢言春色上寒枝。
十年宫里无人问，一日承恩天下知。

卷 494_48【叹花词】

施肩吾

前日满林红锦遍，今日绕林看不见。

· 全唐诗 ·

空馀古岸泥土中，零落胭脂两三片。

卷 494_49【杜鹃花词】

施肩吾

杜鹃花时天艳然，所恨帝城人不识。
丁宁莫遣春风吹，留与佳人比颜色。

卷 494_50【晓光词】

施肩吾

日轮浮动羲和推，东方一轧天门开。
风神为我扫烟雾，四海荡荡无尘埃。

卷 494_51【望晓词】

施肩吾

揽衣起兮望秋河，濛濛远雾飞轻罗。
蟠桃树上日欲出，白榆枝畔星无多。

· 全唐诗 ·

卷 494_52【海边远望】

施肩吾

扶桑枝边红皎皎，天鸡一声四溟晓。
偶看仙女上青天，鸾鹤无多采云少。

卷 494_53【听南僧说偈词】

施肩吾

师子座中香已发，西方佛偈南僧说。
惠风吹尽六条尘，清净水中初见月。

卷 494_54【春日美新绿词】

施肩吾

前日萌芽小于粟，今朝草树色已足。
天公不语能运为，驱遣羲和染新绿。

卷 494_55【对月忆嵩阳故人】

· 全唐诗 ·

施肩吾

团团月光照西壁，嵩阳故人千里隔。
不知三十六峰前，定为何处峰前客。

卷 494_56【赠莎地道士】

施肩吾

莎地阴森古莲叶，游龟暗老青苔甲。
池边道士夸眼明，夜取蠨蛸摘蚊睫。

卷 494_57【效古词】

施肩吾

莫愁新得年十六，如蛾双眉长带绿。
初学箜篌四五人，莫愁独自声前足。

卷 494_58【冬日观早朝】

施肩吾

紫烟捧日炉香动，万马千车踏新冻。

· 全唐诗 ·

绣衣年少朝欲归，美人犹在青楼梦。

卷 494_59【观吴偃画松】

施肩吾

君有绝艺终身宝，方寸巧心通万造。
忽然写出涧底松，笔下看看一枝老。

卷 494_60【题山僧水阁】

施肩吾

山房水阁连空翠，沈沈下有蛟龙睡。
老僧趺坐入定时，不知花落黄金地。

卷 494_61【登岷亭怀孟生】

施肩吾

岷山自高水自绿，后辈词人心眼俗。
鹿门才子不再生，怪景幽奇无管属。

· 全唐诗 ·

卷 494_62【吴中代蜀客吟】

施肩吾

身狎吴儿家在蜀，春深屡唱思乡曲。
峨眉风景无主人，锦江悠悠为谁绿。

卷 494_63【戏咏榆荚】

施肩吾

风吹榆钱落如雨，绕林绕屋来不住。
知尔不堪还酒家，漫教夷甫无行处。

卷 494_64【寄李补阙】

施肩吾

苍生应怪君起迟，蒲轮重辗嵩阳道。
功成名遂来不及，三十六峰仙鹤老。

卷 494_65【贫客吟】

· 全唐诗 ·

施肩吾

毳毼敝衣无处结，寸心耿耿如刀切。
今朝欲泣泉客珠，及到盘中却成血。

卷 494_66 【谪山中叟】

施肩吾

老人今年八十几，口中零落残牙齿。
天阴伛偻带嗽行，犹向岩前种松子。

卷 494_67 【闻山中步虚声】

施肩吾

何人步虚南峰顶，鹤唳九天霜月冷。
仙词偶逐东风来，误飘数声落尘境。

卷 494_68 【题龙池山人】

施肩吾

主人家在龙池侧，水中有鱼不敢食。

· 全唐诗 ·

终朝采药供仙厨，却笑桃花少颜色。

卷 494_69【玩新桃花】

施肩吾

几叹红桃开未得，忽惊造化新装饰。
一种同沾荣盛时，偏荷清光借颜色。

卷 494_70【山石榴花】

施肩吾

深色胭脂碎剪红，巧能攒合是天公。
莫言无物堪相比，妖艳西施春驿中。

卷 494_71【玩友人庭竹】

施肩吾

曾去玄洲看种玉，那似君家满庭竹。
客来不用呼清风，此处挂冠凉自足。

· 全唐诗 ·

卷 494_72【秋夜山居二首】

施肩吾

幽居正想餐霞客，夜久月寒珠露滴。
千年独鹤两三声，飞下岩前一枝柏。

去雁声遥人语绝，谁家素机织新雪。
秋山野客醉醒时，百尺老松衔半月。

卷 494_73【秋夜山中别友人】

施肩吾

独鹤孤云两难说，明朝又作东西别。
知君少壮无几年，莫爱闲吟老松月。

卷 494_74【赠别王炼师往罗浮】

施肩吾

道俗骈闳留不住，罗浮山上有心期。
却愁仙处人难到，别后音书寄与谁。

· 全唐诗 ·

卷 494_75【春日餐霞阁】

施肩吾

洒水初晴物候新，餐霞阁上最宜春。
山花四面风吹入，为我铺床作锦茵。

卷 494_76【喜友再相逢】

施肩吾

三十年前与君别，可怜容色夺花红。
谁知日月相催促，此度见君成老翁。

卷 494_77【候仙词】

施肩吾

西归公子何时降，南岳先生早晚来。
巡历世间犹未遍，乞求鸾鹤且裴回。

卷 494_78【修仙词】

· 全唐诗 ·

施肩吾

丹田自种留年药，玄谷长生续命芝。
世上漫忙兼漫走，不知求己更求谁。

卷 494_79【夏日题方师院】

施肩吾

火天无处买清风，闷发时来入梵宫。
只向方师小廊下，回看门外是樊笼。

卷 494_80【春游乐】

施肩吾

一年三百六十日，赏心那似春中物。
草迷曲坞花满园，东家少年西家出。

卷 494_81【仙客归乡词二首】

施肩吾

六合八荒游未半，子孙零落暂归来。

· 全唐诗 ·

井边不认捎云树，多是门人在后栽。

洞中日月洞中仙，不算离家是几年。
出郭始知人代变，又须抛却古时钱。

卷 494_82【云州饮席】

施肩吾

酒肠虽满少欢情，身在云州望帝城。
巡次合当谁改令，先须为我打还京。

卷 494_83【戏赠李主簿】

施肩吾

官罢江南客恨遥，二年空被酒中消。
不知暗数春游处，偏忆扬州第几桥。

卷 494_84【春词】

施肩吾

黄鸟啼多春日高，红芳开尽井边桃。

· 全唐诗 ·

美人手暖裁衣易，片片轻云落剪刀。

卷 494_85【题景上人山门】

施肩吾

水有青莲沙有金，老僧于此独观心。
愁人欲寄中峰宿，只恐白猿啼夜深。

卷 494_86【妓人残妆词】

施肩吾

云髻已收金凤凰，巧匀轻黛约残妆。
不知昨夜新歌响，犹在谁家绕画梁。

卷 494_87【临水亭】

施肩吾

只怪素亭黏黛色，溪烟为我染莓苔。
欲知源上春风起，看取桃花逐水来。

· 全唐诗 ·

卷 494_88【听范玄长吟】

施肩吾

声声扣出碧琅玕，能使秋猿欲叫难。
诗兴未穷心更远，手垂青拂向云看。

卷 494_89【观叶生画花】

施肩吾

心窍玲珑貌亦奇，荣枯只在手中移。
今朝故向霜天里，点破繁花四五枝。

卷 494_90【洗丹沙词】

施肩吾

千淘万洗紫光攒，夜火荧荧照玉盘。
恐是麻姑残米粒，不曾将与世人看。

卷 494_91【长安春夜吟】

· 全唐诗 ·

施肩吾

露盘滴时河汉微，美人灯下裁春衣。
蟾蜍东去鹊南飞，芸香省中郎不归。

卷 494_92【自述】

施肩吾

筐贮灵砂日日看，欲成仙法脱身难。
不知谁向交州去，为谢罗浮葛长官。

卷 494_93【少年行】

施肩吾

醉骑白马走空衢，恶少皆称电不如。
五凤街头新勒辔，半垂衫袖揖金吾。

卷 494_94【越中遇寒食】

施肩吾

去岁清明雪溪口，今朝寒食镜湖西。

· 全唐诗 ·

信知天地心不易，还有子规依旧啼。

卷 494_95 【赠采药叟】

施肩吾

老去唯将药裹行，无家无累一身轻。
却教年少取书卷，小字灯前斗眼明。

卷 494_96 【清夜忆仙宫子】

施肩吾

夜静门深紫洞烟，孤行独坐忆神仙。
三清宫里月如昼，十二宫楼何处眠。

卷 494_97 【江南怨】

施肩吾

愁见桥边荇叶新，兰舟枕水楫生尘。
从来不是无莲采，十顷莲塘卖与人。

· 全唐诗 ·

卷 494_98【送绝尘子归旧隐二首】

施肩吾

云水千重绕洞门，独归何处是桃源。
仙方不用随身去，留与人间老子孙。

班藤为杖草为衣，万壑千峰独自归。
纵令相忆谁相报，桂树岩边人信稀。

卷 494_99【送裴秀才归淮南】

施肩吾

怪来频起咏刀头，枫叶枝边一夕秋。
又向江南别才子，却将风景过扬州。

卷 494_100【钱塘渡口】

施肩吾

天堑茫茫连沃焦，秦皇何事不安桥。
钱塘渡口无钱纳，已失西兴两信潮。

· 全唐诗 ·

卷 494_101【春日宴徐君池亭】

施肩吾

暂凭春酒换愁颜，今日应须醉始还。
池上有门君莫掩，从教野客见青山。

卷 494_102【山中送友人】

施肩吾

欲折杨枝别恨生，一重枝上一啼莺。
乱山重叠云相掩，君向乱山何处行。

卷 494_103【寄王少府】

施肩吾

采松仙子徒销日，吃菜山僧枉过生。
多谢蓝田王少府，人间诗酒最关情。

卷 494_104【赠女道士郑玉华二首】

· 全唐诗 ·

施肩吾

玄发新簪碧藕花，欲添肌雪饵红砂。
世间风景那堪恋，长笑刘郎漫忆家。

明镜湖中休采莲，却师阿母学神仙。
朱丝误落青囊里，犹是箜篌第几弦。

卷 494_105【寄西台李侍御】

施肩吾

二千馀里采琼瑰，到处伤心瓦砾堆。
唯有绣衣周柱史，独将珠玉挂西台。

卷 494_106【赠凌仙姥】

施肩吾

阿母从天降几时，前朝惟有汉皇知。
仙桃不啻三回熟，饱见东方一小儿。

卷 494_107【晚春送王秀才游剡川】

· 全唐诗 ·

施肩吾

越山花去剡藤新，才子风光不厌春。
第一莫寻溪上路，可怜仙女爱迷人。

卷 494_108【冯上人院】

施肩吾

扰扰凡情逐水流，世间多喜复多忧。
一回行到冯公院，便欲令人百事休。

卷 494_109【金吾词】

施肩吾

行拥朱轮锦幘儿，望仙门外叱金羈。
染须偷嫩无人觉，唯有平康小妇知。

卷 494_110【观舞女】

施肩吾

缠红结紫畏风吹，袅娜初回弱柳枝。

· 全唐诗 ·

买笑未知谁是主，万人心逐一人移。

卷 494_111【鄆县村居】

施肩吾

欲住村西日日慵，上山无水引高踪。
谁能求得秦皇术，为我先驱紫阁峰。

卷 494_112【酬周秀才】

施肩吾

三展蜀笺皆郢曲，我心珍重甚琼瑶。
应缘水府龙神睡，偷得蛟人五色绡。

卷 494_113【旅次文水县喜遇李少府】

施肩吾

为君三日废行程，一县官人是酒朋。
共忆襄阳同醉处，尚书坐上纳银觥。

· 全唐诗 ·

卷 494_114【夏雨后题青荷兰若】

施肩吾

僧舍清凉竹树新，初经一雨洗诸尘。
微风忽起吹莲叶，青玉盘中泻水银。

卷 494_115【途中逢少女】

施肩吾

身倚西门笑向东，牡丹初折一枝红。
市头日卖千般镜，知落谁家新匣中。

卷 494_116【山中玩白鹿】

施肩吾

绕洞寻花日易销，人间无路得相招。
呦呦白鹿毛如雪，踏我桃花过石桥。

卷 494_117【山居乐】

· 全唐诗 ·

施肩吾

鸾鹤每于松下见，笙歌常向坐中闻。
手持十节龙头杖，不指虚空即指云。

卷 494_118【襄阳曲】

施肩吾

大堤女儿郎莫寻，三三五五结同心。
清晨对镜理容色，意欲取郎千万金。

卷 494_119【望夫词二首】

施肩吾

看看北雁又南飞，薄幸征夫久不归。
蟾子到头无信处，凡经几度上人衣。

何事经年断书信，愁闻远客说风波。
西家还有望夫伴，一种泪痕儿最多。

卷 494_120【少妇游春词】

· 全唐诗 ·

施肩吾

簇锦攒花斗胜游，万人行处最风流。
无端自向春园里，笑摘青梅叫阿侯。

卷 494_121【折柳枝】

施肩吾

伤见路边杨柳春，一重折尽一重新。
今年还折去年处，不送去年离别人。

卷 494_122【归将吟】

施肩吾

百战放归成老翁，馀生得出死人中。
今朝授敕三回舞，两赐青娥又拜公。

卷 494_123【惜花词】

施肩吾

千树繁红绕碧泉，正宜尊酒对芳年。

· 全唐诗 ·

明朝欲饮还来此，只怕春风却在前。

卷 494_124 【抛缠头词】

施肩吾

翠娥初罢绕梁词，又见双鬟对舞时。
一抱红罗分不足，参差裂破凤凰儿。

卷 494_125 【望骑马郎】

施肩吾

碧蹄新压步初成，玉色郎君弄影行。
赚杀唱歌楼上女，伊州误作石州声。

卷 494_126 【春日钱塘杂兴二首】

施肩吾

酒姥溪头桑袅袅，钱塘郭外柳毵毵。
路逢邻妇遥相问，小小如今学养蚕。

西邻年少问东邻，柳岸花堤几处新。

· 全唐诗 ·

昨夜雨多春水阔，隔江桃叶唤何人。

卷 494_127【玩手植松】

施肩吾

却思毫末栽松处，青翠才将众草分。
今日散材遮不得，看看气色欲凌云。

卷 494_128【夜笛词】

施肩吾

皎洁西楼月未斜，笛声寥亮入东家。
却令灯下裁衣妇，误剪同心一半花。

卷 494_129【赠郑伦吹凤管】

施肩吾

喃喃解语凤凰儿，曾听梨园竹里吹。
谁谓五陵年少子，还将此曲暗相随。

· 全唐诗 ·

卷 494_130【蜀茗词】

施肩吾

越碗初盛蜀茗新，薄烟轻处搅来匀。
山僧问我将何比，欲道琼浆却畏嗔。

卷 494_131【春霁】

施肩吾

煎茶水里花千片，候客亭中酒一樽。
独对春光还寂寞，罗浮道士忽敲门。

卷 494_132【讽山云】

施肩吾

闲云生叶不生根，常被重重蔽石门。
赖有风帘能扫荡，满山晴日照乾坤。

卷 494_133【日晚归山词】

· 全唐诗 ·

施肩吾

虎迹新逢雨后泥，无人家处洞边溪。
独行归客晚山里，赖有鹧鸪临路岐。

卷 494_134 【玩花词】

施肩吾

今朝造化使春风，开折西施面上红。
竟日眼前犹不足，数株异入寸心中。

卷 494_135 【长安早春】

施肩吾

报花消息是春风，未见先教何处红。
想得芳园十余日，万家身在画屏中。

卷 494_136 【再酬李先辈】

施肩吾

清辞再发郢人家，字字新移锦上花。

· 全唐诗 ·

能使龙宫买绡女，低回不敢织轻霞。

卷 494_137【寄隐者】

施肩吾

路绝空林无处问，幽奇山水不知名。
松门拾得一片屐，知是高人向此行。

卷 494_138【寄四明山子】

施肩吾

高栖只在千峰里，尘世望君那得知。
长忆去年风雨夜，向君窗下听猿时。

卷 494_139【观美人】

施肩吾

漆点双眸鬓绕蝉，长留白雪占胸前。
爱将红袖遮娇笑，往往偷开水上莲。

· 全唐诗 ·

卷 494_140 【收妆词】

施肩吾

斜月胧胧照半床，
茕茕孤妾懒收妆。
灯前再览青铜镜，
枉插金钗十二行。

卷 494_141 【仙女词】

施肩吾

仙女群中名最高，
曾看王母种仙桃。
手题金简非凡笔，
道是天边玉兔毛。

卷 494_142 【仙翁词】

施肩吾

世间无远可为游，
六合朝行夕已周。
坛上夜深风雨静，
小仙乘月击苍虬。

卷 494_143 【遇李山人】

· 全唐诗 ·

施肩吾

游山游水几千重，二十年中一度逢。
别易会难君且住，莫交青竹化为龙。

卷 494_144 【同张炼师溪行】

施肩吾

青溪道士紫霞巾，洞里仙家旧是邻。
每见桃花逐流水，无回不忆武陵人。

卷 494_145 【桃源词二首】

施肩吾

天天花里千家住，总为当时隐暴秦。
归去不论无旧识，子孙今亦是他人。

秦世老翁归汉世，还同白鹤返辽城。
纵令记得山川路，莫问当时州县名。

卷 494_146 【送道友游山】

· 全唐诗 ·

施肩吾

欲驻如今未老形，万重山上九芝清。
君今若问采芝路，踏水踏云攀杳冥。

卷 494_147【赠王屋刘道士】

施肩吾

小有洞中长住客，大罗天下后来仙。
出门即是寻常处，未可还它跨鹤鞭。

卷 494_148【谢自然升仙】

施肩吾

分明得道谢自然，古来漫说尸解仙。
如花年少一女子，身骑白鹤游青天。

卷 494_149【秋吟献李舍人】

施肩吾

肠结愁根酒不消，新惊白发长愁苗。

· 全唐诗 ·

主司傥许题名姓，笔下看成度海桥。

卷 494_150 【山中喜静和子见访】

施肩吾

绝壁深溪无四邻，每逢猿鹤即相亲。
小奴惊出垂藤下，山犬今朝吠一人。

卷 494_151 【春日题罗处士山舍】

施肩吾

乱叠千峰掩翠微，高人爱此自忘机。
春风若扫阶前地，便是山花带锦飞。

卷 494_152 【访松岭徐炼师】

施肩吾

千仞峰头一谪仙，何时种玉已成田。
开经犹在松阴里，读到南华第几篇。

· 全唐诗 ·

卷 494_153【江南织绫词】

施肩吾

卿卿买得越人丝，贪弄金梭懒画眉。
女伴能来看新翫，鸳鸯正欲上花枝。

卷 494_154【宿兰若】

施肩吾

听钟投宿入孤烟，岩下病僧犹坐禅。
独夜客心何处是，秋云影里一灯然。

卷 494_155【题禅僧院】

施肩吾

栖禅枝畔数花新，飞作琉璃池上尘。
谷鸟自啼猿自叫，不能愁得定中人。

卷 494_156【送绝粒僧】

· 全唐诗 ·

施肩吾

碧洞青萝不畏深，免将饥渴累禅心。
若期野客来相访，一室无烟何处寻。

卷 494_157【早春游曲江】

施肩吾

芳处亦将枯槁同，应缘造化未施功。
羲和若拟动炉鞴，先铸曲江千树红。

卷 494_158【佳人览镜】

施肩吾

每坐台前见玉容，今朝不与昨朝同。
良人一夜出门宿，减却桃花一半红。

卷 494_159【遇王山人】

施肩吾

每欲寻君千万峰，岂知人世也相逢。

· 全唐诗 ·

一瓢遗却在何处，应挂天台最老松。

卷 494_160【遇醉道士】

施肩吾

霞帔寻常带酒眠，路傍疑是酒中仙。
醉来不住人家宿，多向远山松月边。

卷 494_161【送人归台州】

施肩吾

莫驱归骑且徘徊，更遣离情四五杯。
醉后不忧迷客路，遥看瀑布识天台。

卷 494_162【赠施仙姑】

施肩吾

缥缈吾家一女仙，冰容虽小不知年。
有时频夜看明月，心在嫦娥几案边。

· 全唐诗 ·

卷 494_163 【山院观花】

施肩吾

初来唯见空树枝，今朝满院花如雪。
门前为报诸少年，明日来迟不堪折。

卷 494_164 【经桃花夫人庙】

施肩吾

谁能枉驾入荒榛，随例形相土木身。
不及连山种桃树，花开犹得识夫人。

卷 494_165 【代农叟吟】

施肩吾

且将一笑悦丰年，渐老那能日日眠。
引客特来山地上，坐看秋水落红莲。

卷 494_166 【下第春游】

· 全唐诗 ·

施肩吾

羈情含藥復含辛，
汨眼看花只似塵。
天遣春風領春色，
不教分付與愁人。

卷 494_167【送僧游越】

施肩吾

麻衣年少雪為顏，
却笑孤雲未是閑。
此去若逢花柳月，
栖禪莫向苾芻山。

卷 494_168【遇越州賀仲宣】

施肩吾

君在鏡湖西畔住，
四明山下莫經春。
門前幾個采蓮女，
欲泊蓮舟無主人。

卷 494_169【江南積雨嘆】

施肩吾

人厭為霖水毀溪，
床邊生菌路成泥。

· 全唐诗 ·

雨师一日三回到，栋里闲云岂得栖。

卷 494_170【云中道上作】

施肩吾

羊马群中觅人道，雁门关外绝人家。
昔时闻有云中郡，今日无云空见沙。

卷 494_171【同诸隐者夜登四明山】

施肩吾

半夜寻幽上四明，手攀松桂触云行。
相呼已到无人境，何处玉箫吹一声。

卷 494_172【戏郑申府】

施肩吾

年少郑郎那解愁，春来闲卧酒家楼。
胡姬若拟邀他宿，挂却金鞭系紫骝。

· 全唐诗 ·

卷 494_173【宿干越亭】

施肩吾

琵琶洲上人行绝，干越亭中客思多。
月满秋江山冷落，不知谁问夜如何。

卷 494_174【少女词二首】

施肩吾

娇羞不肯点新黄，踏过金钿出绣床。
信物无端寄谁去，等闲裁破锦鸳鸯。

同心带里脱金钱，买取头花翠羽连。
手执木兰犹未惯，今朝初上采菱船。

卷 494_175【冬词】

施肩吾

锦绣堆中卧初起，芙蓉面上粉犹残。
台前也欲梳云髻，只怕盘龙手捻难。

· 全唐诗 ·

卷 494_176【昭君怨】

施肩吾

马上徒劳别恨深，总缘如玉不输金。
已知贱妾无归日，空荷君王有悔心。

卷 494_177【赠仙子】

施肩吾

欲令雪貌带红芳，更取金瓶泻玉浆。
凤管鹤声来未足，懒眠秋月忆萧郎。

卷 494_178【越溪怀古】

施肩吾

忆昔西施人未求，浣纱曾向此溪头。
一朝得侍君王侧，不见玉颜空水流。

卷 494_179【秋夜山中赠别友人】

· 全唐诗 ·

施肩吾

何处邀君话别情，寒山木落月华清。
莫愁今夜无诗思，已听秋猿第一声。

卷 494_180【大堤新咏】

施肩吾

行路少年知不知，襄阳全欠旧来时。
宜城贾客载钱出，始觉大堤无女儿。

卷 494_181【宿四明山】

施肩吾

黎洲老人命余宿，杳然高顶浮云平。
下视不知几千仞，欲晓不晓天鸡声。

卷 494_182【禁中新柳】

施肩吾

万条金钱带春烟，深染青丝不直钱。

· 全唐诗 ·

又免生当离别地，宫鸦啼处禁门前。

卷 494_183【酬张明府】

施肩吾

潘令新诗忽寄来，分明绣段对花开。
此时欲醉红楼里，正被歌人劝一杯。

卷 494_184【安吉天宁寺闻磬】

施肩吾

玉磬敲时清夜分，老龙吟断碧天云。
邻房逢见广州客，曾向罗浮山里闻。

卷 494_185【句】

施肩吾

年来如抛梭，不老应不得。

花眼绽红斟酒看，药心抽绿带烟锄。

· 全唐诗 ·

颠狂楚客歌成雪，媚赖吴娘笑是盐。

荷翻紫盖摇波面，蒲莹青刀插水湄。

烟黏薜荔龙须软，雨压芭蕉凤翅垂。

茶为涤烦子，酒为忘忧君。

锄药顾老叟，焚香呼小青。

遗却白鸡呼粥粥。

五通本是佛家奴，身著青衣一足无。

天边有仙药，为我补三关。

世人谁不爱年长，所欲皆非保命方。

但看日及花，惟是朝可怜。

池塘已长鸡头叶，篱落初开狗脊花。

出路船为脚，供官本是奴。

一言感著热铁心，为人剑下偷青娥。

青鬓丈人不识愁。

· 全唐诗 ·

第四百九十五卷

卷 495_1【不赴拾遗召】

费冠卿

君亲同是先王道，何如骨肉一处老。
也知臣子合佐时，自古荣华谁可保。

卷 495_2【闲居即事】

费冠卿

生计唯将三尺僮，学他贤者隐墙东。照眠夜后多因月，
扫地春来只藉风。几处红旗驱战士，一园青草伴衰翁。
子房仙去孔明死，更有何人解指踪。

卷 495_3【酬范中丞见】

费冠卿

· 全唐诗 ·

花宫柳陌正从行，紫袂金鞍问姓名。战国方须礼干木，
康时何必重侯嬴。捧将束帛山僮喜，传示银钩邑客惊。
直为云泥相去远，一言知己杀身轻。

卷 495_4【秋日与冷然上人寺庄观稼】

费冠卿

世人从扰扰，独自爱身闲。美景当新霁，随僧过远山。
村桥出秋稼，空翠落澄湾。唯有中林犬，犹应望我还。

卷 495_5【题中峰】

费冠卿

中峰高拄沕寥天，上有茅庵与石泉。
晴景猎人曾望见，青蓝色里一僧禅。

卷 495_6【蒙召拜拾遗书情二首】

费冠卿

拾遗帝侧知难得，官紧才微恐不胜。
好是中朝绝亲友，九华山下诏来征。

· 全唐诗 ·

三千里外一微臣，二十年来任运身。
今日忽蒙天子召，自惭惊动国中人。

卷 495_7【挂树藤】

费冠卿

本为独立难，寄彼高树枝。蔓衍数条远，溟濛千朵垂。
向日助成阴，当风藉持危。谁言柔可屈，坐见蟠蛟螭。

卷 495_8【枕流石】

费冠卿

不为幽岸隐，古色涵空出。愿以清泚流，鉴此坚贞质。
傍临玉光润，时泻苔花密。往往惊游鳞，尚疑垂钓日。

卷 495_9【久居京师感怀诗】

费冠卿

茆独不为苦，求名始辛酸。上国无交亲，请谒多少难。
九月风到面，羞汗成冰片。求名俟公道，名与公道远。
力尽得一名，他喜我且轻。家书十年绝，归去知谁荣。

· 全唐诗 ·

马嘶渭桥柳，特地起秋声。

卷 495_10【答萧建】

费冠卿

自地上青峰，悬崖一万重。践危频侧足，登堑半齐胸。
飞狖啼攀桂，游人喘倚松。入林寒痒痒，近瀑雨濛濛。
径滑石棱上，寺开山掌中。幡花扑净地，台殿印晴空。
胜境层层别，高僧院院逢。泉鱼候洗钵，老獾戏撞钟。
外户凭云掩，中厨课水舂。搜泥时和面，拾橡半添种。
渡壑缘槎险，持灯入洞穷。夹天开壁峭，透石蹙波雄。
润蔼清无土，潭深碧有龙。畚田一片净，谷树万株浓。
野客登临惯，山房幽寂同。寒炉树根火，夏牖竹梢风。
边鄙筹贤相，黔黎托圣躬。君能弃名利，岁晏一相从。

卷 495_11【代书问费征君九华亭】

萧建

见说九华峰上寺，日宫犹在下方开。
其中幽境客难到，请为诗中图画来。

卷 495_12【献主文】

· 全唐诗 ·

刘虚白

二十年前此夜中，一般灯烛一般风。
不知岁月能多少，犹著麻衣待至公。

卷 495_13【句】

刘虚白

知道醉乡无户税，任他荒却下丹田。

卷 495_14【山出云】

张复

山静云初吐，霏微触石新。无心离碧岫，有叶占青春。
散类如虹气，轻同不让尘。凌空还似翼，映润欲成鳞。
异起临汾鼎，疑随出峡神。为霖终济旱，非独降贤人。

卷 495_15【山出云】

张胜之

片云初出岫，孤迥色难亲。盖小辞山近，根轻触石新。

· 全唐诗 ·

飘飘经绿野，明丽照晴春。拂树疑舒叶，临流似结鳞。
从龙方有感，捧日岂无因。看取为霖去，恩沾雨露均。

· 全唐诗 ·

第四百九十六卷

卷 496_1 【送狄尚书镇太原】

姚合

授钺儒生贵，倾朝赴饯筵。麾幢官在省，礼乐将临边。
代马龙相杂，汾河海暗连。远戎移帐幕，高鸟避旌旃。
天下屯兵处，皇威破虏年。防秋嫌垒近，入塞必身先。
中外恩重叠，科名岁接连。散材无所用，老向琐闾眠。

卷 496_2 【送杨尚书祭西岳】

姚合

报功严祀典，宠诏下明庭。酒气飘林岭，香烟入杳冥。
乐清三奏备，词直百神听。衣拂云霞湿，诗通水石灵。
何因逐驺骑，暂得到岩扃。

卷 496_3 【送李侍御过夏州】

· 全唐诗 ·

姚合

酬恩不顾名，走马觉身轻。迢递河边路，苍茫塞上城。
沙寒无宿雁，虏近少闲兵。饮罢挥鞭去，旁人意气生。

卷 496_4【送李起居赴池州】

姚合

天子念疲民，分忧辍侍臣。红旗高起焰，绿野静无尘。
阙下亲知别，江南惠化新。朝昏即千里，且愿话逡巡。

卷 496_5【送刘詹事赴寿州】

姚合

殷勤莫遽起，四坐悉同袍。世上诗难得，林中酒更高。
隋堤傍杨柳，楚驿在波涛。别后书频寄，无辞费笔毫。

卷 496_6【送裴大夫赴亳州】

姚合

杭人遮道路，垂泣浙江前。谯国迎舟舰，行歌汴水边。

· 全唐诗 ·

周旋君量远，交代我才偏。寒日严旌戟，晴风出管弦。
一杯诚淡薄，四坐愿留连。异政承殊泽，应为天下先。

卷 496_7【送徐州韦仅行军】

姚合

饯幕俨征轩，行军归大藩。山程度函谷，水驿到夷门。
晓日诗情远，春风酒色浑。逡巡何足贵，所贵尽残樽。

卷 496_8【送刘禹锡郎中赴苏州】

姚合

三十年来天下名，衔恩东守阖闾城。初经咸谷眠山驿，
渐入梁园问水程。霁日满江寒浪静，春风绕郭白蘋生。
虎丘野寺吴中少，谁伴吟诗月里行。

州城全是故吴宫，香径难寻古藓中。云水计程千里远，
轩车送别九衢空。鹤声高下听无尽，潮色朝昏望不同。
太守吟诗人自理，小斋闲卧白蘋风。

卷 496_9【送贾谔赴共城营田】

· 全唐诗 ·

姚合

上国羞长选，戎装贵所从。山田依法种，兵食及时供。
水气诗书软，岚烟笔砚浓。几时无事扰，相见得从容。

卷 496_10【送裴宰君】

姚合

见说为官处，烟霞思不穷。夜猿啼户外，瀑水落厨中。
名药人难识，仙山路易通。还应施静化，谁复与君同。

卷 496_11【送顾非熊下第归越】

姚合

失意寻归路，亲知不复过。家山去城远，日月在船多。
楚塞数逢雁，浙江长有波。秋风别乡老，还听鹿鸣歌。

卷 496_12【送雍陶游蜀】

姚合

春色三千里，愁人意未开。木梢穿栈出，雨势隔江来。

· 全唐诗 ·

荒馆因花宿，深山羨客回。相如何物在，应只有琴台。

卷 496_13【送崔约下第归扬州】

姚合

满座诗人吟送酒，离城此会亦应稀。春风下第时称屈，
秋卷呈亲自束归。日晚山花当马落，天阴水鸟傍船飞。
江边道路多苔藓，尘土无由得上衣。

卷 496_14【送李廓侍御赴西川行营】

姚合

不道弓箭字，罢官唯醉眠。何人荐筹策，走马逐旌旃。
阵变孤虚外，功成语笑前。从今蜀州路，无复有烽烟。

卷 496_15【送杨尚书赴东川】

姚合

却縠诗书将，衔恩赴梓州。绕身垂印绶，护马执戈矛。
剑阁和铭峭，巴江带字流。从来皆惜别，此别复何愁。

· 全唐诗 ·

卷 496_16 【送邢郎中赴太原】

姚合

上将得良策，恩威作长城。如今并州北，不见有胡兵。
晋野雨初足，汾河波亦清。所从古无比，意气送君行。

卷 496_17 【送裴中丞赴华州】

姚合

我梦何曾应，看君渡浚川。自无仙掌分，非是圣心偏。
径草多生药，庭花半落泉。人间有此郡，况在凤城边。

卷 496_18 【送徐员外赴河中从事】

姚合

赤府从军美，儒衣结束轻。凉飈下山寺，晓浪满关城。
闲坐饶诗景，高眠长道情。将军不战术，计日立功名。

卷 496_19 【送殷尧藩侍御赴同州】

· 全唐诗 ·

姚合

吟诗掷酒船，仙掌白楼前。从事关中贵，主人天下贤。
此生无了日，终岁踏离筵。何计因归去，深山恣意眠。

卷 496_20 【送崔中丞赴郑州】

姚合

仆射陂前郡，清高越四邻。丹霞凤诏下，太守虎符新。
雾湿关城月，花香驿路尘。连枝相庭树，岁岁一家春。

卷 496_21 【送丁端公赴河阴】

姚合

炎天木叶焦，晓夕绝凉飙。念子独归县，何人不在朝。
市连风浪动，帆彻海门遥。饮尽樽中酒，同年同寂寥。

卷 496_22 【送郑尚书赴兴元】

姚合

儒有登坛贵，何人得此功。红旗烧密雪，白马踏长风。

· 全唐诗 ·

斧钺来天上，诗书理汉中。方知百胜略，应不在弯弓。

卷 496_23【送田使君赴蔡州】

姚合

长年离别情，百盏酒须倾。诗外应无思，人间半是行。
路遥嘶白马，林断出红旗。功业今应立，淮西有劲兵。

卷 496_24【送无可上人游边】

姚合

一钵与三衣，经行远近随。出家还养母，持律复能诗。
春雪离京厚，晨钟近塞迟。亦知莲府客，夜坐喜同师。

卷 496_25【送僧】

姚合

人间扰扰唯闲事，自见高人只有诗。
寂寞嵩峰云外寺，常多梦里过斋时。

城中听得新经论，却过关东说向人。

· 全唐诗 ·

旧国门徒终日望，见时应是见真身。

卷 496_26【送宋慎言】

姚合

童稚便知闻，如今只有君。百篇诗尽和，一盏酒须分。
驿路多连水，州城半在云。离情同落叶，向晚更纷纷。

卷 496_27【送家兄赴任昭义】

姚合

早得白眉名，之官濠上城。别离浮世事，迢递长年情。
广陌垂花影，遥林起雨声。出关春草长，过汴夏云生。
黠吏先潜去，疲人相次迎。宴余和酒拜，魂梦共东行。

卷 496_28【送崔玄亮赴果州冬夜宴韩卿宅】

姚合

兰烛照重茵，飞杯复几分。主人寒不寐，上客晓离群。
骑吏缘青壁，旌旗度白云。剑铭生藓色，巴字叠冰文。
华省思仙侣，疲民爱使君。泠泠唯自适，郡邸有谁闻。

· 全唐诗 ·

卷 496_29【送喻皃校书归毗陵】

姚合

主人庭叶黑，诗稿更谁书。阙下科名出，乡中赋籍除。
山春烟树众，江远晚帆疏。吾亦家吴者，无因到弊庐。

卷 496_30【送董正字武归常州觐亲】

姚合

路岐知不尽，离别自无穷。行客心方切，主人樽未空。
楚檣收月下，江树在潮中。人各还家去，还家庆不同。

卷 496_31【送萧正字往蔡州贺裴相淮西平】

姚合

相府旌旄重，还邀上客行。今朝郭门路，初彻蔡州城。
从马唯提酒，防身不要兵。从来皆作使，君去是时平。

卷 496_32【送进士田卓入华山】

· 全唐诗 ·

姚合

何物随身去，六经与一琴。辞家计已久，入谷住应深。
偶坐僧同石，闲书叶满林。业成须谒帝，无贮白云心。

卷 496_33【送右司薛员外赴处州】

姚合

怀中天子书，腰下使君鱼。瀑布和云落，仙都与世疏。
远程兼水陆，半岁在舟车。相送难相别，南风入夏初。

卷 496_34【送王建秘书往渭南庄】

姚合

白须芸阁吏，羸马月中行。庄僻难寻路，官闲易出城。
看山多失饭，过寺故题名。秋日田家作，唯添集卷成。

卷 496_35【送殷尧藩侍御游山南】

姚合

诗境西南好，秋深昼夜蛩。人家连水影，驿路在山峰。

· 全唐诗 ·

谷静云生石，天寒雪覆松。我为公府系，不得此相从。

卷 496_36【送李植侍御】

姚合

圣代无邪触，空林獬豸归。谁知陇山鸟，长绕玉楼飞。
风雨依山急，云泉入郭微。无同昔年别，别后寄书稀。

卷 496_37【送王澹】

姚合

常省为官处，门前数树松。寻山屐费齿，书石笔无锋。
果熟猿偷乱，花繁鸟语重。今来为客去，惜取最高峰。

卷 496_38【送崔之仁】

姚合

欲出还成住，前程甚谪迁。佯眠随客醉，愁坐似僧禅。
旧国归何处，春山买欠钱。几时无一事，长在故人边。

· 全唐诗 ·

卷 496_39 【送孙山人】

姚合

山翁来帝里，不肯住多时。尘土衣裳重，腥膻仆隶饥。
林中愁不到，城外老应迟。喧寂一为别，相逢未有期。

卷 496_40 【送费骧】

姚合

兄寒弟亦饥，力学少闲时。何路免为客，无门卖得诗。
几人携酒送，独我入山迟。少小同居止，今朝始别离。

卷 496_41 【送河中杨少府宴崔駙马宅】

姚合

凤凰楼下醉醺醺，晚出东门蝉渐闻。不使乡人治驿路，
却将家累宿山云。闲时采药随僧去，每月请钱共客分。
县吏若非三载满，自知无计更寻君。

卷 496_42 【送文著上人游越】

· 全唐诗 ·

姚合

水石随缘岂计程，东吴相遇别西京。夜禅月下袈裟湿，
晓上山巅锡杖鸣。念我为官应易老，羡师依佛学无生。
越中多有前朝寺，处处铁钟石磬声。

卷 496_43【送无可上人游越】

姚合

清晨相访立门前，麻履方袍一少年。懒读经文求作佛，
愿攻诗句觅升仙。芳春山影花连寺，独夜潮声月满船。
今日送行偏惜别，共师文字有因缘。

卷 496_44【送洛阳张员外】

姚合

钱客未归城，东来骆骑迎。千山嵩岳峭，百县洛阳清。
朔雁和云度，川风吹雨晴。薛庭公事暇，应只独吟行。

卷 496_45【送少府田中丞入西蕃】

姚合

· 全唐诗 ·

萧关路绝久，石堠亦为尘。护塞空兵帐，和戎在使臣。
风沙去国远，雨雪换衣频。若问凉州事，凉州多汉人。

卷 496_46【送王龟处士】

姚合

送客客为谁，朱门处士稀。唯修曾子行，不著老莱衣。
古寺随僧饭，空林共鸟归。壶中驻年药，烧得献庭闱。

卷 496_47【送崔郎中赴常州】

姚合

贵是鹄原在紫微，荣逢知己领黄扉。人间盛事今全得，
江上政声复欲归。风起满城山果落，雨馀穿宅水禽飞。
昔年尝作毗陵客，石峭泉清天下稀。

卷 496_48【送林使君赴邵州】

姚合

诏书飞下五云间，才子分符不等闲。驿路算程多是水，
州图管地少于山。江头斑竹寻应遍，洞里丹砂自采还。

· 全唐诗 ·

清净化人人自理，终朝无事更相关。

卷 496_49【送别友人】

姚合

独向山中觅紫芝，山人勾引住多时。摘花浸酒春愁尽，
烧竹煎茶夜卧迟。泉落林梢多碎滴，松生石底足旁枝。
明朝却欲归城市，问我来期总不知。

卷 496_50【送李琮归灵州觐省】

姚合

饯席离人起，贪程醉不眠。风沙移道路，仆马识山川。
塞树花开小，关城雪下偏。胡尘今已尽，应便促朝天。

卷 496_51【送任畹评事赴沂海】

姚合

掷笔不作尉，戎衣从嫖姚。严冬入都门，仆马气益豪。
沂州右镇雄，士勇旌旗高。洛东无忧虞，半夜开虎牢。
丈夫贵功勋，不贵爵禄饶。仰眠作书生，衣食何由销。

· 全唐诗 ·

任生非常才，临事胆不摇。必当展长画，逆波斩鲸鳌。
九陌尘土黑，话别立远郊。孟坚勒燕然，岂独在汉朝。

卷 496_52【送李余及第归蜀】

姚合

蜀山高岧峣，蜀客无平才。日饮锦江水，文章盈其怀。
十年作贡宾，九年多遭回。春来登高科，升天得梯阶。
手持冬集书，还家献庭闱。人生此为荣，得如君者稀。
李白蜀道难，羞为无成归。子今称意行，所历安觉危。
与子久相从，今朝忽乖离。风飘海中船，会合难自期。
长安米价高，伊我常渴饥。临岐歌送子，无声但陈词。
义交外不亲，利交内相违。勉子慎其道，急若食与衣。
苦蕒道路赤，行人念前驰。一杯不可轻，远别方自兹。

卷 496_53【送饶州张使君】

姚合

鄱阳胜事闻难比，千里连连是稻畦。山寺去时通水路，
郡图开处是诗题。化行应免农人困，庭静惟多野鹤栖。
饮罢春明门外别，萧条驿路夕阳低。

· 全唐诗 ·

卷 496_54 【送张宗原】

姚合

东门送客道，春色如死灰。一客失意行，十客颜色低。
住者既无家，去者又非归。穷愁一成疾，百药不可治。
子贤我且愚，命分不合齐。谁开蹇蹇门，日日同游栖。
子行何所之，切切食与衣。谁能买仁义，令子无寒饥。
野田不生草，四向生路岐。士人甚商贾，终日须东西。
鸿雁春北去，秋风复南飞。勉君向前路，无失相见期。

卷 496_55 【送王求】

姚合

士有经世筹，自无活身策。求食道路间，劳困甚徒役。
我身与子同，日被饥寒迫。侧望卿相门，难入坚如石。
为农昧耕耘，作商迷贸易。空把书卷行，投入买罪责。
六月南风多，苦旱土色赤。坐家心尚焦，况乃远作客。
羸马出郭门，餧饮晓连夕。愿君似醉肠，莫漫生忧戚。

卷 496_56 【送朱庆余及第后归越】

姚合

· 全唐诗 ·

劝君缓上车，乡里有吾庐。未得同归去，空令相见疏。
山晴栖鹤起，天晓落潮初。此庆将谁比，献亲冬集书。

卷 496_57【送朱庆馀越州归觐】

姚合

乡书落姓名，太守拜亲荣。访我波涛郡，还家雾雨城。
海山窗外近，镜水世间清。何计随君去，邻墙过此生。

卷 496_58【送任尊师归蜀觐亲】

姚合

白云修道者，归去春风前。玉简通仙籍，金丹驻母年。
锦文江一色，酒气雨相连。众说君平死，真师易义全。

卷 496_59【送友人游蜀】

姚合

送君一壶酒，相别野庭边。马上过秋色，舟中到锦川。
峡猿啼夜雨，蜀鸟噪晨烟。莫便不回首，风光促几年。

· 全唐诗 ·

卷 496_60【送杜立归蜀】

姚合

迢递三千里，西南是去程。杜陵家已尽，蜀国客重行。
雪照巴江色，风吹栈阁声。马嘶山稍暖，人语店初明。
旅梦心多感，孤吟气不平。谁为李白后，为访锦官城。

卷 496_61【送韩湘赴江西从事】

姚合

年少登科客，从军诏命新。行装有兵器，祖席尽诗人。
细雨湘城暮，微风楚水春。浔阳应足雁，梦泽岂无尘。
猿叫来山顶，潮痕在树身。从容多暇日，佳句寄须频。

卷 496_62【送潘传秀才归宣州】

姚合

李白坟三尺，嵯峨万古名。因君还故里，为我吊先生。
晴日移虹影，空山出鹤声。老郎闲未得，无计此中行。

· 全唐诗 ·

卷 496_63【送僧默然】

姚合

出家侍母前，至孝自通禅。伏日江头别，秋风橈下眠。
鸟声猿更促，石色树相连。此路多如此，师行亦有缘。

卷 496_64【送陟遐上人游天台】

姚合

万叠赤城路，终年游客稀。朝来送师去，自觉有家非。
石净山光远，云深海色微。此诗成亦鄙，为我写岩扉。

卷 496_65【送盛秀才赴举】

姚合

重重吴越浙江潮，刺史何门始得消。五字州人唯有此，
四邻风景合相饶。橘村篱落香潜度，竹寺虚空翠自飘。
君去九衢须说我，病成疏懒懒趋朝。

卷 496_66【送僧贞实归杭州天竺】

· 全唐诗 ·

姚合

石桥寺里最清凉，闻说茆庵寄上方。林外猿声连院磬，
月中潮色到禅床。他生念我身何在，此世唯师性亦忘。
九陌相逢千里别，青山重叠树苍苍。

卷 496_67【送卢二弟茂才罢举游洛谒新相】

姚合

踏碎作赋笔，驱车出上京。离筵俯岐路，四坐半公卿。
守命贫难掷，忧身梦数惊。今朝赴知己，休咏苦辛行。

卷 496_68【送任畹及第归蜀中觐亲】

姚合

子规啼欲死，君听固无愁。阙下声名出，乡中意气游。
东川横剑阁，南斗近刀州。神圣题前字，千人看不休。

卷 496_69【送杜观罢举东游】

姚合

· 全唐诗 ·

秋风离九陌，心事岂云安。曾是求名苦，当知此去难。
辛勤程自远，寂寞夜多寒。诗句无人识，应须把剑看。

卷 496_70【送狄兼谟下第归故山】

姚合

慈恩塔上名，昨日败垂成。赁舍应无直，居山岂钓声。
半年犹小隐，数日得闲行。映竹窥猿剧，寻云探鹤情。
爱花高酒户，煮药污茶铛。莫便多时住，烟霄路在城。

卷 496_71【送源中丞赴新罗】

姚合

赤墀赐对使殊方，官重霜台紫绶光。玉节在船清海怪，
金函开诏拜夷王。云晴渐觉山川异，风便那知道路长。
谁得似君将雨露，海东万里洒扶桑。

卷 496_72【送陈侔赴江陵从事】

姚合

荆州胜事众皆闻，幕下今朝又得君。才子何须藉科第，

· 全唐诗 ·

男儿终久要功勋。江村竹树多于草，山路尘埃半是云。
新什定知饶景思，不应一向赋从军。

卷 496_73【送张郎中副使赴泽潞】

姚合

晓陌事戎装，风流粉署郎。机筹通变化，除拜出寻常。
地冷饶霜气，山高碍雁行。应无离别恨，车马自生光。

卷 496_74【送陆畅侍御归扬州】

姚合

故园偏接近，雪水洞庭边。归去知何日，相逢各长年。
山川南北路，风雪别离天。楚色穷冬烧，淮声独夜船。
从军丞相府，谈笑酒杯前。

卷 496_75【送韦瑶校书赴越】

姚合

寄家临禹穴，乘传出秦关。霜落橘满地，潮来帆近山。
相门宾益贵，水国事多闲。晨省高堂后，余欢杯酒间。

· 全唐诗 ·

卷 496_76 【送雍陶及第归觐】

姚合

献亲冬集书，比橘复何如。此去关山远，相思笑语疏。
路寻丹壑断，人近白云居。幽石题名处，凭君亦记余。

卷 496_77 【送李秀才赴举】

姚合

罗刹楼头醉，送君西入京。秦吴无限地，山水半分程。
海上烟霞湿，关中日月明。登科旧乡里，当为改嘉名。

卷 496_78 【送李传秀才归宣州】

姚合

谢守青山宅，山孤宅亦平。池塘无复见，春草野中生。
常日登楼望，今朝送客行。殷勤拂石壁，为我一书名。

卷 496_79 【送元绪上人游商山】

· 全唐诗 ·

姚合

万法空门里，师修历几生。过来心已悟，未到行弥精。
溪寂钟还度，林昏锡独鸣。朝簪抽未得，此别岂忘情。

卷 496_80【送僧栖真归杭州天竺寺】

姚合

吏事日纷然，无因到佛前。劳师相借问，知我亦通禅。
古寺杉松出，残阳钟磬连。草庵盘石上，归此是因缘。

卷 496_81【送敬法师归福州】

姚合

结得随缘伴，蝉鸣方出关。新经译旧寺，故国与谁还。
斋为无钟早，心因罢讲闲。东南数千里，何处不逢山。

卷 496_82【送清敬闍黎归浙西】

姚合

大地无生理，吴中岂是归。自翻贝叶偈，人施福田衣。

· 全唐诗 ·

夏尽滩声出，潮来日色微。郡斋师去后，寂寞夜吟稀。

卷 496_83【送贾岛及钟浑】

姚合

日日攻诗亦自强，年年供应在名场。
春风驿路归何处，紫阁山边是草堂。

卷 496_84【送僧游边】

姚合

师向边头去，边人业障轻。腥膻斋自洁，部落讲还成。
传教多离寺，随缘不计程。三千世界内，何处是无生。

卷 496_85【送澄江上人赴兴元郑尚书招】

姚合

师经非纸上，师佛在心中。觉路何曾异，行人自不同。
水云晴亦雨，山木夜多风。闻结西方社，尚书待远公。

· 全唐诗 ·

卷 496_86 【送马戴下第客游】

姚合

昨来送君处，亦是九衢中。此日殷勤别，前时寂寞同。
鸟啼寒食雨，花落暮春风。向晚离人起，筵收樽未空。

卷 496_87 【送薛二十三郎中赴婺州】

姚合

我住浙江西，君去浙江东。日日心来往，不畏浙江风。

卷 496_88 【送独孤焕评事赴丰州】

姚合

东门携酒送廷评，结束从军塞上行。深磧路移唯马觉，
断蓬风起与雕平。烟生远戍侵云色，冰叠黄河长雪声。
须凿燕然山上石，登科记里是闲名。

卷 496_89 【送张齐物主簿赴内乡】

· 全唐诗 ·

姚合

几年山下事仙翁，名在长生策籍中。
烧得药成须寄我，曾为主簿与君同。

卷 496_90【送王嗣之典仪城】

姚合

日日思朝位，偷闲城外行。唯求采药者，不道在官名。
好异嫌山浅，寻幽喜径生。病来文字拙，不要把归城。

卷 496_91【别贾岛】

姚合

懒作住山人，贫家日赁身。书多笔渐重，睡少枕长新。
野客狂无过，诗仙瘦始真。秋风千里去，谁与我相亲。

卷 496_92【别李余】

姚合

病童随瘦马，难算往来程。野寺僧相送，河桥酒滞行。

· 全唐诗 ·

足愁无道性，久客会人情。何计羁穷尽，同居不出城。

卷 496_93【别胡逸】

姚合

记得春闱同席试，逡巡何啻十年余。
今日相逢又相送，予乘五马子单车。

卷 496_94【惜别】

姚合

酒阑歌罢更迟留，携手思量凭翠楼。桃李容华犹叹月，
风流才器亦悲秋。光阴不觉朝昏过，岐路无穷早晚休。
似把剪刀裁别恨，两人分得一般愁。

卷 496_95【欲别】

姚合

山川重叠远茫茫，欲别先忧别恨长。红芍药花虽共醉，
绿蘼芜影又分将。鸳鸯有路高低去，鸿雁南飞一两行。
惆怅与君烟景迥，不知何日到潇湘。

· 全唐诗 ·

卷 496_96 【别杭州】

姚合

醉与江涛别，江涛惜我游。他年婚嫁了，终老此江头。

· 全唐诗 ·

第四百九十七卷

卷 497_1【寄贾岛】

姚合

漫向城中住，儿童不识钱。
瓮头寒绝酒，灶额晓无烟。
狂发吟如哭，愁来坐似禅。
新诗有几首，旋被世人传。

卷 497_2【寄王度居士】

姚合

憔悴王居士，颠狂不称时。
天公与贫病，时辈复轻欺。
茅屋随年借，盘餐逐日移。
弃嫌官似梦，珍重酒如师。
无竹栽芦看，思山叠石为。
静窗留客话，古寺觅僧棋。
瘦马寒来死，羸童饿得痴。
唯应寻阮籍，心事远相知。

卷 497_3【寄杨茂卿校书】

姚合

· 全唐诗 ·

去年别君时，同宿黎阳城。黄河冻欲合，船入冰罅行。
君为使滑州，我来西入京。丈夫不泣别，旁人叹无情。
到京就省试，落籍先有名。惭辱乡荐书，忽欲自受刑。
还家岂无路，羞为路人轻。决心住城中，百败望一成。
腐草众所弃，犹能化为萤。岂我愚暗身，终久不发明。
所悲道路长，亲爱难合并。还如舟与车，奔走各异程。
耳目甚短狭，背面若聋盲。安得学白日，远见君仪形。

卷 497_4【寄杜师义】

姚合

出处难相见，同城似异乡。点兵寻户籍，烧药试仙方。
事校千般别，心还一种忙。黄金如化得，相寄亦何妨。

卷 497_5【寄陆浑县尉李景先】

姚合

微俸还同请，唯君独自闲。地偏无驿路，药贱管仙山。
月色生松里，泉声在石间。吟诗复饮酒，何事更相关。

卷 497_6【寄酬卢侍御】

· 全唐诗 ·

姚合

诗新得意恣狂疏，挥手终朝力有余。
今到诗家浑手战，欲题名字倩人书。

卷 497_7【寄主客张郎中】

姚合

年长方慕道，金丹事参差。故园归未得，秋风思难持。
蹇拙公府弃，朴静高人知。以我齐杖屦，昏旭讵相离。
吟诗红叶寺，对酒黄菊篱。所赏未及毕，后游良有期。
粲粲华省步，屑屑旅客姿。未同山中去，固当殊路岐。

卷 497_8【寄鄆县尉李廓少府】

姚合

岁满休为吏，吟诗著白衣。爱山闲卧久，在世此心稀。
听鹤向风立，捕鱼乘月归。此君才不及，谬得侍彤闱。

卷 497_9【寄紫阁隐者】

姚合

· 全唐诗 ·

自闻樵客说，无计得相寻。几世传高卧，全家在一林。
养情书览苦，采药路多深。愿得为邻里，谁能说此心。

卷 497_10【寄国子杨巨源祭酒】

姚合

日日新诗出，城中写不禁。清高疑对竹，闲雅胜闻琴。
门户饶秋景，儿童解冷吟。云山今作主，还借外人寻。

卷 497_11【寄永乐长官殷尧藩】

姚合

故人为吏隐，高卧簿书间。绕院唯栽药，逢僧只说山。
此宵欢不接，穷岁信空还。何计相寻去，严风雪满关。

卷 497_12【冬夜书事寄两省阁老】

姚合

天寒渐觉雁声疏，新月微微玉漏初。海峤只宜今日去，
故乡已过十年余。发稀岂易胜玄冕，眼暗应难写谏书。
阁下群公尽高思，谁能携酒访贫居。

· 全唐诗 ·

卷 497_13【寄灵一律师】

姚合

梵书钞律千馀纸，净院焚香独受持。
童子病来烟火绝，清泉漱口过斋时。

卷 497_14【郡中书事寄默然上人】

姚合

郡中饶野兴，过客亦淹留。看月江楼晓，寻山石径秋。
意归何处老，谁免此生愁。长爱东林子，安禅百事休。

卷 497_15【寄张溪】

姚合

幽处寻书坐，朝朝闭竹扉。山僧封茗寄，野客乞诗归。
秋卷多唯好，时名屈更肥。明年取前字，杯酒赛春辉。

卷 497_16【寄李频】

· 全唐诗 ·

姚合

闭门常不出，惟觉长庭莎。朋友来看少，诗书卧读多。
命随才共薄，愁与醉相和。珍重君名字，新登甲乙科。

卷 497_17【寄李群玉】

姚合

九衢名与利，无计扰闲人。道远期轻世，才高贵重身。
石脂稀胜乳，玉粉细于尘。骨换肌肤腻，心灵气色真。
嵩山高到日，洛水暖如春。居住应安稳，黄金几灶新。

卷 497_18【病中书事寄友人】

姚合

终日自缠绕，此身无适缘。万愁生雨夜，百病凑衰年。
多睡憎明屋，慵行待暖天。疮头梳有虱，风耳乱无蝉。
换白方多错，回金法不全。家贫何所怨，将在老僧边。

卷 497_19【九日寄钱可复】

姚合

· 全唐诗 ·

数杯黄菊酒，千里白云天。上国名方振，戎州病未痊。
静愁惟忆醉，闲走不胜眠。惆怅东门别，相逢知几年。

卷 497_20【春日早朝寄刘起居】

姚合

九衢寒雾敛，双阙曙光分。彩仗迎春日，香烟接瑞雪。
珮声清漏间，天语侍臣闻。莫笑冯唐老，还来谒圣君。

卷 497_21【秋日寄李支使】

姚合

秋思朝来起，侵人暑稍微。晓眠离北户，午饭尚生衣。
山静云初白，枝高果渐稀。闻君家海上，莫与燕同归。

卷 497_22【寄汴州令狐楚相公】

姚合

汴水从今不复浑，秋风鼙鼓动城根。梁园台馆关东少，
相府旌旗天下尊。诗好四方谁敢和，政成三郡自无冤。
几时诏下归丹阙，还领千官入阁门。

· 全唐诗 ·

卷 497_23【寄东都分司白宾客】

姚合

阙下高眠过十旬，南宫印绶乞离身。诗中得意应千首，
海内嫌官只一人。宾客分司真是隐，山泉绕宅岂辞贫。
竹斋晚起多无事，唯到龙门寺里频。

卷 497_24【寄裴起居】

姚合

千官晓立炉烟里，立近丹墀是起居。
彩笔专书皇帝语，书成几卷太平书。

卷 497_25【寄狄拾遗，时为魏州从事】

姚合

少在兵马间，长还系戎职。鸡飞不得远，岂要生羽翼。
三年城中游，与君最相识。应知我中肠，不苟念衣食。
主人树勋名，欲灭天下贼。愚虽乏智谋，愿陈一夫力。
人生须气健，饥冻缚不得。睡当一席宽，觉乃千里窄。
古人不惧死，所惧死无益。至交不可合，一合难离坼。

· 全唐诗 ·

君尝相劝勉，苦语毒胸臆。百年心知同，谁限河南北。

卷 497_26【金州书事寄山中旧友】

姚合

安康虽好郡，刺史是憨翁。买酒终朝饮，吟诗一室空。
自知为政拙，众亦觉心公。亲事星河在，忧人骨肉同。
簿书岚色里，鼓角水声中。井邑神州接，帆樯海路通。
野亭晴带雾，竹寺夏多风。溉稻长洲白，烧林远岫红。
旧山期已失，芳草思何穷。林下无相笑，男儿五马雄。

卷 497_27【寄紫阁无名头陀】

姚合

峭行得如如，谁分圣与愚。不眠知梦妄，无号免人呼。
山海禅皆遍，华夷佛岂殊。何因接师话，清净在斯须。

卷 497_28【寄郁上人】

姚合

此生修道浅，愁见未来身。谁为传真谛，唯应是上人。

· 全唐诗 ·

自悲年已长，渐觉事难亲。不向禅门去，他门无了因。

卷 497_29【寄孙路秀才】

姚合

幽居邻里少，江际复山阿。潮去蝉声出，天晴鹤语多。
老人能步蹇，才子奈贫何。曾见春官语，年来虚甲科。

卷 497_30【寄安陆友人】

姚合

别路在春色，故人云梦中。鸟啼三月雨，蝶舞百花风。
烟束远山碧，霞欹落照红。想君登此兴，回首念飘蓬。

卷 497_31【寄马戴】

姚合

天府鹿鸣客，幽山秋未归。我知方甚爱，众说以为非。
隔屋闻泉细，和云见鹤微。新诗此处得，清峭比应稀。

· 全唐诗 ·

卷 497_32【寄贾岛，时任普州司仓】

姚合

长沙事可悲，普掾罪谁知。千载人空尽，一家冤不移。
吟寒应齿落，才峭自名垂。地远山重叠，难传相忆词。

卷 497_33【寄杨工部，闻毗陵舍弟自毚溪入茶山】

姚合

采茶溪路好，花影半浮沉。画舸僧同上，春山客共寻。
芳新生石际，幽嫩在山阴。色是春光染，香惊日气侵。
试尝应酒醒，封进定恩深。芳贻千里外，怡怡太府吟。

卷 497_34【寄陕州王司马】

姚合

家寄秦城非本心，偶然头上有朝簪。自当台直无因醉，
一别诗宗更懒吟。世事每将愁见扰，年光唯与老相侵。
欲知居处堪长久，须向山中学煮金。

· 全唐诗 ·

卷 497_35【寄贾岛】

姚合

寂寞荒原下，南山只隔篱。家贫唯我并，诗好复谁知。
草色无穷处，虫声少尽时。朝昏鼓不到，闲卧益相宜。

卷 497_36【寄崔之仁山人】

姚合

百门坡上住，石屋两三间。日月难教老，妻儿乞与闲。
仙经拣客问，药债煮金还。何计能相访，终身得在山。

卷 497_37【寄嵩岳程光范】

姚合

相别何容易，相逢便岁年。客来嫌路远，谁得到君边。
岳色鸟啼里，钟声竹影前。只应访支遁，时得话诗篇。

卷 497_38【洛下夜会寄贾岛】

· 全唐诗 ·

姚合

洛下攻诗客，相逢只是吟。夜觞欢稍静，寒屋坐多深。
乌府偶为吏，沧江长在心。忆君难就寝，烛灭复星沉。

卷 497_39【寄华州李中丞】

姚合

毛女峰前郡，烟霞气转清。庭分灵掌影，窗度瀑泉声。
藓径人稀到，松斋药自生。常餐亦芝朮，闲客是公卿。
看水逢仙鹤，登楼见帝城。养生非酒病，难隐是诗名。
省署尝连步，江皋欲独耕。偶题无六义，聊以达微诚。

卷 497_40【病中辱谏议惠甘菊药苗，因以诗赠】

姚合

萧萧一亩宫，种菊十馀丛。采摘和芳露，封题寄病翁。
熟宜茶鼎里，餐称石瓯中。香洁将何比，从来味不同。

卷 497_41【舟行书事，寄杭州崔员外】

姚合

· 全唐诗 ·

张颐任酒浇，开眼信花烧。旧国归何滞，新知别又遥。
夜行篙触石，晚泊缆依桥。若未重相见，无门解寂寥。

卷 497_42【寄元绪上人】

姚合

石窗紫藓墙，此世此清凉。研露题诗洁，消冰煮茗香。
闲云春影薄，孤磬夜声长。何计休为吏，从师老草堂。

卷 497_43【寄白阁默然】

姚合

白阁峰头雪，城中望亦寒。高僧多默坐，清夜到明看。
世上无诸苦，林间只一餐。尝闻南北教，所得比师难。

卷 497_44【夏日书事寄丘亢处士】

姚合

暑天难可度，岂复更持觞。树里鸣蝉咽，宫中午漏长。
病夫心益躁，静者室应凉。几欲相寻去，红尘满路旁。

· 全唐诗 ·

卷 497_45【秋中寄崔道士】

姚合

贫居雀喧噪，况乃静巷陌。夜眠睡不成，空庭闻露滴。
旁有一杯酒，欢然如对客。月光久逾明，照得笔墨白。
平生志舒豁，难可似兹夕。四肢得自便，虽劳不为役。
故人山中住，善治活身策。五谷口不尝，比僧更闲寂。
我今暂得安，自谓脱幽戚。君身长逍遥，日月争老得。

卷 497_46【寄华州崔中丞】

姚合

莲华峰下郡，仙洞亦难胜。閤里苍苔水，虚空瀑布冰。
酒香和药熟，山峭过云登。清净黎人泰，唯忧急诏征。

卷 497_47【秋日书事，寄秘书窦少监】

姚合

秋气日骚骚，星星双鬓毛。凉天吟自远，清夜梦还高。
林下期同去，人间共是劳。头巾何所直，且漉瓮头糟。

· 全唐诗 ·

卷 497_48【友人南游不回因寄】

姚合

相思春树绿，千里亦依依。鄠杜月频满，潇湘人不归。
桂花风畔落，烟草蝶双飞。一别无消息，水南车迹稀。

卷 497_49【早春山居寄城中知己】

姚合

阳和潜发荡寒阴，便使川原景象深。入户风泉声沥沥，
当轩云岫影沉沉。残云带雨轻飘雪，嫩柳含烟小绽金。
虽有眼前诗酒兴，邀游争得称闲心。

卷 497_50【辞白宾客归后寄】

姚合

千骑红旗不可攀，水头独立暮方还。
家人怪我浑如病，尊酒休倾笔砚间。

卷 497_51【寄右史李定言】

· 全唐诗 ·

姚合

才归龙尾含鸡舌，更立螭头运兔毫。
阊阖欲开金漏尽，冕旒初坐御香高。

卷 497_52【寄绛州李使君】

姚合

独施清静化，千里管横汾。黎庶应深感，朝廷亦细闻。
心期在黄老，家事是功勋。物外须仙侣，人间要使君。
花多匀地落，山近满厅云。戎客无因去，西看白日曛。

卷 497_53【寄送卢拱秘书游魏州】

姚合

太行山下路，荆棘昨来平。一自开元后，今逢上客行。
地形吞北虏，人事接东京。扫洒氛埃静，游从气概生。
蓟门春不艳，淇水暖还清。看野风情远，寻花酒病成。
官闲身自在，诗逸语纵横。车马回应晚，烟光满去程。

卷 497_54【秋晚夜坐寄院中诸曹长】

· 全唐诗 ·

姚合

腰间垂印囊，白发未归乡。还往应相责，朝昏亦自伤。
穷愁山影峭，独夜漏声长。寂寞难成寐，寒灯侵晓光。

卷 497_55【书怀寄友人】

姚合

精心奉北宗，微宦在南宫。举世劳为适，开门事不穷。
年来复几日，蝉去又鸣鸿。衰疾谁人问，闲情与酒通。
四邻寒稍静，九陌夜方空。知老何山是，思归愚谷中。

卷 497_56【寄无可上人】

姚合

十二门中寺，诗僧寺独幽。多年松色别，后夜磬声秋。
见世虑皆尽，来生事更修。终须执瓶钵，相逐入牛头。

卷 497_57【寄晖上人】

姚合

· 全唐诗 ·

日出月复没，悠悠昏与明。修持经几劫，清净到今生。
林下知无相，人间苦是情。终期逐师去，不拟老尘缨。

卷 497_58【寄李干】

姚合

寻常自怪诗无味，虽被人吟不喜闻。
见说与君同一格，数篇到火却休焚。

卷 497_59【寄贾岛浪仙】

姚合

悄悄掩门扉，穷窘自维縻。世途已昧履，生计复乖缉。
疏我非常性，端峭尔孤立。往还纵云久，贫蹇岂自习。
所居率荒野，宁似在京邑。院落夕弥空，虫声雁相及。
衣巾半僧施，蔬药常自拾。凛凛寝席单，翳翳灶烟湿。
颓篱里人度，败壁邻灯入。晓思已暂舒，暮愁还更集。
风凄林叶萎，苔糝行径涩。海峤誓同归，橡栗充朝给。

卷 497_60【寄九华费冠卿】

姚合

· 全唐诗 ·

逍遥晋缴外，高鸟与潜鱼。阙下无朝籍，林间有诏书。
夜眠青玉洞，晓饭白云蔬。四海人空老，九华君独居。
此心谁复识，日与世情疏。

卷 497_61【寄不疑上人】

姚合

是法修行遍，方栖不二门。随缘嫌寺著，见性觉经繁。
所叹身将老，始闻师一言。尘沙千万劫，劫尽佛长存。

卷 497_62【寄主客刘郎中】

姚合

汉朝共许贾生贤，迁谪还应是宿缘。仰德多时方会面，
拜兄何暇更论年。嵩山晴色来城里，洛水寒光出岸边。
清景早朝吟丽思，题诗应费益州笺。

卷 497_63【寄周十七起居】

姚合

冬冬九陌鼓声齐，百辟朝天马乱嘶。月照浓霜寒更远，

· 全唐诗 ·

风吹红烛举还低。官清立在金炉北，仗下归眠玉殿西。
莫笑老人多独出，晴山荒景觅诗题。

卷 497_64【秋夜寄默然上人】

姚合

霜月静幽居，闲吟梦觉初。秋深夜迢递，年长意萧疏。
海上归难遂，人间事尽虚。赖师方便语，渐得识真如。

卷 497_65【寄王玄伯】

姚合

夜归晓出满衣尘，转觉才名带累身。
莫觅旧来终日醉，世间杯酒属闲人。

卷 497_66【寄山中友人】

姚合

昨秋今复春，役役是非身。海上无归路，城中作老人。
流年何处去，白日每朝新。闻有长生术，将求未有因。

· 全唐诗 ·

卷 497_67【寄陕府内兄郭冏端公】

姚合

蹇钝无大计，酷嗜进士名。为文性不高，三年住西京。
相府执文柄，念其心专精。薄艺不退辱，特列为门生。
事出自非意，喜常少于惊。春榜四散飞，数日遍八纮。
眼始见花发，耳得闻鸟鸣。免同去年春，兀兀聋与盲。
家寄河朔间，道路出陕城。暌违逾十年，一会豁素诚。
同游山水穷，狂饮飞大觥。起坐不相离，有若亲弟兄。
中外无亲疏，所算在其情。久客贵优饶，一醉旧疾平。
家远归思切，风雨甚亦行。到兹恋仁贤，淹滞一月程。
新诗忽见示，气逸言纵横。缠绵意千里，骚雅文发明。
永昼吟不休，咽喉干无声。羁贫重金玉，今日金玉轻。

卷 497_68【寄题蔡州蒋亭兼简田使君】

姚合

几岁乱军里，蒋亭名不销。无人知旧径，有药长新苗。
树宿山禽静，池通野水遥。何因同此醉，永望思萧条。

卷 497_69【山居寄友人】

· 全唐诗 ·

姚合

独在山阿里，朝朝遂性情。晓泉和雨落，秋草上阶生。
因客始沽酒，借书方到城。诗情聊自遣，不是趁声名。

卷 497_70【寄崔之仁山人】

姚合

不得之仁消息久，秋来体色复何如。苦将杯酒判身病，
狂作文章信手书。官职卑微从客笑，性灵闲野向钱疏。
几时身计浑无事，拣取深山一处居。

卷 497_71【寄主客刘员外】

姚合

蝉稀虫唧唧，露重思悠悠。静者多便夜，豪家不见秋。
同归方欲就，微恙几时瘳。今日沧江上，何人理钓舟。

卷 497_72【山中寄友人】

姚合

· 全唐诗 ·

路岐何渺邈，在客易蹉跎。却是去家远，因循住日多。
几看春草绿，又见塞鸿过。未有进身处，忍教抛薜萝。

卷 497_73【寄友人】

姚合

日暮掩重扉，抽簪复解衣。漏声林下静，萤色月中微。
秋霁露华结，夜深人语稀。殷勤故山路，谁与我同归。

卷 497_74【寄李馀卧疾】

姚合

穷节弥惨栗，我讷自云乐。伊人婴疾恙，所对唯苦药。
寂寞行稍稀，清羸餐自薄。幽斋外浮事，梦寐亦简略。
雪户掩复明，风帘卷还落。方持数杯酒，勉子同斟酌。

卷 497_75【寄白石师】

姚合

白石师何在，师禅白石中。无情云可比，不食鸟难同。
屣下苍苔雪，龛前瀑布风。相寻未有计，只是礼虚空。

· 全唐诗 ·

卷 497_76【寄贾岛】

姚合

疏拙只如此，此身谁与同。高情向酒上，无事在山中。
渐老病难理，久贫吟益空。赖君时访宿，不避北斋风。

卷 497_77【寄默然上人】

姚合

晨餐夜复眠，日与月相连。天下谁无病，人间乐是禅。
几生通佛性，一室但香烟。结得无为社，还应有宿缘。

卷 497_78【寄不出院僧】

姚合

不行门外地，斋戒得清真。长食施来饭，深居锁定身。
朝昏常傍佛，起坐省逢人。非独心常净，衣无一点尘。

卷 497_79【万年县中雨夜会宿寄皇甫旬】

· 全唐诗 ·

姚合

县斋还寂寞，夕雨洗苍苔。清气灯微润，寒声竹共来。
虫移上阶近，客起到门回。想得吟诗处，唯应对酒杯。

卷 497_80【寄旧山隐者】

姚合

别君须臾间，历日两度新。念彼白日长，复值人事并。
未改当时居，心事如野云。朝朝恣行坐，百事都不闻。
奈何道未尽，出山最艰辛。奔走衢路间，四枝不属身。
名在进士场，笔毫争等伦。我性本朴直，词理安得文。
纵然自称心，又不合众人。以此名字低，不如风中尘。
昨逢卖药客，云是居山邻。说君忆我心，憔悴其形神。
昔是同枝鸟，今作万里分。万里亦未遥，喧静终难群。

卷 497_81【新居秋夕寄李廓】

姚合

羈滞多共趣，屡屡同室眠。稍暇更访诣，宁唯候招延。
愧君备蔬药，识我性所便。罢吏童仆去，洒扫或自专。
古巷人易息，疏迥自江边。幸当中秋夕，复此无云天。
月华更漏清，露叶光彩鲜。四邻亦悄悄，中怀益缠绵。

· 全唐诗 ·

兹境罕能致，居闲得弥偏。数杯罢复饮，共想山中年。

卷 497_82【赠卢大夫将军】

姚合

将军身在城，讷得虏尘清。酿酒邀闲客，吟诗直禁营。
苍鹰春不下，战马夜空鸣。碣石应无业，皇州独有名。
上山嫌髀重，拔剑叹衣生。公议今如此，登坛到即行。

卷 497_83【赠供奉僧次融】

姚合

会解如来意，僧家独有君。开经对天子，骑马过声闻。
本寺远于日，新诗高似云。热时吟一句，凉冷胜秋分。

卷 497_84【赠王尊师】

姚合

先生自说瀛洲路，多在青松白石间。海岸夜中常见日，
仙宫深处却无山。犬随鹤去游诸洞，龙作人来问大还。
今日偶闻尘外事，朝簪未掷复何颜。

· 全唐诗 ·

卷 497_85 【赠常州院僧】

姚合

一住毗陵寺，师应只信缘。院贫人施食，窗静鸟窥禅。
古磬声难尽，秋灯色更鲜。仍闻开讲日，湖上少鱼船。

卷 497_86 【赠卢沙弥小师】

姚合

怕见世间事，削头披佛衣。年小未受戒，会解如老师。
天与出家肠，一食斋不饥。麻履踏雪路，与马不肯骑。
嫌我身腥膻，似我见戎夷。彼此见会异，对面成别离。
我师文宣王，立教垂书诗。但全仁义心，自然便慈悲。
两教大体同，无处辨是非。莫以衣服别，到头不相知。

卷 497_87 【赠张籍太祝】

姚合

绝妙江南曲，凄凉怨女诗。古风无手敌，新语是人知。
飞动应由格，功夫过却奇。麟台添集卷，乐府换歌词。
李白应先拜，刘桢必自疑。贫须君子救，病合国家医。

· 全唐诗 ·

野客开山借，邻僧与米炊。甘贫辞聘币，依选受官资。
多见愁连晓，稀闻债尽时。圣朝文物盛，太祝独低眉。

卷 497_88【赠丘郎中】

姚合

绕篱栽杏种黄精，晓侍炉烟暮出城。
万事将身求总易，学君难得是长生。

卷 497_89【赠王建司马】

姚合

久向空门隐，交亲亦不知。文高轻古意，官冷似前资。
老觉僧斋健，贫还酒债迟。仙方小字写，行坐把相随。

卷 497_90【赠任士曹】

姚合

宪皇十一祀，共得春闱书。道直淹曹掾，命通侍玉除。
浮生年月促，九陌笑言疏。何计同归去，沧江有弊庐。

· 全唐诗 ·

卷 497_91【赠刘叉】

姚合

自君离海上，垂钓更何人。独宿空堂雨，闲行九陌尘。
避时曾变姓，救难似嫌身。何处相期宿，咸阳酒市春。

卷 497_92【赠僧绍明】

姚合

西方清净路，此路出何门。见说师知处，从来佛不言。
今生多病恼，自晓至黄昏。唯寐方无事，那堪梦亦喧。

卷 497_93【赠张质山人】

姚合

先生居处僻，荆棘与墙齐。酒好宁论价，诗狂不著题。
烧成度世药，踏尽上山梯。懒听闲人语，争如谷鸟啼。

卷 497_94【赠少室山麻襦僧】

· 全唐诗 ·

姚合

只辨麻为衲，此中经几春。庵前多猛兽，径小绝行人。
泉近湓瓶履，山深少垢尘。想师正法指，喻我独迷津。

卷 497_95【赠王山人】

姚合

贤哲论独诞，吾宗次定今。诗吟天地广，觉印果因深。
教演归恭敬，名标中外钦。既能施六度，了悟达双林。

卷 497_96【赠终南山傅山人】

姚合

七十未成事，终南苍鬓翁。老来诗兴苦，贫去酒肠空。
蟠蛰身仍病，鹏抟力未通。已无烧药本，唯有著书功。
白马时何晚，青龙岁欲终。生涯枯叶下，家口乱云中。
潭静鱼惊水，天晴鹤唳风。悲君还姓傅，独不梦高宗。

卷 497_97【使两浙赠罗隐】

姚合

· 全唐诗 ·

平时时风好涕流，谗书虽盛一名休。寰区叹屈瞻天问，
夷貊闻诗过海求。向夕便思青琐拜，近年寻伴赤松游。
何当世祖从人望，早以公台命卓侯。

· 全唐诗 ·

第四百九十八卷

卷 498_1【闲居遣怀十首】

姚合

身外无徭役，开门百事闲。倚松听候鹤，策杖望秋山。
萍任连池绿，苔从匝地斑。料无车马客，何必扫柴关。

闲卧销长日，亲朋笑我疏。诗篇随分有，人事度年无。
情性僻难改，愁怀酒为除。谁能思此计，空备满床书。

白日逍遥过，看山复绕池。展书寻古事，翻卷改新诗。
赊酒风前酌，留僧竹里棋。同人笑相问，羨我足闲时。

好景时牵目，茅斋兴有馀。远山经雨后，庭树得秋初。
道侣怜栽药，高人笑养鱼。优游随本性，甘被弃慵疏。

永日厨烟绝，何曾暂废吟。闲时随思缉，小酒恣情斟。
看月嫌松密，垂纶爱水深。世间多少事，无事可关心。

一生能几日，愁恨也无端。遇酒酩酊饮，逢花烂熳看。
青云非失路，白发未相干。以此多携解，将心但自宽。

· 全唐诗 ·

万事徒纷扰，难关枕上身。朗吟销白日，沈醉度青春。
演步怜山近，闲眠厌客频。市朝曾不到，长免满衣尘。

野性多疏惰，幽栖更称情。独行看影笑，闲坐弄琴声。
懒拜腰肢硬，慵趋礼乐生。业文随日遣，不是为求名。

生计甘寥落，高名愧自由。惯无身外事，不信世间愁。
好酒盈杯酌，闲诗任笔酬。凉风从入户，云水更宜秋。

拙直难和洽，从人笑掩关。不能行户外，宁解走尘间。
被酒长酣思，无愁可上颜。何言归去事，著处是青山。

卷 498_2【武功县中作三十首】

姚合

县去帝城远，为官与隐齐。马随山鹿放，鸡杂野禽栖。
绕舍惟藤架，侵阶是药畦。更师嵇叔夜，不拟作书题。

方拙天然性，为官是事疏。惟寻向山路，不寄入城书。
因病多收药，缘餐学钓鱼。养身成好事，此外更空虚。

微官如马足，只是在泥尘。到处贫随我，终年老趁人。
簿书销眼力，杯酒耗心神。早作归休计，深居养此身。

簿书多不会，薄俸亦难销。醉卧慵开眼，闲行懒系腰。

· 全唐诗 ·

移花兼蝶至，买石得云饶。且自心中乐，从他笑寂寥。

晓钟惊睡觉，事事便相关。小市柴薪贵，贫家砧杵闲。
读书多旋忘，赊酒数空还。长羡刘伶辈，高眠出世间。

性疏常爱卧，亲故笑悠悠。纵出多携枕，因衙始裹头。
上山方觉老，过寺暂忘愁。三考千余日，低腰不拟休。

客至皆相笑，诗书满卧床。爱闲求病假，因醉弃官方。
鬓发寒唯短，衣衫瘦渐长。自嫌多检束，不似旧来狂。

一日看除目，终年损道心。山宜冲雪上，诗好带风吟。
野客嫌知印，家人笑买琴。只应随分过，已是错弥深。

邻里皆相爱，门开数见过。秋凉送客远，夜静咏诗多。
就架题书目，寻栏记药窠。到官无别事，种得满庭莎。

穷达天应与，人间事莫论。微官长似客，远县岂胜村。
竟日多无食，连宵不闭门。斋心调笔砚，唯写五千言。

县僻仍牢落，游人到便回。路当边地去，村入郭门来。
酒户愁偏长，诗情病不开。可曾衙小吏，恐谓踏青苔。

自下青山路，三年著绿衣。官卑食肉僭，才短事人非。
野客教长醉，高僧劝早归。不知何计是，免与本心违。

月出方能起，庭前看种莎。吏来山鸟散，酒熟野人过。

· 全唐诗 ·

岐路荒城少，烟霞远岫多。同官数相引，下马上西坡。

作吏荒城里，穷愁欲不胜。病多唯识药，年老渐亲僧。
梦觉空堂月，诗成满砚冰。故人多得路，寂寞不相矜。

谁念东山客，栖栖守印床。何年得事尽，终日逐人忙。
醉卧谁知叫，闲书不著行。人间长检束，与此岂相当。

朝朝眉不展，多病怕逢迎。引水远通涧，垒山高过城。
秋灯照树色，寒雨落池声。好是吟诗夜，披衣坐到明。

簿籍谁能问，风寒趁早眠。每旬常乞假，隔月探支钱。
还往嫌诗僻，亲情怪酒颠。谋身须上计，终久是归田。

闭门风雨里，落叶与阶齐。野客嫌杯小，山翁喜枕低。
听琴知道性，寻药得诗题。谁更能骑马，闲行只杖藜。

腥膻都不食，稍稍觉神清。夜犬因风吠，邻鸡带雨鸣。
守官常卧病，学道别称名。小有洞中路，谁能引我行。

宦名浑不计，酒熟且开封。晴月销灯色，寒天挫笔锋。
惊禽时并起，闲客数相逢。旧国萧条思，青山隔几重。

假日多无事，谁知我独忙。移山入县宅，种竹上城墙。
惊蝶遗花蕊，游蜂带蜜香。唯愁明早出，端坐吏人旁。

门外青山路，因循自不归。养生宜县僻，说品喜官微。

· 全唐诗 ·

净爱山僧饭，闲披野客衣。谁怜幽谷鸟，不解入城飞。

一官无限日，愁闷欲何如。扫舍惊巢燕，寻方落壁鱼。
从僧乞净水，凭客报闲书。白发谁能镊，年来四十余。

朝朝门不闭，长似在山时。宾客抽书读，儿童斫竹骑。
久贫还易老，多病懒能医。道友应相怪，休官日已迟。

戚戚常无思，循资格上官。闲人得事晚，常骨觅仙难。
醉卧疑身病，贫居觉道宽。新诗久不写，自算少人看。

漫作容身计，今知拙有余。青衫迎驿使，白发忆山居。
道友怜蔬食，吏人嫌草书。须为长久事，归去自耕锄。

主印三年坐，山居百事休。焚香开敕库，踏月上城楼。
饮酒多成病，吟诗易长愁。殷勤问渔者，暂借手中钩。

长忆青山下，深居遂性情。垒阶溪石净，烧竹灶烟轻。
点笔图云势，弹琴学鸟声。今朝知县印，梦里百忧生。

自知狂僻性，吏事固相疏。只是看山立，无嫌出县居。
印朱沾墨砚，户籍杂经书。月俸寻常请，无妨乏斗储。

作吏无能事，为文旧致功。诗标八病外，心落百忧中。
拜别登朝客，归依炼药翁。不知还往内，谁与此心同。

· 全唐诗 ·

卷 498_3【罢武功县将入城】

姚合

乍抛衫笏觉身轻，依旧还称学道名。欲泥山僧分屋住，
羞从野老借牛耕。妻儿尽怕为逋客，亲故相邀遣到城。
无奈同官珍重意，几回临路却休行。

青衫脱下便狂歌，种蕙栽莎鬪古坡。野客相逢添酒病，
春山暂上著诗魔。亦知官罢贫还甚，且喜闲来睡得多。
欲与九衢亲故别，明朝拄杖始经过。

卷 498_4【秋日闲居二首】

姚合

九陌宅重重，何门怜此翁。荒庭唯菊茂，幽径与山通。
落叶带衣上，闲云来酒中。此心谁得见，林下鹿应同。

先忆花时节，家山听更归。爱诗看古集，忆酒典寒衣。
睡少身还健，愁多食不肥。自怜疏懒性，无事出门稀。

卷 498_5【闲居晚夏】

· 全唐诗 ·

姚合

闲居无事扰，旧病亦多痊。选字诗中老，看山屋外眠。
片霞侵落日，繁叶咽鸣蝉。对此心还乐，谁知乏酒钱。

卷 498_6【闲居】

姚合

不自识疏鄙，终年住在城。过门无马迹，满宅是蝉声。
带病吟虽苦，休官梦已清。何当学禅观，依止古先生。

卷 498_7【街西居三首】

姚合

受得山野性，住城多事违。青山在宅南，回首东西稀。
浅浅一井泉，数家同汲之。独我恶水浊，凿井庭之陲。
自凿还自饮，亦为众所非。吁嗟世间事，洁身诚难为。

日出穷巷喜，温然胜重衣。重衣岂不暖，所暖人不齐。
兀兀复行行，不离阶与墀。

丈夫非马蹄，安得知路岐。穷贱餐茹薄，兴与养性宜。
乃知长生术，豪贵难得之。

· 全唐诗 ·

卷 498_8 【闲居遣兴】

姚合

终年城里住，门户似山林。客怪身名晚，妻嫌酒病深。
写方多识药，失谱废弹琴。文字非经济，空虚用破心。

卷 498_9 【庄居即事】

姚合

休看小字大书名，向日持经眼却明。时过无心求富贵，
身闲不梦见公卿。因寻岳寺荤辛断，自到王城礼数生。
斜月照床新睡觉，西风半夜鹤来声。

卷 498_10 【亲仁里居】

姚合

三年赁舍亲仁里，寂寞何曾似在城。饮酒自缘防冷病，
寻人多是为闲行。轩车无路通门巷，亲友因诗道姓名。
自别青山归未得，羡君长听石泉声。

· 全唐诗 ·

卷 498_11【庄居野行】

姚合

客行野田间，比屋皆闭户。借问屋中人，尽去作商贾。
官家不税商，税农服作苦。居人尽东西，道路侵垄亩。
采玉上山颠，探珠入水府。边兵索衣食，此物同泥土。
古来一人耕，三人食犹饥。如今千万家，无一把锄犁。
我仓常空虚，我田生蒺藜。上天不雨粟，何由活蒸黎。

卷 498_12【春日闲居】

姚合

居止日萧条，庭前唯药苗。身闲眠自久，眼老视还遥。
檐燕酬莺语，邻花杂絮飘。客来无酒饮，搔首掷空瓢。

卷 498_13【独居】

姚合

深闭柴门长不出，功夫自课少闲时。翻音免问他人字，
覆局何劳对手棋。生计如云无定所，穷愁似影每相随。
到头归向青山是，尘路茫茫欲告谁。

· 全唐诗 ·

卷 498_14 【早春闲居】

姚合

寂寞日何为，闲居春色迟。惊风起庭雪，寒雨长檐淅。
强饮樽中酒，嘲山世外诗。此生仍且在，难与老相离。

卷 498_15 【原上新居】

姚合

秋来梨果熟，行哭小儿饥。邻富鸡长往，庄贫客渐稀。
借牛耕地晚，卖树纳钱迟。墙下当官道，依前夹竹篱。

卷 498_16 【将归山】

姚合

野人惯去山中住，自到城来闷不胜。宫树蝉声多却乐，
侯门月色少于灯。饥来唯拟重餐药，归去还应只别僧。
闻道旧溪茆屋畔，春风新上数枝藤。

卷 498_17 【山中述怀】

· 全唐诗 ·

姚合

为客久未归，寒山独掩扉。晓来山鸟散，雨过杏花稀。
天远云空积，溪深水自微。此情对春色，尽醉欲忘机。

卷 498_18【偶然书怀】

姚合

十年通籍入金门，自愧名微枉搢绅。炼得丹砂疑不食，
从兹白发日相亲。家山迢递归无路，杯酒稀疏病到身。
汉有冯唐唐有我，老为郎吏更何人。

卷 498_19【客舍有怀】

姚合

旅人无事喜，终日思悠悠。逢酒嫌杯浅，寻书怕字稠。
贫来许钱圣，梦觉见身愁。寂寞中林下，饥鹰望到秋。

卷 498_20【及第后夜中书事】

姚合

· 全唐诗 ·

夜睡常惊起，春光属野夫。新衔添一字，旧友逊前途。
喜过还疑梦，狂来不似儒。爱花持烛看，忆酒犯街沽。
天上名应定，人间盛更无。报恩丞相阁，何啻杀微躯。

卷 498_21【偶题】

姚合

年年九陌看春还，旧隐空劳梦寐间。迟日逍遥芸草长，
圣朝清净谏臣闲。偶逢游客同倾酒，自有前驹耻见山。
道侣书来相责诮，朝朝欲报作何颜。

卷 498_22【感时】

姚合

忆昔未出身，索寞无精神。逢人话天命，自贱如埃尘。
君今才出身，飒爽鞍马春。逢人话天命，自重如千钧。
信涉名利道，举动皆丧真。君今自世情，何况天下人。

卷 498_23【忆山】

姚合

· 全唐诗 ·

闲处无人到，乖疏称野情。日高搔首起，林下散衣行。
泉引窗前过，云看石罅生。别来愁欲老，虚负出山名。

卷 498_24【客游旅怀】

姚合

客行无定止，终日路岐间。马为賒来贵，僮缘借得顽。
诗书愁触雨，店舍喜逢山。旧业嵩阳下，三年未得还。

卷 498_25【迎春】

姚合

半年留醉待花开，晓去迎春夜始回。风暖慢行寻曲水，
天晴远望立高台。亦知无处将诗请，唯得终朝把酒催。
今日柳条全弄色，游人相伴看春来。

卷 498_26【游春十二首】

姚合

正月一日后，寻春更不眠。自知还近僻，众说过于颠。
看水宁依路，登山欲到天。悠悠芳思起，多是晚风前。

· 全唐诗 ·

官卑长少事，县僻又无城。未晓冲寒起，迎春忍病行。
树枝风掉软，菜甲土浮轻。好个林间鹊，今朝足喜声。

诗酒相牵引，朝朝思不穷。苔痕雪水里，春色竹烟中。
迎雨缘池草，摧花倚树风。书非名利事，爱此少人同。

尘中主印吏，谁遣有高情。趁暖檐前坐，寻芳树底行。
土融凝墅色，冰败满池声。渐觉春相泥，朝来睡不轻。

疏顽无异事，随例但添年。旧历藏深箧，新衣薄絮绵。
暖风浑酒色，晴日畅琴弦。同伴无辞困，游春贵在先。

看春长不足，岂更觉身劳。寺里花枝净，山中水色高。
嫩云轻似絮，新草细如毛。并起诗人思，还应费笔毫。

悠悠小县吏，憔悴入新年。远思遭诗恼，闲情被酒牵。
恋花林下饮，爱草野中眠。疏懒今成性，谁人肯更怜。

处处春光遍，游人亦不稀。向阳倾冷酒，看影试新衣。
嫩树行移长，幽禽语旋飞。同来皆去尽，冲夜独吟归。

朝朝看春色，春色似相怜。酒醒莺啼里，诗成蝶舞前。
摘花盈手露，折竹满庭烟。亲故多相笑，疏狂似少年。

卑官还不恶，行止得逍遥。晴野花侵路，春陂水上桥。
尘埃生暖色，药草长新苗。看却烟光散，狂风处处飘。

· 全唐诗 ·

身被春光引，经时更不归。嚼花香满口，书竹粉黏衣。
弄日莺狂语，迎风蝶倒飞。自知疏懒性，得事亦应稀。

晓脱青衫出，闲行气味长。一瓶春酒色，数顷野花香。
朝客闻应羨，山僧见亦狂。不将僮仆去，恐为损风光。

卷 498_27【赏春】

姚合

闲人只是爱春光，迎得春来喜欲狂。买酒怕迟教走马，
看花嫌远自移床。娇莺语足方离树，戏蝶飞高始过墙。
颠倒醉眠三数日，人间百事不思量。

卷 498_28【春日即事】

姚合

春来眠不得，谁复念生涯。夜听四邻乐，朝寻九陌花。
轻烟浮草色，微雨濯年华。乞假非关病，朝衣在酒家。

卷 498_29【春日江次】

姚合

· 全唐诗 ·

野步出茆斋，闲行坐石台。久悲乡路远，犹喜杏花开。
鸥鹭皆飞去，帆樯何处来。因凝千里目，落日尚徘徊。

卷 498_30【扬州春词三首】

姚合

广陵寒食天，无雾复无烟。暖日凝花柳，春风散管弦。
园林多是宅，车马少于船。莫唤游人住，游人困不眠。

满郭是春光，街衢土亦香。竹风轻履舄，花露腻衣裳。
谷鸟鸣还艳，山夫到更狂。可怜游赏地，炀帝国倾亡。

江北烟光里，淮南胜事多。市廛持烛入，邻里漾船过。
有地惟栽竹，无家不养鹅。春风荡城郭，满耳是笙歌。

卷 498_31【寒食二首】

姚合

今朝一百五，出户雨初晴。舞爱双飞蝶，歌闻百啭莺。
江深青草岸，花满白云城。为政多孱懦，应无酷吏名。

出城烟火少，况复是今朝。闲坐将谁语，临觞只自谣。
阶前春藓遍，衣上落花飘。伎乐州人戏，使君心寂寥。

· 全唐诗 ·

卷 498_32【暮春书事】

姚合

穷巷少芳菲，苍苔一径微。酒醒闻客别，年长送春归。
宿愿眠云峤，浮名系锁闥。未因丞相庇，难得脱朝衣。

卷 498_33【春晚雨中】

姚合

寂寂春将老，闲人强自欢。迎风莺语涩，带雨蝶飞难。
傍砌木初长，眠花景渐阑。临轩平目望，情思若为宽。

卷 498_34【送春】

姚合

昨迎今复送，来晚去逡巡。芳尽空繁树，愁多独病身。
静思倾酒懒，闲望上楼频。为向春风道，明年早报春。

卷 498_35【别春】

· 全唐诗 ·

姚合

留春不得被春欺，春若无情遣泥谁。寂寞自疑生冷病，
凄凉还似别亲知。随风未辨归何处，浇酒唯求住少时。
一去近当三百日，从朝至夜是相思。

卷 498_36【夏夜】

姚合

闲斋深夜静，独坐又闲行。密树月笼影，疏篱水隔声。
断猿时叫谷，栖鸟每摇桠。寂寞求名士，谁知此夕情。

卷 498_37【秋日有怀】

姚合

秋来不复眠，但觉思悠然。菊色欲经露，虫声渐替蝉。
诗情生酒里，心事在山边。旧里无因到，西风又一年。

卷 498_38【秋夕遣怀】

姚合

· 全唐诗 ·

昨宵白露下，秋气满山城。风劲衣巾脆，窗虚笔墨轻。
临书爱真迹，避酒怕狂名。只拟随麋鹿，悠悠过一生。

卷 498_39 【秋中夜坐】

姚合

疏散永无事，不眠常夜分。月中松露滴，风引鹤同闻。

卷 498_40 【同卫尉崔少卿九月六日饮】

姚合

酒熟菊还芳，花飘盏亦香。与君先一醉，举世待重阳。
风色初晴利，虫声向晚长。此时如不饮，心事亦应伤。

卷 498_41 【九日忆砚山旧居】

姚合

帝里闲人少，谁同把酒杯。砚山篱下菊，今日几枝开。
晓角惊眠起，秋风引病来。长年归思切，更值雁声催。

· 全唐诗 ·

卷 498_42 【秋晚江次】

姚合

萧萧晚景寒，独立望江壖。沙渚几行雁，风湾一只船。
落霞澄返照，孤屿隔微烟。极目思无尽，乡心到眼前。

卷 498_43 【除夜二首】

姚合

衰残归未遂，寂寞此宵情。旧国当千里，新年隔数更。
寒犹近北峭，风渐向东生。谁见长安陌，晨钟度火城。

殷勤惜此夜，此夜在逡巡。烛尽年还别，鸡鸣老更新。
雉声方去疫，酒色已迎春。明日持杯处，谁为最后人。

卷 498_44 【晦日送穷三首】

姚合

年年到此日，沥酒拜街中。万户千门看，无人不送穷。
送穷穷不去，相泥欲何为。今日官家宅，淹留又几时。

· 全唐诗 ·

古人皆恨别，此别恨消魂。只是空相送，年年不出门。

卷 498_45【咏云】

姚合

霭霭纷纷不可穷，
戛笙歌处尽随龙。
来依银汉一千里，
归傍巫山十二峰。
呈瑞每闻开丽色，
避风仍见挂乔松。
怜君翠染双蝉鬓，
镜里朝朝近玉容。

卷 498_46【咏雪】

姚合

愁云残腊下阳台，
混却乾坤六出开。
与月交光呈瑞色，
共花争艳傍寒梅。
飞随郢客歌声远，
散逐宫娥舞袖回。
其那知音不相见，
剡溪乘兴为君来。

卷 498_47【郡中对雪】

姚合

霏微著草树，
渐布与阶平。
远近如空色，
飘飏无落声。
飞鸦疑翅重，
去马觉蹄轻。
遥想故山下，
樵夫应滞行。

· 全唐诗 ·

卷 498_48 【对月】

姚合

银轮玉兔向东流，莹净三更正好游。
一片黑云何处起，皂罗笼却水精球。

卷 498_49 【八月十五夜看月】

姚合

亭亭千万里，三五复秋中。此夕光应绝，常时思不同。
九霄微有露，四海静无风。惆怅逡巡别，谁能看碧空。

卷 498_50 【赋月华临静夜】

姚合

长空埃壒灭，皎皎月华临。色正秋将半，光鲜夜自深。
九霄晴更彻，四野气难侵。静照遥山出，孤明列宿沉。
高人应不寐，惊鹊复何心。漏尽东方晓，佳期何处寻。

卷 498_51 【酬任畴协律夏中苦雨见寄】

· 全唐诗 ·

姚合

银汉波澜溢，经旬雨未休。细听宜隔牖，远望忆高楼。
风急飘还断，云低落更稠。走童惊掣电，饥鸟啄浮沬。
丝网张空际，蛛绳续瓦沟。青蛙多入户，潢潦欲胜舟。
雷怒疑山破，池浑似土流。灰人漫襦厌，水马恣沈浮。
广陌应翻浪，贫居恐作湫。阳精藏不耀，阴气盛难收。
远色重林暮，繁声四壁秋。望晴思见日，防冷欲披裘。
枕润眠还懒，车羸出转忧。散空烟漠漠，迸溜竹修修。
树暗蝉吟咽，巢倾燕语愁。琴书凉簟净，灯烛夜窗幽。
天下那能向，龙边岂易求。湿烟凝灶额，荒草覆墙头。
酒思凄方罢，诗情耿始抽。下床先仗屐，汲井恐飘瓠。
危坐徒相忆，佳期未有由。劳君寄新什，终日不能酬。

卷 498_52【和座主相公雨中作】

姚合

清气润华屋，东风吹雨匀。花低惊艳重，竹净觉声真。
山际凝如雾，云中散似尘。萧萧下碧落，点点救生民。
缓洒雷霆细，微沾瓦砾新。诗成难继和，造化笔通神。

卷 498_53【恶神行雨】

姚合

· 全唐诗 ·

凶神扇欺恶神行，汹涌挨排白雾生。风击水凹波扑凸，
雨滌山口地嵌坑。龙喷黑气翻腾滚，鬼掣红光劈划攄。
哮吼忽雷声揭石，满天啾唧闹轰轰。

卷 498_54【苦雨】

姚合

江昏山半晴，南阻绝人行。葭菼连云色，松杉共雨声。
早秋仍燕舞，深夜更鼃鸣。为报迷津客，讹言未可轻。

· 全唐诗 ·

第四百九十九卷

卷 499_1 【题凤翔西郭新亭】

姚合

西郭尘埃外，新亭制度奇。地形当要处，人力是闲时。
结构方殊绝，高低更合宜。栋梁清俸买，松竹远山移。
佛寺幽难敌，仙家景可追。良工慚巧尽，上客恨逢迟。
两面寒波涨，当前软柳垂。清虚宜月入，凉冷胜风吹。
宴赏军容静，登临妓乐随。鱼龙听弦管，鳧鹤识旌旗。
泛鹢春流阔，飞觞白日欹。闲花长在户，嫩蘚乍缘墀。
永望情无极，频来困不辞。云峰晴转翠，烟树晓逾滋。
向野惟贪静，临空遽觉危。行人如不到，游乐更何为。

卷 499_2 【题金州西园九首·江榭】

姚合

亭亭白云榭，下有清江流。见江不得亲，不如波上鸥。
有榭江可见，无榭无双眸。

· 全唐诗 ·

卷 499_3【题金州西园九首·药堂】

姚合

僮仆不到闼，双扉常自关。四壁画远水，堂前耸秋山。
时闻有仙鼠，窃药檐隙间。

卷 499_4【题金州西园九首·草阁】

姚合

编草覆柏椽，轩扉皆竹织。阁成似僧居，学僧居未得。
有时公府劳，还复来此息。

卷 499_5【题金州西园九首·松坛】

姚合

盘盘松上盖，下覆青石坛。月中零露垂，日出露尚溥。
山翁称绝境，海桥无所观。

卷 499_6【题金州西园九首·菱径】

· 全唐诗 ·

姚合

药院径亦高，往来踏菱影。方当繁暑日，草屨微微冷。
爱此不能行，折薪坐煎茗。

卷 499_7【题金州西园九首·垣竹】

姚合

种竹爱庭际，亦以资玩赏。穷秋雨萧条，但见墙垣长。
宣尼高数仞，固应非土壤。

卷 499_8【题金州西园九首·石庭】

姚合

布石满山庭，磷磷洁还清。幽人常履此，月下屐齿鸣。
药草枝叶动，似向山中生。

卷 499_9【题金州西园九首·莓苔】

姚合

茅堂阶岂高，数寸是苔藓。只恐秋雨中，窗户亦不溅。

· 全唐诗 ·

眼前无此物，我情何由遣。

卷 499_10【题金州西园九首·芭蕉屏】

姚合

芭蕉丛丛生，月照参差影。数叶大如墙，作我们之屏。
稍稍闻见稀，耳目得安静。

卷 499_11【杏溪十首·杏溪】

姚合

桃花四散飞，桃子压枝垂。寂寂青阴里，幽人举步迟。
殷勤念此径，我去复来谁。

卷 499_12【杏溪十首·莲塘】

姚合

方塘菡萏高，繁艳相照耀。幽人夜眠起，忽疑野中烧。
晓寻不知休，白石岸亦峭。

· 全唐诗 ·

卷 499_13【杏溪十首·架水藤】

姚合

濛濛紫花藤，下复清溪水。若遣随波流，不如风飘起。
风飘或近堤，随波千万里。

卷 499_14【杏溪十首·石潭】

姚合

晓向潭上行，夕就潭边宿。清冷无波澜，潏潏鱼相逐。
钓翁坐不起，见我往来熟。

卷 499_15【杏溪十首·溪路】

姚合

此路何潇洒，永无公卿迹。日日多往来，藜杖与桑屐。
路边何所有，磊磊青渌石。

卷 499_16【杏溪十首·望江峰】

· 全唐诗 ·

姚合

念昔有此峰，在彼江陵先。举世未能知，愚亦望同贤。
我来心益闷，欲上天公笺。

卷 499_17【杏溪十首·杏水】

姚合

不与江水接，自出林中央。穿花复远水，一山闻杏香。
我来持茗瓯，日屡此来尝。

卷 499_18【杏溪十首·渚上竹】

姚合

叶叶新春筠，下复清浅流。微风屡此来，泠泠复修修。
诗人月下吟，月堕吟不休。

卷 499_19【杏溪十首·枫林堰】

姚合

森森枫树林，护此石门堰。杏堤数里馀，枫影覆亦遍。

· 全唐诗 ·

鸬鹚与钓童，质异同所愿。

卷 499_20 【杏溪十首·石濑】

姚合

散漫复潺湲，半砂半和石。清风波亦无，历历鱼可搦。
我来亦屡久，归路常日夕。

卷 499_21 【陕下厉玄侍御宅五题·濯缨溪】

姚合

旧山宁要去，此有濯缨泉。晓景松枝覆，秋光月色连。
行寻履齿尽，坐对角巾偏。寂寂幽栖处，无妨请俸钱。

卷 499_22 【陕下厉玄侍御宅五题·垂钓亭】

姚合

由钓起茅亭，柴扉复竹楹。波清见丝影，坐久识鱼情。
白鸟依窗宿，青蒲傍砌生。欲同渔父舍，须自减逢迎。

· 全唐诗 ·

卷 499_23 【陕下厉玄侍御宅五题·吟诗岛】

姚合

幽岛藓层层，诗人日日登。坐危石是榻，吟冷唾成冰。
静对唯秋水，同来但老僧。竹枝题字处，小篆复谁能。

卷 499_24 【陕下厉玄侍御宅五题·竹里径】

姚合

微径婵娟里，唯闻静者知。迹深苔长处，步狭笋生时。
高是连幽树，穷应到曲池。纱巾灵寿杖，行乐复相宜。

卷 499_25 【陕下厉玄侍御宅五题·泛觴泉】

姚合

不上酒家楼，池边日献酬。杯来转巴字，客坐绕方流。
酹滴苔纹断，泉连石岸秋。若能山下置，岁晚愿同游。

卷 499_26 【题僧院引泉】

· 全唐诗 ·

姚合

泉眼高千尺，山僧取得归。架空横竹引，凿石透渠飞。
洗药溪流浊，浇花雨力微。朝昏长绕看，护惜似持衣。

卷 499_27【题家园新池】

姚合

数日自穿池，引泉来近陂。寻渠通咽处，绕岸待清时。
深好求鱼养，闲堪与鹤期。幽声听难尽，入夜睡常迟。

卷 499_28【咏盆池】

姚合

浮萍重叠水团圆，客绕千遭屐齿痕。
莫惊池里寻常满，一井清泉是上源。

卷 499_29【买太湖石】

姚合

我尝游太湖，爱石青嵯峨。波澜取不得，自后长咨嗟。

· 全唐诗 ·

奇哉卖石翁，不傍豪贵家。负石听苦吟，虽贫亦来过。
贵我辨识精，取价复不多。比之昔所见，珍怪颇更加。
背面涂注痕，孔隙若琢磨。水称至柔物，湖乃生壮波。
或云此天生，嵌空亦非他。气质偶不合，如地生江河。
置之书房前，晓雾常纷罗。碧光入四邻，墙壁难蔽遮。
客来谓我宅，忽若岩之阿。

卷 499_30 【天竺寺殿前立石】

姚合

补天残片女娲抛，扑落禅门压地坳。霹雳划深龙旧攫，
屈槃痕浅虎新抓。苔黏月眼风挑剔，尘结云头雨磕敲。
秋至莫言长屹立，春来自有薜萝交。

卷 499_31 【杭州观潮】

姚合

楼有章亭号，涛来自古今。势连沧海阔，色比白云深。
怒雪驱寒气，狂雷散大音。浪高风更起，波急石难沈。
鸟惧多遥过，龙惊不敢吟。坳如开玉穴，危似走琼岑。
但褫千人魄，那知伍相心。岸摧连古道，洲涨踣丛林。
跳沫山皆湿，当江日半阴。天然与禹凿，此理遣谁寻。

· 全唐诗 ·

卷 499_32【题李频新居】

姚合

赁居求贱处，深僻任人嫌。盖地花如绣，当门竹胜帘。
劝僧尝药酒，教仆辨书签。庭际山宜小，休令著石添。

卷 499_33【寄题纵上人院】

姚合

营营是与非，前乐后还悲。今世已如此，他生愿似师。
禅房空旦暮，画壁半陈隋。绕径苍苔迹，幽人来是谁。

卷 499_34【题山寺】

姚合

千重山崦里，楼阁影参差。未暇寻僧院，先看置寺碑。
竹深行渐暗，石稳坐多时。古塔虫蛇善，阴廊鸟雀痴。
云开上界近，泉落下方迟。为爱青桐叶，因题满树诗。

卷 499_35【题贞女祠】

· 全唐诗 ·

姚合

此女骨为土，贞名不可移。精灵閼何处，蘋藻奠空祠。
水石生异状，杉松无病枝。我来方谢雨，延滞失归期。

卷 499_36 【题刑部马员外修行里南街新居】

姚合

帝里谁无宅，青山只属君。闲窗连竹色，幽砌上苔文。
远近高低树，东西南北云。朝朝常独见，免被四邻分。

卷 499_37 【题郭侍郎亲仁里幽居】

姚合

入门尘外思，苔径药苗间。洞里应生玉，庭前自有山。
帝城唯此静，朝客更谁闲。野鹤松中语，时时去复还。

卷 499_38 【题宣义池亭】

姚合

春入池亭好，风光暖更鲜。寻芳行不困，逐胜坐还迁。

· 全唐诗 ·

细草乱如发，幽禽鸣似弦。苔文翻古篆，石色学秋天。
花落能漂酒，萍开解避船。暂来还愈疾，久住合成仙。
进笋支阶起，垂藤压树偏。此生应借看，自计买无钱。

卷 499_39【题薛十二池亭】

姚合

每日树边消一日，绕池行过又须行。异花多是非时有，
好竹皆当要处生。斜立小桥看岛势，远移幽石作泉声。
浮萍著岸风吹歇，水面无尘晚更清。

卷 499_40【题大理崔少卿驸马林亭】

姚合

每来归意懒，都尉似山人。台榭栖双鹭，松篁隔四邻。
进泉清胜雨，深洞暖如春。更看题诗处，前轩粉壁新。

卷 499_41【题杭州南亭】

姚合

旧隐即云林，思归日日深。如今来此地，无复有前心。

· 全唐诗 ·

古石生灵草，长松栖异禽。暮潮檐下过，溅浪湿衣襟。

卷 499_42【题郑驸马林亭】

姚合

东园连宅起，胜事与心期。幽洞自生药，新篁进入池。
密林行不尽，芳草坐难移。石翠疑无质，莺歌似有词。
莎台高出树，藓壁净题诗。我独多来赏，九衢人不知。

卷 499_43【题厉玄侍御所居】

姚合

幽栖一亩宫，清峭似山峰。邻里不通径，俸钱唯买松。
野人时寄宿，谷鸟自相逢。朝路床前是，谁知晓起慵。

卷 499_44【题田将军宅】

姚合

焚香书院最风流，莎草缘墙绿藓秋。近砌别穿浇药井，
临街新起看山楼。栖禽恋竹明犹在，闲客观花夜未休。
好是暗移城里宅，清凉浑得似江头。

· 全唐诗 ·

卷 499_45 【题崔驸马宅】

姚合

心在林泉身在城，凤凰楼下得闲名。洞中见凿寻仙路，
月里犹烧煮药铛。数树异花皆敕赐，并竿修竹自天生。
诗人多说离君宅，不得青苔地上行。

卷 499_46 【题河上亭】

姚合

亭亭河上亭，鱼蹙水禽鸣。九曲何时尽，千峰今日清。
晨光秋更远，暑气夏常轻。杯里移檣影，琴中有浪声。
岸莎连砌静，渔火入窗明。来此多沈醉，神高无宿醒。

卷 499_47 【题长安薛员外水阁】

姚合

亭亭新阁成，风景益鲜明。石尽太湖色，水多湘渚声。
翠筠和粉长，零露逐荷倾。时倚高窗望，幽寻小径行。
林疏看鸟语，池近识鱼情。政暇招闲客，唯将酒送迎。

· 全唐诗 ·

卷 499_48【题梁国公主池亭】

姚合

平阳池馆枕秦川，门锁南山一带烟。素奈花开西子面，
绿榆枝种沈郎钱。装帘玳瑁随风落，庭岸鸂鶒趁暖眠。
寂寞空余歌舞地，玉箫惊起凤归天。

卷 499_49【寄题尉迟少卿郊居】

姚合

卿仕在关东，林居思不穷。朝衣挂壁上，厩马放田中。
隅坐唯禅子，随行只药童。砌莎留宿露，庭竹出清风。
浓翠生苔点，辛香发桂丛。莲池伊水入，石径远山通。
愚者心还静，高人迹自同。无能相近住，终日羨邻翁。

卷 499_50【题永城驿】

姚合

秋赋春还计尽违，自知身是拙求知。惟思旷海无休日，
却喜孤舟似去时。连浦一程兼汴宋，夹堤千柳杂唐隋。
从来此恨皆前达，敢负吾君作楚词。

· 全唐诗 ·

第五百卷

卷 500_1【过张邯郸庄】

姚合

客行长似病，烦热束四肢。到君读书堂，忽若逢良医。
堂前水交流，堂下树交枝。两门延风凉，洗我昏浊肌。
与子还往熟，坐卧恣所宜。时时相献酬，文字当酒卮。
野饭具藜藿，永日亦不饥。苟餐非其所，鲑炙为疾藜。
时清士人闲，耕作唯文词。岂独乡里荐，当取四海知。

卷 500_2【过杨处士幽居】

姚合

引水穿风竹，幽声胜远溪。裁衣延野客，翦翅养山鸡。
酒熟听琴酌，诗成削树题。惟愁春气暖，松下雪和泥。

卷 500_3【过李处士山居】

· 全唐诗 ·

姚合

闲居昼掩扉，门柳荫蔬畦。因病方收药，寻僧始度溪。
少逢人到户，时有燕衔泥。萧洒身无事，名高孰与齐。

卷 500_4【过无可僧院】

姚合

忆师眠复起，永夜思迢迢。月下门方掩，林中寺更遥。
钟声空下界，池色在清宵。终拟修禅观，窗间卷欲烧。

卷 500_5【过稠上人院】

姚合

清羸一饭师，闲院亦披衣。应诏常翻译，修心出是非。
雪中疏磬度，林际晚风归。蔬食常来此，人间护净稀。

卷 500_6【过不疑上人院】

姚合

九经通大义，内典自应精。帘冷连松影，苔深减履声。

· 全唐诗 ·

相逢幸此日，相失恐来生。觉路何门去，师须引我行。

卷 500_7【过昙花宝上人院】

姚合

九陌最幽寺，吾师院复深。烟霜同覆屋，松竹杂成林。
鸟语境弥寂，客来机自沈。早知能到此，应不戴朝簪。

卷 500_8【过杜氏江亭】

姚合

上国千余里，逢春且胜游。暂闻新鸟戏，似解旅人愁。
野色吞山尽，江烟衬水流。村醪须一醉，无恨滞行舟。

卷 500_9【过张云峰院宿】

姚合

不吃胡麻饭，杯中自得仙。隔篱招好客，扫室置芳筵。
家酝香醪嫩，时新异果鲜。夜深唯畏晓，坐稳岂思眠。
棋罢嫌无敌，诗成贵在前。明朝题壁上，谁得众人传。

· 全唐诗 ·

卷 500_10【过钦上人院】

姚合

有相无相身，唯师说始真。修篁半庭影，清磬几僧邻。
古壁丹青落，虚檐鸟雀驯。伊余求了义，羸马往来频。

卷 500_11【过无可上人院】

姚合

寥寥听不尽，孤磬与疏钟。烦恼师长别，清凉我暂逢。
蚁行经古藓，鹤毳落深松。自想归时路，尘埃复几重。

卷 500_12【过城南僧院】

姚合

寺对远山起，幽居仍是师。斜阳通暗隙，残雪落疏篱。
松静鹤栖定，廊虚钟尽迟。朝朝趋府吏，来此是相宜。

卷 500_13【过灵泉寺】

· 全唐诗 ·

姚合

偶寻灵迹去，幽径入氤氛。转壑惊飞鸟，穿山踏乱云。
水从岩下落，溪向寺前分。释子游何处，空堂日渐曛。

卷 500_14【过天津桥晴望】

姚合

闲立津桥上，寒光动远林。皇宫对嵩顶，清洛贯城心。
雪路初晴出，人家向晚深。自从王在镐，天宝至如今。

卷 500_15【春日游慈恩寺】

姚合

年长归何处，青山未有家。赏春无酒饮，多看寺中花。

卷 500_16【游天台上方】

姚合

晓上上方高处立，路人羡我此时身。
白云向我头上过，我更羡他云路人。

· 全唐诗 ·

卷 500_17【游终南山】

姚合

策杖度溪桥，云深步数劳。青猿吟岭际，白鹤坐松梢。
天外浮烟远，山根野水交。自缘名利系，好此结蓬茆。

卷 500_18【游杏溪兰若】

姚合

踏得度溪湾，晨游暮不还。月明松影路，春满杏花山。
戏狖跳林末，高僧住石间。未肯离腰组，来此复何颜。

卷 500_19【游谢公亭】

姚合

行行方避梦，又到谢亭来。举世皆如此，伊余何处回。
竹鲜多透石，泉洁亦无苔。坐与僧同语，谁能顾酒杯。

卷 500_20【游阳河岸】

· 全唐诗 ·

姚合

终日游山困，今朝始傍河。寻芳愁路尽，逢景畏人多。
鸟语催沽酒，鱼来似听歌。醉时眠石上，肢体自婆娑。

卷 500_21【游河桥晓望】

姚合

闲上津桥立，天涯一望间。秋风波上岸，旭日气连山。
偶圣今方变，朝宗岂复还。昆仑在蕃界，作将亦何颜。

卷 500_22【秋夜月中登天坛】

姚合

秋蟾流异彩，斋洁上坛行。天近星辰大，山深世界清。
仙飙石上起，海日夜中明。何计长来此，闲眠过一生。

卷 500_23【游昊天玄都观】

姚合

性同相见易，紫府共闲行。阴径红桃落，秋坛白石生。

· 全唐诗 ·

薛文连竹色，鹤语应松声。风定药香细，树声泉气清。
垂檐灵草影，绕壁古山名。围外坊无禁，归时踏月明。

卷 500_24【同裴起居厉侍御放朝游曲江】

姚合

暑月放朝频，青槐路绝尘。雨晴江色出，风动草香新。
独立分幽岛，同行得静人。此欢宜稍滞，此去与谁亲。

卷 500_25【晓望华清宫】

姚合

晓看楼殿更鲜明，遥隔朱栏见鹿行。
武帝自知身不死，教修玉殿号长生。

卷 500_26【夏日登楼晚望】

姚合

避暑高楼上，平芜望不穷。鸟穷山色去，人歇树阴中。
数带长河水，千条弱柳风。暗思多少事，懒话与芝翁。

· 全唐诗 ·

卷 500_27【霁后登楼】

姚合

高楼初霁后，远望思无穷。雨洗青山净，春蒸大野融。
碧池舒暖景，弱柳殢和风。为有登临兴，独吟落照中。

卷 500_28【早夏郡楼宴集】

姚合

官散有闲情，登楼步稍轻。窗云带雨气，林鸟杂人声。
晓日襟前度，微风酒上生。城中会难得，扫壁各书名。

卷 500_29【夜宴太仆田卿宅】

姚合

故人九寺长，邀我此同欢。永夜开筵静，中年饮酒难。
微风侵烛影，叠漏过林端。腊后分朝日，天明几刻残。

卷 500_30【春日同会卫尉崔少卿宅】

· 全唐诗 ·

姚合

诗家会诗客，池阁晓初晴。鸟尽山中语，琴多谱外声。
映花相劝酒，入洞各题名。疏野常如此，谁人信在城。

卷 500_31【军城夜会】

姚合

军城夜禁乐，饮酒每题诗。坐稳吟难尽，寒多醉较迟。
远钟惊漏压，微月被灯欺。此会诚堪惜，天明是别离。

卷 500_32【晦日宴刘值录事宅】

姚合

花落莺飞深院静，满堂宾客尽诗人。
城中杯酒家家有，唯是君家酒送春。

卷 500_33【宴光禄田卿宅】

姚合

竹里开花馆，珍羞次第尝。春风酒影动，晴日乐声长。

· 全唐诗 ·

久坐难辞醉，衰年亦暂狂。殷勤还继烛，永夕梦相妨。

卷 500_34【会将作崔监东园】

姚合

墙北走红尘，墙东接白云。山光衣上见，药气酒中闻。
此会诚堪惜，穷秋日又曛。人间唯有醉，醉后复何云。

卷 500_35【同诸公会太府韩卿宅】

姚合

九寺名卿才思雄，邀欢笔下与杯中。六街鼓绝尘埃息，
四座筵开语笑同。焰焰兰缸明狭室，丁丁玉漏发深宫。
即听鸡唱天门晓，吏事相牵西复东。

卷 500_36【乞酒】

姚合

闻君有美酒，与我正相宜。溢瓮清如水，黏杯半似脂。
岂唯消旧病，且要引新诗。况此便便腹，无非是满卮。

· 全唐诗 ·

卷 500_37【寄卫拾遗乞酒】

姚合

老人罢卮酒，不醉已经年。自饮君家酒，一杯三日眠。
味轻花上露，色似洞中泉。莫厌时时寄，须知法未传。

卷 500_38【乞新茶】

姚合

嫩绿微黄碧涧春，采时闻道断荤辛。
不将钱买将诗乞，借问山翁有几人。

卷 500_39【西掖寓直春晓闻残漏】

姚合

直庐仙掖近，春气曙犹寒。隐隐银河在，丁丁玉漏残。
微风飘更切，万籁杂应难。凤阁明初启，鸡人唱渐阑。
静宜来禁里，清是下云端。我识朝天路，从容自整冠。

卷 500_40【杭州郡斋南亭】

· 全唐诗 ·

姚合

符印悬腰下，东山不得归。独行南北近，渐老往还稀。
迸笋侵窗长，惊蝉出树飞。田田池上叶，长是使君衣。

卷 500_41【郡中西园】

姚合

西园春欲尽，芳草径难分。静语唯幽鸟，闲眠独使君。
密林生雨气，古石带潮文。虽去清秋远，朝朝见白云。

卷 500_42【杭州官舍偶书】

姚合

钱塘刺史谩题诗，贫病无恩懦少威。春尽酒杯花影在，
潮回画槛水声微，闲吟山际邀僧上，暮入林中看鹤归。
无术理人人自理，朝朝渐觉簿书稀。

卷 500_43【省直书事】

姚合

· 全唐诗 ·

默默沧江老，官分右掖荣。立朝班近殿，奏直上知名。
晓雾和香气，晴楼下乐声。蜀笺金屑腻，月兔笔毫精。
禁树霏烟覆，宫墙瑞草生。露盘秋更出，玉漏昼还清。
碧藓无尘染，寒蝉似鸟鸣。竹深云自宿，天近日先明。
孱懦难封诏，疏愚但掷觥。素餐终日足，宁免众人轻。

卷 500_44【杭州官舍即事】

姚合

临江府署清，闲卧复闲行。苔藓疏尘色，梧桐出雨声。
渐除身外事，暗作道家名。更喜仙山近，庭前药自生。

卷 500_45【假日书事呈院中司徒】

姚合

十日公府静，巾栉起清晨。寒蝉近衰柳，古木似高人。
学佛宁忧老，为儒自喜贫。海山归未得，芝朮梦中春。

卷 500_46【书县丞旧厅】

姚合

· 全唐诗 ·

宫殿半山上，人家向下居。古厅眠易魇，老吏语多虚。
雨水浇荒竹，溪沙拥废渠。圣朝收外府，皆是九天除。

卷 500_47【县中秋宿】

姚合

鼓绝门方掩，萧条作吏心。露垂庭际草，萤照竹间禽。
棋罢嫌无月，眠迟听尽砧。还知未离此，时复更相寻。

卷 500_48【夏夜宿江驿】

姚合

竹屋临江岸，清宵兴自长。夜深倾北斗，叶落映横塘。
渚闹渔歌响，风和角粽香。却愁南去棹，早晚到潇湘。

卷 500_49【陕城即事】

姚合

左右分京阙，黄河与宅连。何功来此地，窃位已经年。
天下才弥小，关中镇最先。陇山望可见，惆怅是穷边。